

ହସ୍ୟସିଦ୍ଧା

ଶ୍ରୀଯଶିନୀଳ ବନ୍ଦ୍ୟୋପାଧ୍ୟାୟ

ଶୁକ୍ରଦାସ ଚତୁଃପାଧ୍ୟାୟ ଏଣ୍ଡ ସମ୍ପ.

୨୦୩/୧/୧, କର୍ମଓୟାଲିମ୍ ସ୍ଟ୍ରିଟ୍, କଲିକାତା

প্রকাশক—

শ্রীগোবিন্দপদ ভট্টাচার্য্য
২০৩।১।১ কর্ণওয়ালিস ষ্ট্রীট,
কলিকাতা।

তিন টাকা
তৃতীয় মুদ্রণ

All rights reserved to Messrs. G. D. Chatterjea & Sons.

৪নং সিমলা ষ্ট্রীট, কলিকাতা শৈলেন প্রেস হইতে শ্রীগোবিন্দপদ ভট্টাচার্য্য
কর্তৃক মুদ্রিত।

সমর্পণ

ষোড়শ বৎসর পূর্বে বারাণসী ধামে

লেখকের কর্মশালায় পদার্পণ করিয়া

বঙ্গের যে স্বয়ংসিদ্ধ মহামনীষী

স্বয়ংসিদ্ধার নায়িকা চণ্ডীর

প্রাথমিক চরিত্র-চিত্রণ-প্রসঙ্গে

মুক্তকণ্ঠে প্রশংসা করিয়াছিলেন

ষোড়শ বৎসর পরে সেই চিত্রটি

গ্রন্থাকারে রূপপরিগ্রহ করিয়া

বান্দালার সেট চিরস্মরণীয় পুরুষসিংহ

স্মার আশুতোষ মুখোপাধ্যায় মহাশয়ের

অবিনশ্বর স্মৃতির উদ্দেশে

লেখক কর্তৃক

গভীর শ্রদ্ধাসহকারে সমর্পিত হইল ।

পরিচয়

এই উপন্যাসখানির কিঞ্চিৎ অংশ ১৩২৭ সালে বারাণসী হইতে প্রকাশিত “প্রবাস-জ্যোতি” নামক পত্রিকায় ‘চণ্ডী’ নামে বাহির হয়। তৎকালে ইহা সাহিত্য-রসিক-সমাজে বিশেষ ভাবে প্রশংসিত হইলেও, অধিকদূর অগ্রসর হইবার অবসর পায় নাই। তাহার পর, ১৩৪১ সালের ভয়াবহ বোরিবোরির প্রকোপে কাশীর কর্মক্ষেত্র পরিত্যাগ করিয়া কলিকাতায় ফিরিয়া পুনরায় বঙ্গ সাহিত্য সাধনার ব্রতী হই, সেই সময় আমার পরমাখ্যায়, ইণ্ডিয়ান আর্ট স্কুলের সুদক্ষ শিল্পী শ্রীযুক্ত নারায়ণচন্দ্র চট্টোপাধ্যায় প্রবাস-জ্যোতির জীর্ণপ্রায় কবেকখানি পাতা আমাকে উপহার দিয়া এই উপাখ্যানটি শেষ করিতে অনুরোধ জানান। উক্ত পাতাগুলিতে চণ্ডীর গোটা দুই অধ্যায় ছাপা হইয়াছিল। চণ্ডী-চরিত্র যখন চিত্রিত হয়, শিল্পীর তখন লেখকের স-শবে কাশীর কর্মক্ষেত্রেই ছিলেন এবং নানা-মুত্রে এই চিত্রটির প্রতি ছিল তাঁহার অতিশয় শ্রদ্ধা। ইহার সমাপ্তি সম্বন্ধে এই জন্মই তাঁহার এতটা আগ্রহ দেখা দিয়াছিল।

আমার এই শ্রদ্ধাজন আখ্যায় শিল্পীর সমস্ত রক্ষিত পাতা কয়খানিই অবলম্বন করিয়া পূর্ব রচনার আমূল পরিবর্তন ও নূতন পরিবর্তনায় ইহা পুনরায় বচনা করবার অবকাশ পাই। রচনার সঙ্গে সঙ্গেই ১৩৪২ সালের ফাল্গুন মাস হইতে ইহা “মানিক বসুমতী” পত্রিকায় “স্বয়ংসিদ্ধা” নামে ধারাবাহিকরূপে প্রকাশিত হইতে থাকে। তৎপরে গুরুদাস চট্টোপাধ্যায় এও নামের কর্তৃপক্ষের আগ্রহে গ্রন্থকারে প্রকাশিত হয়। আমার সাহিত্য-জীবনের দ্বিতীয় অধ্যায়ের হুইই প্রথম উপন্যাস। পাঠক-সমাজে ইহার আদর ও প্রশংসাই লেখকের পক্ষে অপরিমিত আনন্দের কথা।

শ্রীমণিলাল বন্দ্যোপাধ্যায়

দ্বিতীয় সংস্করণ সম্পর্কে

যে উপন্যাসখানিকে অবলম্বন করিয়া আমার সাহিত্য-জীবনের দ্বিতীয় অধ্যায় আরম্ভ হয়, তাহার দ্বিতীয় সংস্করণের প্রকাশ আমার পক্ষে যেমন সুখকর, যাহার ইহার প্রত্যাশায় বহুদিন যাবৎ আগ্রহাঙ্কিত ছিলেন, কাগজ-সম্পর্কে বর্তমানের সংকটাপন্ন অবস্থার মধ্যেই তাহার পুনরাবির্ভাব তাঁহাদের পক্ষেও তদ্রূপ আনন্দদায়ক নন্দেহ নাই।

শ্রীমণিলাল বন্দ্যোপাধ্যায়

অগ্রহায়ণ, ১৩৫০

শ্রীমণিলাল বন্দ্যোপাধ্যায়

স্বয়ংসিদ্ধা

প্রথম পর্ব

এক

বাণলীর জ্বরদত্ত জমিদার হরিনারায়ণ গাঙ্গুলী কবিরাজ করণী চাটুয্যের দজ্জাল মেয়ে চণ্ডীকে দেখিতে আসিতেছেন,—এ কথা রাষ্ট্র হইতেই সারা শ্রামাপুর গ্রামধানির ভিতরে একটা রীতিমত সাড়া পড়িয়া গেল। এই ব্যাপারে গ্রামব্যাপী বিপুল চাঞ্চল্যের মূলে হেতুরও অভাব ছিল না। সেগুলির আলোচনা করিলে বিষয়বিলুপ্ত প্রতিবাসীদের মনোবৃত্তির উপর যে দোষারোপ করা চলে না, নিম্নের ঘটনাস্থলি হইতে তাহা উপলব্ধি করিতে পারা যায়।

শ্রামাপুর নামে সহৃদ গ্রামধানি যে পরগণার অন্তর্গত, সেই পরগণাটির প্রায় ষোল আনার মালিক বাণলীর জমিদার হরিনারায়ণ গাঙ্গুলী। ইনি আবার যেনন তেমন জমিদার নহেন, বর্তমানের কড়া আইন-কাহনের মধ্যেও তাঁহার এমনই দপদপা যে, প্রজাদের টু-শব্দটিও বৃদ্ধিবার জো নাই। শুধু তাহাই নয়, যখন মনে তাঁহার যে খেয়াল উঠিবে, যে জেদ তিনি ধরবেন, তাহা হইতে কেহ কোন দিন তাঁহাকে নিরস্ত করিতে

পারে নাই। একটিবার বে-কথা তাঁহার মুখ দিয়া নির্গত হইয়াছে, কখনও তাহার নড়চড় হয় নাই। রাজার মত এই গাঙ্গুলী-বংশের প্রভাব-প্রতিপত্তি ও ঐশ্বর্য্য। এ অঞ্চলের আবালবৃদ্ধবনিতা বাঙালীর গাঙ্গুলী বাবুদের নামে সদাসর্ব্বদাই ভীত, ভক্তি ও শ্রদ্ধায় অবনত-মস্তক।

করালী চট্টোপাধ্যায় ছাপোষা মানুষ। কতকগুলি কবিরাজী ঔষধ নাড়াচাড়া করিয়া তাহারই উপস্থিত্তে অনেকগুলি পোষ্য তাঁহাকে প্রতিপালন করিয়াছে। স্বধর্ম্মে আস্থাশীল, সত্যনিষ্ঠ ও সজ্জন বলিয়া তাঁহার খ্যাতিও আছে। যাহা উপায় করেন, তাহাতেই সংসারব্যয় নির্ব্বাহ হয়; অভাবের তাড়না সহ করেন না, ঋণের কালিমা কখনও তাঁহাকে স্পর্শ করিতে পারে নাই। সহধর্ম্মিণী স্নগৃহিণী, সংসার-তরীখানির হাল ধরিবার শক্তি ও কৌশলটুকু পূর্ণমাত্রায় আয়ত্ত করিয়াছেন, সুতরাং চট্টোপাধ্যায় মহাশয় বে সাংসারিক ব্যাপারে একান্ত সুখী, সে সম্বন্ধে সন্দেহ করিবার কিছু নাই।

কিন্তু এই সুখের সংসারে সমস্তা তুলিয়াছে সম্প্রতি চট্টোপাধ্যায় মহাশয়ের জ্যেষ্ঠা কন্যা অনুচা তরুণী শ্রীমতী চণ্ডী।

শ্রামাপুর গ্রাম ও পিতামাতার সহিত চণ্ডীর ঘনিষ্ঠতা দেড়টি বৎসরের বেশী নয়। চণ্ডী যখন পাঁচবছরের বালিকা, তখন তাহার মাতামহ অধ্যাপক বীরমূর্ত্তি শ্রামাপুরে কন্যা-জামাতাকে দেখিতে আসেন। তিনি তখন পাঞ্জাবের কোন প্রসিদ্ধ শিক্ষাপ্রতিষ্ঠানের ব্যায়াম-অধ্যাপক। সেখানেই সপরিবার অবস্থিতি করেন। বালিকা চণ্ডীকে দেখিয়া, তাহার মনোবৃত্তি সম্বন্ধে কয়েকটি বৈশিষ্ট্যের পরিচয় পাইয়া তিনি জামাতাকে অনুরোধ করিলেন,—তোমার এই মেয়েটিকে দেখে আমার ভারি ভাল লেগেছে। আমি একে পাঞ্জাবে নিবে গিয়ে আমার মনের মত করে মানুষ করব। বছর বারো পরে তোমাদের মেয়েকে আবার ফিরিয়ে দেব, ছুখন তোমরা দেখে অন্যাক হযে যাবে।

যত্নের অনুরোধ জামাতা প্রত্যাখ্যান করিতে পারেন নাই। চণ্ডীকে

তাঁহার হাতে তুলিয়া দেন। স্বাস্থ্যবিদ্যু মাতামহ চণ্ডীকে সুদূর পাঞ্জাবে লইয়া যান, এবং সেই সময় হইতেই তাহাকে তাঁহার পরিকল্পনা অনুসারে সকল বিঘাতেই পটীয়সী করিয়া তুলিতে যথাশক্তি প্রয়াস পান।

অধ্যাপক বীরমূর্ত্তি শুধু শক্তিসাধকই ছিলেন না, বহু ভাষা ও নানা দেশের পণ্ডিতদের গ্রন্থরাজির সহিত তাঁহার বিশেষ পরিচয় ছিল। হিন্দুর শাস্ত্র পুরাণ ও সনাতন ধর্ম্মে তাঁহার আস্থা ছিল অসাধারণ। চণ্ডীকে তিনি সত্যকার শিক্ষা দিয়া যেমন শিক্ষিতা করিয়া তুলিতেছিলেন, পক্ষান্তরে তেমনই স্বাস্থ্য-সংক্রান্ত বিবিধ শিক্ষায় কিশোর বয়সেই তাহাকে এমন পারদর্শিনী করিয়াছিলেন যে, পঞ্চনদের জলবায়ু, শক্তিসাধক শিক্ষকের শিক্ষানৈপুণ্য এবং ছাত্রীর ঐকান্তিক সাধনা সম্যক্রূপেই সার্থক হইয়াছিল।

এই সময় সহসা অধ্যাপক বীরমূর্ত্তি চঁহলোকের সাধনা শেষ করিয়া পরলোকের পথে মহাপ্রস্থান করিলেন। চণ্ডী তখন কৈশোরের সীমা প্রায় অতিক্রম করিয়াছে। শক্তিসাধক গুরুর তত্ত্বাবধানে স্বাস্থ্যসাধনায় তাহার সর্ব্বাঙ্গে তখন যৌবনের অপূর্ব্ব সৌন্দর্য্য লীলাযিত, স্বাস্থ্যপুষ্ট নিটোল দেহের সে রূপৈশ্বর্য্য অতুলনীয়, অনবগ।

মাতামহের মৃত্যুর পর চণ্ডীকে শ্রামাপুরে পিত্রালয়ে ফিরিয়া আসিতে হইল। কিন্তু শ্রামাপুরের পারিপার্শ্বিক আবেষ্টন চণ্ডীর আবাল্যের রুচি ও প্রকৃতির সম্মুখে পদে পদেই অন্তরায় তুলিতে লাগিল। তাহার চলা-ফেরা আচার-ব্যবহার, খাওয়া-পরার ধারা সমবয়সী মেয়েদের পক্ষে যেমন নূতন, তেমনই বিসদৃশ। চণ্ডী চায়, সে যে-সকল বিধি-ব্যবস্থা অনুসারে এত বড় হইয়াছে, এখানকার মেয়েরাও সেই ধারায় চলে; কিন্তু তাহার কথা শুনিয়া মেয়েরাও হাসিয়া খুন! তাহারা বলে, ব্যায়াম'ত' করে ছেলেরা; মেয়েরাও তাহাদের মতন মুগুর ভাঁজিবে, কুস্তি করিবে, মাগান-বোঝা লইয়া নাচিবে, ডনবৈঠক করিবে,—দূর দূর।

কথায় কথায় এক এক দিন ঝগড়াও যে হয় না, তাহা নয় ; কিন্তু ঝগড়া বাধিলেই পাড়ার মেয়েদের নাকালের আর অন্ত থাকে না । চণ্ডী অতর্কিতভাবে যুৎসুর এমন প্যাচ তাহাদের উপর প্রয়োগ করিয়া বসে যে, তাহারা মুহূর্তমধ্যে একেবারে আড়ষ্ট হইয়া যায় । নিজের সমবয়সী বা অপেক্ষাকৃত বেশী বয়সের মেয়েদেরও সে সহসা এমন তৎপরতায় দুই হাতে শূন্যে তুলিয়া ধরে যে তাহারা আতঙ্কে চীৎকার করিয়া উঠে । চণ্ডী হাসিয়া বলে,—আমার মুখ চলে না তোদের মত, কিন্তু হাত এমনই বেপরোয়া চলে । কাজেই আমাকে ঝাটালেই মুন্সি !

চণ্ডীর সহিত ভাব করিবার জন্ত যাহারা ছুটিয়া আসিত, চণ্ডীর কথাবার্তা ও ব্যবহার তাহাদিগকে অবাক করিয়া তফাতে সরাইয়া দিত । পল্লীপথে মেয়েদের যে সব অবস্থায় ভয়ে বা সঙ্কোচে অভিভূত হইবার কথা, চণ্ডী সে সমস্ত ভয়-বাধায় ক্রম্পণও করিত না । কোনও মেয়ে যদি তাহাকে প্রশ্ন করিত,—তোমার ভয় করে না ? চণ্ডী গম্ভীর হইয়া উত্তর দিত,—গারে জোর থাকলে ভয়-ডর কাছে ঘেঁষে না ।

চণ্ডীর কথা লইয়া পাড়ায় চর্চার অন্ত নাই । বর্ষায়সীরা নাসিকা কুঞ্চিত করিয়া বনেন,—মাগো মা, চাটুঘ্যেদের কি মেয়েই তৈরী হয়েছেন,—যেন ধিঞ্জী । কি ক'রে পার করবে বাবা !

মেয়ের এইরূপ সপ্রতিভ ও নিঃশঙ্কভাব পিতামাতার মনেও ক্রমশঃ সংশয়ের রেখাপাত করিতে থাকে । বয়স হইয়াছে, পরের ঘর করিতে হইবে, এতটা বেপরোয়া হওয়া ত ভাল কথা নয় । বছর ঘুরিতে না ঘুরিতেই গ্রামময় টি-টি পড়িয়া গিয়াছে ।

অথচ কৃষ্ণার সখকে এই সকল অনুযোগ, তাহার আচরণে নীতির দিক দিয়া এমন কোনও অপরাধ কখনও দেখিতে পাওয়া যায় নাই, যাহাতে তাহার বিরুদ্ধে কোনও অভিযোগ করা চলে । সুযোগ্য গুরুর নিকট

সে শুধু শিক্ষা ও শক্তির মর্যাদা রক্ষার দীক্ষা নয় নাই, আত্মমর্যাদা সম্বন্ধেও চণ্ডী ছিল একান্ত সচেতন।

তথাপি চণ্ডী প্রতিবাসীদের সুখ্যাতি পাইল না। সে ভাল ভাবিয়া যে কার্যটিতে হাত দিত, তাহাতেই হইত তাহার নিন্দা। এ অঞ্চলে দরিদ্র ঘরের নীচ জাতির মেয়েরা বাড়ী বরাবর তরীতরকারী, মাছ প্রভৃতি ফেরি করিয়া বিক্রয় করে, তাহাতেই তাহাদের অন্নসংস্থান হয়। কিন্তু সম্প্রতি দূরবর্তী সহর হইতে খোট্টারা ঝাঁকা ভরিয়া সহরের চালানী আনাঙ্গ-পত্র বহিয়া আনিয়া বিক্রয় শুরু করিয়া দেওয়ায়, পল্লীর অনাথারা মাথায় হাত দিয়া পড়িল, পল্লাবাসীদের তাহাতে দৃকপাত নাই। সস্তায় দেশ-দেশান্তরের চালানী মাল পাইয়া তাহারা পল্লীর উৎপন্ন পণ্যের মায়া অনায়াসেই কাটাইয়া দিল। কিন্তু চণ্ডী ইহা সহিতে পারিল না। এ সম্বন্ধে কাগরও সহানুভূতি না পাইলেও, এ মেয়েটি একাই বিদেশী ফিরিওয়ালাদের এমন বিব্রত ও নাকাল করিয়া তুলিল যে, তাহারা গ্রামের ত্রিসীমানাও আর মাড়াইতে সাহস করিল না। কিন্তু পল্লীসমাজে এজন্য চণ্ডীর নামে নানারূপ নিন্দা ঘটিল।

পল্লীর মেয়েদের মধ্যে শিক্ষা বিস্তারের জন্য চার্চ মিশন সোসাইটির সৌজন্যে একটি মিশনারী স্কুলও গ্রামের সৌষ্ঠব বর্ধন করিয়াছিল। ছোট ছোট মেয়েরা এখানে লেখাপড়ায় যতটা ওস্তাদ না হউক, পাদরীদের অনুরোধে নানারূপ ছড়া কাটিয়া হিন্দুধর্ম ও দেবদেবীর বিকৃত বর্ণনায় রীতিমত কৃতবিগ্ন হইয়া উঠিয়াছিল। মিস্ খুষ্টকুমারী নামী এক সন্ত ব্যাপ্টাইজড্ তরুণী এই শিক্ষালয়টির ভার পাইয়া এই অঞ্চলের বালিকা-গুলিকে অন্ধকার হইতে আলোকে লইয়া যাইবার জন্য উঠিয়া পড়িয়া লাগিয়াছিলেন। ছাত্রীদের লেখাপড়ার দিকে এই নবীন শিক্ষয়িত্রীর যত না আগ্রহ ছিল, তাহাদিগের তরুণ চিত্তগুলির উপর তাহাদের চিরচিত্ত ধর্ম ও আরাধ্য দেবতা সম্বন্ধে বিকৃত ধারণার সংশোধন করিতে

তাঁহার যত্নের অভাব দেখা যাইত না। ছোট ছোট মেয়েরা বখন তোতা-পাখীর মত শেখানো ছড়া কাটিত, গান গাহিত—ধর্মপদ্ধতি ও ঠাকুর-দেবতাদের সম্বন্ধে নানা প্রকার অভদ্র বিক্রম ঐ সকল ছড়া ও গানে ব্যক্ত হইয়া পড়িত তাহাদের পরিজনরা তাহা সিয়া উপেক্ষা করিলেও চণ্ডী তাহাদের ঘৃণতা সহ্য করিতে পারিত না। সে প্রায়ই প্রতিবাদ করিয়া বলিত, ও স্কুলে আপনারা মেয়ে পাঠাবেন না। ওখানে ওদের মনের ভিতরে যে বিষ ঢোকানো হচ্ছে, তার ফল কখন ভাল হবে না।

কিন্তু কে তাহার কথা শুনিবে? পশ্চিমের ফেরত বেহায়া একটা মেয়ে পাড়ার 'মোড়ল' গইয়া সকল বিষয়েই মাথা দিয়া দাঁড়াইতে চায়! ইহা অসহ্য অভাবিকাদের কেহ ঝাঝাইয়া গ্রন্থ করিলেন,—ও স্কুলে পাঠাব না ত পাঠাব কোন চুলোর?

চণ্ডীও দৃঢ়স্বরে উত্তর দিল,—ওখানে পাঠিয়ে মেয়েদের মাথা খাওয়ার চেয়ে ঘরে বসিয়ে সংসারের কাষকন্ম শেখানো চের ভাল।

এক বর্ষীয়সী প্রতিবেশিনী মুখখানা মচকাইয়া কহিলেন,—তোমার বে হল, স্বপ্নরকে বলিস্ যেন এ গায়ে একটা 'পাঠশালা' বানিয়ে দেয়, আর তোকে করে তার মাষ্টারী!

চণ্ডী বুদ্ধিল, তাহার যুক্তি নিষ্ফল। কিন্তু পল্লীর এতগুলি মেয়ের এই মনোবৃত্তি তাহার মনে সদা-সর্বদাই খোঁচা দিতে লাগিল, কি করিয়া এই অনাচার হইতে সে এই গ্রামখানিকে রক্ষা করবে? কোনও উপায়ই সে খুঁজিয়া পাইল না। মেয়েদের বৃদ্ধাহতে গিয়া, সে তাহাদের চাপা তাহির টিটকিরি শুনিল; সকলে মিলিয়া, তাহার দিকে চপলকটাক্ষে চাহিয়া, সমস্বরে এমন এক গান ধরিল, চণ্ডী শেষ পর্যন্ত ধৈর্য্য রাখিতে পারিল না।

স্থানের ঘাটেই ঘটয়াছিল সে দিন এই ব্যাপার। চণ্ডীও শ্রান করিতে আসিয়াছিল, মেয়েরাও জলে নামিয়া চণ্ডীর কথার উত্তরে তাহাকে লক্ষ্য করিয়া স্কুলের শেখানো গান ধরিয়াছিল। কিন্তু কিছুক্ষণের মধ্যেই সব

চুপ! প্রত্যেক মেয়েটিকে ধরিয়া চণ্ডী এমনভাবে জলে চুবাইয়া দিন-বে, তাহাদের একেবারে মৃতকর অবস্থা। কেহই রেহাট পাইল না সে দিন চণ্ডীর কঠোর হস্তের কঠিন শাসন হইতে।

কিন্তু ইহার পর অভিভাবকদের পক্ষ হইতে মেয়েদের এই লাঞ্ছনার বিনিময়ে চণ্ডীর উদ্দেশে যে সব মন্তব্য প্রচারিত হইয়া সারা গ্রামখানিকে মুগ্ধ করিয়া তুলিল, চণ্ডী তাহা হাসিয়া উপেক্ষা করিলেও তাহার পিতা-মাতা একেবারে অতিষ্ঠ হইয়া উঠিলেন। চণ্ডীকে সে দিন তাঁহারা রুচুভাবে জানাইয়া দিলেন, এটা পাড়ারগা, দশজনের সঙ্গে মিলে মিলে এখানে থাকতে হয়। পাঞ্জাবী ধিক্কীপণা এখানে সম্পূর্ণ অচল!

চণ্ডী নীরবে পিতামাতার তিরস্কার শুনিল। তাহার মনে জাগিল দীক্ষাদাতা মাতামহের দৃষ্ট কথা,—স্বধর্ম্মে নিধনং শ্রেয়ঃ পরধর্ম্মো ভয়াবহঃ—বটা করিয়া যাহারা ধর্ম্ম ত্যাগ করে কিছা জোর করিয়া যাহারা ধর্ম্মে আঘাত দেয়, শুধু কি তাহারাই ভয়াবহ? ছোট ছোট মেয়েদের তরুণ মনগুলি যাহারা শিকার ছলে বিধাইয়া দিয়া তাহাদের ধর্ম্মবিশ্বাস গোড়াতেই শিথিল করিয়া দেয়,—তাহা কি অধিকতর ভীতিপ্রদ নয়? তাহার মনে পড়িল, পাঞ্জাবের এক ঘটনা। পাঞ্জাবী মেয়েদের শিক্ষা দিবার ছলে এইরূপ শিক্ষালয় প্রতিষ্ঠার ফলে কি আগুন জলিয়া উঠিয়াছিল সেখানে! আর এখানে, এ সম্বন্ধে কোনও প্রতিকারেরই পথ নাই, চেষ্টা নাই, ইচ্ছাও নাই কাহারও। দুই চক্ষু তাহার আর্দ্র হইয়া গেল, দীর্ঘনিশ্বাস ফেলিয়া সে তাহার দাদামহাশয়ের দেওয়া গীতাখানি খুলিয়া বসিল।

চণ্ডীর পড়াশুনা কতদূর, তাহা কেহ জানিত না। দীর্ঘ একষুগ ধরিয়া খেয়ালী দাদামহাশয় তাঁহার এই আদরিণী নাতিনীটিকে কি ভাবে শিক্ষিতা করিয়াছেন, চণ্ডীর পিতামাতাও তাহা জানিতে কিছুমাত্র আগ্রহই, কোনওদিন প্রকাশ করেন নাই। চণ্ডীও কোনও মুখেই কখনও

কাহাকেও জানিবার অসবর দেয় নাই, কি পর্য্যন্ত তাহার বিচার দৌড়! এ সম্বন্ধে কোনও উচ্চবাচ্য না করিয়া বরং দৌড়-ঝাঁপের দিকেই ঝুঁকিয়া সেই পথেই সে তাহার দক্ষতাটুকু প্রকাশে অপ্রকাশে প্রকাশ করিত। কিন্তু নিজের ছোট ঘরখানির দ্বারটি রুদ্ধ করিয়া বিনিত্রিত-নয়নে সে বে দীর্ঘরাত্রি অতিবাহিত করে, সে সংবাদটুকুও অধিকদিন গুপ্ত থাকে নাই। এ সম্বন্ধে প্রশ্ন উঠিলে সপ্রতিভ ভাবেই চণ্ডী উত্তর দিত,—গীতা পড়ি।

কিন্তু গীতা পড়িয়াও চৈতন্য হইল না। উপরের ঘটনার কিছু দিন পরেই মিশনারী বিদ্যালয়ের এক উৎসব-সভায় এমন এক কাণ্ড সে করিয়া বসিল, যাহাতে পারিপার্শ্বিক গ্রামগুলির মধ্যও তাহার ছুঁবার ‘দজ্জালপনা’ জাহির হইয়া পড়িল।

বিদ্যালয়ের সভায় বিভিন্ন গ্রামের মহিলাসমাজ আমন্ত্রিত হইয়াছিলেন। চণ্ডীও এই সভায় বোগদান করিয়াছিল। সভা আরম্ভ হইতেই শিক্ষয়িত্রী খুঁটকুমারী হিন্দু মহিলাদের কুরুচি ও কুসংস্কার সম্বন্ধে এক দীর্ঘ উপদেশ দিতে উঠিলেন। ক্রমে তাহার উচ্ছ্বাস—কুরুচি ও সংস্কার অতিক্রম করিয়া দেবীদের উদ্দেশে ছুটিল এবং প্রথমেই আক্রমণ হইল কুসংস্কারাচ্ছন্ন হিন্দু-জাতির আরাধ্যাদেবী কালী ঠাকুরগণটির উপর। নগদেহ, কদর্য্যমূর্ত্তি, কধিরলোলুপা এই অসভ্য দেবীটি সম্বন্ধে তাঁহার বিদ্রোহ উচ্ছ্বাসিত হইয়া উঠিল। সভায় ভক্তিমতী মহিলাদের অভাব ছিল না, পল্লী ‘পলিটিক্স’র চর্চায় দিগন্তবিহারী উচ্চকণ্ঠীদেরও সমাগম হইয়াছিল, কিন্তু গৃহপ্রাঙ্গণে বা পল্লী অঙ্গনে প্রতিবেশিনীদের সহিত বাগযুদ্ধে ইঁহাদের যত কুতিস্বই থাক, কোনও বিশিষ্ট স্থানে একান্ত বিরুদ্ধ কথা উঠিলেও, তাঁহাদের ছুঁবার বাকশক্তি তখন পক্ষাঘাতগ্রস্ত হইয়া পড়িত। এ ক্ষেত্রেও তাহার ব্যতিক্রম ঘটে নাই। তাঁহারা সকলেই নির্ঝাঁক-বিশ্বয়ে স্বধর্ম্মের নিন্দা ও আরাধ্যা দেবীর উদ্দেশে ভিন্নধর্ম্মীর অবমাননা নীরবেই পরিপাক করিতেছিলেন। কেহ কেহ এই সুযোগে চণ্ডীর দিকে কটাক্ষ করিয়া

মুখ টিপিয়া হাসিবার প্রলোভনটুকুও যে সম্বরণ করিতে পারেন নাই, এ সংবাদও পরে শুণ্ড ছিল না।

চণ্ডী কিন্তু আর সহ করিতে পারিল না। সভাস্থ সকলকেই চমকিত করিয়া সে উঠিয়া তীক্ষ্ণস্বরে কহিল,—আমি প্রতিবাদ করছি আপনার বক্তৃতায়—থামুন আপনি।

মুহুর্তে সভা হইল স্তব্ধ। সমগ্র মহিলা ও ছাত্রীদের বিষয়পূর্ণ দৃষ্টি চণ্ডীর দিকে। খৃষ্টকুমারীর পাউডারচর্চিত শুভ্র মুখখানি বিকৃত হইয়া উঠিল। ক্রূতস্বরে প্রশ্ন হইল,—তুমি! অসভ্য বালিকা, তুমি আমার ‘স্পীচে’ বাধা দিতে সাহস কর?

চণ্ডী স্বর দৃঢ় করিয়া কহিল,—নিশ্চয়ই! আপনি আমাদের এখানে নিমন্ত্রণ ক’রে ডেকে এনে যথেষ্ট অপমান করলেন। আপনার উচিত সকলের কাছে ক্ষমা প্রার্থনা করা।

এ পর্য্যন্ত এত বড় কথা মিস্ খৃষ্টকুমারীকে কোনও বাঙ্গালীর মেয়ে এ ভাবে বলিতে সাহস করে নাই। সমবেত মহিলা ও ছাত্রীদের সমক্ষে এ লাঞ্ছনা পরিপাক করা তাঁহার পক্ষে অসম্ভব। সভাস্থলে অশ্রুট গুঞ্জন শিক্ষয়িত্রীকে আরও চঞ্চল করিয়া তুলিল। আত্মমর্য্যাদা রক্ষার উদ্দেশে তিনি হাতের তর্জনীটি তুলিয়া কহিলেন,—এসে দাঁড়াও তুমি আমার সামনে।

দৃষ্ট ভঙ্গিতে সকল চক্ষুগুলি চমৎকৃত করিয়া চণ্ডী শিক্ষয়িত্রীর টেবল-ধানির সম্মুখে গিয়া দাঁড়াইল। সভাস্থ সকলেই ভয়ে বিষ্ময়ে হতবুদ্ধি হইয়া পড়িয়াছে, কিন্তু চণ্ডীর মুখে তাহার একটি রেখাও পড়ে নাই; কোতুকোম্পন্ন চক্ষু দুইটি শিক্ষয়িত্রীর অপ্রসন্ন মুখখানির উপর তুলিয়া সে উত্তরপ্রার্থিনী হইল।

কিন্তু শিক্ষয়িত্রী ধৈর্য্য হারাইয়া যে উত্তর দিলেন, তাহা তাঁহার উচ্চত প্রকৃতির উপযুক্ত হইলেও, সভাস্থ সকলেই তাহাতে শিহরিয়া

উঠিলেন।—টেবলের উপর বুকিয়া তিনি চণ্ডীর গণ্ডদেশে সবলে এক চপেটাঘাত করিয়া কহিলেন,—অসভ্যতার এই পুরস্কার।

পরক্ষণেই যে কাণ্ড বাধিল, তাহাতে সভাস্থ সকলেই উঠি-পড়ি অবস্থায় ঘরমুখী হইতে ব্যস্ত হইলেন। প্রকৃত হইবার সঙ্গে সঙ্গেই চণ্ডীর একখানি হাত এমন অতিক্রমভাবেই টেবলটির তলায় আটকাইয়া গেল যে, তাহাতে উপরে সাজানো মসীপত্র, ঘড়ি, হাতবাক্স, ফুলদানি ও মোটামোটা বাইবেলগুলির সহিত সেখানি উল্টাইয়া পড়িয়া গেল। মিস খৃষ্টকুমারী তখন টেবলখানির উপরেই দেহের সম্পূর্ণ ভারটুকু রক্ষা করিয়াছিলেন, বিপর্যস্ত আধার তাহাকেও রেগাত দিন না, তিনিও সেই সঙ্গে সশব্দে—পপাত ধরলেন! শুধু মথের আর্ন্তস্বব শোনা গেল,—ও গড্!

বিদ্যালয়ের পরিচারিকা নকটেই ছিল, ছুটিয়া আসিয়া মিসকে টানিয়া তুলিল। সভা তখন বিশৃঙ্খল, সকলেই স্থানত্যাগে ব্যস্ত; তথাপি শেষ দৃশ্যটুকু উপভোগ করিবার আগ্রহ সকলকে পরিত্যাগ করে নাই। শিক্ষয়িত্রী পরিচারিকার সহায়তায় উঠিয়া দাঁড়াইতেই তাঁহার বিচিত্রমূর্তি এই বিক্ষোভের সময়ও সভায় হাশ্বরসের উচ্ছ্বাস তুলিল।—টেবলে রক্ষিত, প্রকাণ্ড দোয়াতটির সমস্ত কৃষ্ণবর্ণ তরল পদার্থটুকু মিস খৃষ্টকুমারীর নিবর্ণ মুখে ও অঙ্গের অমল ধবল পরিচ্ছদে প্রবাহিত হইয়া বর্ণবিভ্রাট ঘটাইয়াছিল!

শিক্ষয়িত্রীর কালিমালিঙ্গ মুখের দিকে তাবাহারা সহজ-স্বরে চণ্ডী কহিল,—এ মা-কালীর শাস্তি, গুরুমা! তাঁর মন্দ না জেনে আপনি যেমন মিছে নিন্দা করলেন, তিনিও তেমনই অদৃশ্য হাত দুখানি দিয়ে আপনার মুখখানিতে কালি লেপে দিলেন। এমন কাজ আর কখনও করবেন না।

এই ঘটনা অতিরঞ্জিতভাবেই পাড়াময় রাষ্ট্র হইয়া পড়িল। চণ্ডীই

যে অস্ত্রার কাজ করিয়াছে, বাঙ্গালী ঘরের মেয়ে লেখাপড়া-জানা সাহেবসুবোধে মাষ্টারণীর সঙ্গে টকর দিতে গিয়া এই কেনেঙ্কারী বাধাইয়াছে এবং সে-ই যে টেবলখানি উল্টাইয়া দিয়া দস্তিপনা করিয়াছে,—এ বিষয়ে সকলেই একমত। ঐ ঘটনার পর চণ্ডীর পরিণাম সম্বন্ধে চর্চাই পল্লীবাসিনীদের অবসরসময়ের নিয়মিত কার্য হইয়া উঠে। কবরেজ-চাটুযো কি করিয়া এই মেয়েকে পার করিবে, কোন্ গৃহস্থই বা এই দজ্জাল ধিক্কীকে ঘরে তুলিবে, আর যদিও কোনও রকমে পার হইয়া যায়, স্বপুর্নবাড়ী গিয়া এই ‘বাবা-নাচুনে’ মেয়ে কেমন করিয়া ঘরসংসার করিবে—পল্লীর মহিলা-মজলিস যখন চণ্ডীর সম্বন্ধে এই সকল দুশ্চিন্তাসংকলিত ভাবাক্রান্ত, সেট সময় সমগ্র পল্লীকে সচকিত করিয়া অপ্রত্যাশিত সংবাদ বাট্ট হইল যে, বাঙ্গালীর জমিদার হরিনারায়ণ গাঙ্গুলী চণ্ডীকে দেখিতে আসিতেছেন,—পছন্দ হইলে চণ্ডী গাঙ্গুলী-বাড়ীর বড় বধু হইবে!—সুতরাং চণ্ডীর একটা গতি-মুক্তির চিন্তাই যাহাদিগকে এতটা বিব্রত করিয়া তুলিয়াছিল, তাহার উল্লগতির এমন চমকপ্রদ সংবাদটুকুও যে তাহারা প্রীতির সহিত পরিপাক করিতে পারিবে না—আর একটা নূতন রকমের চলাবনায় তাহারা আকুল হইয়া উঠিবে, তাহা সহজেই অনুমেয়।

তুই

যেমন অদ্ভুত ও অপূর্ণ মেয়ে চণ্ডী, তাহাকে পুত্রবধুরূপে গ্রহণ করিতে আসিলেন যিনি, তাঁহার প্রকৃতিও সেই অনুযায়ী অদম্য ও একান্ত রহস্যময়। কোনও সংবাদ না দিয়া সহসা তিনি পাত্রী দেখিতে উপস্থিত হইলেন গ্রামের মধ্যবিত্ত গৃহস্থ—চট্টোপাধ্যায় মহাশয়ের ভবনে! কথাটা অবশ্য গুপ্ত রহিল না, অবিলম্বেই পল্লবিত হইয়া পড়িল। শ্রামাপুর হইতে দশ ক্রোশ দূরে বাগুনীর জমিদার বাবুদের বাড়ী। হরিনারায়ণ গাঙ্গুলীর নাম গ্রামবাসীদের জপমালা হইলেও, চর্মচক্ষুতে এ গ্রামের কেহই তাঁহাকে এ পর্য্যন্ত দেখে নাই। এই বিখ্যাত নামের মালিকটিকে দেখিবার জন্ম কবিরাজের বাড়ীর সম্মুখের রাস্তার পর্য্যন্ত জনসমাগম হইয়া গেল। কবিরাজ মহাশয় বাহিরের বৈঠকখানায় রাজতুল্য অতিথিকে অতি সঙ্কোচের সহিত বসাইয়া করজোড়ে আদেশপ্রার্থীর মত হজুরের সম্মুখে দাঁড়াইলেন।

হজুর হুকুম করিলেন,—আপনার একটি বিবাহযোগ্য ডাগর মেয়ে আছে শুনেছি। আমি তাকে দেখব ব'লে এসেছি। যদি পছন্দ হয়, আমার কোনও ছেলের জন্ম গ্রহণ করব তাকে।

হজুরের কথায় কবিরাজ মহাশয়ের বাকশক্তি যেন রুদ্ধ হইয়া গেল। তিনি তুই চক্ষু বিস্ফারিত করিয়া হজুরের দিকে অপরাধীর মত তাকাইয়া রহিলেন।

হজুরের মুখের হাসিটুকু সুপুষ্ট পরিপক্ব গৌফ বোড়াটির ভিতর দিয়া সুস্পষ্ট হইয়া উঠিল; কহিলেন,—বুঝতে পেরেছি, আপনি কথাটা প্রত্যয় করতে পারছেন না। কিন্তু এ কথাও ভুলবেন না, চাটুষ্যে মশাই—

হরিনারায়ণ গাঙ্গুলী বাজে কথা কইবার মানুষ নয়, আর সে অবসরও তার নেই। আমি যে প্রকৃতির মেয়ে খুঁজছি, আপনার মেয়ের সম্বন্ধে এ পর্যন্ত আমি যতটুকু খবর পেয়েছি, তাতে—আপনার মেয়ে আমার মনে স্থান পেয়েছে ; এখন চোখে যদি লাগে—তা হ'লে তিনি আমার ঘরেও স্থান পাবেন।

কি সর্বনাশ ! হরিনারায়ণ গাঙ্গুলীর কানেও তাঁহার দুর্জয় মেয়ের সকল কথাই উঠিয়াছে,—সে সমস্ত শুনিয়াও তিনি তাহাকে তাঁহার বাড়ী বহিয়া দেখিতে আসিয়াছেন ! বিশ্বয়ের সুরে চট্টোপাধ্যায় মহাশয়ের মুখ দিয়া মৃদু স্বর বাহির হইল,—এই দীন দরিদ্রের মেয়ের কথা হুজুরের—

হুজুরের মুখের হাসিটুকু এবার আরও একটু গাঢ় হইয়া ফুটিল, রসিকতার ভঙ্গিতে। হাশুমুখে চট্টোপাধ্যায় মহাশয়ের কথায় বাধা দিয়াই যেন কহিলেন,—সারা পরগণার খবর হুজুরের মনের কেতাবে যে লেখা আছে, তা বুঝি জানেন না ? মেয়েদের খবরও বাদ যায় না, কেন না, নিজের ঘরে যখন উপযুক্ত ছেলে, পরের ঘরের একটি যোগা মেয়েরও ত দরকার। তবে আপনার মেয়েটি পঞ্জাবে থাকত বলে, খবরটি পেতে বিলম্ব হয়েছে। আর খবরটি পেয়েছি—সত্য কথা বলতে কি—তার বিরুদ্ধে নালিশের সূত্রে।

বিশ্বয়ের উপর বিশ্বয় !—নালিশ—তবে কি চণ্ডীর সম্বন্ধে কোনও নালিশ হুজুরের দরবারে উঠিয়াছে, এবং সেই সূত্রেই—

কিন্তু হুজুরই সমস্তা ভঙ্গন করিলেন। কহিলেন,—আপনারই কোনও হিতৈষী প্রতিবেশী আপনার মেয়ের বিরুদ্ধে এক আর্জী পাঠান আমার কাছে। তাতে তাঁর সম্বন্ধে দোষারোপ ক'রে যে সব কথা লেখা হয়েছে, শুনে আমি ত একেবারে অবাক ! পাড়াগায়ে যে এমন মেয়ে থাকা সম্ভব, এ আমি ধারণা করতেই পারিনি। যিনি আর্জী পাঠিয়েছিলেন, নামটুকু দিতে অবশ্য সাহস পান নি। কাজেই তাঁকে না পেয়ে, অগত্যা

এই মহালের নায়েবকে লিখি, আপনার মেয়ের সম্বন্ধে সঠিক খবর সব জেনে আমাকে দাখিল করতে। তারপর আপনাকে আমি এইটুকু বলতে পারি—নালিশ গেছে উল্টে। আপনার মেয়ের দোষগুলো আমি শুণ ব'লেই ধ'রে নিয়েছি, তাই না এসেছি, তাঁকে দেখতে। যান, আপনি আর বিলম্ব করবেন না; এই ঘরেই মাকে নিয়ে আসুন। বেশীকণ অপেক্ষা করা আমার সম্ভব হবে না।

অল্পসময়ের মধ্যে বতটুকু সম্ভব, সেইভাবে চণ্ডীকে সাজাইয়া বাহিরের ঘবে আনাইবার ব্যবস্থা হইয়া গেল। বাহিরের ছোট বৈঠকখানা-ঘরটির পার্শ্বেই একটি বড় প্রাঙ্গণ, তাহার পরেই চট্টোপাধ্যায় মহাশয়ের অন্তর-মহল। চট্টোপাধ্যায় মহাশয় ভিতরে তাড়া দিয়াই বাহিরে আসিয়া রাজ-অতিথির সর্দকনায় তৎপর,—বাড়ীর পরিচারিকার সহিত সুসজ্জিতা চণ্ডী সবেমাত্র প্রাঙ্গণে পা দিয়াছে, এমন সময় যেন দৈবনির্দেশেই এক বিদ্রাট দেখা দিল!

প্রাঙ্গণের এক পার্শ্বে চট্টোপাধ্যায় মহাশয়ের সন্তঃপ্রসূতা এক ফুলকার গাভী বাধা ছিল। বাছুরটি কাছেই খেলা করিতেছিল, ছোট একটি ছেলে সেই গোবৎসটির কানছুটি ধরিয়া টানাটানি করিতেই বৎসমাতার ধৈর্য্যচ্যুতি ঘটিল, বন্ধন রজ্জু ছিন্ন করিয়া দুইটি তাঁলুধার শৃঙ্গ মেলিয়া সে ছুটিল বালকটির দিকে। বৈঠকখানায় সমবেত সকলেই সে দৃশ্যে ধধন কিংকর্তব্যবিমূঢ়,—চণ্ডী তখন ক্ষিপ্রহস্তে আঁচোলটি কোমরে জড়াইয়া আক্রান্ত বালকটির সম্মুখে গিয়াই দুই হাতে গাভীর দুইটা শৃঙ্গ ধরিয়া প্রবল ঝাঁকুনি দিল। হুটপুটে অত বড় তেজস্বিনী গাভীটির সাধ্য হইল না আর একটি পদ অগ্রসর হইতে! ইতিমধ্যে গাভীর পরিচর্যাকারী ভৃত্যটি ছুটিয়া আসিয়া তাহাকে ষথাস্থানে লইয়া গেল। কিন্তু বেশ বুঝা গেল, চণ্ডীর প্রবল ঝাঁকুনীতে তাহার তেজোবহি নির্ঝাপিত ও আক্রমণস্পৃহা প্রশমিত হইয়াছে।

বৈঠকখানায় আসিয়া সর্বপ্রথমে পিতার পদধূলি লইয়া বেশ সপ্রতিভ-
ভাবেই চণ্ডী পরগণার মালিকের উদ্দেশে নত হইয়া প্রণাম জানাইল ।
হরিনারায়ণবাবু এতক্ষণ নির্ঝাঁক বিষ্ময়ে চণ্ডীর দিকে তাকাইয়াছিলেন ।
চণ্ডী তাঁহার পদস্পর্শ করিতেই দুই হাতে তাহাকে তুলিয়া তিনি স্নেহভরে
তাঁহার হাত দুইখানি নিজের গাতের মধ্যে লইয়া কহিলেন,—হাতে
লাগেনি ত, মা ?

চণ্ডী মুখখানি নীচু করিয়া মৃদুহাস্তে কহিল,—না ।

সকলেই স্তব্ধ, নির্ঝাঁক দৃষ্টি প্রত্যেকেরই হরিনারায়ণ গাঙ্গুলী ও চণ্ডীর
দিকে । প্রায় পাঁচটি মিনিট ধরিয়া চণ্ডীর দুই করতলের রেখাগুলি
পরীক্ষার পর হরিনারায়ণবাবু কহিলেন,—তুমি জিতে গেছ মা, চণ্ডী হয়েই
তুমি আমার বাড়ীতে যাবে, মা ।

পরক্ষণেই চট্টোপাধ্যায় মহাশয়ের দিকে চাহিয়া কহিলেন,—আপনার
মেয়েকে দেখতে এসেছিলুম সংশয়ের মধ্যেই । কানের শোনা, আর
চোখের দেখা, এ দুটোর তফাৎ অনেক । কিন্তু আমার সে দর্প ভেঙ্গে
দিয়েছেন মা চণ্ডী—ঐ উঠোনটিতে প্রথম দেখা দিয়ে । মা আমার নিজের
নামকেও সার্থক করেছেন । ঐখানেই আমার দেখাও শেষ হয়েছে । তা
হ'লে আমার আর কোনও কথা নেই, এখন আপনার যদি কোনও কথা
থাকে, বলতে পারেন ।

হজুরের সামনে আমার আবার কি কথা থাকবে ? মেয়েকে আমি
এনে হজুরের সামনে রেখেছি । মালিক সব বিষয়েই যে, হজুর !

হজুরের ছেলেটিকেও যাচাই করা দরকার আপনার পক্ষে, আমি
যে ভাবে আপনার মেয়েকে যাচাই করেছি ।

তার কোনও প্রয়োজন নেই, হজুর ! আমার মেয়েকে যখন দয়া
করে দেখতে এসেছেন, পছন্দ করেছেন, তখন আমি আর কি
বলব !

হজুরের মুখ হইতে তখন হুকুম হইল,—তা হ'লে পাজী আনুন, দিনস্থির করা যাক ।

পাজী বাহিরের ঘরেই ছিল, হজুরের হাতে আসিতে বিলম্ব হইল না । সকলের চক্ষু তখন হজুরের পাজী দেখার ভঙ্গিটির দিকে ; কোন্ দিন স্থির করেন, তাহা জানিতে প্রত্যেকেরই আগ্রহ অসীম ।

মিনিট কয়েক পরেই হর্ষোৎফুল্ল মুখে পরগণার মালিক রায় প্রকাশ করিলেন,—২৭শে ফাস্তুন বুধবার, খাসা দিন ; এই দিনটিই তা হ'লে স্থির হইল বিবাহের,—আপনি প্রস্তুত হোন, বোই মশাই !

বোই মশাই ! এই অপ্রত্যাশিত সংবাদে অত্যন্ত শ্রবণসুখকর হইল বটে, কিন্তু বিবাহের তারিখটি চট্টোপাধ্যায় মহাশয়ের মনটির উপর চিন্তার খোঁচা দিল ; এত তাড়াতাড়ি কন্ঠার বিবাহ কি সম্ভবপর ? তখনই মুখখানি স্তান করিয়া, হাত দুইখানি যুক্ত করিয়া কম্পিতকণ্ঠে আবেদন জানাইলেন,—হজুরের কথার উপর কথা বলাই ধৃষ্টতা, তবুও অবস্থা অনুসারে নিবেদন করতে হচ্ছে, হজুর—আজ মাসের বারো তারিখ, মধ্যে মাত্র পনেরোটি দিন—

হজুর নিবেদনটি সমস্ত না শুনিয়াই সহসা বাধা দিয়া কহিলেন,—তাই কি কম, চাটুবো মশাই ? প্রয়োজন হলে রাতারাতি আমরা পুকুর কাটাই, আবার তা ভরাট ক'রে বাগান বসাই—এ সব ত শুনেছেন । কথা যখন হরিনারায়ণ গাঙ্গুলীর মুখ দিগে বেরিয়েছে, এর আর নড়চড় হবে না ; ঐ দিনই স্থির ।

কেহই আর এ কথার প্রতিবাদ করিতে সাহস পাইলেন না । অতঃপর কথার মালিক কন্ঠার দিকে চাহিয়া কহিলেন,—তোমাকে শুধু দেখতেই এসেছিলুম, না । আজ শুধু কথা দিয়েই আশীর্বাদ ক'রে চলেছি । তবুও তোমাকে না ব'লে পারছি না,—আমার এই ইচ্ছা, তুমি নিজেই আমার কাছে পাকা দেখার যোতুকটুকু চাও, যা তোমার ইচ্ছা

হয় মা, যা তোমার মনে লাগে—অবশ্য আমার বা সাধ্যের মধ্যে,—তুমি মুখ ফুটে চাইলে, আমি ভারি খুসী হব মা !

সকলের মনে আবার জাগিল দারুণ বিষয়,—চণ্ডী কি চাহিয়া বসে !
তাঁহার প্রার্থনা শুনিলার জন্য বহু কণ-ই উৎকর্ণ হইয়া উঠিল ।—

দিব্য সহজ সুরেই চণ্ডী সকলকে চমৎকৃত করিয়া তাঁহার প্রার্থনা নিবেদন করিল,—তাহ'লে আপনি এই গ্রামখানির মধ্যে মেয়েদের এমন একটি স্কুল তৈরী ক'রে দিন, যার কোনও খুঁত না থাকে, আর বিয়ের পরদিন যাতে আমি আপনার তৈরী সেই নোতুন স্কুলটির দরজা খুলে দিয়ে, আপনার বাড়ীর দরজায় মাথা গলাতে পারি । এ ছাড়া আর কোনও প্রার্থনাই আমার নেই ।

সকলেই শুরু, স্তম্ভিত, চমৎকৃত ! হরিনারায়ণ গাঙ্গুলী এতক্ষণ শুরু দৃষ্টিতে চণ্ডীর দৃশ্য মুখখানির দিকে চাহিয়াছিলেন, পরক্ষণেই তিনি নিস্তব্ধতা ভঙ্গ করিয়া কহিলেন,—চমৎকার ! অনেক প্রার্থনা এ পর্য্যন্ত শুনেছি, কিন্তু চাবুক উঁচিয়ে দেবার জিনিষটি এমন তেজের সঙ্গে আর কেউ কোনও দিন শোনাতে পারে নি । গাঙ্গুলী-বংশের আদর্শ বধুর মতই তুমি তোমার ভাবী শ্বশুরের দেবার দস্ত ভেঙ্গে দিয়েছ । তোমার চাওয়া আর আমার দেওয়া—এ দুটোয় সার্থকতা কার—সেইটিই এখন সমস্যা ।

তিন

পাকা দেখার পর বাড়ীর ভিতর আসিরামাত্রই বাড়ীর পরিজন ও পাড়ার আর দশ জন চণ্ডীকে ঘিরিয়া ফেলিল। প্রত্যেকেরই মুখে বিশ্বয়ের রেখা, চক্ষুগুলিও সেই অনুসারে বিস্তারিত। চণ্ডী যেন মহিষ-মর্দিনী চণ্ডীর মতই অসাধ্য-সাধন করিয়া—বিজয়-টীকা পরিয়া নূতন মূর্তিতে বাড়ার ভিতর পা দিয়াছে। সবারই মুখে একই প্রশ্ন,—অত বড় লোকটার মুখের ওপর অত কথা কি ক’রে কইলি রে চণ্ডী!

যাহাকে লইয়া এত বিশ্বয়, তাহার আকৃতি ও আচরণে কিন্তু কোনও পরিবর্তনের চিহ্নও দেখা গেল না। যেমন সহজ স্বচ্ছন্দভাবে সে বাহিরের বৈঠকখানায় গিয়াছিল, সেই ভাবেই সে বাড়ীর ভিতর ফিরিয়াছিল। সকলের মুখে বিশ্বয়ের ভাব ও কথায় তাহার আভাস পাইয়া সে বুঝিল, বাহিরের ব্যাপানে ইহারা সকলেই একেবারে অবাক হইয়া গিয়াছে। মনে মনে কোতুক অনুভব করিয়া হাসিমুখে চণ্ডী উত্তর দিল,—কথা এমন বেশী কি বলেছি, হাঁ—তবে জেঁাকের মুখে নুন দিবেছি, এ কথা বলতে পার।

সকলেই অবাক হইয়া অপরূপ ভঙ্গীতে চণ্ডীর দিকে চাহিল। পাড়ার মিত্র-পরিবারের সহিত চণ্ডীদের খুব ঘনিষ্ঠতা; মিত্র-গৃহিণীকে চণ্ডীর মাঠাকুরঝি বলিয়া ডাকিতেন; সেই সূত্রে চণ্ডী বলিত, পিসী! তিনিই প্রথমে বিশ্বযটুকু ভঙ্গ করিয়া কহিলেন,—শোনো মেয়ের কথা!

মেয়ের মুখের হাসিটুকু মুখেই মিলাইয়া গেল, অভিমানের সুরে তৎক্ষণাৎ উত্তর দিল, কেন পিসী, কি অন্তায় আমি করেছি বল! বাবার মুখের উপর বললেন, কথা বখন ব’লে ফেলেছি, নড়-চড় হবার আর জেঁ নেই! রাতারাতি যারা পুকুর কাটান, বাগান বসান,—সেখানে তাঁরা

যেন দয়া করেই বিয়ের সময় দিলেন মাঝে দুটো হপ্তা !—আমিও ত বাবার মেয়ে—চট্ ক’রে দিলুম অমনি পাণ্টা জবাব ।

পিসী কহিলেন,—জবাব বলে জবাব, ঘর শুদ্ধ লোক মেয়ের কথা শুনে একেবারে অবাক্ ; সবাই যেন শুনে ‘থ’ হয়ে গেল ! মিন্বে মুখে যাই বলুক, মনে মনে কি ভাবলে কে জানে !

চণ্ডী কহিল,—বারা কথার মানুষ, তারা মনে কিছু চেপে রাখে না । উনি অবাক্ও হন নি, আর, আমিও এমন কিছু অণ্ডায় আন্ধার করি নি, যাতে তিনি মনে মনেও ভাবতে পারেন—মেয়েটা কি বেহায়া ।

ঐ আন্ধারটি ক’রে তুমিই বা এমন কি লাভ করলে, বাছা ? শুধু ধান-দুর্কো দিয়েই ত বুড়ো আশীর্বাদ ক’রে গেল, এক টুকরো সোনাও ঠেকালে না ? গেরামে ইস্কুল হলেই তোমার সব আকিঙ্ক্য মিটবে যেন !

চণ্ডী এ কথার কোন উত্তর দিল না, শুধু হাসিল ; কিন্তু সে হাসির মধো যে কথা প্রচ্ছন্ন ছিল, তাহা ব্যক্ত করিলেন তাহার মা । তিনিও হাসিতে হাসিতে কহিলেন,—তোমাদের এই মেয়েটি সোনাদানার ভোলবার পাত্রই বটে, মিত্তির ঠাকুরঝি ! এখানে এসে অবধি ওর যত কিছু রাগ ঐ মিশনারী ইস্কুলটির ওপর ; ওখানকার গুরুমাকে সে-বারে কি নাকালটাই করেছিল, সে ত তোমরা শুনেছ ! পাড়ার মেয়েরা ইস্কুলে গিয়ে নিজেদের ঠাকুর-দেবতার নাম করতে পারবে না, বীশুখুঁটের কথা তাদের পড়তেই হবে,—এই নিয়েই ওর যত ভাবনা, হয়ত ঠাকুরের কাছে ধর্না দিতেও কস্বর করে নি,—তাই তিনিই ওর মনস্কামনা পূর্ণ করেছেন ! এই দুর্জয় মেয়েকে নিয়ে আমাদেরও কি কম ভাবনা ছিল, ঠাকুরঝি ?—মেয়ে আমার যে জেদ্ ধরবেন, কার বাপের সাধি তা থেকে ফেরাতে পারে ! কোথায় কার ঘরে পড়বেন, ভেবেই অস্থির হয়ে পড়েছিলুম, এখন তোমাঁদের কল্যাণে মা সর্বমঙ্গলাই মুখ রাখলেন ।

মিত্রবাড়ীর গৃহিণী মুখখানি গস্তীর করিয়া কহিলেন,—মেয়ে তোমার যতই একপুঁয়ে আর মুখ তার যতই আনুগা হোক বোদি, ও যে রাজরাণীর বরাত নিয়ে এসেছে, এ কথা গেরামগুদ্ব সকলকে মানতেই হবে, নইলে বিশখানা তালুকের মালিক, এ অঞ্চলের রাজা—বাণুলীর বাবুদের বাড়ীতে তোমার মেয়ে বউ হয়ে ঢুকতে চলেছে !

পরদিন ভোর হইতে না হইতেই পাড়ায় একটা সাড়া পাইয়া গ্রামের প্রায় সকলেই ঘরের বাহিরে আসিয়া সবিস্ময়ে দেখিলেন, গ্রামের বারোয়ারীতলায় যেন কিসের মেলা বসিয়া গিয়াছে। গাড়ী, গরু, মুটে, মজুর, কত রকমের মানুষ যেন গিস্ গিস্ করিতেছে। একদিকে ইমাবতের ভিত কাটা আরম্ভ হইয়া গিয়াছে, একজন এঞ্জিনিয়ারের নির্দেশমত রাজমিস্ত্রীরা কাজ আরম্ভ করিয়া দিয়াছে এবং অনেকগুলি মজুর, নিঃশব্দে শৃঙ্খলার সহিত ব্যস্তভাবে যোগাড় দিতেছে। বারোয়ারী-তলার অত বড় মাঠখানি রাশি রাশি ইট, সুরকী, চণ, বালি প্রভৃতি ইমারত তৈয়ারীর মাল-মসলায় ভরিয়া গিয়াছে। লগুড়ধারী একপাল দরোয়ান লইয়া কয়েক-জন ভদ্রবেশধারী ব্যক্তি খবরদারি করিতেছেন।

চণ্ডীর প্রার্থনা ও হরিনারায়ণ বাবুর প্রতিশ্রুতির কথা পাড়াময় পূর্ব-দিনই রটনা হইয়াছিল, স্তত্রাং কাহারও বুঝিতে বিলম্ব হইল না যে, ভাবীপুত্রবধূর অসম্ভব আবদারটুকু যথাযথভাবে সম্ভব করিতেই বাণুলীর অদ্ভুত-কর্ম্মা রাজাবাবুর এই বিপুল আয়োজন। লোকের মুখে তখন আর অন্য কথা নাই, প্রত্যেক বাড়ীতেই চলিতে থাকে চণ্ডীকে লইয়া আলোচনা ও সেই সূত্রে বাণুলীর দোর্দণ্ডপ্রতাপ রাজাবাবুদের অতীত অদ্ভুত অদ্ভুত কার্য্যকলাপের কত রোমাঞ্চকর কথা ও কাহিনী।

সন্ধ্যা তাঁহার ধূসর অঞ্চলটি গুটাইয়া সবেমাত্র দিনান্তের কোলে বিলীন হইয়াছে, শঙ্খঘণ্টাকাঁসরের সুগস্তীর রেশটুকু তখনও স্নিগ্ধ বায়ুর সহিত মিশিয়া পল্লী-সুখমার বন্দনায় উচ্ছ্বসিত, প্রদীপের শান্ত শিখা ধীরে

দীর্ঘ গৃহের অন্ধকারকে দূরে ঠেলিয়া দিতেছে,—ঠিক এমনই সময় চণ্ডীদের বাড়ীর দেউড়িতে একখানি জুড়ি-ঘোড়ার গাড়ী আসিয়া দাঁড়াইল। উর্দূপরা পাঞ্জাবী সহিস তাড়াতাড়ি গাড়ীর দরজা খুলিয়া দিতেই প্রথমে নামিলেন চণ্ডীর ভাবী স্বশুর হরিনারায়ণ বাবু স্বয়ং ; তাহার পরেই চামড়ার একটি ব্যাগ লইয়া পশ্চাৎ পশ্চাৎ নামিলেন তাঁহার দেওয়ান বাধানাথ বাপুলী। তিনিও হরিনারায়ণ বাবুর মত দীর্ঘাকৃতি ও বর্ষীয়ান।

করালী বাবু বাহিরের ঘরে বসিয়া পুরোহিত ও অন্তরঙ্গদের সঙ্গিত বিবাহ সম্পর্কেই আলোচনা করিতেছিলেন। দরজার সম্মুখে গাড়ী আসিয়া দাঁড়াইতেই সকলেই উৎকর্ণ হইয়া উঠিলেন। করালীবাবু ভৃত্যদিগকে উদ্দেশ্য করিয়া হাঁকিলেন,—কে এল রে ?

ভূতাগণের কেহই সে সময় বাহিরে ছিল না। করালী বাবুর কথার উত্তর দিতে দিতে ভাবী বৈবাহিক বৈঠকখানার ভিতরে প্রবেশ করিলেন,—আমরাই এসেছি বোই মশাই, হঠাৎ অপ্রত্যাশিতভাবেই।

ফরাস হইতে সকলেই শশব্যস্ত হইয়া উঠিয়া দাঁড়াইলেন। এ সময় অকস্মাৎ এভাবে হরিনারায়ণ বাবুর উপস্থিতি তাঁহারা কেহই কল্পনাও করেন নাই,—দুর্জয় বিশ্বয় দমন করিয়া করালী বাবু করবোড়ে কহিলেন,—আসতে আজ্ঞা হোক, আসতে আজ্ঞা হোক, ওরে—কে আছিস, শাগ্গীর পা ধোবার জল নিয়ে আয়—

হরিনারায়ণবাবু বাধা দিয়া কহিলেন,—ব্যস্ত হবেন না, বোই মশাই, ও সব কিছুই দরকার হবে না, জানেন ত মা-চণ্ডী তাঁর মণ্ডপ তৈরীর হুকুম দিখে বুড়া ছেলেটিকে কেমন জ্বদ করেছেন ! এসেছিলুম তারই তদারক করতে, ভাবলুম, এই সুযোগে মাকেও আর একবার দেখে যাই।

পুরোহিত মহাশয় অগ্রবর্তী হইয়া কহিলেন,—দেখবেন বই কি, অবশ্য দেখবেন ; কিন্তু পায়ের ধূলো যখন পড়েছে, তখন ত আসন গ্রহণ করতেই হবে, তার পর একটু মিষ্টমুখ—জলযোগ—

হরিনারায়ণবাবু মহাশয়ে কহিলেন,—ও সব গোলযোগ আর বাধাবেন না, ভট্টাচার্য্য মহাশয়,—তার অবসরও নেই। আমরা আমাদের মাঝে ধূলোপায়েই দেখব ব'লে এসেছি, মা-চণ্ডী এখন কি করছেন, ব্যেই মশাই ?

করালী বাবু কহিলেন,—এ সময় নিত্যই সে ঠাকুরঘরে থাকে, মায়ের আরতির গোছগাছ ক'রে দিয়ে শুভ-স্তোত্র পড়ে।

উল্লাসের সুরে হরিনারায়ণ বাবু কহিলেন—বাঃ। “যাদৃশী ভাবনা যস্ত সিদ্ধির্ভবতি তাদৃশী।”—মা চণ্ডী তা হ'লে এখন যথাস্থানেই, ভানই হয়েছে। সেইখানেই আমাদের দুজনকে নিয়ে চলুন, ব্যেই মশাই ; মায়ের এক রূপ কাল দেখেছি, আজ অন্য রূপ দেখে ধন্য হই। আপত্তি নেই ত কিছু ?

করালীবাবু মিনতির সুরে কহিলেন,—অমন কথা বলবেন না, হজুর,—আমাদের পক্ষে এ ত মস্ত সোভাগ্যের কথা ; কিন্তু সত্যই বসবেন না ?

হরিনারায়ণবাবুর সেই কথা,—কথার ত নড়চড় হবার উপায় নেই, ব্যেই মশাই ! তবে একটা কথা আছে, হঠাৎ আমরা পূজোর ঘরে গিয়ে মাঝে একবার অবাক ক'রে দেব, তাঁকে কিন্তু আগে খবর দেওয়া হবে না যে আমরা এসেছি ! আর এই দুই বুড়ো যদি আপনার পেছু পেছু বাড়ীর ভেতর ঢোকে তাতে অপরাধও বোধ হয় কেউ নেবেন না, কেন না—আমরা চলেছি ঠাকুরঘরে ধূলো পায়ে আমাদের চণ্ডীমাঝে দেখতে।

এ অঞ্চলের যিনি মুকুটমণি, ধনে, মানে, বংশগরিমায়, শৌর্য্যে, ঐশ্বর্য্যে—সকল বিষয়েই সকলের আগে যাঁহার নাম, সেই অসাধারণ মানুষটির নানাবিধ সদগুণের সহিত তাঁহার অদ্ভুত অদ্ভুত খেয়ালের কাহিনীও গল্পের মত সাধারণের সুপরিচিত ছিল। তাঁহার মুখের কথা কখনও নড়চড় হয় না, মনে মনে যাহা সঙ্কল্প করেন, কিম্বা যাহা সম্পন্ন

করিবেন বলিয়া কাহাকেও কথা দেন, তাহা শেষ না করিয়া কখনই নিরস্ত হন না। সুতরাং এই অদ্ভুত প্রকৃতির অতিমানুষটির মনের খেয়ালটুকু মিটাইবার জন্ত করালীবাবু যে বাস্তব হইয়া উঠিবেন, ইহা স্বাভাবিক।

বাহিরের প্রাক্কণ পার হইয়া ভিতরের অঙ্গনে প্রবেশ করিতেই বামদিকে দক্ষিণমুখী পূর্ব-পশ্চিমে লম্বা একখানি টানা দালান, তাহার কোলেই খোলা দরদালান। এইখানেই এই পরিবারের যাবতীয় পূজাপাঠ ও ক্রিয়াকর্মাদি সম্পন্ন হয়। পূজার দালানের মধ্যস্থলেই বেদীর উপর কুলদেবীর ঘট প্রতিষ্ঠিত, পার্শ্বেই পিতলের সিংহাসনে শালগ্রামশিলা, দেওয়ালে নানা দেবদেবীর সিন্দুর ও চন্দনচর্চিত চিত্র; দেবীর ঘটের পশ্চাতেই দক্ষিণা-কালিকার সুরহং আলেখ্য,—পুরোভাগে গন্ধোদকপূর্ণ তাম্রময় কোশা, পুষ্পপাত্র, শঙ্খ, ঘণ্টা, প্রভৃতি সজ্জিত; পিতলের পীলসুজ্জটির উপর পরিচ্ছন্ন প্রদীপ, তাহার নিম্নল আলোকধারায় এই মনোরম দেবস্থানটির স্নিগ্ধ সৌন্দর্য্য যেন নিখুঁতভাবেই ফুটিয়া উঠিয়াছে। ধূপ ও ধূনার স্নগন্ধে সমগ্র বাড়ীখানিই যেন আনন্দিত; আর গালিচার আসনখানির উপর বসিয়া, ভাবার্ভ দুইটি চক্ষু দেবীর আলেখ্যটির উপর নিবদ্ধ করিয়া, মধুর স্বরে বিশুদ্ধভাবে চণ্ডী স্তোত্র পাঠ করিতেছে—

জয়া মমাগ্রতঃ পাতু বিজয়া পাতু পৃষ্ঠতঃ ।
 নারায়ণী শীর্ষদেশে সর্কান্ধে সিংহবাহিনী
 শিবদূতী উগ্রচণ্ডা প্রত্যঙ্গে পরমেশ্বরী ।
 বিশালাক্ষী মহামায়া কোমারী শঙ্খিনী শিবা ।
 চক্রিণী জয়দাত্রী চ রণমত্তা রণপ্রিয়া ।
 দুর্গা জয়ন্তী কালী চ ভদ্রকালী মহোদরী ।
 নারসিংহী চ বারাহী সিদ্ধিদাত্রী সুখপ্রদা ।
 ভয়ঙ্করী মহারোদ্রী মহাভয়বিনাশিনী ॥

এমনই তন্ময়ভাবে চণ্ডী স্তব পাঠ করিতেছিল যে, তাহারই ঠিক

পশ্চাতে কয়েক জনের উপস্থিতি সে মোটেই লক্ষ্য করে নাই। পাঠের পর হেঁট হইয়া দেবীর উদ্দেশে মাথা নত করিতেই হরিনারায়ণ বাবু কহিলেন এই জন্মই আমি ঠাকুরঘরে হঠাৎ আসতে চেয়েছিলুম, ব্যেই মশাই! তাতেই না মায়ের এই নূতন রূপটি দেখতে পেলুম!

মুখ তুলিয়া চাহিয়াই চণ্ডী সচকিতে উঠিয়া পিতা ও পিতৃবয়সী দুই বর্ষীয়ান পুরুষের পদধূলি মাথায় লইল। মুখে তাহার কথা নাই, কিন্তু স্বাস্থ্যপুষ্টি সুন্দর মুখখানির উপর এমন একটি স্নিগ্ধ জ্যোতি ফুটিয়া উঠিয়াছিল, যাহার বুদ্ধি তুলনা নাই।

হরিনারায়ণ বাবু গাঢ়স্বরে কহিলেন,—এখন বুঝতে পারছি ব্যেই মশাই, মা আমার এই বয়সে কোথা থেকে পেয়েছেন এত তেজ! সে দিন মুগ্ধ হয়েছিলুম বাইরের রূপ দেখে, আজ আমার চক্ষু মন সব ভরে গেছে ভেতরের একটা রূপের দিবা জ্যোতিতে। বাপুলী যে চুপ করেই রয়েছে, কিছু বলছে না ত!

দেওয়ান রাধানাথ বাপুলী এতক্ষণ মুগ্ধের মতই চণ্ডীর দিকে চাহিয়া-ছিলেন, কর্তার কথায় যেন তাঁহার চমক ভাঙ্গিল; তিনি বেশ সহজভাবেই কহিলেন,—মাকে দেখে গিয়ে আপনি আমাকে যা বলেছিলেন, কোনও মানুষের সম্বন্ধে অত উঁচু রকমের প্রশংসা আপনার মুখে এ পর্য্যন্ত কখনও শুনিনি। লোকের চেহারা দেখে তার প্রকৃতিকেও ধরতে পারি বলে আমার যে একটা বদনাম আছে, তার উপরে নির্ভর করেই এতক্ষণ আমাদের এই নোতুন মা-টিকে চেনবার চেষ্টা করছিলুম।

চিনতে পেরেছো, না এখনও যাচাই চলবে তোমার?

যাচাই আমার হয়ে গিয়েছে।

কথা না শুনেই?

পাকা সোনা চোখে পড়লেই চেনা যায়, কষ্টিপাথরে কষবার দরকার হয় না।

উচ্চহাস্তে পূজার দালানটি মুখরিত করিয়া হরিনারায়ণ বাবু কহিলেন,—তা হ'লে আমি ঠকিনি বল !

বাপুলী মহাশয়ও সঙ্গ সঙ্গ উত্তর দিলেন,—এ পর্য্যন্ত বাপুলীর হরিনারায়ণ গাঙ্গুলীকে কেউ কোনও দিন ঠকাতে পারেনি ।

মুহূর্তমধ্যে হরিনারায়ণ বাবুর সুন্দর মুখখানি যেন কালো হইয়া গেল । চক্ষু বক্র করিয়া তীক্ষ্ণস্বরে তিনি কহিলেন,—এ যে তোমার খোসামোদের কথা হল বাপুলী, ঠকিনি আমি—সত্যি বলছ ! বরাবর জিতে এসে, তার পর হঠাৎ কি ভাবে অতি আপনার লোকের কাছে ঠকে গিয়ে মুস্ড়ে পড়েছি,—মুখের কথা রাখতে ছুটে এসেছি,—তা কি ভুলে গেলে, বাপুলী ?

দেওয়ান কিছুমাত্র অপ্রতিভ না হইয়া কহিলেন, তাতে আপনি ঠকেননি ;—এ নিয়ে কোন দিন আপনার সঙ্গে তর্ক করিনি, করবও না । তবে, মহামায়া আপনার মুখরক্ষা যে করবেন—এই সংযোগই তার সূচনা ।

এই বৃদ্ধের কথা চণ্ডী তাহার পিতার সহিত অবাক হইয়াই শুনিতেছিল, রহস্যময় কথা, বুঝিবার উপায় নাই ।

হরিনারায়ণবাবু আবার উচ্চ হাস্যধ্বনিতে সকলকে চমকিত করিয়া কহিলেন,—কথার পীঠে একটা পারিবারিক কথা এসে গিয়েছিল, দেওয়ানজাই যখন তার নিষ্পত্তি ক'রে দিলে, আর কথা নেই । এবার আমাদের কাজের কথাই হোক ।—হাঁ, কাল তোমাকে অমনি অমনিই দেখে গিয়েছি মা চণ্ডী, তুমি হয় ত মনে মনে দুঃখ করেছ—বুড়ো ভারি রুপণ, খালি হাতে পাত্রীকে পাকা দেখে গেল ! নয় কি মা ?

চণ্ডী মুখখানি তুলিয়া অকুণ্ঠিতভাবেই কহিল,—তা কেন, আমি যে ঠিক এর উল্টো ভেবেছি, বাবা !

বাবা !—এ সম্বন্ধে হরিনারায়ণবাবুর স্বাভাবিক দৃঢ় হৃদয়টি সহসা

যেন হুলিয়া উঠিল, সে ভাব দমন করিয়া তিনি কহিলেন,—কি ভেবেছো, মা ?

গাঢ়স্বরে চণ্ডী উত্তর দিল,—যে রকম ঘট ক'রে আপনি পাকা দেখেছেন আমাকে, তেমন ঘট এ অঞ্চলে কেন, সারা বাঙ্গালাদেশে কেউ আর কখনও করে নি।

হরিনারায়ণবাবু বাপুলীর দিকে চাভিয়া কহিলেন,—শুনছ বাপুলী, আমার মায়ের কথা !

বাপুলী কহিলেন,—এই জন্তই ত বলেছিলুম আগেই, খাটি সোনা চোখে পড়লেই চেনা যায়।

হরিনারায়ণবাবু কহিলেন,—তোমার ও-কথার এই উত্তর হচ্ছে মা, বাঙ্গালা দেশে কস্মীর অভাব নেই, তবে কি জান মা, কস্মের সন্ধান দেবার মত লোকেরই অভাব। দিতে পারে অনেকে, কিন্তু তার দেওয়াটাকে সার্থক করবার মত বস্তুটিও ত দেখিয়ে দেওয়া চাই। কাল আমি বখন কল্পতরু হয়েছিলুম, কোনও সাধারণ মেয়ে হলে কি চাইত বলা ত ! হয় ত মুখ দিয়ে চাইবার কথাই কুটত না, না হয় লজ্জায় জড়সড় হয়ে বলত, আপনি না দেবেন ; সাহস একটু যার বেশী থাকত, খপ্ করেই সে চুড়িসুটের অষ্ট অলঙ্কার চেয়ে নিত, কিম্বা এই ধরণের অল্প কিছু। কিন্তু তুমি চাইলে এমন জিনিষ, বাঙ্গালার কোনো মেয়ে কোন দিন যা চায়নি—চাইবার কল্পনাও তারা কখনো করেনি। একেই বলে মা কস্মের সন্ধান দেওয়া, তাকে জাগিয়ে তোলা, আমার দেওয়াকে সার্থক করা। তুমি তা করেছ, মা। আর, এটা ঠিক যে, তুমি যা নিয়েছ তার চেয়ে, বরং বেশী দিয়ে। আমার বিচারে তুমি করেছ তোমার জন্মভূমির জন্ত—তোমার দেশের মেয়েদের জন্ত একটা উঁচু রকমের ত্যাগ।

চণ্ডী মুখখানি নীচু করিয়া কহিল,—আমাকে আপনি লজ্জা দিচ্ছেন

বাবা, শুধু শুধু বাড়িয়ে ; আপনি নিজে যে কি কীর্ত্তি এ অঞ্চলে প্রতিষ্ঠা করলেন—

বাধা দিয়া হরিনারায়ণবাবু কহিলেন,—এ কীর্ত্তি তোমার মা, তোমার । হাঁ, এবার আসল কাজটাই শেষ করি । বাপুলী, ব্যাগটি এবার খোল ত—

বাপুলী মহাশয় তাঁহার হাতের লম্বা ব্যাগটি খুলিতেই তাহার ভিতরের রত্নগচিত স্বর্ণময় দ্রব্যগুলির দ্যুতি সকলের চক্ষুকে আকৃষ্ট করিয়া তুলিল ।

হরিনারায়ণবাবু ব্যাগটির ভিতর হাতটি ঢুকাইয়াই হাসিয়া কহিলেন,—তুমি নিশ্চয়ই বুঝতে পেরেছ মা, তোমার এই নতুন বুড়ো ছেলোটির কাণ্ডকারখানা সবই বেয়াড়া রকমের ! কাজেই খেয়ালী ছেলোটি যদি তার নতুন মা'টিকে নিজের ইচ্ছামত সাজায়, তাতে কিন্তু আপত্তি তুলতে পারবে না—তা আমি ব'লে রাখছি ।

কথার সঙ্গে সঙ্গে ব্যাগের ভিতর হইতে হাতখানি বাহির করিতেই দেখা গেল, অপূর্ব কারুকার্যখচিত দুইগাছি স্বর্ণময় অতিকায় কঙ্কণ ; নিশ্চয়পারিপাটো সে দুটি যেমন চমৎকার, আয়তনে ও পরিমাণে তেমনই গুরুভার । চণ্ডীর হাত দুইখানি তুলিয়া কঙ্কণ দুইগাছি সবভে পরাইয়া দিয়া হরিনারায়ণবাবু কহিলেন,—এই হচ্ছে মা আমাদের মা-লক্ষ্মীদের সত্যিকারের ভূষণ, হাতের এই কঙ্কণ এককালে ছিল তাঁদের অলঙ্কার আর হাতিয়ার—একাধারে দুইই, তাঁরা এই কঙ্কণ পরেই আয়তী বজায় রাখতেন, আবার দরকার পড়লে—এই দিবে আত্মরক্ষা করতেন । এর একটি ঘা তাগ্ ক'রে যদি রগ ঘেঁষে মাথায় লাগানো যায়, অতি বড় পাকা মাথাও তখনই ভেঙ্গে পায়ের তলায় লুটিয়ে পড়ে । কিন্তু মা, এ কালের মা-লক্ষ্মীরা এমন গর্বে'র গয়না ছেড়ে চুড়ি ব্রেসলেট সার করেছে, যেমন সৌখীন বাবুরা বাঁশের পাকা লাঠির সঙ্গে স্বাস্থ্যটুকুও হারিয়ে সখের খাতিরে ছড়ি ধরেছেন । এখন প্রশ্ন এই আমার, তোমার এ অলঙ্কার অপছন্দ নয়, মা ?

চণ্ডী উত্তর দিল,—আমার দাদামহাশয় বলতেন, বিয়ের সময় তোকে আমি এমন এক জোড়া কঙ্কণ গড়িয়ে দেব চণ্ডী, যা দেখে সবাই অবাক হয়ে চেয়ে থাকবে। তিনি আজ স্বর্গে, কিন্তু সেই মহাপুরুষের মনের সাধ আপনিই পূর্ণ করলেন, বাবা! এখন থেকে সকাল সন্ধ্যা দুটি বেলা আপনার দেওয়া এ দুটি জিনিস ভক্তির সঙ্গে মাথায় ঠেকিয়ে এই দিনটির কথা আমি স্মরণ করব।

হরিনারায়ণবাবু উচ্ছ্বসিতস্বরে কহিলেন,—শুনলে ত বাপুলী। তুমি না বলেছিলে, এত খরচ ক'রে আপনি কঙ্কণ গড়ালেন, আজকালকার মেয়ে ত, পছন্দই হয় ত করবে না।

বাপুলী মহাশয় কহিলেন,—আপনার তপশ্চায় তুষ্ট হয়ে আপনার কুলদেবী যে নির্জনে ব'সে আপনার মনের মত কুলবধূটি সৃষ্টি ক'রে রেখেছেন, এ সন্ধান ত তখন পাইনি।

হরিনারায়ণবাবু হাসিয়া কহিলেন,—সাধে কি আমি আমার চণ্ডীমাকে নিজের ইচ্ছামত সাজে আজ সাজাতে এসেছি, বাপুলী।

ব্যাগের ভিতর হইতে তাহার পর বাহির হইল এক ছড়া হেমচাঁপার মালা ও রত্নখচিত স্বর্ণময় মুকুট। এই দুইটি অভিনব অলঙ্কারের উজ্জ্বল সন্ধ্যার স্নিগ্ধ আলোকে উদ্ভাসিত হইয়া উঠিল। হরিনারায়ণবাবু কহিলেন,—যেমন তোমার নাম আর তুমি, আমিও ঠিক তেমনই তোমার স্বপ্ন, আর আমার দেওয়া য়োতুক! এ দুটি অলঙ্কার আমার লোহার সিন্দুকে তোলা ছিল মা, আমার বৃদ্ধ পিতামহ মহেশ্বর গাঙ্গুলী এই মালা আর মুকুট গড়িয়েছিলেন আমার প্রপিতামহীর জন্ত। আমার পিতামহীও এই দুই অলঙ্কার পরতেন শুনেছি, কিন্তু তার পর গাঙ্গুলী পরিবারে ধারা কুলবধূ হয়ে প্রবেশ করেন, এ দুটো বস্তুর ভার বহন করবার মত সামর্থ্য তাঁদের কারুরই ছিল না। এই ভার এখন তোমাকে বহন ক'রে গাঙ্গুলী পরিবারের লুপ্ত শক্তিকে আবার ফিরিয়ে আনতে হবে, মা।

খাটি সোনায় নিশ্চিত একই আকারের চল্লিশটি বড় বড় চাঁপা, তাহাদের সংযোগে এই অপূর্ব মালা গ্রথিত। হরিনারায়ণবাবু চণ্ডীর গলায় প্রায় দুইশত ভরি ওজনের এই অভিনব মালা পরাইয়া দিলেন, তাহার পর সেই বিচিত্র রত্ন-মুকুটখানি তাহার মাথায় আঁটিয়া দিয়া হাসিয়া কহিলেন,—এইবার আমাদের মাকে ঠিক মানিয়েছে।

চণ্ডী একে একে সকলেরই পদতলে নত হইয়া শিষ্টতার পরিচয় দিল। নববস্ত্রালঙ্কার ধারণের পর অধিকাংশ স্থলেই মেয়েরা এইভাবে প্রণম্যগণের চরণ বন্দনা করিয়া থাকে। আনুষ্ঠানিক হিন্দু সমাজে এই প্রথা সুপরিচিত।

হরিনারায়ণবাবু কহিলেন,—বাঃ ! অলঙ্কারের ভরে চণ্ডীমা আমাদের মোটেই আড়ষ্ট হন নি।

করালীবাবু হাসিতে হাসিতে এই সময় কহিলেন,—এ সব দিক্ দিয়ে মেয়ে আমার বে-পরোয়া। হজুর হয় ত গুনলে আশ্চর্য্য হবেন,—চালের একমোণি বস্তা চণ্ডী মাথায় তুলে অনায়াসে ওপর নীচে ওঠানামা করেছে এমন কত বার।

হরিনারায়ণবাবু কহিলেন,—একমোণি বোঝা বহন করা ত আমার মায়ের কাছে ছেলেখেলা, ব্যেই ; কিন্তু যে বিষম বোঝার ভার আমি এঁর মাথায় চাপাবো—এর পরে গুনবেন তার কাহিনী। তবে, আমি, ঠিক জানি, মা আমার পেছপাও হবেন না কিছুতেই।—এইবার মা তোমাকে আর একটি জিনিস দেব এইটেই হচ্ছে আমার সবার শেষ আর সব চেয়ে সেরা যৌতুক।

বলিতে বলিতে তিনি সর্পাকৃতি স্বর্ণময় একটি বিচিত্র বস্তু বাহির করিলেন। সেই জিনিস চণ্ডীর সম্মুখে প্রসারিত করিয়া প্রদান করিলেন,—বলতে পারো মা, এ জিনিসটি কি ?

চণ্ডী মুখ টিপিয়া হাসিয়া উত্তর দিল,—চাবুক ব'লে মনে হচ্ছে।

ঠিক ধরেছ মা, চাবুকই বটে ; তুমি এ রকম চাবুক দেখেছ ?
দেখেছি। দাদা মহাশয় আমায় এই রকমেরই একটা চাবুক
দিয়েছিলেন। তবে সেটা ছিল চামড়ার—

আর এটা হচ্ছে সোনার। আমি এটি তোমার হাতে দিচ্ছি কেন
শুনবে ? আমার বাড়ীতে আছে একটা ভারি বেয়াড়া গাধা, সেটাকে
সায়েন্তা করবে তুমি ; সেই জন্যই এই চাবুক।

মুহু হাসিয়া চণ্ডী প্রশ্ন করিল,—গাধাকে সায়েন্তা করতে চামড়ার
চাবুক ত বথেষ্ট, সোনার চাবুকের কি দরকার বাবা ?

হরিনারায়ণবাবু পরিপূর্ণ দৃষ্টিতে চণ্ডীর কোঁতুকোজ্জ্বল সুন্দর মুখখানির
দিকে চাহিলেন, তাহার পরই তাঁহার সোম মুখখানিকে কঠিন করিয়া
তীক্ষ্ণস্বরে তিনি উত্তর দিলেন,—আমি বার কথা তোমাকে বলেছি মা,
সে ত সাধারণ গাধা নয়—সেটাও যে সোনার গাধা, তাই তাকে সংযত
করতে প্রয়োজন—সোনার চাবুক। এই নাও মা ধরো, আর এই সঙ্গে
ননে রেখো মা আমার কথা।

চণ্ডী হাত বাড়াইয়া এই রহস্যময় পুরুষটির হাত হইতে সেই অপূর্ব
স্বর্ণময় প্রহরণটি গ্রহণ করিল।

চার

বাণুলীর এই খেয়ালী জমিদারটির প্রভাব, প্রতিপত্তি ও দপদপা দেখিয়া বিভিন্ন গরগণার লোক ভাবিত, জন্মান্তরের অতি বড় পুণ্যের জোর না থাকিলে মানুষ এতটা ভাগ্যবান হইতে পারে না। কিন্তু তাহারা যদি এই ভাগ্যধরটির পারিবারিক সুখ-সৌভাগ্যের খবর রাখিত, তাহা হইলে তাহারা বিস্ময়ে স্তম্ভিত হইয়া দেখিতে পাইত, বিপুল ধন-সম্পত্তি ও একাধিক পরগণার অধিপতি হইয়াও এই অতিমানুষটির দুঃখের অস্ত্র নাই।

শৈশবেই হরিনারায়ণবাবু পিতৃহীন হন, কিন্তু স্নেহময়ী জননীর আদর ও আশ্রিতা আত্মীয়গণের বিপুল পরিচর্যায় তিনি পিতার অভাব উপলব্ধি করিতে পারেন নাই। যৌবনে যখন মাতৃহীন হইলেন, সহধর্মিণী সুলোচনার সাহচর্য্য তাঁহাকে সাহুনা দিয়াছিল। কিন্তু যৌবনের অপরাহ্নে যে দিন সুলোচনা তাঁহার বাহুপাশ ছিন্ন করিয়া পরলোকের পথে মহাপ্রস্থান করিল, বিশাল জমিদারী, বিপুল ঐশ্বর্য্য, দুর্বার প্রতাপ তাহাকে রক্ষা করিতে পারিল না, সেইদিন হরিনারায়ণবাবু প্রথম উপলব্ধি করিলেন শোকের মর্ম্মস্বাদ যাতনা—প্রিয়বিরহে সহস্র অতীত স্মৃতির নিদারুণ দংশনের জ্বালা। বিশাল ভবনে আশ্রিত প্রতিপালিত আত্মীয় অনাত্মীয়দের সংখ্যা হয় না, কিন্তু কে দিবে সাহুনা! সাধ্বী সুলোচনা যে তাঁহার অঞ্চলখানি প্রসারিত করিয়া ইহাদিগকে রক্ষা করিতেন, করুণাময়ী আশ্রয়দাত্রীর অকাল-বিয়োগে সকলেই আত্মহারা। দুই বৎসরের শিশু, সুলোচনার একমাত্র উপহার গোবিন্দকে বিশাল বন্ধোমধ্যে চাপিয়া হরিনারায়ণ বাবু পত্নীশোক ভুলিতে প্রয়াস পাইলেন,—পারিলেন না। পুত্র পিতার আদরে ভুলিল না, অসংখ্য পরিচারিকা ও পরিজনরা শোকার্ত শিশুকে লইয়া বিব্রত হইয়া

উঠিল, শিশু কিছুতেই প্রবোধ মানিতে চাহে না, তাহার মুখে শুধু আকুল উচ্ছ্বাস—মা কাছো যাবো ।

শোকাতুর পিতা স্তব্ধ হইয়া ভাবেন, তিনিও ত শৈশবে পিতৃহারা হইয়াছিলেন, যৌবনে মাকে হারাইয়াছিলেন, কিন্তু এমন ভাবে ত আত্মহারা হন নাই !

পৌরুষের অভিমান তৎক্ষণাৎ চল্লিশ বৎসরের উচ্চাকাঙ্ক্ষী দান্তিক ভূস্বামীর চিত্তে তুলিল বিক্ষোভ ! সাধারণ দশজনের মত তিনিও শোক-মর্ষিত দেহখানি লইয়া লোকের মোখিক সহানুভূতির ভিখারী হইবেন ! বাহারা তাঁহার সম্মুখে আসিয়া দাঁড়াইতে সাহস পায় না, এই সূত্রে ঘনিষ্ঠতা গাঢ় করিবার অবকাশ পাইবে ! এই চিন্তার সঙ্গে সঙ্গে শোকের আবর্তকে সবলে রুদ্ধ করিয়া, তিনি প্রচণ্ড উৎসাহে জমিদারীর কাজে লিপ্ত হইলেন । সত্যশোকাতুর হৃজুরের এই আকস্মিক উদ্দাম কর্ম্মলিপ্সায় সেরেস্তায় শিহরণ উঠিল । পরিজন ও পরিচারিকাদের উপর কঠোর আদেশ হইল,—ছেলের কান্না তিনি পছন্দ করেন না, অতএব সাবধান !

সকলেই কর্তার সম্বন্ধে সচেতন থাকিত । জানিত, এখানে পাণ হইতে চুণটুকু খসিলেই মুস্কিল ; খোকার কান্না যদি কোনও দিন হৃজুরের কানে গিয়া বাজে, কাহারও নিস্তার থাকিবে না । কিন্তু খোকা কিছুতেই ছ'দও চুপ করিয়া থাকে না । শেষে কান্না থামাইবার উপায় স্থির হইয়া গেল । এক পরিচারিকা কলিকাতার কোনও এক রাজপরিবারে কিছুদিন কাজ করিয়াছিল । রাজবাড়ীর রোরুণমান শিশুদের সহজে শাস্ত করিবার কৌশলটুকু শিক্ষা করিয়াই সে বাণুলীর বাবুদের বাড়ীতে ঢুকিয়াছিল । তাহার ব্যবস্থায় সেই কৌশলটুকু এ ক্ষেত্রে কাজে লাগিয়া গেল, পরিমাণ-মত মরফিয়া ছুধের সহিত যোগ দিয়া শিশুকে সহজে ঘুম পাড়াইয়া দিল । অতঃপর শিশু সর্বক্ষণই ঘুমায়, কর্তার কানে কান্না তাহার পৌঁছায় না ।

বাহিরে কর্তা খুবই কঠিন, সকলেই ভাবে, কি সহ্য গুণ ; অত বড়

শোকটায় একটু আহা উহ নাই ! কিন্তু ভিতরটির কি অবস্থা, কে তাহার সন্ধান রাখিবে ! প্রত্যবে অশ্রুসিক্ত উপাধানটি উপলক্ষ করিয়া এই কঠিন পুরুষের মনোবৃত্তি নির্ণয় করিবার অবসর কেহ পাইত কি ?

ছয়টি মাস এই ভাবে কাটিল । কঠিন পুরুষ বাহিরের সেরেস্তার জমিদারী গদীতে বসিয়া কঠোরভাবে জমিদারী শাসন করেন, মধ্যাহ্নে ও নিশীথে নিজের সুসজ্জিত কক্ষের কোমল শয্যায় দেহখানি ঢালিয়া দিয়া স্বর্গীয়া সহধর্মিণীর স্মৃতি লইয়া ভাবেন । কিন্তু ভাবনাটুকুরও পরিসমাপ্তি হইয়া গেল এক অপ্রত্যাশিত ঘটনায় ।

অষ্টকোটের রাজার কোপে ও কন্ঠাকুলের ধনকুবের মহাজনের ঋণের চাপে পড়িয়া পার্শ্ববর্তী পরগণার অন্ততম ব্রাহ্মণ ভূস্বামী রাজা রেবতীমোহন রায়চৌধুরী বাণুলীর গাঙ্গুলী বাবুর শরণাপন্ন হইলেন । হরিনারায়ণ বাবু প্রায় এগার লক্ষ টাকা বাহির করিয়া দিয়া রাজাকে যেমন রক্ষা করিলেন, কৃতজ্ঞ রাজাও তেমনি তাঁহার এষ্টেট পরিচালনার সর্বময় কর্তৃত্ব তাঁহার রক্ষাকর্তার উপর অর্পণ করিয়া নিশ্চিত হইলেন । এই সূত্রে দুইটি বর্ষিক পরিবারের মধ্যে ঘনিষ্ঠতা গাঢ় হইয়া উঠিল এবং এক দিন সকলেই সবিস্ময়ে শুনিল, রাজা রেবতীমোহনের সপ্তদশী তরুণী কন্ঠা মাধুরী দেবী বাণুলীর গৃহিণী-শূত্র শুদ্ধান্তে রাণীর মর্যাদায় প্রবেশ করিতেছেন ।

হরিনারায়ণ বাবুর খেয়ালের অস্ত ছিল না সত্য, কিন্তু খেতাবের মোহ কোনও দিন তাঁহাকে আকৃষ্ট করিতে পারে নাই । তাঁহার অসংখ্য প্রজার তিনি প্রাণের রাজা,—পরগণার সর্বত্র তাঁহার আখ্যা—বাণুলীর রাজাবাবু । কোনও সরকারী প্রতিষ্ঠানে অর্থ প্রদানের প্রয়োজন হইলে তিনি সেই সঙ্গে কলেक्टर বা কমিশনারকে লিখিয়া পাঠান—টাকার বিনিময়ে তাঁহাকে যেন কোনও খেতাব দিয়া লজ্জিত না করণ হয় ।

যে খেয়ালের বশে হরিনারায়ণবাবু বিবিধ অসাধ্যসাধন করিয়া থাকেন, রাজা রেবতীমোহনের বয়স্হা কন্ঠাকে এ ভাবে সহসা বিবাহ

করাও তাঁহার সভাবসিদ্ধ খেয়ালের অন্তর্গত। অষ্টকোটের রাজা বংশমর্যাদায় হীন হইয়াও রাজা রেবতীমোহনের কণ্ঠার পাণিপ্ৰার্থী হন এবং দুই স্ত্রেই কণ্ঠাকুলের ধনী মহাজন রাজা বাহাদুরকে বিব্রত করিয়া তুলেন। হরিনারায়ণ বাবু রাজা রেবতীমোহনকে ঋণমুক্ত করিলেন বটে, কিন্তু অষ্টকোটের চরিত্রহীন দুর্দ্ধর্ষ রাজা অক্টপাসের মত অষ্টপদ বিস্তার করিয়া রাজকণ্ঠাকে আয়ত্ত করিতে বন্ধপরিকর হইয়া উঠেন। রাজা রেবতীমোহন ব্যয়বাহুল্যে রাজ্যোচিত মর্যাদাটুকু রক্ষা করিতে যে পরিমাণে সচেতন ছিলেন, মামলাবাজী বা লাঠাল্যাঠি ব্যাপারে সেই অনুপাতে ছিলেন উদাসীন। অষ্টকোটকে এ বিষয়ে বেপরোয়া দেখিয়া তিনি সভয়ে দ্বিতীয়বার হরিনারায়ণবাবুর শরণাপন্ন হইলেন। অষ্টকোটের রাজাদের সহিত বাগুনীর বাবুদের বংশানুক্রমে একটা মনোমালিন্য চলিয়া আসিতেছিল। সমস্ত শুনিয়া খেয়ালী জমিদারের রক্ত উষ্ণ হইয়া উঠিল; তলে তলে অষ্টকোটের যখন এই চেষ্টা চলিয়াছিল, তখন সকলকে চমৎকৃত করিয়া অসংখ্য লাঠিয়াল-পরিবেষ্টিত নবপরিণীতা রাজকণ্ঠার শিবিকা একদা বাগুনীর প্রাসাদে প্রবেশ করিল।

তাঁহার পর আরও বাইশটি বৎসর কাটিয়া গিয়াছে। বাগুনীর প্রাসাদে বহু পরিবর্তন হইয়াছে। মাতৃহীন দুই বৎসরের শিশু গোবিন্দ এখন চব্বিশ বৎসরের যুবা। মাতৃবিয়োগের পর এই শিশু পিতার মনে যে সংশয় তুলিয়াছিল, আজও তাহাকে লইয়াই যত আশঙ্কা, যত সমস্তা ও উদ্বেগ।

অবশ্য পিতৃপুরুষদের আকৃতিগত সৌন্দর্য্য হইতে গোবিন্দকে বিধাতা-পুরুষ বঞ্চিত করেন নাই। তবে এই বয়সে এত বড় অভিজাত বংশের ছেলের চেহারা যেন লাবণ্য ও কমনীয়তা থাকা উচিত, গোবিন্দের দেহে তাঁহার অভাব দেখা যায়। দেহের রং খুব সুন্দর হইলেও কেমন যেন ফ্যাঙ্কাসে, মুখখানি যদিও বেশ ঘোরালো, কিন্তু কোমলতা বর্জিত;

যক রক্ষ ও কর্ণ, এই বয়সেই রীতিমত পাকিয়া গিয়াছে। গৌকের চুলগুলি পিঙ্গলবর্ণ, মাথার চুলেও তাহার আভা। এইগুলি যেমন তাহার আকৃতিগত ক্রটি, তেমনই কয়েকটি বিশেষত্বও পৌরুষের দিক দিয়া প্রশংসনীয়। গোবিন্দের ছয় ফুট দীর্ঘ দেহযষ্টি, আজানুলম্বিত দুটি বাহু, অসাধারণ টিকোলো নাসিকা ও একবোড়া দীর্ঘায়ত চক্ষু সকলেরই দৃষ্টি আকর্ষণ করে।

ইহা ত গেল আকৃতির কথা। কিন্তু প্রকৃতির দিক দিয়া তাহার ক্রটি প্রচুর। মানসিক ব্যাধি ও মস্তিষ্কের দুর্বলতায় সে একবারেই অকর্মণ্য। বাহিরের কাহারও সহিত তাহার মিশিবার অধিকার নাই, ক্ষমতাও নাই। বিষয়-সংক্রান্ত কোনও কার্যেই এ পর্য্যন্ত কর্তার তরফ হইতে তাহার উপর ডাক পড়ে নাই। নামেই সে বাড়ীর জ্যেষ্ঠ সন্তান, বিষয়বুদ্ধি ত দূরের কথা, আত্মসম্মান বজায় রাখিবার জ্ঞানটুকুর পর্য্যন্ত তাহার অভাব। পরিচারক-পরিচারিকারা তাহাকে গ্রাহ্য করেনা, আশ্রিত আত্মীয় পরিজনরা তাহাকে উপেক্ষা করিয়া চলে। কেহ তাহাকে বিজপ করিলে তাহার মনে অভিমান আসে না, আদেশ কেহ অবহেলা করিলেও তাহার চক্ষুর জ্ব দুইটি কুঞ্চিত হইয়া উঠে না। সুতরাং এমন নির্বিকার নিস্তেজ নগণ্য বংশধরকে লইয়া যে এই বংশের মালিকের চিন্তা বিক্ষুব্ধ হইয়া উঠিবে তাহাতে আর কথা কি ?

পক্ষান্তরে, কর্তার দ্বিতীয় পক্ষের পুত্র গোবিন্দের বৈমাত্রেয় ভাই— নিবারণ বয়সে প্রায় চারি বৎসরের কনিষ্ঠ হইয়াও যেন সকল বিষয়েই জ্যেষ্ঠকে বহু পশ্চাতে ফেলিয়া কৃতী পিতার ঠিক পাশটিতে গিয়াই দাঁড়াইয়াছে। প্রয়োজন পড়িলে, কর্তা তাহাকে কত গুরুতর কাজেই নিয়োগ করেন,—পিতার বহুগুণ পুত্রে বর্তাইয়াছে; কি অহাৰ দাপট এই তরুণ বয়সেই; সেরেস্তার কর্মচারিগণ ভয়ে তটস্থ, বাড়ীর মধ্যে দাস-দাসী আত্মীয়-পরিজন তাহার সম্মুখে দাঁড়াইয়া কথা কহিতে কাঁপিয়া

অস্থির হয় : পুত্রের প্রতাপ ও ঔদ্ধত্য পিতারও পরম প্রীতিপ্রদ, প্রায়ই সমর্থন করিয়া বলেন,—এই ত চাই, গোড়ায় দাপট দেখাতে পারলে তবেই শেষে নামের জোরে শাসন চলে ।

জ্যেষ্ঠের প্রতি কর্তার একান্ত উপেক্ষা ও কনিষ্ঠের প্রতি আন্তরিক সহানুভূতি লক্ষ্য করিয়া এষ্টেটের সকলের মনেই এই ধারণা বদ্ধমূল হইয়াছিল যে, অদূর-ভবিষ্যতে কনিষ্ঠ নিবারণই তাহাদের ভাগ্যবিধাতা হইবে ।

এই ধারণাটুকু মনে স্ফূট হইবার মূলে যে কারণটুকু ছিল, তাহা এইরূপ :—

পুরুষানুক্রমে এই বংশের প্রচলিত পদ্ধতি—সম্পত্তি বিভক্ত হইবার উপায় নাই ! বংশের জ্যেষ্ঠই এষ্টেটের উত্তরাধিকারী হইয়া সর্বময় কর্তৃত্ব গ্রহণ করেন, কনিষ্ঠগণ নির্দ্ধারিত বৃত্তির অধিকারী থাকেন মাত্র । উচ্চতন বহু পুরুষ ধরিয়া এই প্রাচীন বিধি অনুসারে বাণুলীর গাঙ্গুলীবংশ ও তাঁহাদের অধিকৃত বিপুল সম্পত্তি পরিচালিত হইয়া আসিতেছে । ঐশ্বর্যসূত্রে এই গাঙ্গুলী পরিবারের যে পরিমাণ বাড়বাড়ন্ত, বংশবৃদ্ধির দিক দিয়া তাহার অভাব দেখা যায় । বিধাতাপুরুষ যেন ভাবিয়া চিন্তিয়া হিসাব করিয়াই বরাবর এই বংশে একটি করিয়া পুত্র যোগান দিয়াছেন । কেবল বর্তমান বংশপতি হরিনারায়ণ গাঙ্গুলীর দুর্ব্বার দাপটেই যেন বিধাতার নিয়মভঙ্গ হইয়াছে । এ বংশে একমাত্র ইনিই দুই পক্ষে দুই পুত্র পাইয়াছেন এবং এই সূত্রে এই প্রথম উত্তরাধিকার প্রসঙ্গে একটা সংশয় আত্মপ্রকাশ করিয়াছে ।

পাঁচ

শ্রামাপুরের নায়েবের পত্রে চণ্ডীর সম্বন্ধে বিস্তারিত সংবাদ পাইয়াই হরিনারায়ণ বাবু গৃহিণী মাধুরী দেবীকে কহিয়াছিলেন,—চমৎকার একটি মেয়ের সন্ধান পেয়েছি।

ইতিপূর্বেই মাধুরীদেবী স্বামীকে উপদেশ দিয়াছিলেন, গোবিন্দের যে রকম মতিগতি ও বুদ্ধিবুদ্ধির অভাব, তাতে কিছুতেই তার বিয়ে দেওয়া উচিত নয়।

স্ত্রীর কথায় হরিনারায়ণ বাবু কিছুক্ষণ তাহার দিকে চাহিয়া একটি সুদীর্ঘ নিশ্বাস ফেলিয়া বলিয়াছিলেন,—কথাটা ভাববার মত বটে!

ইহার পরেই উঠে গোবিন্দকে রাখিয়া নিবারণের বিবাহের কথা। কর্তা গৃহিণীর কথা শুনিয়া হেঁয়ালীর ভাষায় যে মন্তব্য প্রকাশ করিতেন, তাহাই তাঁহার প্রাণের কথা ভাবিয়া মাধুরীদেবী মনে মনে ইহাই সাব্যস্ত করিয়া লইয়াছিলেন যে, জ্যেষ্ঠের মর্যাদাটুকু লইয়াই গোবিন্দ বৃত্তিভোগী অবস্থায় তাহার নিঃসঙ্গ জীবনটা কাটাইয়া দিবে; স্বাস্থ্য, প্রকৃতি ও পরমায়ু সম্বন্ধে সন্দেহভাজন এই ছেলেকে যেমন সংসারধর্মের লিপ্ত হইতে বিরত থাকিবে, তেমনই বাণুলীর রাজগদীর সংস্পর্শ হইতে দূরেই থাকিয়া যাইবে।

সুতরাং কর্তা যে চমৎকার মেয়েটির প্রসঙ্গ তুলিয়াছিলেন, সেটা নিজ-পুত্র নিবারণের সম্পর্কেই সাব্যস্ত করিয়া মাধুরীদেবী নাসিকা কুঞ্চিত করিয়া কহিয়াছিলেন,—শুধু দেখতে শুনতে চমৎকার হ'লে ত চলবে না, ঘরও চমৎকার হওয়া চাই।

কর্তা হাসিয়া কহিলেন,—কিন্তু শাস্ত্রকাররা লিখে গেছেন—স্ত্রীরঙ্গঃ দুহুলাদপি।

গৃহিণী ঝঙ্কার দিয়া ইহাতে মন্তব্যপ্রকাশ করিয়াছিলেন,—সে শাস্ত্র পুড়িয়ে ফেলো । রাজকন্ঠা না হলে নিবারণের মনে ধরবে না, আর আমারও এই ধনুর্ভঙ্গ পণ,—সে ত তুমি জানই ; মেয়েটি কোথাকার শুনি ?

কর্তা গম্ভীরভাবেই কথাটার উপসংহার করেন,—তা হ'লে আর শুনে কাজ নেই ! তোমার এই ধনুর্ভঙ্গ পণটির কথা আমার মনেই ছিল না ; যাই হোক, এর পর তোমার এ পণ মনে রেখেই আমি নিবারণের কনে খুঁজব ।

দুই দিন পরেই কর্তা গৃহিণীকে ডাকিয়া কহিলেন,—গোবিন্দের বিয়ের দিনস্থির ক'রে এলুম, আসছে সাতাশে শুভকাজ ।

কর্তার কথাগুলি বজ্রধ্বনির মত গৃহিণীর কানে নির্ঘাত হইয়া বাজিল । গোবিন্দের বিবাহ । তিনি কি ভুল শুনিলেন ! বিশ্বয়কম্পিতকণ্ঠে প্রশ্ন আসিল,—কার বিয়ে বললে ?

সহধর্মিণীর বিশ্বয়াচ্ছন্ন মুখখানির উপর বদ্ধদৃষ্টিতে চাতিয়া কর্তা উত্তর দিলেন,—তোমার বড় ছেলের ।

পরক্ষণে গুঞ্চকণ্ঠে গৃহিণীর সশ্লেষ উক্তি,—সত্যি ! বড় ছেলের আইবুড়ো নামটাও তা হ'লে খণ্ডাবার জন্ত কোমর বেঁধে লোগেছ বল ! এটি আগেই প্রয়োজন বটে !

কোথায় গৃহিণীর ব্যথা, তাহা উপলব্ধি করিয়াই কথাপ্রসঙ্গে কর্তার প্রত্যুত্তর,—এত দিন এটা প্রয়োজনীয় ব'লে মনে করিনি ; কিন্তু কন্ঠাটিকে দেখেই যেমনই মনে হ'ল চমৎকার, তখনই তাকে নেবার কথাটা দিয়ে ফেলি । গরীবের মেয়ে, নিজের রূপগুণ যতই থাক, বাপের নামডাক, খেতাব বা বড়মানুষীয়ানার কিছুই নেই । এ দিকে নিবারণের সম্বন্ধে তোমার ধনুর্ভঙ্গ পণ, যেমন তেমন ঘরের মেয়ে তোমার মনে ধরবে না—রাজকন্ঠা চাইই ; কাজেই নিজের মুখের কথাটুকু রাখবার জন্ত গরীবের এই মেয়েটিকে গোবিন্দের ঘাড়ে চাপিয়ে দিবে তার আইবুড়ো নাম খণ্ডাবার ব্যবস্থাই করা গিয়েছে ।

অখণ্ড মনোযোগের সহিত স্বামীর কথাগুলি শুনিয়া মাধুরীদেবী এবার গভীরভাবেই মন্তব্য প্রকাশ করিলেন,—ভালই হয়েছে, জমিদারের জড়ভরত ছেলে, আর গরীবের ঘরের চমৎকার মেয়ে,—দুয়ে মিলবে ভাল !

উৎসাহের সুরে কৰ্ত্তা কহিলেন,—ঠিক কথাই বলেছ তুমি, আমারও ঠিক এই মত ; সেই জন্তই আমি অনেক ভেবেচিন্তে আমাদের এই বেকাম গাধাবোটখানার সঙ্গে একটা তেজীয়ান ষ্টীম-লঞ্চ বেঁধে দেবার ব্যবস্থা করেছি । এর ফল হয় ত ভালই হবে, এক দিন জেটিতে গিয়ে ভিড়লেও ভিড়তে পারে ।

এ সম্বন্ধে আর কোনও কথা উঠিবার অবকাশ পাইল না ; কিন্তু যাহা উঠিল, বুঝিবার পক্ষে তাহাই যথেষ্ট । কৰ্ত্তার শেষের কথাগুলি মধুমক্ষিকার ছলের মত মাধুরীদেবীর বক্ষে বিদ্ধ হইয়া দাহ উপস্থিত করিল । দীর্ঘ বাইশ বৎসর এই সূবৃহৎ সংসারটির উপর প্রভুত্বের শকটখানি কি তিনি ভুল পথে চালাইয়াছেন ? স্বামীর অন্তররাজ্যের রহস্যদ্বার কি এত দিন তাঁহার নিকট বন্ধ হইয়াই ছিল ? চারিদিকের আটঘাট বাধিয়া প্রথর বুদ্ধির প্রভাবে অতি সন্তর্পণে পুত্র নিবারণের প্রতিষ্ঠার যে পথটুকু তিনি প্রায় নিরঙ্কুশ করিয়া তুলিয়াছিলেন, তাহা কি সত্যই ব্যর্থ-প্রয়াস ?

ছয়

নির্দিষ্ট দিনটির শুভলগ্নেই এই রহস্যময় বিবাহের মঙ্গল-শব্দ বাজির উঠিল।

মধ্যবিত্ত অবস্থাপন্ন কন্যাপক্ষ কন্যার বিবাহ-ব্যাপারে অবস্থাকে অতিক্রম করিয়া যে পরিমাণ ঘটায় ব্যবস্থা করিয়াছিলেন, সেই অনুপাতে ধনাঢ্য বরপক্ষের তরফ হইতে বিশেষ কিছু জাঁকজমকের পরিচয় পাওয়া গেল না। যাহারা ভাবিয়াছিল, খুব জমকালো মিছিল করিয়া যাত্রার দলের রাজার মত সঁচচার পোষাক পরিয়া বর আসিয়া সভায় বসিবে, তাহারা বেন আকাশ হইতে পড়িল। . পাঙ্কী হইতে নামাইয়া বরকে যখন সভায় বসান হইল, তখন সকলেই সবিস্ময়ে দেখিল, বরের পরনে বেনারসী ধুতি, গায়ে তাহারই পিরাণ ও চাদর! বিশেষত্বের মধ্যে বেলকুলের গোড়ের সহিত পাল্লা দিয়া বড় বড় মুক্তাদিয়ে গাথা এক ছড়া দীর্ঘ মালা গলায় তুলিতেছিল। বরের চেহারা দেখিয়া যাহারা বলিল—বেশ, কিছুক্ষণ পরে তাহারই আবার ভাবভঙ্গি দেখিয়া বরপক্ষের অন্তরালে মত প্রকাশ করিল—বোধ হয় মাথায় ছিট আছে।

কিন্তু শুভদৃষ্টির সময় এমনই এক অপূর্ব ভাবে বরের চক্ষু দুইটি বিস্ফারিত হইয়া উঠিল যে, সেই মুহূর্তেই তাহা বধুর অন্তরস্পর্শ করিল। বধুও ঠিক এই মাহেঞ্জদক্ষণে অন্তর্ভেদী উজ্জল দৃষ্টিতেই বরের দিকে চাহিয়াছিল। তাহার মনে হইল, এই অপরিচিত মানুষটি বেন অতি পরিচিতের মতই সাক্ষর দৃষ্টিতে তাহার অন্তরের দ্বারটি উদ্বাটিত করিয়া কোনও কাব্য-বস্তুর সন্ধান করিতেছে। চণ্ডীর দীর্ঘায়ত চক্ষু দুটি পল্লবভারে ধীরে ধীরে অবনমিত হইল।

অন্যের বর বাসরেও বাহিরের আসরের মত সকলের মনেই সংশয়

তুলিল। মুখে কথা নাই, তীক্ষ্ণ পরিহাস-বিজ্ঞপে দৃকপাত নাই, তরুণীদের লাস্ত্রলীলায় তাহার মুখে হাসির কোন চিহ্নটিও কেহ দেখিল না। বাসর-সঙ্গিনীদের সকল প্রয়াসই যখন ব্যর্থ হইয়া গেল, বরের হৃদয়-বর্ষ ভেদ করিতে পারিল না, তখন তাহার বেণা-বনে মুক্তা ছড়ানো বিফল ভাবিয়া—মুক্ত অবশুর্গন মাথায় তুলিয়া বাসর হইতে বাহির হইয়া গেল।

অবশুর্গনের ভিতর দিয়া চণ্ডী এ পর্য্যন্ত বন্ধদৃষ্টিতে বরের দিকে চাহিয়া-ছিল। মেয়েরা সকলেই চলিয়া গেলে সে মুখখানি অবশুর্গন মুক্ত করিতেই বরের সহিত তাহার চোখোচোখি হইয়া গেল। শুভদৃষ্টির পর পরস্পরের পরিপূর্ণ দৃষ্টির এই পুনরায় সংযোগ।

বরই প্রথমে কথা কহিল, বালকের গায় তরল কোতূহলের সুরে প্রশ্ন করিল,—তোমার নাম বুঝি চণ্ডী ?

বরের মুখে বালকসুলভ ভঙ্গিতে এই প্রশ্ন শুনিয়া চণ্ডী মনে মনে কোতুক অনুভব করিয়া বিজ্ঞপের সুরে অসঙ্কোচে কহিল,—হাঁ। তুমি বুঝি মনে মনে এই কটা কথা এতক্ষণ মুখস্থ করছিলে ?

দুই চক্ষু অস্বাভাবিক উজ্জ্বল করিয়া বর কহিল,—বিয়ে করতে এসে বুঝি কেউ পড়া মুখস্থ করে !

বরের কথায় চণ্ডীর ক্র দুটি কুঞ্চিত হইয়া উঠিল, তীক্ষ্ণদৃষ্টিতে তাহার মুখের দিকে চাহিয়া প্রশ্ন করিল,—বরকে তা হ'লে কি করতে হয় ?

মুখের ভঙ্গির সহিত হাতের একটি অঙ্গুলী তুলিয়া বর উত্তর দিল,—চুপটি ক'রে বাবু হয়ে বসে থাকতে হয়।

অনুরূপ কোতুকভঙ্গিতে চণ্ডী কহিল,—তাই বুঝি এতক্ষণ চুপটি ক'রে চোরটির মত বসেছিলে, সাত চড়েও কথা কও নি ?

বর কহিল,—ওরা যে মেয়েমানুষ !

চণ্ডী কহিল,—আর আমি বুঝি পুরুষমানুষ ?

বর এবার হাসিমুখে কহিল,—উহু, তুমি যে আমার বউ ।

চণ্ডী নিরন্তরে নিম্পলকনয়নে কিছুক্ষণ তাহার পার্শ্বে উপবিষ্ট সেই নির্বোধটির মুখের দিকে চাহিয়া রহিল । তাহার বুদ্ধিতে বিলম্ব হইল না, নিষ্ঠুর অদৃষ্ট তাহাকে কাহার পার্শ্বে আনিয়া বসাইয়াছে । সঙ্গে সঙ্গে তাহার পৃষ্ঠে কে যেন চাবুক মারিয়া স্মরণ করাইয়া দিল, তাহার খণ্ডরের দেওয়া সোনার চাবুক আর সেই সঙ্গে তাঁহার কথা—আমার বাড়ীতে আছে একটা ভারি বেয়াড়া গাধা, সেটাকে মায়েস্তা করবে তুমি ; সেই জন্তই এই চাবুক । চণ্ডীর দুই চক্ষু বিস্ফারিত হইয়া উঠিল ।

পরক্ষণে তাহার মনে পড়িল, রাজকন্যা বিগ্ণাবতীর গল্প । পণ্ডিতদের চক্রান্তে মূৰ্খ কালিনাসের সহিত তাহার পরিণয়-রহস্য ! কিন্তু রাজকন্যা মূৰ্খ স্বামীকে প্রত্যাখ্যান করিয়াছিলেন, আর সেই উপেক্ষিত মূৰ্খ কঠোর সাধনায় জয়পতাকাহস্তে বিগ্ণামন্দিরের শিখরে দাঁড়াইয়া পণ্ডিতা পত্নীর দৰ্প ভাঙ্গিয়া দিয়াছিলেন । সেই পরীক্ষা কি আজ তাহাদের সম্মুখেও উপস্থিত !

চণ্ডীকে নিরন্তর দেখিয়া বর তাহার দন্ত পাটি বিকাশ করিয়া কহিল, —দেখো, আজকে আমার ভারি আফ্লাদ হচ্ছে, সত্যি ।

দুশ্ছেদ্য চিন্তাজাল যেন সবলে ছিঁড়িয়া ফেলিয়া চণ্ডী ব্যগ্রকণ্ঠে জিজ্ঞাসা করিল,—কেন বল ত ?

বর গভীর লজ্জায় হাত দুইখানি কচলাইতে কচলাইতে চণ্ডীর মুখের দিকে চাহিয়া কহিল,—এই তোমাকে বে ক'রে, তোমাকে দেখে, আর তোমার সঙ্গে কথা ক'য়ে—

চণ্ডী মুখ টিপিয়া হাসিয়া কহিল,—আমাকে তা হ'লে তোমার পছন্দ হয়েছে বল ?

ধ্যৎ ! আমার লজ্জা করে ।

আচ্ছা, ও কথা না হয় থাক ; তা হ'লে আমার কথাগুলো ত ভাল লাগছে ?

হঁ ; এমন ক'রে কেউ ত আমার সঙ্গে কথা কর না !

কেন—বাবা ?

বাবা ত' দেখলেই বকে ।

দেখলেই বকেন বুঝি ? কিন্তু মা ?

মুখে কিছু বলবে না, কিন্তু চোখ পাকিয়ে এমনি চাইবে, বাবা রে !
তোমার মত কি চায় ভেবেছ, সে চাউনি—

শুধুই রাগ ক'রে চান, আদর-ষত্র করেন না মোটেই ?

কেন করবেন বল ত ? আমি যে মুখ্য, মাতৃষ হয়েও গাধা, আমার
ত গুণ কিছু নেই ।

তুমি বুঝি পড়াশুনাও কিছু করনি ?

নাঃ ! করব কোথেকে ? রোজ রোজ মাষ্টার আসত আমাকে
পড়াতে, কিন্তু এমনই মজা, যে একদিন আসত, আর তার টিকিও
দেখতে পেতুম না—

কেন ?

কি করবে এসে বল না ? আমার মাথায় নাকি গোবর পোরা,
ব'লত, ওর কিছু হবে না । কিন্তু তোমাকে বলি, আমার ভারি ইচ্ছে
করত পড়তে—

নিজেরই কেন পড়তে না ?

পড়ব কি ক'রে ? খোকা রাজা ছুটে এসে বই কেড়ে নিয়ে যেত ;
বলত, তুই পাগল, বই নিয়ে বসলে মাথা গুলিয়ে যাবে । আমার
বাবাকে বলত. ওর কিছু হবে না ।

খোকা রাজাটি তোমার কে ?

জান না ? আমার ছোট ভাই, ঐ যে নতুন মার কথা বললুম, তাঁর
ছেলে । আমার নিজের মা ত নেই ।

ও ! বুঝেছি । আচ্ছা, বাবাকে তুমি কিছু বলতে না ?

উহঁ ! থোকা রাজা তা হ'লে পিঠের চামড়া আস্ত রাখত না ! এক একদিন যা মারে—

মারে ! তুমি না তার বড় ভাই !

বড় ভাই হ'লে কি হয়—সেই যে রাজা হবে, তা বুঝি জান না ?

সে কি ? আর তুমি ?

আমি যে বোকা, পাগল, জড়ভরত । তাই কেউ আমাকে ভালবাসে না, ভালকথা বলে না, তাই না তোমাকে এত ভাল লাগছে তোমার কথা শুনে ! সত্যি, তোমার কথা কি মিষ্টি, তুমি আমাকে ভালবাসবে ত ?

চণ্ডীর বৃকের ভিতর যে ঝড় বহিতেছিল, দুই হাতে তাহার গতি রুদ্ধ করিয়াই যেন সে বাষ্পার্দ্রকণ্ঠে কহিল,—বাসব বই কি ।

অসহায় শিশুর মত আবদারের সুরে বর কহিল,—ওদের মত মারবে না ত,—নতুন মার মত চোখ দিয়ে বকবে না বল,—এমনি ক'রে গল্প করবে আমার সঙ্গে ?

কণ্ঠস্বর সংযত করিয়া চণ্ডী কহিল,—করব, তুমি যাতে সুখী হও, তাই করব আমি ।

বিপুল উল্লাসের আবেগে বর কহিল,—সত্যি ? বাঃ ! তা হ'লে কি মজাই হবে । আমি কিছু করব না, শুধু তোমার কথা চূপটি ক'রে ব'সে ব'সে শুনব ।

চণ্ডী মুখে হাসি টানিয়া কহিল,—তা শুনো, অনেক গল্প আমি জানি. তোমাকে সবই শোনাব, কিন্তু তোমাকেও আমার একটি কথা রাখতে হবে ।

চণ্ডীর মুখের উপর চক্ষু দুইটি তুলিয়া জিজ্ঞাসু নরনে বর চাহিয়া রহিল ।

চণ্ডী কহিল,—তোমাকে মানুষের মত মানুষ হ'তে হবে ।

বরের মুখে কথা নাই, দুই চক্ষুর বিষয়ভরা দৃষ্টি পার্শ্ববর্তিনী বধুর মুখেই নিবদ্ধ ; সেই দৃষ্টি যেন প্রশ্ন করিতেছিল—সে আবার কি ?

চণ্ডী তখন বিস্মিত বরকে রাজকন্যা বিদ্যাবতীর গল্পটি শুনাইয়া দিল । বর পরমাগ্রহে সে গল্প শুনিল । মুখ কালিদাস কঠিন সাধনায় সর্বশ্রেষ্ঠ কবি হইয়াছিলেন শুনিয়া বর ব্যগ্র উল্লাসে কহিল,—বাঃ ! বাঃ ! কি মজা ! শুনে এমনি আহ্লাদ হচ্ছে আমার !

চণ্ডী স্বামীর দিকে পরিপূর্ণ দৃষ্টিতে চহিয়া প্রশ্ন করিল,—তোমার ঐ রকম হ'তে ইচ্ছে করে না ?

সহর্ষে বর কহিল,—আমার ! হ্যাঁ, হয় । কেউ যদি আমাকে শেখায়, আমার ভার নেয়, সত্যি, আমিও তা হ'ল মানুষ হ'তে পারি ।

দৃঢ়স্বরে চণ্ডী কহিল,—মানুষ তোমাকে হতেই হবে । আমি তোমার ভার নেব, এর জন্ত আমি করব কঠোর সাধনা ।

সাত

আসরে বর আসিয়া বসিলে তাহার সম্বন্ধে যে সকল অপ্রীতিকর কথা উঠে এবং আসরে বরের মুখে একটি কথাও না শুনিয়া মেয়ের দল যে সব কথা রটায়, সে সমস্তই চণ্ডীর বাবা, মা ও পরিজনদের কানে যথাযথভাবেই উঠিয়াছিল । এই অপ্রত্যাশিত সংযোগ তাঁহাদিগকে যেমন আনন্দে অভিভূত করিয়া তুলিয়াছিল, বরের সম্বন্ধে নানা কঠোর অপ্রিয় মন্তব্য তেমনই নিষ্ঠুর আঘাতে তাঁহাদের মনের উল্লাস মুসড়াইয়া দিয়াছিল । কিন্তু হরিনারায়ণ বাবুকে এ সম্বন্ধে কোনও কথা কেহ জিজ্ঞাসা করিতে পারে নাই, কিম্বা তাঁহার সম্মুখে দাঁড়াইয়া বরের সম্বন্ধে কোনও অপ্রিয় মন্তব্য প্রকাশ করিবার মত সাহসটুকু পর্য্যন্ত কাহারও দেখা যায় নাই ।

বিবাহের পরদিন প্রত্যুষে পূজার দালানে পরিজনরা সমবেত হইয়াছেন। বরের বিষয় লইয়াই তুমুল আলোচনা চলিয়াছে। বাসর হইতে যে সব তরুণী মুখ ভারী করিয়া ফিরিয়াছিল, বাসর-জাগরণের দক্ষিণা আদায়ের জন্য তাহারাও আসিয়া দল ভারী করিয়াছে। একজন মন্তব্য প্রকাশ করিল,—এ যেন ঠিক সেই—ওঠ ছুঁড়ি, তোর বে—হ'ল! খোঁজ-খবর নেই, জিজ্ঞাসাবাদ নেই, অমনি হয়ে গেল পাকাপাকি কথা,—হ'লই বা বড় লোক ?

করানী বাবু রুক্ষস্বরে কহিলেন,—এ সব কথা এখন কেন ? তোমরা কি এই নিয়ে একটা কেলেকারী বাধাতে চাও ? ভবিতব্যের বিধান কে কবে খণ্ডন করতে পেরেছে শুনি !

এই সময় প্রাতঃকৃত্যাদি সারিয়া চণ্ডী বীরে ধীরে দালানের ভিতরে আসিয়া দাঁড়াইল। সকলের মুখের কথা একেবারে ধামিয়া গেল, প্রত্যেকেই আগ্রহপূর্ণ দৃষ্টি পড়িল চণ্ডীর মুখের উপর। কিন্তু সে মুখে বিষাদের কোনও চিহ্ন নাই, চিন্তার একটিও রেখা তাহার সেই দৃষ্ট মুখখানির উপর পড়িয়া এতটুকু বিকৃত করে নাই ; এমন একটা অপরিণীম তৃপ্তি ও প্রসন্ন হাসির দীপ্তিতে চণ্ডীর মুখখানি ভরিয়া উঠিয়াছিল—বিয়ের পরদিন যেটুকু কোনও মেয়ের মুখেই দোঁখবার আশা করা যায় না।

মেয়ের প্রকৃতি পিতামাতার অবিদিত নয় ; তাহারা উভয়েই চণ্ডীর মুখ দেখিয়া স্বেয়াস্তির নিশ্বাস ফেলিলেন। বুঝিলেন, বাসরে কোনও অনর্থ বাধে নাই, আর সকলে হাল ছাড়িয়া দিয়া চলিয়া আসিলেও, তাহাদের মেয়ে জামাইকে খাচাই করিতে অবহেলা করে নাই ; নিশ্চয়ই বর চণ্ডীর পছন্দ হইয়াছে, নতুবা কখনই সে হাসিমুখে এখানে আসিয়া দাঁড়াইত না।

তখন নানামুখে জিজ্ঞাসাবাদের বস্তা ছুটিল,—বর কেমন হয়েছে ?

কথাবার্তা কইতে পারে কি না? বাসরে বসেও কি নেশা চালিয়েছে? তোর মুখে যে বড় এমন হাসি?—এমনই নানা প্রশ্ন, অপ্রিয় প্রশ্ন—নানা বয়সের প্রতিবেশিনী ও তরুণী বাসরসঙ্গিনীদের মুখে।

চণ্ডীর মুখে তখনও হাসি, রাগ বা বিরক্তির কোন চিহ্নই দেখা দিল না। সে হাসিমুখেই এক কথায় সকলের কথার উত্তর দিল,—ভগবান্কে বিশ্বাস ক’রে যে যা চায়, তিনি তাই তাকে দেন; আমার ত নাশিক করবার কিছুই নেই, তবে এ সব কথা কেন?

প্রশ্নকারিণীদের কৌতুকোজ্জ্বল মুখগুলি একেবারে ছাইয়ের মত বিবর্ণ হইয়া গেল; বর্ষীয়সী প্রতিবেশিনীরা বিস্ময়ে নিজ নিজ মুখ বিকৃত করিয়া পরস্পর অর্থপূর্ণ দৃষ্টি-বিনিময় করিলেন। আমাদের পূর্বপরিচিতা মিত্র-গৃহিণী কৌতুহলী হইয়া কহিলেন,—তবে যে এরা বলছিল, জামাই যেন একটি জন্তু, কারুর সঙ্গে কথাটা পর্য্যন্ত বলেনি,—হাঁও নয়, হুঁও নয়—

কথাটার মনে মনে আঘাত পাইলেও, সে ভাব কাটাইয়া চণ্ডী একটু কঠিন হইয়া উত্তর দিল,—হাঁ, ওরা তাঁকে বুনো জন্তু ভেবেই তাঁর সঙ্গে জন্তুর মত ব্যবহার করেছিল, কিন্তু তিনি মানুষ বলেই চুপ ক’রেছিলেন।

এক তরুণী ঝঙ্কার দিয়া উঠিল,—তুমি ধন্ত মেয়ে বাবা!

চণ্ডী হাসিয়া উত্তর দিল,—আমিও ত চুপ করেই বসে ছিলাম; নাচিওনি, বেহায়াপনাও করিনি কিছু; ঠোঁকর দিলে গুনব কেন?

আর একটি মেয়ে মুখখানি মচকাইয়া কহিল,—বাসরে গিয়ে ব’সে ব’সে কেউ ইষ্টিমন্তর জপ করে না।

চণ্ডী কহিল,—তা ব’লে অমন ‘হল্লোড়’ কেউ করে না তোদের মত।

মিত্রগৃহিণী চণ্ডীর এই কথায় সায় দিয়া কহিলেন,—তা মিছে নয়, তোমরা বাছা দিন দিন ভারী বেহায়া হয়ে উঠছ, এ কিন্তু ভাল নয়। সব বিষয়ে চণ্ডীর কাছে তোমাদের শিক্ষা করবার ঢের আছে। হাঁ রে চণ্ডী, জামায়ের সঙ্গে কথাবার্তা কিছু হয়েছে তোর?

চণ্ডী কিছুমাত্র সঙ্কোচ না করিয়াই কহিল,—কেন হবে না ?

এক বর্ষীয়সী অমনই গণ্ডে হাতখানি বিচিত্র ভঙ্গিতে রাখিয়া বিশ্বয়ের সুরে কহিলেন,—বা—বা ! শোন মেয়ের কথা ! কালে কালে এ সব হ'ল কি ?

চণ্ডী ছেলেমানুষের মত আবদারের সুরে কহিল,—বা—রে ! তোমরা বিয়ে দিতে পারলে, তাতে দোষ হ'ল না ; যত দোষ আমাদের ঐ নিয়ে কথা কইলেই ! বেশ ত !

মিত্রগৃহিণী মুখ টিপিয়া হাসিয়া প্রশ্ন করিলেন,—কি কথা তোর সঙ্গে হ'ল, বল না শুনি ?

চণ্ডী কহিল,—সে সব কথা এখন নাই বা শুনলে, পিসীমা ।

পিসীমা কহিলেন,—নেশা-ভাঙ্গের কথা শুনতে পেলি কিছু ?

পিসীমার কথায় চণ্ডীর মুখে ক্রেশের চিহ্ন ফুটিয়া উঠিল ; কিন্তু তৎক্ষণাৎ সে ভাব গোপন করিয়া সহজ সুরেই উত্তর দিল, এ কথা আমাকে জিজ্ঞাসা না ক'রে, যার ছেলে তাঁকেই জিজ্ঞাসা করা উচিত । তা হ'লে এখনই মীমাংসা হয়ে যায় ।

আবার সকলের মুখে বিশ্বয়ের চিহ্ন,—প্রতিবেশিনীদের অধিকাংশেরই মনের আনন্দ পুনরায় বিষাদে রূপান্তরিত হইল । যাহারা প্রকৃতই এ নারীর হিতার্থী, তাহাদের মনের আকাশ হইতে দুশ্চিন্তার একটা গভীর মেঘ সরিয়া গেল ।

করালী বাবু কহিলেন,—এই জগুই আমি কোন কথা কইনি, কাউকে কোন প্রশ্ন করিনি । চণ্ডীর মুখে না শুনে আমি এ কথায় কোনও কথা কইব না, এই ছিল আমার সঙ্কল্প । চণ্ডীকে দেখেই আমি বুঝেছি, ও সব মিছে কথা, কোনও ভিত্তিই ওর নেই ।

চণ্ডী মনে মনে তখন হাসিতেছিল । অল্পবয়সে বাপ-মা পরিজন ছাড়িয়া মেয়েদের পরের ঘরে বাইতে হয় । যে সব মেয়ের বুদ্ধিবৃত্তি থাকে

তাহারা বুদ্ধি খেলাইয়া হিসাব করিয়া কথা কর। স্বামী ও স্বপুত্রবাড়ীকে খাটো করিতে চায় না, বাপের বাড়ীর মর্যাদাটুকুও ছোট হইতে দেয় না। দাদামহাশয়ের কাছে ছেলেবেলা হইতেই চণ্ডী দুই কুলের মর্যাদা বজায় রাখিবার শিক্ষাটুকু যেমন পাইয়াছিল, চির-প্রচলিত লজ্জা ও সঙ্কোচের মোহটুকু তেমনই কাটাইতে অভ্যস্ত হইয়াছিল।

বাসরসঙ্গিনীদের মনের ক্ষোভটুকুও কিছুক্ষণ পরে একবারে নিশ্চিহ্ন হইয়া গেল,—যখন চণ্ডীর স্বপুত্রের নিকট হইতে বাসরে রাত্রি-জাগরণের জন্য একটি করিয়া মোহর মর্যাদাস্বরূপ তাহাদের প্রত্যেকের হাতে আসিয়া উঠিল! বহু বাসরে তাহারা রাত্রি-যাপন করিয়াছে, প্রচুর আনন্দ পাইয়াছে, কিন্তু চণ্ডীর বিয়ের বাসরে যদিও তাহারা খুসী হইতে পারে নাই, কিন্তু বাসর-জাগরণের এমন উচ্চ দক্ষিণার কথা তাহারা কখনও শুনে নাই, তখন তাহাদের আনন্দ দেখে কে!

বিদায়ের পূর্বক্ষণে মায়ের হাতে মেয়ের কনকাঞ্জলি দিবার প্রথা। চণ্ডী এই প্রথার বিরুদ্ধে মাথা তুলিয়া সকলকে অবাক করিয়া দিল। পিতলের একখানা থালায় চাল, সুপারি ও একটি টাকা রাখিয়া প্রথামত তাহাকে বলা হইল,—মায়ের আঁচলে দিয়ে বল, মা তোমার ঋণ শোধ ক'রে চলনুম।

এ সময় সকল মেয়ের মনটি বিচ্ছেদের ব্যথায় আর্ন্ত হইয়া উঠে, চক্ষু দিয়া অশ্রুর প্রবাহ ছুটিতে থাকে। চণ্ডীরও দুই চক্ষু অশ্রুসিক্ত হইয়া উঠিয়াছিল, তবে পল্লীগ্রামের সাধারণ মেয়েদের মত সে ক্রন্দনের প্রবল উচ্ছ্বাসে পরিজনদিগকে পর্যন্ত আকুল করিয়া তুলিয়াছিল, এ কথা কখনই বলা চলে না। মাতৃঋণ পরিশোধের কথা কয়টি তাহার কানে ঘেন তীক্ষ্ণ খোঁচার মত আঘাত দিল। সে উত্তর দিল,—আমি ত ও-কথা বলতে পারবো না।

একাধিককণ্ঠে প্রতিবাদ উঠিল,—ও মা, এ কি কথা রে চণ্ডী,

এ বে 'নেম কন্ম'—ঐ বলে মায়ের আঁচলে ঐ থালাগুঁড় সব দিতে হয়।

চণ্ডী উচ্ছ্বসিত স্বরে কহিল, মায়ের ঋণ কি কখনও শোধ হয় যে, এমন মিছে কথা বলব ?

মায়ের ব্যথিত চিত্তটিও বুঝি মেয়ের কথায় উল্লাসে নাচিয়া উঠিল, কিন্তু সে ভাব দমন করিয়া তিনিই বিধান দিলেন,—না, না, ও কথা তোকে বলতে হবে না,—তুই শুধু বল যে—অন্নজলের ঋণ শোধ ক'রে চললুম।

চণ্ডী কহিল,—এই একথানা চাল, গোটাকতক সুপারি আর একটি টাকাতেই তোমার অন্নজলের ঋণ শোধ হবে মা ?—তাও নিজে থেকেই ত দিচ্ছ আমাকে—তোমার হাতে দেবার জন্তে। না মা, আমি এ দিবে তোমার অন্নজলের ঋণ শোধ করতে পারবো না কিছুতেই।

তখন সকল বয়সের সমবেত সকল মেয়ের কণ্ঠগুলিই গভীর বিষ্ময়ে কল্লোলিয়া উঠিল,—ও মা, এমন সৃষ্টিছাড়া কথা ত কখনও শুনিনি বাপু!

পূজার দালানের নীচেই প্রাঙ্গণটির উপর দুই বৈবাহিক এবং দুই পক্ষের ঘনিষ্ঠ মাতব্বররাও এই অরণীয় সন্ধিক্ষণটিতে সমবেত হইয়াছিলেন এবং হৃদয় বৈবাহিক যেন জোর করিয়াই সঙ্কোচের ব্যবধানটুকু আজ কাটাইয়া দিতেছিলেন। চণ্ডী তাহার আপত্তি অক্ষুটস্বরে ব্যক্ত করে নাই, সুতরাং প্রাঙ্গণে ষাঁহারা অন্য কথার আলোচনায় উন্মনা ছিলেন, চণ্ডীর কথায় তাঁহারা প্রত্যেকেই উৎকর্ণ হইয়া উঠিলেন। কথার আঘাতটি যথাস্থানে গিয়াই বাজিল। হরিনারায়ণ বাবু উৎফুল্ল হইয়া উল্লাসের স্বরে কহিলেন,—খাসা কথা বলেছ মা তুমি, এই ত চাই! বরাবর যে ভুল হয়ে আসছে, সেইটেই যে চোখ বুজিয়ে চালিয়ে যেতে হবে, এমন কি কথা! ঠিকই ত, ঐ দিবে কি কখনও অন্নজলের ঋণ শোধ হ'তে পারে,—তার ওপর কি না, যার শিল যার নোড়া, তাই দিবে তারই

দাঁতের গোড়া ভাঙ্গবার ব্যবস্থা ! দাঁড়াও মা দাঁড়াও, এখনই এর উপায় আমি ক'রে দিচ্ছি ; তুমি আমার মস্ত ভুল ধ'রে দিয়েছ মা,— বাঃ ! বাঃ !

বাড়ী শুদ্ধ সকলকে অবাক্ করিয়া দিয়া—বাহিরের ঘর হইতে জনৈক কর্মচারিকে ডাকাইয়া হরিনাবায়ণ বাবু তৎক্ষণাৎ পুত্রবধূর উপযুক্ত কনকাঞ্জলির ব্যবস্থা করিয়া দিলেন। করালী বাবু মিনতির ভঙ্গিতে বহু আপত্তি করিলেন, কিন্তু তাহা টিকিল না। হরিনারায়ণ বাবু হাসিয়া কহিলেন,—মা চণ্ডীর মুখ দিয়ে যে যুক্তি আমরা শুনেছি ব্যেই, তার খণ্ডন করবার ক্ষমতা আমাদের কারুর নেই। আর এ বিষয়ে আপনার আপত্তি বৃথা, এতে কুণ্ঠিত হবার কি আছে? আপনি নিজের ইচ্ছায় আহ্লাদ ক'রে আপনার জামাতাকে রূপার খালায় ভ'রে এক রাশ টাকা সেই সঙ্গে আরও কত কি সামগ্রী যৌতুক দিয়েছেন, আমি ত প্রত্যাখ্যান করিনি কোনটি। তবে আমার বধুও যদি তার জননীর উদ্দেশে সত্যকার কনকাঞ্জলি দেয়, তা কেন গ্রাহ্য হবে না বলুন ত !

হরিনারায়ণ বাবুর এমন যুক্তিযুক্ত কথার উপর কাহারও আর কথা তুলিবার সাহস হইল না। সুতরাং চণ্ডী স্বশুর-দত্ত পাঁচ শত টাকার পুর্ণ থলিটি উজাড় করিয়া মায়ের উদ্দেশে রীতিমত কনকাঞ্জলি দিয়া কহিল,—এখানকার অন্নজলের ঋণটুকুই শুধু শোধ ক'রে বিদায় নিচ্ছি মা।

সঙ্গে সঙ্গে চণ্ডীর স্বর আর্ত হইয়া উঠিল, দুই চক্ষুর উচ্ছ্বসিত অশ্রু বাঁধ-ভাঙ্গা স্রোতের মত দুর্ব্বার হইয়া ছুটিল। সকলের চক্ষু তখন অশ্রুসিক্ত,—কন্টার এ বিদায় দৃশ্য চিরদিনই সকল সংসারে সকলেরই মর্শ্বস্পর্শী !

আট

পূজার দালানে যে সময় বিদায়-পর্বেৰ নিয়ম-কর্ম চলিতেছিল, সে সময় বাড়ীর সম্মুখে সুদীর্ঘ রাস্তাটির উপর এমন এক বিরাট মিছিল নানা জাতীয় বাতলাগুদি ও যানবাহন সহ শ্রেণীবদ্ধ হইতেছিল, এ অঞ্চলে যাহা সত্যই অভূতপূর্ব। বাজনা-বাণের ঘটা না করিয়া বিনাডম্বরেই বিবাহ-বাড়ীতে বরাগমন হওয়ায় যাহারা বিস্ময় হইয়াছিল, বিবাহের পরদিন বর-বিদায়ের সময় এই অপ্রত্যাশিত মিছিলের বাহার তাহাদিগকে শুধু যে চমৎকৃত করিয়া তুলিল, তাহা নহে, খেয়ালী জমিদারের উদ্দেশে এক বাক্যেই তাহাদিগকে সশ্রদ্ধ প্রশস্তি করিতে হইল,—

“যা কিছু শুনেছি, যা কিছু বুঝেছি

তারো চেয়ে তুমি উপরে,

কামনা ভাবনা কল্পনা মোদের

পারে না ধরিতে তোমারে।”

কনকাঞ্জলি দিয়া সুসজ্জিতা বধু বরের সহিত বাহিরে আসিতেই হরিনারায়ণ বাবু বৈবাহিককে উদ্দেশ করিয়া কহিলেন,—পাকা দেখার দিনটিতে চণ্ডীমার কাছে বাকবন্দী হয়ে আছি। তৈরী বিঘামন্দির দেখিয়ে যদি ওঁকে খুসী করতে পারি, তবেই না আমার নিষ্কৃতি। কাজেই এই সঙ্গেই এ বাড়ীর সকলকেই ওখানে পায়ের ধুলো দিতে হবে। মিছিলে এ জন্ত পাকীর বিশেষ ব্যবস্থা করা হয়েছে।

কন্যাপক্ষ হইতে এ সম্বন্ধে আপত্তি উঠিলেও শেষ পর্য্যন্ত টিকিল না। হরিনারায়ণ বাবু কহিলেন,—আমরা ত আর কন্যাপক্ষকে সরাসরি বাস্তবিত্তে জোর ক’রে ধ’রে নিয়ে যাচ্ছি না, তাঁদেরই কন্যার মন্দির-প্রাতিষ্ঠা দেখে তাঁরা ফিরে আসবেন, এতে আর বাধা কি ?

অগত্যা কোন বাধাই আর রহিল না। কণ্ঠাপক্ষের পুরুষগণ স্নানজ্জিত শকটে উঠিলেন, মহিলারা মূল্যবান কিংখাপের আস্তরণ-মণ্ডিত শিবিকার ভিতরে ঢুকিলেন। কেবল চণ্ডীর মা বাড়ীতে রহিয়া গেলেন। কণ্ঠার হাতের কনকাঞ্জলি লইয়া কণ্ঠার মা আর পিছনের দিকে না তাকাইয়াই চলিয়া যান, ইহাই প্রথা। পদ্ধতির কথা বৃঝিয়া বৈবাহিক ঠাহাকে আর পীড়াপীড়ি করিলেন না।

এ দিকে যেমন বিবাহের সমারোহ চলিয়াছিল, বারোয়ারীতলার বিজালয় প্রতিষ্ঠার আয়োজনও তেমনই ঘটা করিয়া সম্পন্ন হইতেছিল। বিবাহবাসর অপেক্ষা এইখানেই পল্লীবাসীদের আগ্রহ অধিক,—একটি পক্ষের মধ্যেই পোড়ো জমির উপর একখানা ইমারত খাড়া করিয়া তোলা পল্লীঅঞ্চলে কতটা সম্ভবপর, হরিনারায়ণ গাঙ্গুলী নির্দিষ্ট দিনটির মধ্যে কি ভাবে তাহার পণ রক্ষা করিবেন, এই অদ্ভুত খেয়ালী মানুষটির যে সকল হুঃসাধ্য কার্য হেলায় সমাধা করিবার গল্প তাহারা এ পর্য্যন্ত শুধু কানেই শুনিয়াছে—এখন সত্যই তাহারা প্রত্যক্ষ করিয়া চক্ষু-কর্ণের বিবাদ মিটাইতে পারিবে কি না—এই সব কথাই প্রধান আলোচনার বিষয় হইয়া শ্যামাপুর গ্রামখানির সহিত চারিপার্শ্বের সন্নিহিত আরও দশখানি গ্রামের অধিবাসিগণকে সচকিত করিয়া তুলিয়াছিল। সকলেই বিপুল আগ্রহে আকাঙ্ক্ষিত দিনটির প্রতীক্ষা করিয়াছিল। বারোয়ারীতলার সুবিশাল প্রাঙ্গণের চারিদিক সুউচ্চ কানাৎ দিয়া এমন সম্ভরণে পরিবেষ্টন করা হইয়াছিল যে ভিতরের ইমারতের কাজ কি ভাবে সম্পন্ন হইতেছে, সে সম্বন্ধে কিছুমাত্র আভাস পাইবার কোনো সম্ভাবনাই ছিল না,— কাজেই জনসাধারণের কোতূহল উচ্ছ্বসিত হইবারই কথা।

স্বদেশী ও বিদেশী বিবিধ বাজের আবর্তে সারা গ্রামখানি কাঁপাইয়া বিশাল মিছিল বারোয়ারীতলার সম্মুখে আসিতেই যুগপৎ কয়েকটি বন্দুকের আওয়াজ হইল এবং রক্তমণ্ডলের যবনিকা যে ভাবে সহসা উপরে

উঠিয়া যায় সেইরূপ তৎপরতায় সেই সূবৃহৎ প্রাক্কণের চারিপার্শ্বের সু-উচ্চ কানাতগুলি একসঙ্গে খুলিয়া গেল। পরক্ষণে সুন্দর অঙ্গন-সমন্বিত বিচক্ষণ শিল্পীর পরিকল্পিত সত্যঃসম্পন্ন মনোরম বিজামন্দিরের নিৰ্ম্মাণ-পরিপাট্য সকল কোতূহলী চক্ষুকেই চমৎকৃত করিয়া দিল।

দুইটি সপ্তাহ পূর্বেও যে পতিত জমিটির উপর পল্লীর গরু-বাছুর চরিয় বেড়াইত, সেখানে আজ আরব্য রজনীর উপাখানের মত এক আশ্চর্য্য অট্টালিকা যেন বাতুমন্ত্রের প্রভাবেই মাথা তুলিয়া দাঁড়াইয়াছে।—অঙ্গনের সম্মুখেই বিজামন্দিরের প্রশস্ত সোপানশ্রেণী, তাহার দুইধারে দুইটি সুদীর্ঘ চাতাল অট্টালিকার উভয় প্রান্ত পর্য্যন্ত বিস্তৃত। সোপানশ্রেণীর উপরেই ভেলভেটের একখানি সূবৃহৎ পর্দা দৃশ্যপটের মত পড়িয়া ছিল। কানিশের নিম্নেই বড় বড় হরফে উৎকীর্ণ করা হইয়াছে—মা চণ্ডীর বিজামন্দির।

দেউড়ীর সম্মুখে আসিয়া মিছিল থামিতেই হরিনারায়ণ বাবু অগ্রবর্তী হইয়া বর-বধু ও কন্যাপক্ষীয়দের সহিত সোপানশ্রেণী অতিক্রম করিয়া পর্দার সম্মুখে আসিয়া দাঁড়াইলেন। কোতূহলী জনতায় বিশাল অঙ্গন তখন ভরিয়া গিয়াছে।

হরিনারায়ণ বাবু বধুর দিকে চাহিয়া হাসিমুখে কহিলেন,—তোমার হাতের পরশ না পেলে এ পর্দা ত উঠবে না মা, পর্দাখানা তুলে তোমাকেই যে আগে প্রবেশ করতে হবে তোমার মন্দিরে।

চণ্ডীর সর্বাঙ্গ ব্যাপিয়া তখন যেন একটা অপূর্ব পুলকের শিহরণ উঠিয়াছে। কোনও দিকে দৃষ্টিপাত না দিয়া সে তাহার হাতের কাজলতা-খানি প্রথমে কটিদেশে গুঁজিয়া রাখিল, তাহার পর সবল দুইখানি হাত দিয়া সেই বিশাল পর্দাখানি গুটাইতে আরম্ভ করিল।

হরিনারায়ণ বাবু হাসিয়া কহিলেন,—মা আমার কিছুতেই পেছুতে চান না, নিজেই হাত লাগিয়েছেন কোনওদিকে দৃকপাত না করে।

ব্যাস্—মা, হয়েছে। তোমার স্পর্শ টুকুই ছিল দরকার,—এবার তুমি ছেড়ে দাও, মা।

পুলীর সাহায্যে পর্দাখানি উপরে টানিয়া তুলিবার যথোচিত ব্যবস্থাই ছিল। পরক্ষণেই ক্ষিপ্রগতিতে সেখানি উপরের দিকে উঠিয়া যাইতেই বিদ্যামন্দিরের সুসজ্জিত সুবৃহৎ হলঘরখানি সকলের চক্ষুর উপর প্রকাশ হইয়া পড়িল।

ইমারতের সংখ্যা এ অঞ্চলে নিতান্ত অল্প না হইলেও এই ধরনের প্রশস্ত দরদালানযুক্ত পরিচ্ছন্ন অট্টালিকা সম্পূর্ণ অভিনব। দালানখানি পত্র-পুষ্প ও নানাবিধ চিত্রপটে সুসজ্জিত, তাহার তিন দিকেই তিনখানি করিয়া বড় বড় ঘর, প্রত্যেক ঘরেই পালিস্ করা সারি সারি সূত্রী বেঞ্চি, পুরোভাগে টেবিল ও শিক্ষয়িত্রীর কেদারা ; দেওয়ালে কালো রঙের বোর্ড ও ভারতবর্ষের মানচিত্র টাঙ্গানো। হলে প্রবেশ করিতেই দুই পাশের দুইখানি ঘর অন্য প্রকারে সজ্জিত। একখানি ঘরে আফিসের যাবতীয় সাজ-সরঞ্জাম ; বড় বড় দুইটি আলমারীর মধ্যে খাতা কাগজ পেনসিল দোয়াত কালি কলম, নানা দেশের নানাবিধ মানচিত্র, রাশি রাশি শ্লেট প্রাথমিক শিক্ষায় অপরিহার্য্য বিদ্যাসাগরের প্রথম ও দ্বিতীয় ভাগ, ধারাপাত, শুভঙ্করী, চাণক্য-শ্লোক, ঘরের এক পার্শ্বে অনেকগুলি চরকা প্রচুর তুলা প্রভৃতি। অপরপার্শ্বের ঘরখানির দরজা ও জানালা কয়টি বাদ দিয়া সর্বস্থান আলমারীতে ভরা। তবে আলমারীগুলি ঘরের দেওয়াল-গুলি ভরাইয়া তুলিলেও, তাহাদের গহ্বরগুলি তখনও পুস্তকে ভরিয়া উঠে নাই।

চণ্ডীকে অগ্রবর্তিনী করিয়াই সকলে হলে প্রবেশ করিলেন। হরিনারায়ণ বাবু ধীরে ধীরে বধূর অনুগমন করিতে করিতে কহিলেন,—বুঝতেই পেরেছ মা, তোমার এই স্কুলটির নামকরণ হয়েছে—মা চণ্ডীর বিদ্যামন্দির। কেমন মা, ঠিক নাম হয়নি ?

চণ্ডীর মুখখানি তখন পরিতৃপ্তির উল্লাসে উদ্ভাসিত হইয়া উঠিয়াছে । বৃদ্ধ তাহা লক্ষ্য করিয়া কহিলেন,—দেখ মা, মানুষ লোকের দৃষ্টিতে যতই হয়, দুর্বল বা অসহায় হোক না কেন, তার নামটি যদি হয় সবল আর নির্মল, তা হ'লে সেখান থেকে যে প্রার্থনা ওঠে শ্রীভগবানের উদ্দেশে, তা কখনও ব্যর্থ হ'তে পারে না ; তাঁরই প্রেরণায় তখন উপযুক্ত লোক ছুটে আসে তার সেই কাজটুকু উদ্ধার ক'রে দিতে । নিজের স্বার্থের দিকে চেয়ে ত তুমি তাঁর দোরে প্রার্থনা পাঠাওনি মা, দেশের দুঃখমোচনের জন্ত —দেশের কল্যাণের কথা ভেবে কোমল হৃদয়টি তোমার ছলে উঠেছিল, দুই চক্ষু দিয়ে অশ্রু গড়িয়ে পড়েছিল, ভগবান্ কি স্থির হয়ে থাকতে পারেন, মা !—এই যে পাঠশালা-প্রতিষ্ঠা, এর মূলে তোমারই মনের গভীর সাধনা ; —তুমি যে মা স্বয়ংসিদ্ধা ।

নয়

বিবাহের পরে শশুরবাড়ীতে আসিয়াই চণ্ডী নানা স্ত্রে শুদ্ধান্তের সর্বময়ী রাণী মাদুরীদেবীর চিত্তে দারুণ বিরাগ সৃষ্টি করিয়া বসিল ।

বিবাহ-রাত্রিতে বাসরে নির্বোধ স্বামীর মুখে তাহার জীবন-পদ্ধতি শুনিয়া চণ্ডী মনে মনে শশুরালয়ে তাহার কর্মপদ্ধতির একটা খসড়া করিয়া ফেলিয়াছিল । সে বুঝিয়াছিল, প্রতিপক্ষদের সহিত যুদ্ধ করিবার জন্তই বিধাতা তাহাকে সৃষ্টি করিয়াছেন । শ্যামাপুরে আসিয়া অবধি বরাবরই সে অশ্রায়ের বিরুদ্ধে মাথা তুলিয়াছে, এ জন্ত কত নিন্দা, কত অনুরোধই না তাহাকে শুনিতে হইয়াছে ; কিন্তু সে কোনও দিকেই দৃকপাত করে নাই । বাসরে স্বামীর মুখে যে কাহিনী সে শুনিয়াছে, তাহার সহিত কত বড় বিপদ, কত বিপ্লব, কত সব কলহের সম্ভাবনা যে জড়াইয়া

রহিয়াছে, তাহা উপলব্ধি করিতে চণ্ডীর বিলম্ব হয় নাই। স্বামীর বেখানে কোনও সম্মান নাই, কিছুমাত্র আদর নাই, কোনওরূপ প্রতিষ্ঠা নাই,— দরিদ্রের কণ্ঠা সে, সেই—স্বামীর সহধর্মিণী হইয়া সেখানে চলিয়াছে ; কি ব্যবহার পাইবে, তাহার আত্মমর্যাদার উপরেও আঘাত আসিবে কি না, কে বলিতে পারে ! এই সব ভাবিয়াই চণ্ডী তাহার সঙ্কল্প আগে হইতেই স্থির করিয়া লইয়া বাণুলীর প্রাসাদে প্রবেশ করিয়াছিল।

কিন্তু প্রাসাদের ভিতর রাণী মাধুরীদেবীর প্রতাপের অস্ত ছিল না। প্রাসাদের কর্তা তাঁহার অসংখ্য প্রজা ও সেরেসতার কর্মচারীদের মুখে ‘হুজুর’ সম্বোধন শুনিয়াই সন্তুষ্ট থাকিতেন, রাজা আখ্যা তিনি পছন্দ করিতেন না। কিন্তু খেতাবধারী রাজার কণ্ঠা মাধুরী দেবী স্বামীর এই ত্যাগটুকুকে খ্যাতিলাভের পথে একটা প্রকাণ্ড ক্রটি বলিয়াই সাব্যস্ত করিয়াছিলেন, এবং স্বামীর এই ক্রটিটুকুর পরিপূরণ করিতে তাঁহার চেষ্টার ক্রটি দেখা যায় নাই। সংসার-তরণীখানির হাল ধরিয়াই তিনি শুদ্ধান্তের সকলকে জানাইয়া দিলেন, বাপের বাড়ীতে তিনি ছিলেন রাজকণ্ঠা,—এখানে রাণী। সুতরাং এক কর্তা ভিন্ন সকলের মুখেই গুঞ্জন উঠিল—রাণী-মা। মায়ের খ্যাতির অংশে পুত্রও বঞ্চিত হইল না, রাণীর ইচ্ছানুসারে পুত্র নিবারণ খোকা-রাজা আখ্যা পাইল।

গোবিন্দের বিবাহ-প্রসঙ্গে রাণী প্রসন্ন হইতে পারেন নাই। তবে তাঁহার মনে এইটুকু সাস্তুনা ছিল যে, বধু দরিদ্রের মেয়ে, এখানে আসিয়াই অবাক হইয়া যাইবে, ঐশ্বর্য্য তাহার দুই চক্ষু বলসিয়া দিবে ; এ রকম মেয়েকে দাসী বাঁদীর মত পদানত করিয়া লইতে অসুবিধা হইবে না। সুতরাং মনের ভাব গোপন রাখিয়া গোবিন্দের বিবাহে গুথে তিনি খুবই উৎসাহ দিলেন, আনন্দ প্রকাশ করিলেন, তাহার মধ্যে দীর্ঘনিশ্বাসের সহিত গভীর মর্মব্যথাটুকুও সকলকে শুনাইয়া দিলেন,—ছেলেটা পাগল ব'লে, একটা যা তা ঘরের গরীবের মেয়ে আসছে তার বউ হয়ে ! মেঘেটারও

ঝকমারী, না পারবে ভরসা ক'রে মিশতে,—পারে পারে জড়িয়ে মরবে; ছেলেটারও হবে নাকালের একশেষ।—আশ্রিতা, আত্মীয়া, অনাত্মীয়া, পাচিকা, পরিচারিকা প্রভৃতি বিভিন্ন অবস্থা ও বয়সের মেয়েরাও রাণীর দেখাদেখি গরীবের এই মেয়েটির ভাগ্যের কথা ভাবিয়া একটি করিয়া নিশ্বাস ফেলিতে ভুল করে নাই।

কিন্তু প্রথম দর্শনেই বধুর কুণ্ডলশূন্য প্রতিভাদৃষ্ট মুখখানি মাধুরীদেবীর দৃঢ়চিত্তে সংশয়ের একটা নিবিড় রেখা টানিয়া দিল। নববধুসুলভ অপরিণীম লজ্জা ও আড়ষ্টতার প্রভাব কাটাইয়া সহজ স্বচ্ছন্দভাবেই বধু যখন প্রাসাদের সিংহদ্বারে চতুর্দোলা হইতে নামিল, বাণুলী-প্রাসাদের বিপুল ঐশ্বর্যের নানা নিদর্শনই সেখানে বিকোণ হইয়াছিল। কিন্তু রাণী নিম্পলক-নয়নে দেখিলেন, দরিত্রের এই মেয়েটির চক্ষু দুইটি চক্ষুচমৎকারী ঐশ্বর্যের কোনও দিকেই আকৃষ্ট নহে; বরং তাহার দৃষ্টিতে যেন দস্তুর একটা ভঙ্গি ও মুখে তাহারই আভাস পরিস্ফুট। অথচ তাহার দিক দিয়া শিষ্টাচারের কোনও অভাব দেখা গেল না। মাধুরীদেবী বধুর চরণ দুইখানির উপর প্রথা অনুযায়ী হরিদ্রা-বারি ঢালিবামাত্রই বধু তৎক্ষণাৎ নত হইয়া তাঁহার পদধূলি লইয়া মাথায় দিল, তাহার পর যুক্ত হাত দুইখানি ললাটে তুলিয়া স্মিত-বদনে সমবেত মহিলাদের উদ্দেশে শ্রদ্ধা নিবেদন করিয়াই সম্মুখে আস্তৃত রক্তবর্ণ বনাতমণ্ডিত পথে বরের পার্শ্ব-বর্তিনী হইয়া অসঙ্কোচে অগ্রসর হইল, কাহাকেও কোলে তুলিয়া লইবার অবসর দিল না। মাধুরীদেবীই শুধু তীক্ষ্ণদৃষ্টিতে দেখিলেন, অন্তের অনলক্ষ্যে অপূর্ব কোশলে বধু তাহার জড়প্রকৃতি বরটির পার্শ্বে থাকিয়া তাহাকে চালনা করিতেছে। সেই মুহূর্ত্তেই স্তব্ধ বিশ্বয়ে রাণী উপলব্ধি করিলেন,—এ বংশের বধুর অধিকারটুকু পাইয়াই যেন এই অদ্ভুত মেয়েটি অতীতের বাহা কিছু সমস্ত মুছিয়া ফেলিয়া মহিমময়ী রাজ্ঞীর মতই পুরীর ভিতরে চলিয়াছে,—রাজ্য তাহার বুঝিয়া লইতে! মাধুরীদেবীর মনে পড়িল,

বধূর বয়সে তিনও ঠিক এইভাবে এই তেজোদৃষ্ট মনোবৃত্তি লইয়া এই স্থানে আসিয়া দাঁড়াইয়াছিলেন।

পরিজনদের উপর মাতুলিক অন্তর্ধানগুলির ভার দিয়া নিজের মহল্লায় নির্জন কক্ষে আসিয়া মাধুরীদেবী শয্যার আশ্রয় লইলেন। পরিচারিকারা পশ্চাৎ পশ্চাৎ ছুটিয়া আসিয়াছিল, তিনি তাহাদিগকে ফিরাইয়া দিলেন। উপাধানের উপর মুখখানি চাপিয়া বহুক্ষণ তিনি নিজজীবের মত পড়িয়া রহিলেন। নিজের অজ্ঞাতে অবিরল অশ্রুধারায় উপাধান সিক্ত হইতে তিনি শিহরিয়া উঠিয়া বসিলেন, অঞ্চলে চক্ষু দুটি মুছিয়া নিজের মনে কহিলেন,—‘ছি, ছি, এ আমার হ’ল কি? এক রত্তি একটা মেয়েকে আমার প্রতিদ্বন্দ্বিনী ভেবে আমি কেঁদে সারা হচ্ছি!’—জোর করিয়া নিজের দেহখানিকে টানিয়া রাণী অলিন্দে আসিয়া দাঁড়াইলেন। কিন্তু সেখানে উৎসব-সজ্জায় সজ্জিত বিশাল পুরীর সৌন্দর্য্য তাঁহার দুই চক্ষুর উপর যেন দুর্ভেদ্য ধূম্রজাল রচনা করিতেছিল। তখন তাঁহার কণ্ঠের অক্ষুটস্বর প্রশ্নের মত শুনাইল,—দোষ কার? এ কি প্রকৃতির প্রতিশোধ?

অস্থিরপদে সুদীর্ঘ অলিন্দে কিছুক্ষণ পদচারণার পর পুনরায় রাণী স্থির হইয়া দাঁড়াইলেন, সঙ্গে সঙ্গে আর্তকণ্ঠের পুনরুচ্ছ্বাস,—‘দুর্জয় পণের জন্মই না আমার এই পরাজয়! নিবারণের পাশেই ত আজ এই বধূটির দাঁড়াইবার কথা!—তৎক্ষণাৎ কর্তার মুখের কথা দৈববাণীর মত তাঁহার কানে ঝঙ্কার দিয়া উঠিল,—গাধাবোটখানাকে টেনে নিয়ে যাবে বলেই এই ষ্টীমলঞ্চের ব্যবস্থা।—রাণীর বুকখানি অমনই উদ্বেলিত হইয়া উঠিল, তিনি যেন কল্পনার দৃষ্টিতে দেখিতে পাইতেছিলেন,—এই তেজীয়ান্ ষ্টীমলঞ্চের সহায়তায় গাঙ্গুলী-পরিবারের অকস্মণ্য গাধাবোটখানি ধীর-মহুরগতিতে বাঙালীর রাজ-গদী লক্ষ্য করিয়া অগ্রসর হইতেছে! শিহরিয়া দুই হাতের করপুটে মাধুরীদেবী নিজের ম্লান মুখখানি লুকাইলেন।

স্বয়ংসিদ্ধা ।

পরক্ষণে কানে বাজিল নিবারণের নিদারুণ তীক্ষ্ণস্বর,—মা!—তিনিই
নতুন বৌএর আস্পদকার কথা !

নিজের মঙ্গলব্যথা প্রচ্ছন্ন রাখিয়া চকিতভাবে মা দুই চক্ষু বিস্ফারিত
করিয়া চাহিলেন, অপ্রতিহতপ্রভাব পুত্রের এমন ব্যথাতুর বিবর্ণ মুখ তিনি
কোনও দিন দেখেন নাই । তাঁহার ওষ্ঠে কথা স্ফুরিত হইল না, কিন্তু দুই
চক্ষুতে প্রশ্ন ফুটিয়া উঠিল ।

নিবারণ কহিল,—দেখাশোনার সময় বাবা না-কি বউকে একগাছা
চাবুক দিয়ে বলেছিলেন, এই দিয়ে একটা গাধাকে সায়েস্তা করতে হবে ।
খেলার আসরে বউ সবার সামনে বলেছে—সে গাধা আমি । আমাকেই
সে খুঁজছিল ।

মনের ভাব গোপন করিয়া মুখে সকৌতুক হাসির ঝিলিক তুলিয়া
মাধুরীদেবী কহিলেন,—আজকের দিনের কথা কি গায়ে মাথতে আছে
পাগল ! তুই হচ্ছিস্ দেওর, তাই ঠাট্টা করছে বউ ।

নিবারণ কঠিনস্বরে কহিল,—আমি ত আর ঠাট্টা বুঝি না । ওকে
ঠাট্টা বলে না, দিবিয়া ঝাঁঝিয়ে ও কথা বলেছে, তেজ দেখিয়েছে ; আমিও
তোমাকে বলে রাখছি, মা, এ তেজ যদি না ভাস্কতে পারি—আমি
খোকা-রাজা নই ।

মাধুরীদেবী স্তব্ধ-বিস্ময়ে অবাক হইয়া রহিলেন, নিবারণকে ডাকিয়া
ফিরাইতে বা প্রবোধ দিয়া বুঝাইতে তাহার মুখে কথা কুটিল না ।

রাজীর নিকট নিবারণ বধুর বিরুদ্ধেই একতরফা অভিযোগ করিয়া গেল এবং অভিযুক্তের শাস্তির ব্যবস্থা সে যে নিজের হাতেই করিবে, সে কথা-টুকুও দস্তুর সহিত ব্যক্ত করিতে দ্বিধা করিল না। কিন্তু সেই অপ্রীতিকর প্রসঙ্গে সে নিজেও যে কতখানি অপরাধী, সে কথা সে নিজেও যেমন চাপিয়া গেল, প্রত্যক্ষদর্শীর দলও তেমনই খোকা-রাজার অপরাধ সম্বন্ধে নীরস্তরই রহিল। যাহাদের সাহস একটু বেশী ও উচিতবক্তা বলিয়া কিছুই খ্যাতি আছে, তাহারা এ প্রসঙ্গে যে নির্ভীক এজাহার দিল, তাহার মন্ত্র এইরূপ,—গোড়ার দিকে খোকা-রাজার কথাগুলো একটু মুখ-আলগা-গোছের হয়েছিল। কিন্তু তা না হয় হ'ল; তা ব'লে কি টস্ দেখিয়ে অমন ক'রে কথা বলা বউ-মানুষের মুখে সাজে? হাজার হোক, ভুই ত বাছা গরীবের ঘরের মেয়ে, তার উপর বিয়ের কনে, আর উনি হচ্ছেন ঘরের ছেলে—রাজপুত্র।

কিন্তু এই অপ্রীতিকর ব্যাপারটির প্রকৃত বিবরণ এইরূপ,—মাঙ্গলিক অনুষ্ঠানগুলি যখন প্রায় শেষ হইয়া আসিয়াছে, সেই সময় তরুণী-সমাজে চাঞ্চল্য উঠিল। বেশ বুঝা গেল, সে স্থলে এমন কোনও মাতব্বর ব্যক্তির আগমন হইতেছে, যাহার সম্বন্ধে অধিকাংশ মেয়ের মনে লজ্জার অন্ত নাই। বিভিন্ন কণ্ঠ হইতেই চাপা সুরের অস্ফুট নির্দেশ—খোকা-রাজা! খোকা-রাজা! এতক্ষণ যাহারা ঘোমটা খুলিয়া অসকোচেই আনন্দ অনুষ্ঠানে যোগ দিয়াছিল, আগন্তকের নামেই তাহারা শশব্যস্ত হইয়া মাথার কাপড় টানিয়া তাহার মধ্যে মুখ লুকাইল।

বধু এতক্ষণ অবনতমুখী হইয়া নির্দেশমত মাঙ্গলিক অনুষ্ঠানগুলিতে লিপ্ত ছিল। সাপের নাম শুনিলে মানুষ যে ভাবে চমকিত হইয়া উঠে, খোকা-

রাজা নামটি শুনিতেই বধুও ঠিক সেইরূপ সচকিত ভঙ্গিতে সোজা হইয়া বসিয়া তীক্ষ্ণদৃষ্টিতে দ্বারের দিকে চাহিল। বিবাহ-বাসরে স্বামীর মুখের কথাগুলি তখনও সে ভুলে নাই,—‘খোকা রাজা তা হ’লে পিঠের চামড়া আমার আন্ত রাখবে না, এক এক দিন যা মারে!’—সেই লোকটি আসিতেছে তাহারই সম্মুখে!

ভাবভঙ্গি, গতিবিধি ও সর্ব্বাঙ্গে আভিজাত্যের নানা নিদর্শন লইয়া সেই সুবৃহৎ হলটির ভিতর দেখা দিল খোকা-রাজা নিবারণ! তরুণীদের সঙ্কোচ-ভাব ও সহসা অবগুষ্ঠনবতী হইবার প্রয়াস তাহার দৃষ্টি অতিক্রম করে নাই। রুক্ষস্বরে সে কহিল,—‘আমি কি বাঘ যে আমাকে দেখেই সবাই ভয়ে জড়সড়!’

আরও কি বলিতে যাইতেছিল নিবারণ, কিন্তু ঠিক এই সময় নববধুর দীর্ঘায়ত দুইটি চক্ষুর সুতীক্ষ্ণ দৃষ্টির সহিত হইল তাহার বিচিত্র চক্ষুবুগলের বিষম সংঘাত! বিচিত্র চক্ষু বলিবার অর্থ এই যে, নিবারণের দুই চক্ষুর তারকায বিড়ালের চক্ষুর মত অপূর্ব্ব বর্ণ বৈচিত্র দেখা যায় এবং ইহাই এই সুন্দর সুগঠিতদেহ তরুণ যুবাটির আকৃতিগত একটা বিষম খণ্ড অথবা বিশেষত্ব।

তাহাদেরই তালুকের এক সাধারণ প্রজার মেয়ে এ বংশের বধুর মর্যাদা লইয়া আসিয়াছে,—কিন্তু বংশের কলঙ্ক বিকৃতমস্তিষ্ক বড়খোকার পার্শ্বে বধুটি কেমন খাপ খাইয়াছে, তাহা দেখিতেই সদস্ত কৌতূহলে খোকা-রাজার এই মহিলা-মজলিসে আধির্ভাব হইয়াছিল। কিন্তু আসিবামাত্রই এ ভাবে বধুর সহিত তাহার চোখোচোখি হইবে ও বধু সকল সঙ্কোচ কাটাইয়া পরিপূর্ণ দৃষ্টিতে তাহার দিকে তাকাইবে, ইহা সে কল্পনাও করে নাই। বধুর সঙ্কোচশূন্য প্রথর দৃষ্টি, সুন্দর সপ্রতিভ মুখ ও সর্ব্বাঙ্গের অনবচ্ছন্ন সুবন্দা নিবারণের মস্তিষ্কের ভিতর কেমন একটা জ্বালা ধরাইয়া দিল। ক্ষণকাল বধুর দিকে বন্ধ-দৃষ্টিতে চাহিয়া সহসা

বিদ্রোপের সুরে সে কহিল,—খাসা বউ ত বাগিয়েছে আমাদের গবা পাগলা,—তবে এটা ঠিক বাদরের গলার মুক্তোর মালার মতই মানিয়েছে।

পরের বাড়ী, অপরিচিত স্থান, চারিধারে অনাখীয়ে সমাবেশ, নিজের অসহায় অবস্থা সেই মুহূর্তেই চণ্ডী সমস্ত ভুলিয়া গেল; যে নিষ্ঠুর মানুষটির কদর্যা চিত্র সে মানসপটে কল্পনার তুলিতে আঁকিয়া রাখিয়াছিল, তাহাকে চাক্ষুষ দেখিবার জন্মই তাহার চক্ষু দুইটি অবাধে বিস্ফারিত হইয়া উঠে। কিন্তু দৃষ্টিবিনিময়ের সঙ্গে সঙ্গেই যে সেই মানুষটি তাহাকেও অভদ্রের মত একরূপ আঘাত দিবে, এ ধারণা তাহার মনে আসে নাই। উত্তেজনায় চণ্ডীর সর্ব্বাঙ্গে শিরায় শিরায় তখন রক্ত উষ্ণ হইয়া ছুটিয়াছে, মনের ভিতরের সমস্ত ছালাটুকু তাহার দুইটি চক্ষুতে তখন দীপ্ত হইয়া উঠিয়াছে; সেই প্রোঞ্জনা দৃষ্টি স্বামীর মুখের উপর স্থাপন করিয়াই কিন্তু সে শিহরিয়া উঠিল। দেখিল, সে মুখ একেবারে নিশ্চভ, ছাইয়ের মত বিবর্ণ; সর্ব্বাঙ্গ তাহার থর্-থর্ করিয়া কাঁপিতেছে। মুখে কোনও কথা নাই, কিন্তু দুইটি কাতর চক্ষুর আর্ত দৃষ্টিতে একটা অব্যক্ত আতঙ্ক যেন কুটিয়া উঠিতেছে!

স্বামীর সহিত চোখোচোখি হইতেই একটি মর্ম্মভেদী নিশ্বাস কেলিয়া চণ্ডী তাহার উত্তেজনা দীপ্ত মুখখানি নত করিল, সেইসঙ্গে আস্তে আস্তে মাথার উপর অবগুণ্ঠন টানিয়া দিল।

বরবধূর সান্নিধ্যেই বসিয়াছিল নিবারণের মাতুল-কণ্ঠা মৃগালিনী। সপ্তদশী তরুণী, রূপও তাহার প্রচুর; বেথুনে পাড়িয়া একটা পাশও করিয়াছে। সহরের অভিজাত ঘরের আদপ-কায়দা পদে পদে সে মানিয়া চলে। একে ত মৃগালিনী খেতাবধারী রাজার আদরিণী নাতনী, স্বামীও কেউকেটা নয়,—নামজাদা ব্যারিষ্টারের ছেলে এবং নিজেও ব্যারিষ্টার হইবার জন্ম বিলাতে পড়াশুনা করিতেছে। এ অবস্থায়

পল্লী অঞ্চলে মহিলা-সমাজে সর্বক্ষণই মৃগালিনীর নাকটি উচু করিয়া থাকিবার কথা,—যাহার তাহার সহিত সে বড় একটা কথা কহে না, নিজের মর্যাদা দস্তুর সহিত রক্ষা করিতে সে সর্বদা সচেতন। রাণী মাধুরীদেবী এই স্পর্ধিতা ভ্রাতৃকণ্ঠাটিকে অস্তুরের সহিত ভালবাসেন। তিনি বলেন,— আভিজাত্যের অহঙ্কারটুকুই বড় ঘরের মেয়েদের একটা উচু রকমের সৌন্দর্য্য। বিলাত হইতে স্বামী ফিরিয়া না আসা পর্য্যন্ত এই সৌন্দর্য্যময়ী ভাইঝিটিকে রাণী সঘরে নিজের কাছেই রাখিয়াছেন।

বধূকে সহসা অবগুণ্ঠন টানিতে দেখিয়া মৃগালিনী মুখ টিপিয়া হাসিয়া কহিল,—কথার এমনি খোঁচা দিলে দাদা যে, বউ একবারে লজ্জাবতী লতা!

বধূর দিকে বক্রদৃষ্টিতে চাহিয়া নিবারণ কহিল,—কোথায় ওঁকে দেব বাহবা—ওঁর সাহস দেখে, কিন্তু উনিও শেষে ওঁদের দলে ভিড়ে গেলেন,—মেপে একটি হাত ঘোমটা, একবারে কলাবউ!

মৃগালিনী নিবারণের কথায় সায় দিয়া হাসিমুখে কহিল,—তাই ত, এ যেন গোড়া কেটে আগায় জল ঢালা হ'ল!

সহর্ষে নিবারণ কহিল,—ঠিক বলেছিম্ মিনা, অমন ক'রে চোখ মেলে দেখবার পর ও লজ্জা এখন আর খাটবে না, ওকে বাতিল করাই চাই; ঘোমটাখানা তুই খুলে দে আগে।

মৃগালিনী নিবারণের কথায় তাহার দীর্ঘ অবগুণ্ঠনের প্রান্তভাগ স্পর্শ করিতেই বধূর হাতখানি তাহার কনুইটির উপর হেলিয়া পড়িল; পরমুহূর্ত্তেই বিদ্যুৎস্পৃষ্টবৎ মৃগালিনীর সর্ব্বাঙ্গ আড়ষ্ট, নিদারুণ যন্ত্রণায় সে আর্তনাদ তুলিল,—মা গো!

তাহার ফিটের ব্যামো ছিল, সকলেই ভাবিল, মৃগালিনীর ফিট হইয়াছে। পার্শ্ববর্ত্তিনীরা চঞ্চল হইয়া উঠিল। কিন্তু একটু পরেই তাহার সে ভাব কাটিয়া গেল, সে প্রকৃতিস্থ হইয়া অবগুণ্ঠনবতী বধূর দিকে সংশয়ান্বিতদৃষ্টিতে চাহিল।

নিবারণ কহিল,—কি হ'ল তোর মিনা,—অমন ক'রে নেতিয়ে পড়লি যে !

মৃগালিনীর দেহখানি তখনও ঠক্-ঠক্ করিয়া কাঁপিতেছিল। কণ্ঠের স্বরও তাহার প্রভাব অতিক্রম করিতে পারে নাই। মৃদুস্বরে সে উত্তর দিল,—বউএর ঘোমটাখানি ধ'রে যেই তুলতে যাব, অমনি একটা ঝাঁকুনি পেলুম সর্ব্বাঙ্গে ; কে যেন শিরাগুলো জোর ক'রে টানা-হেঁচড়া করতে লাগলো। ভাবলুম, ফিট বুঝি এলো, কিন্তু তা নয়। আমার মনে হয়, বউ কিছু কারসাজি করেছে।

নিবারণ ব্যাঙ্গের সুরে কহিল,—তা মিছে নয়, শুনেছি কবরেজের মেয়ে, তুক-তাক হয় ত অনেক কিছুই জানে।—কিন্তু তুই যে ভয়ে স'রে এলি, ঘোমটাখানা খুলে দিলি নি !

মৃগালিনী কহিল,—আবার ! আমার দ্বারা হচ্ছে না দাদা, ইচ্ছা হয়, তুমি নিজে খুলে দাও।

নিবারণ স্বর তীক্ষ্ণ করিয়া কহিল,—ঘোমটাখানি নিজেই খুলবে, না আমাকেই খুলে দিতে হবে নিজের হাতে ?

বধু নির্ঝক, নিশ্চাণ প্রতিমার মত নিশ্চল। শ্লেষের সুরে নিবারণের পুনরায় প্রশ্ন,—গোড়ায় তীরটি ছুঁড়ে তারপর হঠাৎ এমন বৈরাগ্য কেন শুনি ?

• মৃগালিনীও এবার ঝঙ্কার দিয়া কহিল,—ঢং দেখে আর বাঁচিনে ! দেওরকে দেখে এতই যদি লজ্জা, চোখের পর্দা তুলে অমন ক'রে আগেই চেয়েছিলে কেন শুনি ?

অবগুণ্ঠনের মধ্য হইতে বধুর কণ্ঠস্বর এবার ঝঙ্কার দিয়া উঠিল,—কেন অমন ক'রে চেয়েছিলুম তখন, তাই জানতে চান ?

বধুর কথায় সকলেরই মনে গভীর বিস্ময়, বিপুল কৌতূহল।

বধু দৃঢ়স্বরে কহিল,—বাবা আমাকে দেখতে গিয়ে একটা চাবুক যৌতুক দিয়েছিলেন।

কাহারও মুখে কথা নাই, বধুর কথা শুনিতে সবাই উৎকর্ষ।

বধু কহিল,—বাবা বলেছিলেন, তাঁর বাড়ীতে একটা বেয়াড়া গাধা আছে, তাঁর দেওয়া চাবুক দিয়ে তাকে সায়েস্তা করতে হবে। সেই গাধাটাকে দেখবার জগ্গেই আমি অমন ক'রে চেয়েছিলুম।

বধুর মুখের কথা শুনিয়া সকলেই একেবারে স্তব্ধ। অবগুণ্ঠনের মধ্য দিয়া তরুণীরা নির্ঝাঁক-বিস্ময়ে দেখিতেছিল—নিবারণের সুন্দর মুখখানির উপর কে যেন এক ঝলক কালি ঢালিয়া দিয়াছে!

এগারো

গাঙ্গুলী-বংশের প্রথা, কুশণ্ডিকার পর গৃহিণী ও পুরবাসিনীগণ শঙ্খধ্বনি ও পূত গঙ্গাবারির ধারার সহিত সুসজ্জিতা বধুকে শুদ্ধাস্তের কোষাগারে লইয়া যান। সেই কক্ষে এক অতিকায় লৌহময় সিন্দুকেব মধ্যে দুর্লভ রত্নরাজি ও স্বর্ণময় মাস্তুলিক দুশ্রাপ্য বহুবিধ সামগ্রী সুরক্ষিত। শুভক্ষণে কুলবধুর সম্মুখে সেই বিরাট সিন্দুকটির বিশাল ডালা উদ্বাটিত হইলে বধুকে শ্রদ্ধাসহকারে ভিতরের রত্নরাজি ও স্বর্ণময় দ্রব্যাদি স্পর্শ করিতে হয়।

কুশণ্ডিকা-অস্ত্রে শুভ লগ্নে মাধুরীদেবী ও পুরমহিলাগণ রীতিমত শোভাযাত্রা করিয়াই নববধু চণ্ডীকে লইয়া কোষাগারে বিশালকায় রত্ন

সিন্দুকটির সন্মুখে উপস্থিত হইলেন। পাশাপাশি কপিতয় সুদৃঢ় কীলকাবদ্ধ সুবৃহৎ তালায় মহাকায় সিন্দুকের ডালা রুদ্ধ ছিল।

কর্তার আদেশ মত বালক ভৃত্য দুর্গাদাস শৃঙ্খলাবদ্ধ চাবিগুচ্ছ আনিয়া তালাগুলি খুলিয়া দিল। অল্প সময় এই মহাসিন্দুক খুলিবার প্রয়োজন হইলে কর্তার খাস ভৃত্য পালোয়ান পঞ্চানন চাবির তাড়া লইয়া আসে এবং সেই-ই তালাগুলি খুলিয়া গুরুতর ডালা তুলিয়া ধরে।

দুর্গাদাস তালাগুলির চাবি খুলিয়া দিয়া, ডালার কীলক মুক্ত করিয়া সরিয়া দাঁড়াইতেই মাধুরীদেবী বিরক্তির সুরে প্রশ্ন করিলেন,—পঞ্চা যে এল না, ডালা তুলবে কে ?

দুর্গাদাস সবিনয়ে জানাইল,—রাজাবাবু ব'লে দিলেন, পালোয়ান দিয়ে সিন্দুকের ডালা তোলবার আর দরকার হবে না।

ক্র কুঞ্চিত করিয়া রাণী কহিলেন,—তা হ'লে তুই এই ডালা তোলবার মত লায়েক হয়েছিস্ বুঝি ?

ভীতিপূর্ণ স্বরে বালক কহিল,—আমি ! আমার ক্ষ্যামতা কি, রাণী-মা—যে ঐ পেরলয় ডালা তুলব ! হ-হাতে চাড়া দিয়ে চারটি আঙ্গুলও উঁচু করতে পারব না ত, রাণী-মা !

কণ্ঠস্বর তীক্ষ্ণ করিয়া রাণী কহিলেন,—তা হ'লে তোর রাজাবাবুকে গিয়ে বল্ যে, পালোয়ান দিয়ে ডালা তোলবার দরকার যদি না থাকে, তিনি নিজে এসেই ডালাখানা তুলে দিয়ে যান।

চণ্ডী স্থির হইয়া দুই পক্ষের কথাই শুনিতোছিল, ডালা তোলা সম্বন্ধে রাজাবাবুর প্রচ্ছন্ন মনোভাবটি বুঝিয়া সে মনে মনে হাসিল। কিন্তু নিজের মনোভাব গোপন করিয়া শাণ্ডীর মুখের দিকে চাহিয়া সে কহিল,—বাবা তো ভালো কথাই বলেচেন মা, সিন্দুকের ডালা তুলতে মেয়েমহলে পালোয়ানের কি দরকার ? আমরা তুলতে পারব না ?

স্বামীর কথায় মাধুরীদেবীর মনটি অভিমানে ভরিয়া উঠিয়াছিল, বধুর যুক্তি শুনিয়া সর্বদা তাঁহার জলিয়া উঠিল, বড় বড় দুইটি চক্ষুর দৃষ্টি প্রথর করিয়া তিনি বধুর দিকে চাহিলেন মাত্র। বাক্য স্মৃতিত না হইলেও সে তীক্ষ্ণ দৃষ্টির অর্থ দুর্বোধ্য ছিল না।

সেই জলন্ত দৃষ্টির অর্থ কথায় ব্যক্ত করিল তাঁহার ভ্রাতৃকণ্ঠা যুগালিনী। বিজ্রপের সুরে সে বধুকে লক্ষ্য করিয়া কহিল,—কথা কহিতে হয় বউদি, দশ জনের সামনে হিসাব ক’রে—আগ-পাছ ভেবে! এ তোমার বাপের বাড়ীর আমকাঠের সিন্দুক নয় বে, গায়ের জোরে ডালা চাগিয়ে তুলবে!—এর ‘দু’মোণি’ ডালাখানা আমাদের তুলতে হ’লে দু’টি বছর আদা-ছোলা খেয়ে ডন-বৈঠক করতে হবে।

আরক্ত মুখখানিতে অপূর্ব হাসির লহর তুলিয়া বধু উত্তর দিল,—তোমার কথাগুলি সবই সত্য, ঠাকুরঝি, কিন্তু আসল কথাটাই তুমি ভুলে গিবেছ; সে কথাটি হচ্ছে এই,—এ বংশের বধুর মর্যাদা নিয়ে এ ঘরে আসতে হ’লে এই কুলবস্ত্রটির ডালাখানি নিজের হাতে তোলবার যোগ্যতাটুকুও তাকে আনতে হবে। বাবার নির্দেশটুকু মাথায় নিয়ে তাঁরই আশীর্ব্বাদে—বাপের বাড়ীর এমোসিন্দুক-খোলা-হাতেই স্বপুত্রবাড়ীর এই লোহার সিন্দুকটার ডালাখানা আমিই তুলে দিচ্ছি,—পালোয়ান ডাকবার সত্যই কোনও দরকার হবে না।

দিব্য সহজ স্বাভাবিক ভঙ্গিতে অগ্রসর হইয়া চণ্ডী সেই মহাসিন্দুকটির কীলকমুক্ত অতিকায় ডালাটি দুই হাতে তুলিয়া স্বচ্ছন্দে কক্ষের দেওয়ালের আশ্রয়ে তেলাইয়া রাখিল।

দোঁদাওপ্রতাপ জমিদার গৃহিণী—শুদ্ধান্তের রাণী হইতে আরম্ভ করিয়া প্রৌঢ়া-তরুণী-কিশোরী-নির্কিণেশে প্রায় অর্দ্ধশত পুরমহিলা ও তাহাদের পশ্চাতে দণ্ডায়মানা পাচিকা ও পরিচারিকাগণ নববধুর কাণ্ড দেখিয়া অবাক-বিস্ময়ে তাহার দিকে চাহিয়া রহিল;—সত্যই কি বধু স্বহস্তে এই

বিশাল সিন্দুকটির গুরুভার ডালাটি তুলিল, কিম্বা এই বংশের কুলদেবী বধুর কোমল হাত ছু'খানি আশ্রয় করিয়া তাহার মুখ রক্ষা করিলেন ! মৃগালিনীর মুখখানি ছায়ের মত বিবর্ণ, রাণীর দৃপ্ত মুখে অতৃপ্তের কালিমা । বালক ভৃত্য দুর্গাদাস বধুর উদ্দেশে হেঁট হইয়া কক্ষতলে মাথা ঠুকিয়া কহিল,—আপনাকে গড় করছি বউরাণী-মা, এমনটি কুখাও দেখি নাই ।

চণ্ডী কাহারও স্তুতিবাদে কর্ণপাত না করিয়া গৃহিণী মাধুরীদেবীকে উদ্দেশ করিয়া কহিল,—এখন কি করতে হবে, মা ?

গৃহিণী এ পর্য্যন্ত নববধুকে বত দূর সম্ভব এড়াইয়া আসিয়াছেন । উভয়ের মধ্যে কথাবার্তা অল্পই হইয়াছে, একান্ত প্রয়োজনস্থত্রে যে দুই চারিটি কথা তিনি কহিয়াছেন এবং বধু সেই কথার স্থত্রে যে উত্তর দিয়াছে, তাহা তাঁহার ভাল লাগে নাই । এ কক্ষে চাবিসহ ভৃত্য দুর্গাদাসের আগমন, তাহার উক্তি, সেই প্রসঙ্গে বধুর আচরণ প্রত্যেকটিই যেন তাঁহাকে আঘাত দিবার জন্ত ঘটিয়া গেল । সমস্ত রোষটুকু তাঁহার কর্তার উপর গিয়া পড়িল । এই সময়ে বধুর প্রশ্ন যেন তাঁহাকে স্বাভাবিক অবস্থায় ফিরাইয়া আনিল । সঙ্গে সঙ্গে মুখের ভাবটুকু বদলাইবার জন্ত হাসির ভান করিয়া কহিলেন,—সেই কথাই ত ভাবছি অরাক্‌হয়ে মা,—আগে জানা থাকলে পাড়ার মেয়েদের নেমন্তন্ন ক'রে এ ঘরে এনে ঐ হাত ছু'খানার শক্তিটুকু দেখাতুম ।

চণ্ডী অল্প একটু হাসিয়া বেশ সপ্রতিভ ভাবেই উত্তর দিল,—এর জন্ত ভাবনাই বা কেন মা, শুনেছি আজ রাতে হাজার মেয়ে আসবেন নেমন্তন্ন খেতে, আমাদের সে সময় ছেড়ে দেবেন তাঁদের পরিবেশন করতে, তাতেই তাঁরা এই হাত ছু'খানার শক্তি দেখতে পাবেন ; এর চেয়ে সেটা আরও ভালো দেখাবে, আর তাতে আপনাদের কাজেরও সাশ্রয় বড় কম হবে না, মা ।

মাধুরীদেবীর মুখের হাসিটুকু ধীরে ধীরে অস্তহিত হইয়া গেল ! গভীর হইয়াই এবার তিনি কহিলেন,—ভাল, এই ব্যবস্থাই না হয় তখন হবে । এখন ত এ ঘরের কাজটুকু সারা হোক ।

অতঃপর তিনি সিন্দূকের অভ্যন্তরে রক্ষিত দুর্লভ রত্নরাজির উপর বধুর করস্পর্শে মঙ্গলাচরণে প্রবৃত্ত হইলেন । যুগপৎ শব্দ ও হ্রস্বনিতে গাঙ্গুলী-সংসারের লক্ষ্মীর ভাণ্ডার মুখরিত হইয়া উঠিল ।

বার

বিবাহ-বাসরে প্রথম আলাপনের পর এই বিচিত্র দম্পতি কথোপ-কথনের আর অবসর পায় নাই, সে অবসর আসিল ফুলশয্যার মধুময় নিশায় ।

শুক্রান্তের যে অংশে গোবিন্দের মা থাকিতেন, সেই সুবৃহৎ মহলটি নববধুর জন্ম সংস্কার করাইয়া কর্তার নির্দেশমত সাজানো হইয়াছিল । মাধুরীদেবী এ বাড়ীতে বধুরূপে পদার্পণ করিয়া অল্পকালই এই মহলে অবস্থিতি করিয়াছিলেন, স্বামীর চিন্ত হইতে লোকান্তরিতা পত্নীর স্বতিটুকু নিশ্চিহ্ন করিবার জন্ম নিজেই জেদ করিয়া শুক্রান্তের অপরাংশে আধুনিক পরিকল্পনায় তাঁহার বাসোপযোগী স্বতন্ত্র একটি মহল নির্মাণ করাইয়া লইয়াছিলেন ।

অব্যবহৃত পরিত্যক্ত মহলটি দীর্ঘকাল পরে নূতন শ্রী, মনোরম সজ্জা ও প্রচুর দীপালোকে উদ্ভাসিত হইয়া নবদম্পতির সস্বর্ধনা করিতেছিল । নিজের মহলটির ব্যবস্থা দেখিয়া চণ্ডীর মন তৃপ্তিতে ভরিয়া গেল । শয়ন-ঘরে বিচিত্র পালঙ্কের উপর অপূর্ব শয্যা, তাহার আস্তরণ ও উপাধানগুলি

পুষ্পময় । কক্ষতলে পারশ্বদেশীয় মূল্যবান গালিচা আঁসৃত, কক্ষের দেওয়ালে বিভিন্ন স্থানে নানাবিধ মনোজ্ঞ আলেখ্য, দরজার সম্মুখেই দেওয়াল জুড়িয়া এক বিশাল তৈলচিত্র,—অপূর্ব রূপলাবণ্যবতী এক হাশ্বাননা নারীর পরিপূর্ণ অবয়ব সেই ছিত্রে প্রতিফলিত ; কক্ষদ্বারে দাঁড়াইলেই মনে হয়, চিত্রাঙ্কিতা নারীমূর্তি মধুর হাশ্বে অভ্যাগতদের সাদর আহ্বান করিতেছেন ! নানাজাতীয় দুর্লভ ও দুপ্রাপ্য পুষ্পসস্তারে এই বৃহৎ শয়নমন্দিরটির অভ্যন্তর ও বাহিরের সুপ্রশস্ত দরদালান পরিপাটীরূপে সুসজ্জিত ; কক্ষতলে আঁসৃত গালিচার উপর ছোট ছোট ধাতুময় কারুকার্যখচিত আধারগুলি পুষ্পসস্তারে পূর্ণ ।

শয়নঘরের এক পার্শ্বে পুস্তকাগার, বড় বড় সুদৃশ্য আলমারিভরা বিবিধ পুস্তক,—মধ্যস্থলে টেবল, চারিপার্শ্বে কেদারা ; ইহার পরেই বসিবার ঘর, সুন্দর কোচ ও সোফায় সে ঘর সজ্জিত । অপর পার্শ্বে মনোহর প্রসাধন-কক্ষ, বিবিধ বিলাসসস্তার কক্ষের বায়ুকে সুরভিত করিয়া তুলিয়াছে । ইহার পার্শ্বে-ই দম্পতির ভোজন-ঘর, অদূরে প্রশস্ত উন্মুক্ত ছাদ, চারিপার্শ্বে ফুলের টব, নিম্নে সুরম্য উদ্যান ।

উপন্যাসের রাজাস্তঃপুরিকাদের স্বতন্ত্র প্রাসাদ-কক্ষের যে কাহিনী এক সময় চণ্ডীর মনে কল্প-লোকের সৃষ্টি করিত, নিজের মহলে আসিয়া এই প্রথম সে অনুভব করিল যে, কল্পিত কাহিনীও সত্য হয় ।

সুসজ্জিতা দম্পতির সহিত অনেকগুলি তরুণীরও ফুলশয্যার কক্ষে সমাগম হইয়াছিল । আচার অনুষ্ঠানগুলি শেষ হইলেও ইহাদের স্থান-ত্যাগের কোন লক্ষণ দেখা গেল না । বধুর মুখখানি বিরক্তিতে বিকৃত হইয়া উঠিলেও ইহাদের ক্রক্ষেপ নাই ; বধুর অনেক কথাই ইহারা অবাক হইয়া শুনিয়াছে, কিন্তু বরের সহিত বধু কি ভাবে কথা কহে, এ পর্য্যন্ত ইহাদের কেহই তাহা শুনে নাই, সুতরাং শুনিবার এই স্পৃহাটুকু মিটাইতে ইহারা যেন জোর করিয়া জাঁকিয়া বসিয়াছিল । মৃণালিনীই

এখন এ বাড়ীর সকল ক্ষেত্রেই অগ্রবর্তিনী, সে নিজেই কথাটা খপ্পু করিয়া পাড়িয়া ফেলিল, কহিল,—এখন তোমরা দুটিতে গোটাকতক কথা কইলেই আমরা ছুটি পাই, আর উৎসবটারও মধুরেণ সমাপয়েৎ হয়, বৌদিদি !

বধু কোনও উত্তর দিল না, কিন্তু এ বাড়ীতে যে মানুষটিকে কাহারও কথার পিঠে কোনও দিন একটি কথা কহিতেও কেহ দেখে নাই, সেই নিরীহ মানুষটিই সতর্ক বনিয়া উঠিল,—তোমরা তা হ'লে কিছু জান না,—বিয়ের রাতেই আমাদের কত ত কথা হয়ে গেছে, সে বুঝি গোটাকতক ? ওরে বাবা ! সে অনেক—সারারাত ধ'রে কত ভালো-ভালো গল্পো—

গোবিন্দের কথার সঙ্গে সঙ্গে তরুণীদের মুখে মুখে কোঁতুকের হাসি যেন বিদ্যুতের মত খেলিয়া গেল । মৃগালিনী মুখ টিপিয়া হাসিয়া কহিল,—বল কি গবা-দা, এত কথা হয়ে গেছে তোমার বাসরে, গল্পো পর্য্যন্ত ! ও—বাবা !

গোবিন্দের মুখ-চক্ষু তখন উৎসাহে দীপ্ত হইয়া উঠিয়াছে, গভীর উল্লাসের সুরে সে কহিল,—সে গল্পো যদি শোনো, একবারে তাক লেগে যাবে । সব চেয়ে ভালো, সেই যে রাজকণ্ঠে বিগ্বেবতীর গল্পোটা,—কি মজার গল্পো সেটা—ওঃ ।

মৃগালিনী সকোঁতুকে জিজ্ঞাসা করিল,—কে গল্পো বললে গবা-দা, বউ না তুমি ?

গোবিন্দ সগর্বে উত্তর দিল,—ঐ যে—

এতক্ষণে বধুর সহিত গোবিন্দের চোখোচোখি হইল । বধু অসহিষ্ণু-ভাবেই স্বামীর দিকে পুনঃপুনঃ অর্থপূর্ণ দৃষ্টিতে চাহিতেছিল, কিন্তু কথা কহিবার উৎসাহে বধুর মুখের দিকে চাহিবার অবসর তাহার ছিল না । চোখোচোখি হইতেই বধুর তীক্ষ্ণ-দৃষ্টির সংঘাতে গোবিন্দের উৎসাহ

মুহূর্তে নিবিয়া গেল, পরক্ষণেই স্বর নিম্ন ও আৰ্ত্ত করিয়া সে কহিল,—
ও বাবা, তুমিও আবার চোখ দিয়ে ধমকাচ্ছে !

গোবিন্দের কথায় তরুণীরা সকলেই হাসিয়া উঠিল, মৃগালিনী বধুর
দিকে চাহিয়া কহিল,—বৌদি বুঝি তা হ'লে বের রাতেই আমাদের
গবাকান্ত ভাইটির বুদ্ধির স্প্রিংএ পাক-কতক দম খাইয়ে দিয়েছিলে ?

বধু প্রচ্ছন্ন বিদ্রূপের সুরে কহিল,—কি সূত্রে এত বড় আবিষ্কারটি
ঠাকুরঝির বুদ্ধি ভরা মাথায় গজিয়ে উঠল শুনি !

কথাটায় মনে মনে আঘাত পাইলেও সে ভাব গোপন করিয়া সহজ
সুরেই মৃগালিনী উত্তর দিল,—কথা বলবার ধরণ দেখেই গো ! যে লোক
সাত চড়েও কথা কহিত না, আজ সে ওপরপড়া হয়ে কথা কহিতে আসে !
এতে মনে হয় না কি, তোমার হাতের গুণে কিংবা স্পর্শের প্রভাবে
এমনটি হয়েছে ।

বধু একটু হাসিয়া কহিল,—তোমাদের ভাইটিকে তোমরাই যদি সাধ
ক'রে মায়াকাঠী ছুঁইয়ে ঘুম পাড়িয়ে রেখে থাকো, তারপর একটা শুভলগ্নে
হঠাৎ সোণাব কাঠীর পরশ পেয়ে ঘুম তাঁর ভেঙ্গে যাব, সে দোষ ত
আমার নয়, ঠাকুরঝি !

বধুর কথা এক মুহূর্তে সকলকেই নির্ঝাক করিয়া দিল ; মৃগালিনী
আসিয়াছিল তাহাকে খোঁটা দিয়া খাটো করিতে, কিন্তু নিজেই আঘাতের
পর আঘাত পাইয়া ক্রমেই কঠিন হইয়া উঠিতেছিল । এতগুলি মেয়ের
সম্মুখে সে অপ্রতিভ হইয়া যাইবে ! সুতরাং মুখের কথায় বিশেষ জোর
দিয়াই সে এবার কহিল,—দোষের কথা কেন হবে বৌদি, এ-ত খুব
গোরবেরই কথা গো ! হবুকান্ত রাজার ছিল গবুকান্ত মন্ত্রী, এবার আমরাও
পেলুম—গবাকান্ত ভাইটির পরশ-পাথর বউটি !

বধু হাসিমুখে কহিল,—কিন্তু এর পরে সত্যি সত্যিই যদি পুকুর চুরি
হয়, তা হ'লে যেন দোষ দিয়ো না, ঠাকুরঝি !

ঠাকুরঝির মুখে এবার উত্তর যোগাইল না, উত্তর আসিল বাহির হইতে তাহারই উদ্দেশ্যে,—চুপ ক'রে রইলি কেন মিনা, বল না তুই—ও ভয় এখানে মোটেই নেই, কবরেজের মেয়েরা বড় জোর ওষুধ চুরি করতে পারে।

বাহিরের দিকে চাহিতেই সবিস্ময়ে সকলে দেখিল, দ্বারদেশে দাড়াইয়া নিবারণ ! তরুণীদের অনেকেই শশব্যস্ত হইয়া অবগুষ্ঠন টানিল, মৃগালিনীর মলিন মুখখানি উৎসাহে উজ্জ্বল হইয়া উঠিল। নিবারণের কথায় সায় দিয়া সে এবার দৃঢ়কণ্ঠে কহিল,—দাদা ঠিক কথাই বলেছে, বউদি। জমিদারের মেয়ে যদি হ'তে, তা হ'লে তোমার মুখে পুকুর চুরির কথা সাজতো।

সকলকে চমকিত করিয়া উদ্দীপ্ত কণ্ঠে বধু কহিল,—কথা হচ্ছিল ঠাকুরঝি আমাদের মধ্যে, এখানে বাপ-পিতামহকে টেনে আনবার কোনও দরকার ত ছিল না !

আরক্তনুখে মৃগালিনী নিবারণের মুখের দিকে চাহিতেই চকিতের মধ্যে তাহাদের চোখে চোখে কি কথা হইয়া গেল, পরক্ষণেই মৃগালিনী তাচ্ছিল্যের ভঙ্গিতে কহিল, - ছোট মুখে উঁচু কথা বললেই বংশের খোঁটা সকলেই দিয়ে থাকে। যার বাপ নাড়ী টিপে বড়ী বেচে খায়, তার মুখে বড় বড় কথা মানায় না।

ব্রাতা ভগিনীর অশিষ্ট ব্যবহার ও ক্রূর কথায় বধুর দৃষ্টি প্রথর হইয়া উঠিল, মৃগালিনীর মুখের উপর তুই চক্ষু তুলিয়া, মুখের কথায় বিশেষ জোর দিয়াই সে কহিল,—আমার বাবা বৃত্তি হিসেবে ওষুধের বড়ী বেচে খান, এ কথা খুব সত্য, কিন্তু দেনার দায়ে মেয়ে বেচে বংশকে তিনি খাটো করেন নি কোন দিন। এ দিক দিয়ে প্রকাণ্ড শূণ্য ঘড়ার চেয়ে ক্ষুদ্র পূর্ণ ঘড়ীর মর্যাদা অনেক বেশী।

নিষ্ফের কথাগুলি ক্রূর হইলেও বধু যে তাহার উত্তরে এমন নিষ্ঠুর

আঘাত করিবে, তাহার মুখখানি নীচু করিয়া দিবে, মৃগালিনী এতটা ভাবে নাই। এ বাড়ীতে আসিয়া কয়েক দিনের মধ্যেই যে বধু এ বংশের সকল তথ্যই জানিয়াছে, ইহাও সে জানিত না। বিবর্ণ মুখখানি তুলিয়া একান্ত অসহায়ের মত সে নিবারণের দিকে চাহিল।

নিবারণও আজ প্রস্তুত হইয়াই বধুর সহিত বোঝাপড়া করিতে আসিয়াছিল। তাহার পিতৃবংশ ও পিতার বৃত্তির প্রশংসা তুলিয়া অপ্রতিভ করিয়া দিবে এবং এই সূত্রে বড় কথা শুনাইয়া সে দিনের অপমানের প্রতিশোধ লইবে, ইহাই ছিল নিবারণের তরুণ চিত্তের উদ্যম বাসনা। কিন্তু কথার সূত্রে বধুর পিতার প্রশংসা উঠিতেই বধু তাহার উত্তরে যে সূতীক্ষ্ম শর নিক্ষেপ করিয়া বসিল, তাহার লক্ষ্যস্থল কে—মৃগালিনীর আয় নিবারণেরও তাহা বৃষ্টিতে বিলম্ব হয় নাই। তবে মৃগালিনী নিরুপায়ের মত নিবারণের দিকে নির্ঝাক দৃষ্টিতে চাহিয়াছিল, কিন্তু নিবারণ বধুর এই স্পর্ধায় ধৈর্য্যচ্যুত হইয়া চীৎকার তুলিয়া নির্ঝোধের মত কহিল,—কাকে ঠেস্ দিয়ে ছোটমুখে এত বড় কথা তুমি বললে, তা জান ?

চণ্ডী অন্তদিকে মুখ ফিরাইয়া অবিচলিত কণ্ঠে কহিল,—আমি কাউকে ঠেস্ দিয়ে বা কারুর নাম নিয়ে এ কথা বলিনি ; কথার কথায় যারা উঁচু বংশ নিয়ে গলাবাজি করে, আমি তাদের জানাতে চেয়েছি—প্রদীপের নীচেই অন্ধকার বেশী, উঁচু বংশও অনেক সময় নীচু কাজ ক'রে লোক হাসায়, কাজেই বংশ নিয়ে বড়াই করা মস্ত ভুল !

চণ্ডীর কথাগুলি নিবারণকে আরও বিচলিত করিয়া তুলিল, সে এবার দুই চক্ষু পাকাইয়া তর্জনে করিয়া কহিল,—তুমি এখন শাক দিয়ে মাছ ঢাকবার চেষ্টা করছ, কিন্তু এ চালাকী খাটবে না তোমার ! আমি বলছি, তুমি আমার মাতামহকে ঠেস্ দিয়েই এ কথা বলেছ। বল নি তুমি—বল নি ?

নিবারণের গর্জনে ত্রস্ত হইয়া মেয়েরা বধুর মুখের দিকে চাহিল, কিন্তু

ভয়ের কোন চিহ্নই তাহার মুখে দেখা গেল না। পূর্ববৎ অবিচলিত কণ্ঠে সুর অপেক্ষাকৃত কঠিন করিয়া সে কহিল,—আপনার মাতামহের নাম ধরে আমি কোনও কথাই বলিনি, আপনিই তাঁর কথা তুললেন। এখন আমি বলছি, সত্যিই যদি তিনি এমন কাজ ক’রে থাকেন, তাঁর নাতি-নাতনীর সে জন্ত লজ্জিত হওয়াই উচিত।

কি ! তুমি আমার দাদামশায়ের কাজের বিচার করতে চাও ?

আমার বাবার বৃত্তি নিয়ে খোঁটা দেবার অধিকার কে আপনাকে দিয়েছে—আমি যদি এ কথা জিজ্ঞাসা করি ?

তোমার বাবার সঙ্গে আমাদের রাজাপ্রজা সম্বন্ধ, তার সম্বন্ধে চর্চা কববার অধিকার আমার নিশ্চয়ই আছে।

তা হ’লে আমারও উত্তর শুনে রাখুন, মানুষের মতই আমি রাজাব মুখোসপরা মানুষগুলোর অগ্নায়ের প্রতিবাদ করব চিরদিন !

গুণালিনী এই সময় সবেগে নিবারণের একখানি হাত ধরিয়া মিনতির সুরে কহিল,—চুপ কর দাদা, আর কেলেকারী বাড়িয়ে কাজ নেই, এ মেয়ের সঙ্গে কথায় তুমি পারবে না।

নিবারণ তখন রাগে ফুলিতেছিল, এ দিকে উত্তর দিবার মত কথার পুঁজিও তাহার নিঃশেষ হইয়া গিয়াছিল। আলোচ্য বিষয়ের মোড় ফিরাইয়া রুক্ষস্বরে সে এবার ঝঙ্কার তুলিল,—এ রকম আশ্পর্ক সহ করা বাব না, সেদিনও তুমি আমাকে সকলের সামনে গাধা বলেছিলে !

চণ্ডী চুপ করিয়া রহিল, এ কথার কোনও উত্তর দিল না। কিন্তু সেই কক্ষের সকলকে চমকিত করিয়া নিবারণের কথায় উত্তর দিল গোবিন্দ ; স্বর্ণায় মুখখানি বিকৃত করিয়া সে কহিল,—কেন বলবে না গাধা ? দাদাকে পাগল বললি, বউএর ঘোমটা খুলে দিতে গেলি, চোঁচিয়ে সবার কানে তাল ধরিয়ে দিলি—তুই গাধা নম্ ত কি ?

দৃষ্টি উজ্জ্বল করিয়া বধু স্বামীর মুখের দিকে চাহিল। নিবারণের

সহিত মৃগালিনীর আবার দৃষ্টি-বিনিময় হইল, সঙ্গে সঙ্গে নিবারণ শ্লেষের স্বরে কহিল,—গবা পাগলাও কপচাতে শিখেছে দেখছি,—ম'রে যাই, ম'রে যাই! মুখের ভারী দৌড় যে,—বে'র জল প'ড়ে অবধি পিঠে বেত পড়ে নি—তাই বুঝি এত ঝাঁঝ?

গোবিন্দর মুখ আজ খুলিয়া গিয়াছে। নিবারণের কথার পিঠে আজ সে অকুতোভয়ে উত্তর দিল,—সাধে কি বউ তোকে গাধা বলেছে। এক ঘর মেয়েমানুষের ভেতর দাড়িয়ে তুই সকলকে গুনিয়ে বলছিস কি না—বড় ভাইকে মারিস্! তুই গাধা—গাধা; আমার ইচ্ছে করছে, কাগজের একটা গাধার টুপী বানিয়ে তোর মাথায় পরিয়ে দিই,—বেশ মানায় তা হ'লে, আর আমরা সকলে পেছনে পেছনে হাত-তালি দিয়ে বলি—তুই গাধা, তুই গাধা—

চণ্ডী তীক্ষ্ণ দৃষ্টিতে গোবিন্দের মুখের দিকে চাহিয়াছিল, এই সময় আবার চোখোচোখি হইতেই তাহার উৎসাহে সহসা বাধা পাইল, সে বুঝিল,—নিজেও সে গাধার মত চেঁচাইয়া দোষ করিয়া ফেলিয়াছে; মনের উচ্ছ্বাস তৎক্ষণাৎ বন্ধ করিয়া মুখের কথাও বন্ধ করিল।

কিন্তু নিবারণের উৎসাহ তখন উদ্দীপ্ত হইয়া উঠিয়াছে। এ পর্য্যন্ত সে জ্যেষ্ঠকে শাসন করিয়াই আসিয়াছে, আজ সে বধূর অঞ্চল ধরিয়া তাহাকে সকলের সমক্ষে হেয় করিয়া দিবে! তাহার দুই চক্ষু দৃপ্ত হইয়া উঠিল, বধূর উপর সঞ্চিত রোষটুকু গোবিন্দের উপর প্রয়োগ করিয়া সে তীক্ষ্ণস্বরে কহিল,—আজ তোর কান দুটো ধ'রে এই ঘরে ঘোড়দৌড় করাব, রাস্কল!

নিবারণের কথায় বধূর অন্তর যেন জলিয়া উঠিল, কিন্তু বাহিরে তাহার কোন লক্ষণ প্রকাশ না করিয়া, প্রকাশে একটুখানি হাসিয়া সে কহিল,—ঘোড়-দৌড়ের মাঠই আপনার যোগ্য স্থান; কিন্তু মনে রাখবেন, এটা ময়দান নয়, ভদ্র-ঘরের মেয়েরা এখানে আপনার আচরণে

অতিষ্ঠ হয়ে উঠেছেন। রীতিমত সভ্যতা ও ভদ্রতা শিক্ষা ক'রে তবে মেয়েদের সঙ্গে কথাবার্তা কহিতে হয়, এ বিবেচনাটুকুও আপনার নেই!

নিবারণ মারমুখী হইয়া ছফ্কার দিয়া কহিল,—কি বলব, তুমি কনে বউ, মেয়েমানুষ, নহলে—

কণ্ঠের স্বরটুকু তরল করিয়া পরিহাসের সুরে বধু কহিল,—কি কবতেন? কান ধ'রে ঘোড়দোড় করাতেন বোধ হয়? সেদিন আপনাকে উদ্দেশে গাধা বলেছিলুম, কিন্তু আজ আপনার আচরণ দেখে মনে হচ্ছে, গাধাটাকেই ছোট করা হয়েছে।

মৃগালিনী এই সময়ে ক্রন্দনের সুরে চীৎকার তুলিয়া কহিল,—দাদা, তুমি কি এখানে দাঁড়িয়ে দাঁড়িয়ে এমনি ক'রে আঘাত সত্ত্ব করবে? আমি তোমাকে এক মুহূর্তও এখানে থাকতে দেব না, কিছুতেই ন, তুমি চল—

নিবারণ তীক্ষ্ণ দৃষ্টিতে বধুর দিকে চাহিয়া কহিল,—আমি বুঝতে পেরেছি, কার জোরে এত বড় আশ্পর্কা হয়েছে ওর! কিন্তু আমি ব'লে যাচ্ছি, এ দর্প আমি ভাঙ্গবই—যে ওকে মাথায় তুলেছে, সেই-ই ছু পায়ে ধ'াংলাবে কালই। হাঁ, এখানে ঝাঁরা ঝাঁরা আছেন, মিনা, ভুই তাঁদের নাম দিবি, সবাইকে সাক্ষী দিতে হবে বাবার কাছে।

কথাগুলি শেষ করিয়াই খরদৃষ্টিতে একবার বধুর দিকে চাহিয়া নিবারণ টলিতে টলিতে ঘর হইতে বাহির হইয়া গেল।

বধু হাসি-মুখে ঘরের দিকে চাহিয়া কহিল,—মোল্লার দোড় মসজিদ পর্য্যন্ত। কিন্তু ভাইটিকে আগেই কেন এই উপদেশটুকু দাওনি, ঠাকুরঝি!

মৃগালিনী মুখখানি ভার করিয়া কহিল,—মোল্লাকেও চেননি, আর তার মসজিদের মারপ্যাচও দেখনি, দেখবে শীগ্গীর; তখন চোখের জলে পায়ের আলতা পর্য্যন্ত ধুয়ে যাবে।

চণ্ডী সবেগে ছুটিয়া গিয়া মৃগালিনীর কাঁধটি এক হাতে ধরিয়া অপর হাতে তাহার মুখখানি চাপা দিয়া পরিহাস-ভঙ্গিতে কহিল,—মুখ সামলে ঠাকুরঝি, মুখ সামলে! আজ আমাদের ফুলশয্যার রাত, হাসি ছাড়া অন্য কথা মুখে আনাও পাপ, অতএব সাবধান!

মৃগালিনীর সর্বাঙ্গ তখন আড়ষ্ট হইয়া গিয়াছে,—না পারে ঘাড়টি নাড়িতে, মুখ দিয়া কথা বলিবারও সামর্থ্য নাই, বিদ্যৎস্পৃষ্টের মত নির্বাকদৃষ্টিতে সে বধুর দিকে চাহিয়া রহিল। ক্রণকাল পরেই কাঁধ হইতে হাতখানি সরাইয়া বধু তাহাকে মুক্তি দিল। তাহার পর সে তরুণীদের দিকে চাহিয়া কহিল,—আপনারা ঠাকুরঝির সঙ্গে গিয়ে নামগুলো লিখিয়ে দিন, সাক্ষীর সমন যাবে আপনাদের কাছে।

তরুণীদের ভিতর হইতে একজন কহিল, আমরা ত এখন আপনাবই কোটে, এই সময় ঘুসটুস দিয়ে হাত ক'রে ফেলুন, বোদি!

বধু কহিল,—ঠাকুরাপা আগেই আপনাদের সাক্ষী মেনে গেলেন শুনলেন না? আপনারা তাঁর তরফেই সাক্ষী দেবেন, আমার সাফাই সাক্ষী আছে।

এই সময় মৃগালিনী প্রকৃতিস্থ হইয়া কহিল,—বউ আমার গায়ে হাত দিয়েছে, মুখ চেপে ধরেছে, তোমরা তা দেখেছ, রাজাবাবুর কাছে একথা বলতে হবে তোমাদের।

তরুণী-সমাজে তখন চাঞ্চল্য দেখা গেল, কেহ কেহ বিরক্তির সুরে কহিল,—কি ঝক্কারিই করেছি বাবা ফুলশয্যার ঘরে এসে।

নানা কণ্ঠে গুঞ্জন তুলিয়া তরুণীদল মৃগালিনীর সহিত চলিয়া গেল। চণ্ডী এতক্ষণে নিষ্কৃতি পাইল।

ভের

সকলে চলিয়া গেলে ক্ষণকাল পরে বধুও বাহিরের দিকে গেল। এই মহলের প্রবেশদ্বারে দুই জন পরিচারিকা বসিয়া বসিয়া ঘিমাইতেছিল। বধুকে দেখিয়াই তাহারা উঠিয়া দাড়াইল, জিজ্ঞাসা করিল,—কি চাই: বউরাণী-মা ?

বধু কহিল, কিছু চাই না, তোমরা এখন ঘুমাতে যাও। তাহারা বিষ্ময়ে জানিতে চাহিল,—রাতে যদি দরকার পড়ে,—আমাদের সারা রাত পালা ক'রে এখানে জেগে থাকবার কথা। একজন ঘুমোবে, একজন জাগবে।

বধু জানাইল,—কোনও প্রয়োজন নেই এ ভাবে তোমাদের রাত কাটাবার। দরকার পড়ে, আমি নিজেই তা সেরে নেব, আমি ত ঠুঁটো নই—তোমরা যাও।

বিষ্ময়ে হতবুদ্ধি হইয়া তাহারা চলিয়া গেল। বধু স্বহস্তে দরজা বন্ধ করিয়া দিয়া নিজের ঘরে ফিরিয়া আসিল। গোবিন্দ তখন পালঙ্কের উপর গম্ভীর হইয়া বসিয়াছিল। বধু আস্তে আস্তে তাহার সম্মুখে গিয়া দাড়াইল, পরিপূর্ণ শান্ত দৃষ্টিতে স্বামীর মুখের দিকে চাহিল।

গোবিন্দ এতক্ষণ মনে মনে বিচার করিতেছিল, সে যে আজ এত কথা কহিয়া ফেলিল, তাহা কি ভাল হইয়াছে, কিম্বা সে অগ্নায় করিয়া ফেলিয়াছে! চণ্ডীর স্থির মূর্তি ও শান্ত দৃষ্টি দেখিয়া সাহস পাইয়া সে নিজের সংশয় ভঞ্জন করিতে ব্যগ্র হইল, আগ্রহের সহিত চণ্ডীর দিকে চাহিয়া প্রশ্ন করিল,—তুমিই বল না, কথা ব'লে আমি ভাল করেছি, না মন্দ করেছি ?

বধু গম্ভীর হইয়া উদ্ভর দিল,—তুমি নিজে বুঝতে পারছ না, ভাল করেছ কি মন্দ করেছ ?

গোবিন্দ নিরুত্তরে চণ্ডীর মুখের দিকে চাহিয়া রহিল, তাহার জ্ঞান দৃষ্টি যেন প্রকাশ করিতেছিল,—আমি যদি বুঝতে পারব, তা হ'লে তোমাকে জিজ্ঞাসা করব কেন ?

বধু স্বামীর মুখভঙ্গিটির দিকে বক্রদৃষ্টিতে চাহিয়া কহিল,—বাসরের কথা কে তোমাকে বলতে বলেছিল ? মেয়েগুলোর মুখে ঠাট্টা শুনেও তোমার হাঁস হয় নি !

ওহো ! তাই তুমি তক্ষুনি আমাকে চোখ দিয়ে ধমকে দিয়েছিলে ! কিন্তু তুমি ত আমাকে বারন ক'রে দাও নি—বাসরের কথা কাউকে বলতে নেই । তা হ'লে আমি কক্খনো বলতুম না । আর ত বলবনা ।

মনের কথা মুখে সব বলতে নেই, স্বামী-স্ত্রীর মধ্যে যে সব কথা হয়, অপর কাউকে শোনাতে নেই । আজ থেকে আমার সম্বন্ধে কোনও কথা তুমি কাউকে বলতে পারবে না, আমি তোমাকে যা যা বলব, সে সব মনের ভেতর ছিপি এঁটে রাখতে হবে, বুঝেছ ?

বুঝেছি—বুঝেছি,—বউএর কথা কাউকে বলতে নেই, তা হ'লে মন্দ হয় ; আমি আর কক্খনও বলব না ।

বেশী কথা না বলাই ভাল ; যা বলবে, ভেবে চিন্তে বলবে ! তোমার একটি কথায় আজ আমি ভারি খুসী হয়েছি ।

খুসী হয়েছ—সত্যি ? বাঃ—বাঃ ! কি মজা !

কিন্তু জিজ্ঞাসা ত করলে না—কোনু কথাটা ?

বল না, বল না,—লক্ষ্মীটি ! বল না—

“ ঠাকুরপো গাধার কথা তুলতে, তুমি প্রথম যে জবাবটি দিয়েছিলে । বেশ বলেছিলে ।

বলব না ! আমার তখন যা রাগ হয়েছিল !

তোমার মনে তা হ'লে রাগও হয় ?

আগে হ'ত না, কিন্তু এখন হয়, কেউ যদি তোমাকে কিছু বলে, অমনি রাগ আসে। রাগের মাথায় আমি কি করতুম আজ জানি না, কিন্তু তুমি যে আবার ধমকে দিলে চোখ দুটো পাকিয়ে—

তুমি অভদ্রের মত ভারী বাড়াবাড়ি ক'রে ফেললে। মেয়েদের সামনে হাততালি দিয়ে অমন ক'রে চোঁচালে যে নিন্দে হয়।

আচ্ছা, আমি আর কখনও মেয়েদের সামনে চোঁচিয়ে কথা বলব না।

আজ আমাদের ফুলশয্যা, তা জান ত ?

তা আর জানিনা ? অত ঘটা, ঘরে এত ফুল—

আচ্ছা, ঐ বড় ছবিখানা বোধ হয় তোমার মায়ের ?

হাঁ, ঐ ত আমার মা।

তোমার গুঁকে মনে পড়ে ?

কি ক'রে পড়বে মনে ? আমি যে তখন ছোটটি ছিলাম, মা বখন স্বর্গে যান—

এ ঘরের আর সব ছবির গলাতেই আজ মালা চড়ানো হয়েছে, শুধু আমাদের মায়ের ছবিখানিই খালি দেখছি ; বলতে পার—কেন ?

কি জানি ! হয় ত ভুলে গেছে।

কিন্তু আমাদের ত এই ভুলটুকু শুধরে নিতে হবে। ঘরে ত মালায় অভাব দেখাছি না, তুমি ওঠ এখনি, নিজের হাতে মায়ের গলায় মালা পরিয়ে দাও।

অভিভূতের মত গোবিন্দ পালক হইতে উঠিল। কক্ষের বিভিন্ন আধারে প্রচুর মালা ছিল, চণ্ডী নিজে বাছিয়া কয়েক ছড়া গোড়ে স্বামীর হাতে দিল, পার্শ্বের ঘর হইতে নিজেই একখানা কেদারা আনিয়া ছবির সম্মুখে রাখিল, গোবিন্দ তাহার উপর দাঁড়াইয়া মায়ের আলেখ্যটির উপর মালাগুলি চড়াইয়া দিল।

কেদারাখানি সরাইয়া চণ্ডী স্বামীর হাত ধরিয়া সেই আলোখ্য-সম্মুখে নতজানু হইয়া বসিয়া কহিল,—এসো, আমরা দু'জনে এই শুভরাতটিতে আগে আমাদের মায়ের আশীর্বাদ প্রার্থনা করি ;—ভক্তির সঙ্গে বলি, না ! আমাদের মনে বল দাও, তোমার আশীর্বাদে আমরা যেন সত্যকাব মানুষ হ'তে পারি ।

পুরোহিতের মন্ত্র শুনিয়া ব্রতী যে ভাবে তাহা আবৃত্তি করে, চণ্ডীর মুখের কথাগুলি সেই ভাবেই গোবিন্দ ভাবগদ-গদস্বরে উচ্চারণ করিল । চণ্ডী কহিল,—রোজই সকাল সন্ধ্যায় এই ভাবে আমরা এই মন্ত্র পড়ব, তারপর আমরা মানুষের মত মানুষ হবার জন্তু কঠোর সাধনা করব ।

গোবিন্দ জিজ্ঞাসুনয়নে চণ্ডীর মুখের দিকে চাহিয়া রহিল, শেষের কথাগুলি তাহার ঠিক বোধগম্য হয় নাই । চণ্ডী তাহা লক্ষ্য করিয়া কহিল,—আমার কথা বোধ হয় বুঝতে পারনি, কিন্তু মুখে বললে বুঝতে হয় ত পারবেও না ; কাজের সঙ্গে সঙ্গে সব কথাই তুমি ক্রমে ক্রমে নিজেই বুঝতে পারবে । তখন হয় ত আমাকেও অনেক কথা তুমি বুঝিয়ে দেবে । কিন্তু সেই বোঝাপড়ার গোড়াপত্তন হবে আজ এই শুভ রাতটিতে । আজ থেকেই আমাদের সাধনার পথে হাতে খড়ি । চল, আমরা পড়বার ঘরে যাই ।

যেন তাহার মাথার উপর আর কেহ নাই, সেই-ই এই গৃহের সর্বময়ী কর্ত্রী, এমনই সহজ স্বচ্ছন্দ গতিতে অসঙ্কোচে চণ্ডী মন্ত্রমুগ্ধ স্বামীর হাতখানি ধরিয়া পড়িবার ঘরটির দিকে অগ্রসর হইল ।

দ্বিতীয় পর্ব

এক

সেরেস্টার কাজ-কর্ম চুকিয়া গেলেও খাস-কামরায় দেওয়ানজীর সহিত হুজুরের কথাবার্তা তখনও শেষ হয় নাই। প্রকাণ্ড একটা তাকিয়ার উপর দেহতার রক্ষা করিয়া হরিনারায়ণ বাবু সুদীর্ঘ সটকায় সুগন্ধি তাম্রকূট সেবনের ফাঁকে ফাঁকে হাসিনুখে পুত্রবধুর সম্বন্ধে যে মুখরোচক কথাগুলি উদ্গীরণ করিতেছিলেন, ফরাসের প্রান্তভাগে বসিয়া দেওয়ান রাধানাথ বাপুলী সেগুলি উপভোগ করিতে অথও মনোযোগ দিয়াছিলেন। এমন সময় মুখখানি বিষম গস্তার করিয়া নিবারণ সেই কক্ষে প্রবেশ করিল।

মুখের কথা তৎক্ষণাৎ বন্ধ করিয়া কর্তা বিশ্বয়ের দৃষ্টিতে নিবারণের মুখের দিকে চাহিলেন। নিবারণ নিত্যই নিয়মিতরূপে সেরেস্টায় হাজিরা দেয়, তাহার স্বতন্ত্র কামরায় বসিয়া আংশিক কার্যও সম্পন্ন করে। প্রত্যহ বিভিন্ন মহাল হইতে যে সকল অভিযোগ ও আবেদনপত্র সদরের সেরেস্টায় আসিয়া থাকে, নিবারণ সেগুলি পড়িয়া তাহাতে নিজের মন্তব্য লিখিয়া দেয়; অতঃপর খোদ হুজুর দেওয়ানজীর সহযোগিতায় তাহাদের সম্বন্ধে চূড়ান্ত নিষ্পত্তি করেন। এ দিন নিবারণ সেরেস্টায় তাহার কামরায় আসিয়া বসে নাই; তাহার অনুপস্থিতির সংবাদ হরিনারায়ণ বাবুর অজ্ঞাত ছিল না। সুতরাং অসময়ে তাঁহার কামরায় নিবারণের উপস্থিতি ও তাহার গুরুগম্ভীর মুখভঙ্গি এই বিচক্ষণ ভূস্বামীর মুখে সংশয়ের

রেখা ফুটাইয়া তুলিল। ঋণকাল নিবারণের দিকে বক্রদৃষ্টিতে চাহিয়াই তিনি প্রশ্ন করিলেন,—এমন অসময়ে যে নেমে এলে, নিবারণ? তননুম, সেরেস্তায়ও আজ বসনি, শরীর ভাল আছে ত?

নিবারণ তাহার স্বভাবসিদ্ধ রুক্ষস্বরেই উত্তর দিল,—আজ্ঞে হাঁ, শরীর আমার ভালই আছে, তবে মনটা মোটেই ভাল নেই; সেই জন্তই সকালের দিকে নীচে আর নামতে পারিনি, ওপরেই আপনার জন্ত এতক্ষণ অপেক্ষা করছিলুম, দেবী দেখে অগত্যা এখানেই এলুম।

এমনভাবে এক নিশ্বাসে নিবারণ কথাগুলি বলিয়া গেল, যেন এই কয়টি কথাই তাহার বক্তব্য বিষয়ের মুখবন্ধমাত্র, আসল কথাগুলি প্রচ্ছন্ন হইয়াই আছে এবং সেগুলি বাক্ত করিবার জন্তই এমন অসময়ে পিতার খাস-কাময়ায় তাহার আগমন।

কিড়ালের গোফ দেখিলেই শিকারী তাহার প্রকৃতি নির্ণয় করিতে পারে। পুত্রের মুখভঙ্গি ও কথায় প্রচ্ছন্ন অভিমানের নির্দেশ পাইয়াই তীক্ষ্ণদর্শী বর্ষীয়ান পিতার বুদ্ধিতে বিলম্ব হয় নাই যে, এমন অসময়ে কোনও শ্রীতিকর প্রসঙ্গ লইয়া সে নীচে নামিয়া আসে নাই। পুত্রের প্রকৃতি পিতার অবিদিত ছিল না, সুতরাং মুখে কোতূহলের কৃত্রিম ভাবটুকু প্রকাশ করিয়া কোমল স্বরে প্রশ্ন করিলেন,—কোনও বিশেষ কথা তা হ'লে আছে বোধ হয়?

নিবারণ উত্তর দিল,—আজ্ঞে হাঁ।

কর্তা কহিলেন,—দাঁড়িয়ে কেন তা হ'লে, ব'স,—আর কথাগুলোও শীগগীর শেষ ক'রে ফেলো; বেলাও অনেক হয়েছে, অথচ ও-গুলো শোনবারও কোতূহল হচ্ছে।

বক্রদৃষ্টিতে দেওয়ানজীর দিকে তাকাইয়া নিবারণ অপ্রসন্নভাবে কহিল,—আমার কথা উপস্থিত আপনার সঙ্গে, আপনাকেই বলতে চাই।

নিবারণের কথা সঙ্গ সঙ্গ দেওয়ান রাধানাথ বাপুলী তাঁহার বপুখানি নাড়া দিয়া কুষ্ঠার সহিত কহিলেন,—আমি তা হ'লে এখন উঠি, আপনাদের কথাবার্তা চলুক ।

হাত তুলিয়া বাধা দিয়া দৃঢ়স্বরে হরিনারায়ণ বাবু কহিলেন,—বিলক্ষণ ! আমাদের আগেকার কথাই যে এখনও শেষ হয়নি বাপুলী, তুমি উঠবে কি রকম ?

পরক্ষণে পুত্রের দিকে মর্শ্বস্পর্শী দৃষ্টিতে চাহিয়া কহিলেন,—তুমি ও জ্ঞান নিবারণ, আমার এষ্টেট বা ঘরের এমন কোনও কথা নেই, যা তোমার কাকাবাবুর সামনে বলা চলে না । বেলা আর বাড়িয়ে না, নিবারণ, কি কলবে, বল ।

নিবারণের মুখখানি নুহুতে বিবর্ণ হইয়া উঠিল ; প্রবীণ দেওয়ান রাধানাথ বাপুলীর সম্বন্ধে কোনও দিন সে শ্রদ্ধাসম্পন্ন ছিল না । পিতা তাঁহাকে অন্তরঙ্গ বন্ধুর দৃষ্টিতে দেখিলেও, পুত্রের বিদ্বিষ্ট মনে দ্বিধা উঠিত, প্রভু-ভৃত্য সম্বন্ধে যেখানে, এই কৃত্রিম বাধাবাধকতা বালির প্রাচীর বা তাসের বাড়ীর মত সেখানে অসার ! স্মৃতরাং কোনও দিনই দেওয়ান-কাকার উদ্দেশে নিবারণকে সশ্রদ্ধ ব্যবহার করিতে দেখা যায় নাই এবং সেরেস্টার 'গ্যাডমিনস্ট্রেসন' সম্বন্ধে দেওয়ানজীর সহিত তাহার নিজের অভিমত কখনও ঐক্যবদ্ধ হয় নাই । সেই দেওয়ানজীর সম্মুখে পিতার এইরূপ দৃঢ় নির্দেশ পুত্রের চিত্তে যে বিষম আঘাত দিবে, ইহা স্বতঃসিদ্ধ ।

কিন্তু নিবারণ আজ প্রস্তুত হইয়াই আসিয়াছিল । যে প্রগল্ভা বধুটি অল্প কয়েক দিন মাত্র তাহাদের সংসারে আসিয়া অপ্রত্যাশিতভাবে বিষম বিপ্লব বাধাইয়া দিয়াছে, তাহার নিজের ও তাহার মায়ের অপ্রতিহত শাসনশকটের গতিবিধির প্রচণ্ড প্রতিবন্ধক হইয়া দাঁড়াইয়াছে,—তাহার সম্বন্ধে খেয়ালী পিতার প্রকৃত মনোবৃত্তি কিরূপ, তাহার পরিচয়টুকু বর্ষীয়ান পিতার বিশাল মনোরাজ্য আলোড়িত করিয়া আজ সে

উদ্বাটিত করিবেই। সুতরাং দেওয়ানজীর উপস্থিতি উপেক্ষা করিয়াই নিবারণ তাহার গুরুতর সমস্যাটুকুর নিষ্পত্তির দিকেই অগত্যা মনোনিবেশ করিল।

অতঃপর আর কোন ভূমিকা না করিয়াই সে কহিল, -আমি একটা গুরুতর নালিশ নিয়ে আপনার কাছে এসেছি।

নিবারণ যদি তর্জনী তুলিয়া, শাণিত অস্ত্র দেখাইয়া বলিত,— আপনাকে আমি খুন করতে এসেছি,—তাহা হইলেও বোধ হয় কক্ষমধ্যে ফরাসে আসীন দুই বর্ষীয়ান পুরুষ এ ভাবে চমৎকৃত হইতেন না!

- নিবারণের মুখে নালিশের কথা শুনিয়া উভয়ের মুখেই সুগভীর বিশ্বয়ের রেখা স্পষ্ট হইয়া ফুটিয়া উঠিল। সতাই, বিস্মিত হইবার কথাই বটে।

এ পর্য্যন্ত কর্তা বা দেওয়ানজী কেহ কোনও দিন কোনও কারণে এই বেপরোয়া দাস্তিক ছেলেটিকে অস্ত্রের বিরুদ্ধে নালিশ করিতে দেখেন নাই।

নিবারণের বিরুদ্ধে নানা সূত্রে নানা লোকের নিকট হইতে কর্তার দরবারে অসংখ্য নালিশ উপস্থিত হইয়াছে, কিন্তু সে নিজে কোনও দিন নালিশ

নহঁয়া আসে নাই। যে তাহার কোপে পড়িয়া বিরুদ্ধভাজন হইয়াছে, কর্তার দিকে না তাকাইয়া নিজেই বিচার করিয়াছে, নিজের ইচ্ছামত

দণ্ড দস্তুর সহিত দিয়াছে বরাবর, এমন কি, তাহার সম্বন্ধে দেওয়ানজীর আচরণ যদি কোনও দিন অপ্রীতিকর হইত, সে তাহার প্রতিবিধানে

পিতার দ্বারস্থ না হইয়া নিজেই অবজ্ঞার সুরে কহিত,—মনে রাখবেন আপনি, সিংহের শাবক আমি : আমার মর্যাদা হিসেব ক’রে সর্বদা

কথা কহিবেন ! খেয়ালী কর্তার কানে পুত্রের ঔদ্ধত্যের বিবরণ যথাযথভাবেই উঠিত, কিন্তু শাসনে তাঁহার ঔদাসীন্যই দেখা যাইত।

শেষের সুরে তিনি মস্তব্য প্রকাশ করিতেন,—“ওর নামই যে নিবারণ, তাই কারুর বারন মানতে চায় না।” পুত্রের সম্বন্ধে ত্রায়নিষ্ঠ নৃপপ্রতিম

ভূস্বামীর এই দুর্বলতাটুকু উপলক্ষ করিয়া কত গল্প কথাই প্রচারিত হইয়া

আসিতেছে, কত বেনামা-পত্র পিতার করতলগত হইয়াছে, কিন্তু অশুচিত পুত্রবাৎসল্যের ক্রটিটুকু মর্মে মর্মে উপলক্ষি করিয়াও তিনি উদ্যম পুত্র নিবারণকে কোনও দিন বারণ বা শাসন করিতে কিছুমাত্র প্রয়াস পান নাই। এ সম্বন্ধে কোন গৃহ উদ্দেশ্যটুকু তাঁহার অন্তরের অন্তঃস্থ প্রচ্ছন্ন-ভাবে নিহিত, তাহার তত্ত্ব শুধু তিনিই অবগত।

এমন যে দুর্জয় নিবারণ, সেই-ই আজ এই সর্বপ্রথম তাঁহার সম্মুখে দাঁড়াইয়া নালিশের কথা নিবেদন করিতেছে! কিছুক্ষণ তিনি শুদ্ধবিশ্বয়ে নিবারণের মুখের দিকে চাহিয়া রহিলেন, মুখে কোনও কথা নাই; মনের ভিতর শুধু স্মৃতিসাগর আলোড়ন করিয়া কে 'বেন জানাইতেছিল—এমন অঘটন তাঁহার সুদীর্ঘ জীবনে বুঝি আর কোনও দিন ঘটে নাই; পূর্বের সূর্য্য বেন আজ পশ্চিমদিক ধরিয়া প্রকাশ পাইয়াছে,—নিবারণ করিতেছে নালিশ! অথচ তিনি স্বকর্ণে শুনিতেছেন, চক্ষুর উপর তাহার পাণ্ডুর মুখখানি দেখিতেছেন, অবিখ্যাসের কিছু নাই।

ক্ষণকাল পরে আত্মসংবরণ করিয়া কণ্ঠা কহিলেন,—তুমি এসেছ নালিশ নিয়ে আমার কাছে! তা হ'লে ছনিয়ার দরিয়ায় এই প্রথম তুমি হালে পানি পাওনি,—তা, হ'লে আমাকে বুঝতে হবে,—এ মামলাও সাধারণ নয়। ভাল, আসামী কে শুনি? কার বিরুদ্ধে তোমার এই নালিশ?

তীক্ষ্ণদৃষ্টিতে পিতার মুখের দিকে চাহিয়া ততোধিক স্তম্ভিত্বেরে নিবারণ কহিল,—আপনি কি এখনও তা জানতে পারেন নি, বুঝতে পারেন নি কিছু?

নিবারণের এই কয়টি কথা অগ্নিগর্ভ ভয়াবহ বোমার রক্তে বেন অগ্নি-সংযোগ করিয়া দিল; সমস্ত ঘরখানিকে ত্রস্ত-কম্পিত করিয়া স্থবির সিংহ গর্জিয়া উঠিলেন,—চোবরাও বেয়াদব! মনে রেখো, নালিশ করতে

এসেছ তুমি, চোধ রাঙ্গাছ কাকে ? নীচু হয়ে হিসেব ক'রে এখন থেকে কথা বলতে শেখ ।

জীবনের পথে এত দূর অগ্রসর হইয়া এ পর্য্যন্ত পিতার নিকট এমন নির্ঘাত আঘাত নিবারণ কোনও দিন পায় নাই । কঠোরপ্রকৃতি পিতার মুখের উপর অসঙ্কোচে কথা কহিবার একমাত্র অধিকার সেই পাইয়াছিল, কথার পিঠে ইহা অপেক্ষা কঠিন কথা কতবারই সে পিতাকে শুনাইয়াছে, যাহারা সে সময় সেখানে উপস্থিত ছিলেন, নিবারণের কথা শুনিয়া চমকিয়া উঠিয়াছেন, কিন্তু যাহার উদ্দেশে সেই অশোভন কথা, তাঁহার ভ্রষুগল কুঞ্চিত হইয়া উঠে নাই, বরং হাসির আবর্তে বিশাল গুচ্ছ-জোড়াটি বিস্মুরিত হইবার শোভাটুকুই তাঁহারা সবিস্ময়ে দেখিয়াছেন । যাহাদের কথা উল্লেখ করা যাইতেছে, দেওয়ান রাধানাথ বাপুলী তাঁহাদের অন্ততম ; আজ তিনিও ব্ৰহ্মপুত্রের প্রতি পিতার এই অপ্রত্যাশিত তীব্র আচরণে নির্ঝাক বিস্ময়ে স্তব্ধ !

কয়েক মুহূর্ত চুপ করিয়া থাকিয়া নিবারণ মনে মনে তাহার সঙ্কল্প স্থির করিয়া কহিল,—তা হ'লে আমার যা নালিশ, কাগজে কলমে লিখেই দরখাস্ত করব ।

দৃঢ়স্বরে কষ্ঠা জানাইলেন,—না, তার কোনো দরকার নেই, তুমি যা বলতে এসেছ এখানে, ব'লে যাও ।

নিবারণ কহিল,—বেশ, তাই বলছি, কিন্তু আমি বুঝতে পারছি, আমার কথা আপনার মনে আজ ধরবে না—

বাজে কথা বলবার কোনও আবশ্যক দেখছি না নিবারণ, তোমার যে নালিশ, সেইটিই আগে ব'লে ফেলো ।

কারুর সঙ্গে পরামর্শ না ক'রে, ছোট ঘরের একটা মেয়েকে কুলবধুর সম্মান দিয়ে—ছুঁচোর বিষ্ঠা আপনি পাহাড়ে তুলেছেন, তা জানেন ?

এ তোমার নালিশ নয়, নিবারণ, আমার নিজের কার্যের অনধিকার চর্চা—

কিন্তু আপনার কার্যের চর্চা বরাবরই আমি এমনই তেজের সঙ্গেই করেছি।

সে তেজ তুমি হারিয়ে ফেলেছ, তাই অধিকারটুকুও স'রে দাঁড়াচ্ছে। তোমার যেটুকু নালিশ, তাই আমি গুনতে চাই। তোমার কাছে আমার কাজের কৈফিয়ৎ দেবার সময় এখনও আসেনি।

গোবিন্দর বোয়ের বিরুদ্ধেই আমার নালিশ—

ব'লে যাও, আমি গুনছি।

সে সকলের সামনে আমার অপমান করেছে।

কি সূত্রে?

আপনি তাকে এখন আশীর্বাদ করেন, তখন না কি একগাছা সোণার চাবুক তার হাতে দিয়ে তাকে বলেছিলেন—আমার বাড়ীতে একটা গাধা আছে, এই চাবুক দিয়ে তাকে সায়েস্তা করতে হবে—

তাতে তোমার গাত্রদাহের কারণ?

আমাকেই সেই গাধা সাব্যস্ত ক'রে নতুন বো আপনার দেওয়া সোণার চাবুকটি আমারই পিঠে হাঁকড়াবে বলেছে—তাই।

বোনা বলেছে এ কথা?

এক ঘর মেয়ের সামনে, সাফার অভাব নেই।

কথাটি কি সূত্রে উঠেছিল, গুনি?

নতুন বো আমাকে দেখেই ঘোমটা দেয়, আমি তার মুখখানি দেখতে চাই, মীনাকে ঘোমটা খুলে দিতে বলেছিলুম—

তোমার এইটুকু ক্রটিতেই তিনি অত বড় রুঢ় কথা তোমাকে বললেন?

বলেছে কি না, তাকেই আগে জিজ্ঞাসা করবেন; আপনি যে তাকে সোণার চাবুক দিয়েছেন, গাঙ্গুলী-বাড়ীর গাধাকে সায়েস্তা করতে

বলেছেন, এ সব কথা আগে ত শুনি নি ; বোধ হয়, এ বাড়ীর কেউ শোনেনি—বৌএর মুখ থেকে প্রকাশ হবার আগে ।

হঁ ?—তার পর ? আর কিছু বলবার আছে ?

আমার দাদামশাইকেও নতুন বৌ অপমান করেছে ।

কি বললে ?

আমার স্বর্গীয় মাতামহের কথা বলছি ; ফুলশয্যার রাতে এক ঘর মেয়ের সামনে বৌ তাঁর নামে এমন গোঁটা দিয়েছে, শুনে আপনিও শিউরে উঠবেন ।

কি বলেছেন ?

দনার দায়ে তিনি না কি তাঁর মেয়েকে—আমার মাকে—বেচেছিলেন ।

বোমা এ কথা বলেছেন ? বোমা ! চণ্ডী মা !

পকেট হইতে একখানি কাগজ বাহির করিয়া পিতার হাতে দিয়া নিবারণ করিল,—যাঁরা সেখানে ছিলেন, এ কথা বৌকে বলতে শুনেছেন, তাঁদের নাম এতে আছে । আমার কথাটা আপনি যাচিয়ে নিতে পারেন ।

সাদা কাগজখানির উপর কালো কালিতে লেখা কতকগুলি নারীর নাম হরিনারায়ণ বাবুর দৃষ্টিতে তখন যেন কুণ্ডলী-পাকানো একপাল সাপের মত প্রতীয়মান হইতেছিল ! তাঁহার মস্তিষ্কে তখন জ্বালা ধরিয় গিয়াছে, চক্ষুর দৃষ্টি নিম্প্রভ হইয়া উঠিয়াছে ; যে আদরিণী বধুর প্রতি তাঁহার অতি উচ্চ ধারণা, তাহার সম্বন্ধেই এমন গুরুতর অভিযোগ ; তাঁহারই স্বপ্তরকে এমন ভাবে আক্রমণ করিতে সে সাহস পাইয়াছে । এ কি স্পর্ধা তাহার !

কিছুক্ষণ নীরবে কি ভাবিয়া হরিনারায়ণ বাবু করিলেন,—আচ্ছা, তুমি এখন যেতে পার, নিবারণ, তোমার নালিশ আমি নিয়েছি ; বিচারের ক্রটি হবে না ।

নিরুত্তরে পিতার মুখের দিকে একবার তীক্ষ্ণদৃষ্টিতে চাহিয়া নিবারণ ধীরে ধীরে সে কক্ষ হইতে নিজ্জানিত হইল ।

একটা সুদীর্ঘ নিশ্বাস ত্যাগ করিয়া কৰ্ত্তা কহিলেন—বাপুলী, তুলে ত সব !

বাপুলী কৰ্ত্তার মুখের দিকে দৃষ্টি নিবদ্ধ করিয়া কহিলেন,—আপনার কি মনে হয় ?

কৰ্ত্তার গাঢ় করিয়া কৰ্ত্তা উত্তর দিলেন,—নিবারণ মিথ্যা বলেনি, সোণার চাবুকের কথা এ বাড়ীতে আমরা দুজন ভিন্ন আর কেউ জানে না । এমন কি, রাণী পর্য্যন্ত না !

বিচলিত কণ্ঠে বাপুলী কহিলেন,—তা হ'লে কি আপনার ধারণা, বউমা নিবারণকে—

উত্তেজিত কণ্ঠের দৃপ্ত স্বরে বাপুলীর কথায় বাধা দিয়া কৰ্ত্তা কহিলেন,—হাঁ, তাকেই সোণার গাধা সাব্যস্ত ক'রে নিয়েছে । আমার কথা সে ধরতে পারেনি, এইখানেই সে হেরেছে ; সব মেয়েই যেখানে ধরা দেয়, এই অভাগীও ঠিক সেইখানেই হেঁচট খেয়েছে ।

একটা কথা আমার জানতে হ'চ্ছে হ'চ্ছে ।

বল ।

রাণী কিছু আপনাকে বলেছেন এ সম্বন্ধে ?

কিছু না ; কিন্তু না বললেও, নতুন বউ আসার পর থেকেই তিনি আশ্চর্য্যরকম গম্ভীর হয়েছেন ; এখন আমার মনে হ'চ্ছে বাপুলী, তিনি সবই শুনেছেন ; বধুর ব্যবহার তাঁর মনেও কঠিন আঘাত দিয়েছে ।

কিন্তু আপনাকে ত বলেন নি কিছু !

তুমি কি পাগল হয়েছ বাপুলী, বলছ কি ? রাণী এই এক কোটা মেয়ের বিরুদ্ধে আমাকে লাগাবেন, নালিশ করবেন ?

তাও ত বটে, আমি এটা ভাবিনি ।

ভাববার সময় এখন এসেছে, বাপুলী ! এখন মনে হচ্ছে আমার, বড় ঘরোয়ানা অবহেলা করবার নয় ; যারা করে, তারা ঠকে । আমিও বোধ হয় ঠকেছি, বাপুলী ।

আমার কিন্তু দৃঢ়বিশ্বাস, আপনি যে-ঘরে সওদা করেছেন, সে ঘর পয়সা ছাড়া আর সব দিক দিয়েই বড়, আপনি ঠকেন নি ।

আমিও তাই ভেবেছিলুম, কিন্তু এখন বুঝছি, ভুল করেছি । এই মেয়েটার একটা দিকই আমরা দেখেছিলুম, সেই উজ্জল দিকটাতেই সে জয়পতাকা উড়িয়ে আমাদের মাত ক'রে দেয়,—কিন্তু আর একটা দিক যে মেয়েদের আছে, আমরা সে দিকে মোটেই নজর দিই নি, আজ সেইটিই কদর্যা হয়ে উঠেছে ।

আপনার এ কথার অর্থ আমি ঠিক ধরতে পারছি না ।

তুমি কি সত্যই এত বোকা ? কিম্বা বুঝতে পেরেও না-বোঝার ভান করছ ? আমার কথা কি জান,—আমি এই মেয়েটাকে একটু অসাধারণই ভেবেছিলুম,—এর মনের আর দেহের শক্তিটুকুর সন্ধান পেয়ে । সেই সঙ্গে এটুকুও আমি ভেবেছিলুম, স্বপ্নরবাড়ীতে এসে সাধারণ মেয়ের পথে ও মেয়েটি পা বাড়াবে না, বাড়ীওঁদ্ধ সকলকে আপনার ক'রে নেবে । কিন্তু এসেই ও দিয়েছে নিবারণকে এক আঘাত, তার কথাতেই তা বোঝা গেল । নিবারণের মাতামহের গলদটুকু ধরেই সেখানেও নির্ঘাত আঘাত দিয়েছে, রাণীর কথা অবশ্য জানি না, কিন্তু তিনিও যে রেহাই পেয়েছেন, তা মনে হয় না । ও এবাড়ীতে এসেই আপনার-পর ঠিক ক'রে নিয়েছে ; একটা অপদার্থ গাধা যে ওর স্বামী হয়েছে, সে সম্বন্ধে কোনও দুঃখই ওর মনের কোণেও দেখেনি, ঐশ্বর্য্য দেখে সব ভুলে গিয়েছে ।

তা হ'লে আপনি এখন কি করবেন স্থির করেছেন ?

এখনও বুঝতে পার নি,—নিবারণের ওপর হুমকি দেখেও ? এঁচোড়ে পাকা একটা মেয়ে যে এমন ক'রে আমাকে ঠকিয়ে দেবে, আমার সংসারে

একটা বিপ্লব বাধাবে, আমি কিছুতেই তা বরদাস্ত করতে পারব না : শাস্তি তাকে নিতেই হবে, অপরাধ করলে আমার কাছে কারুর রেহাই নেই ।

আর্দ্রকণ্ঠে বাপুলী কহিলেন,—কিন্তু আমার একটি অনুরোধ, যদি দেখেন, সত্যই তিনি অপরাধিনী, তা হ'লে শাস্তির ব্যবস্থাটুকু করবার আগেই—

হাসিমুখে কৰ্ত্তা কহিলেন,—যেন তোমাকে খবর দিই । ভাল, তাই হবে, তোমার সামনেই না হয় তাঁর শাস্তির ব্যবস্থা হবে । যে দিন শ্যামাপুরে তাঁকে পুরস্কার দিই, সে দিনও তুমি যখন উপস্থিত ছিলে, শাস্তি যখন দেওয়া হবে—তোমার সেখানে থাকাটাও উচিত হবে ।

কথাটা নিঃশেষ করিয়াই কৰ্ত্তা উঠিয়া পড়িলেন । ভূতাগণ বাহিরে প্রতীক্ষায় ছিল, শশব্যস্ত হইয়া ছুটিয়া আসিল ।

দুই

কুলশব্যার শুভ রাত্রিটিকে সাক্ষ্য করিয়া পড়িবার নিভৃত ঘরখানির মধ্যে নবদম্পতির যে সাধনার সূত্রপাত হয়, উভয়ের অদম্য উৎসাহে তাহা ক্রমশঃ গভীর হইয়া উঠিতেছিল । অপূৰ্ব এই দম্পতির সাধনা ; লক্ষ্য হইবার মোক্ষলাভ নয়,—সত্যকার মানুষ হওয়া । আর এই সিদ্ধিটুকু আয়ত্ত করিবার মন্ত্র—একাগ্রচিত্তে বিজাদেবীর আরাধনা ! আমোদ-প্রমোদ, খেলা-ধূলা, বিলাস-হাস্য; রঙ্গরস প্রভৃতি তরুণ বয়সের এই অপরিহার্য উদ্দাম স্পৃহাগুলি সত্যকার মানুষ হইবার সাধনায় কঠোর সংযমী সাধক-সাধিকার গভীর নিষ্ঠায় রূপান্তরিত হইয়া এই অপূৰ্ব তরুণ-

তরুণীর দুইটি হৃদয় যুগপৎ চিত্তশুদ্ধি ও বিবেকবুদ্ধির ঔজ্জ্বল্যে উদ্ভাসিত করিয়া রাখিয়াছে।

এই অপূর্ব সাধনার পথে ইষ্টলাভের অর্চনায় বধূকেই স্বামীর পৌরোহিত্য করিতে হইয়াছে ; পূজার পদ্ধতি, মন্ত্রের নির্দেশ, প্রয়োগ-তৎপরতা প্রতি পদেই স্বামীর মর্যাদা রক্ষা করিয়া চলে, কোনও বিষয়েই তাহাকে খাটো হইতে দেয় না।

লাহোরে বিগ্না-সাধনায় চণ্ডী তাহার বহুদশী অধ্যাপক দাদামহাশয়ের নিকট যে ভাবে দীক্ষা পাইয়াছিল, সেই মন্ত্রেই গোবিন্দও দীক্ষিত হইয়াছে। সে এখন বুঝিয়াছে,—দেবী সরস্বতীকে তুষ্ট করিয়া বিদ্বান্ হইতে হইলে বিগ্না অর্জন করিতে হইবে, একমনে লেখাপড়া শিখিয়া বিশ্বসংসারের সকল সন্ধান জানিতে হইবে। মা-সরস্বতীর পূজার শ্রেষ্ঠ উপচার এই লেখা আর পড়া ; এবং অতি শীঘ্র তাঁহাকে প্রসন্ন করবার মন্ত্র—একাগ্র মন। তিনি ফুলচন্দন অপেক্ষা এইগুলিই অধিক পছন্দ করেন। মূর্খ কালিদাস বনে বসিয়া একমনে লেখাপড়া শিখিয়াই তাঁহার বরপুত্র হইয়াছিলেন। স্মরণ্য গোবিন্দের মন আশায় ভারি গিয়াছিল, উৎসাহে নাচিয়া উঠিয়াছিল। মা সরস্বতীকে তুষ্ট করিয়া তাঁহার প্রসাদে বিদ্বান্ হইবার এমন সহজ উপায় আর কেহ ত তাহাকে কোনও দিন বলিয়া দেয় নাই ! দুই চক্ষু মুদিত করিয়া, আহার-নিদ্রা বিসর্জন দিয়া মনে মনে কোনও মন্ত্র জপ করিতে হইবে না, কিম্বা হাত তুলিয়া দীর্ঘবাহু হইয়া দাঁড়াইয়া তাঁহাকে ডাকিতে হইবে না,—বহু লইয়া বসিয়া একমনে সদাসর্বদা পড়াশুনা ও খাতায় কালি-কলম দিয়া বহুয়ের কথা লেখা ; সব বই পাড়িতে শিখিলে, ভালো করিয়া ছাপার মত লিখিতে পারিলে—মা সরস্বতী সদয় হইবেন, সম্মুখে আসিয়া দেখা দিবেন; বর দিয়া আমাকেও কালিদাসের মত পণ্ডিত করিয়া দিবেন ! কি মজা !

ভেজোময় মন্ত্রের অপূর্ব প্রভাবে গোবিন্দের মস্তিষ্কের জড়তা কোথায়

সরিয়া গিয়াছে, সিদ্ধিনাভের উল্লাসে নিবিড় একাগ্রতায় দুর্লভ প্রতিভা ধীরে ধীরে সেই স্থানটুকুর উপর প্রভাব বিস্তার করিতেছে।

এই তরুণ সাধক-সাধিকার সৌভাগ্যসূত্রে পরিপূর্ণ তিনটি মাসের মধ্যে ইহাদের সাধনামন্দিরে কোনওরূপ বিষ উপস্থিত হয় নাই। দূরদর্শিনী বধু আট ঘাট বাঁধিয়াই যেন এই কঠোর সাধনায় ব্রতী হইয়াছিল।

বাসরে স্বামীর সহিত পরিচয়সূত্রে তাহার বিগ্ণাবুদ্ধি ও প্রকৃতির পরিচয়টুকু পাইয়াই বুদ্ধিমতী বধু নিজের উপস্থিত-বুদ্ধির প্রভাবে প্রতীকারের উপায় স্থির করিয়া লইয়াছিল। অল্পবয়সেই বয়সের অনুপাতে সুপ্রচুর বিগ্ণা সে অর্জন করিতে পারিয়াছিল—নিজের সহজাত অনাধারণ প্রতিভা ও তৎসহ তাহার আদর্শ-শিক্ষক দাদামহাশয়ের উদ্ভাবিত অভিনব শিক্ষাব্যবস্থার সহায়তায়। শিক্ষা-সংক্রান্ত সেই অপূর্ব ব্যবস্থাপত্রগুলি ইষ্টকবচের মতই সে লাহোর হইতে সঙ্গে করিয়া শামাপুরে আনিয়াছিল। এখানেও সেই অমূল্য পুঁথিগুলি তাহার সঙ্গে আসিয়াছে এবং যাহাদের প্রসাদে এই বয়সেই সে বিশ্ব-সাহিত্য-ভাণ্ডারের জ্ঞাতব্য বহু তথ্যরাজির সন্ধান পাইয়াছে, তাহার অজ্ঞ স্বামীকে বিজ্ঞ করিয়া তাহার সম্মুখেও সেই রহস্যময় ভাণ্ডারের দ্বার উদ্ঘাটিত করিবার সুবোগ-টুকুর প্রতীক্ষা করিতেছে।

চণ্ডীর প্রতিক্ষণেই মনে পড়ে, লাহোরে তাহার সম্মুখে যখন এই দ্বার উদ্ঘাটিত হয়, তখন তাহার নিয়ামক ছিলেন তাহার শিক্ষা-গুরু দাদা মহাশয় স্বয়ং। আর এখানে? তরুণী বধু প্রকারান্তরে রহস্যাবেষ্টি স্বামীর বিগ্ণাসাধনায় শিক্ষয়িত্রী হইলেও, সে সেই গোরবের দিকে ক্রক্ষেপমাত্র না করিয়া সহপাঠিনীরূপে স্বামীর সহিত আবার নূতন করিয়া সাধনায় বসিয়াছে। সহসা দেখিলেই মনে হয়, দুই তরুণ-তরুণী পরমোৎসাহে একাগ্র সাধনায় বিগ্ণা অর্জন-প্রয়াসী, একই পর্যায়ের

ছাত্র-ছাত্রী উভয়েই :—তবে অপেক্ষাকৃত পারদর্শিনী বলিয়া ছাত্রীটিই সর্বতোভাবে তাহার সহপাঠীকে সহায়তা করিয়া চলিয়াছে ।

নিভৃত কক্ষে ইহাদের এই অভূতপূর্ব বিদ্যাসাধনার বারতা কক্ষের বাহিরে গাঙ্গুলী পরিবারের জন-প্রাণীও জ্ঞাত নহে। পরিচারিকাদেব বিদ্যাব দিয়া নিজ মহল্লার দ্বার রুদ্ধ করিয়া বধু স্বামীর সঙ্গিত অহোরাত্রিবে অধিকাংশ সময়টুকু এই সাধনায় অতিবাহিত করে। স্বামী-স্ত্রীর রুদ্ধ কক্ষে এই ভাবে অবস্থিতি সম্বন্ধে বাহিরে কত কল্পিত উপাখ্যানই পল্লবিত হইয়া উঠে ; কিন্তু স্বামিসর্ব্বস্ব বধুর বাহু-জগতের আর কোনও দিকেই যেন কিছুমাত্র লক্ষ্যই নাই ; তাহার ধ্যান-ধারণা চিন্তা-কল্পনা সমস্তই স্বামীকে কেন্দ্র করিয়া তাহার চারিপাশ্বে সর্ব্বক্ষণই ঘুরিতেছে ; স্বামীর মুক্তির জন্ত এই তেজস্বিনী তরুণীর সর্ব্বস্ব পণ,—স্বামীর জড়ত্ব দূর করিয়া তাহাকে সে দেবত্বের পর্যায়ে তুলিবেই ! অদৃশ্য মনোজগতে ও পরিদৃশ্যমান বাস্তব জগতের সর্ব্বত্রই সে দেখিতে পায়. যেন তাহার স্বামীই একমাত্র সকল স্থান অধিকার করিয়া মানবদেবতার প্রতীকরূপে উজ্জ্বল হইয়া বিরাজ করিতেছেন !

লোকচক্ষুর অগোচরে এই অপূর্ব সাধক-সাধিকার বিদ্যাসাধনা অবাধে শত অহোরাত্র অতিক্রম করিবার অবকাশ পাইয়াছিল। ইহাদের সাধনার প্রভাবেই যেন বধুর বিরুদ্ধে আরোপিত অভিযোগ এই শত অহোরাত্রের মধ্যে আত্মপ্রকাশ করিয়া কোনও বিষ উপস্থিত করে নাই।

শত অহোরাত্রের পরবর্ত্তী মধ্যাহ্নে সহসা বাহিরের রুদ্ধ কক্ষদ্বারে উপর্যুপরি আঘাত,—তাহার রুদ্ধ নির্ঘাত পাঠাগারের নীরব গাঙ্গীর্ধ্য ক্ষুণ্ণ করিয়া দিল। লিখিবার ছোট টেবিলখানির দুই পাশ্বে মুখোমুখী বসিয়া উভয়েই তখন নিজ নিজ খাতায় লিখিত একই নিদ্দিষ্ট অঙ্কের সমাধানে ব্যস্ত। দ্বারে পুনঃ পুনঃ আঘাতের শব্দে বিরক্ত হইয়া চণ্ডী হাতের খাতা ছাড়িয়া উঠিল, কিন্তু গোবিন্দের গভীর অভিনিবেশের কিছুমাত্র ব্যতিক্রম

দেখা গেল না। দ্বারে অবিরাম আঘাত এবং তাহাতে আকৃষ্ট হইয়া সম্মুখবর্তিনী সহপাঠিনীর প্রস্থান, কোনটিই তাহার কর্ণ ও চক্ষুকে চমকিত করিল না, টেবিলের উপর ব্রহ্ম খাতাখানির উপর সকল ইন্দ্রিয়ের সহিত তাহার চিন্তা এমনভাবে নিবদ্ধ, যেন আর কিছুই তাহার লক্ষ্য করিবার নাই; যে সাধনায় সে লিপ্ত হইয়াছে, তাহা সমাপ্ত না হওয়া পর্য্যন্ত বাহিরের অস্তিত্ব সম্বন্ধেই যেন সে সম্পূর্ণ অচেতন!

এই মহল্লায় যে দুই জন পরিচারিকার পর্যায়ক্রমে বদলি উপস্থিত থাকিবার কথা, খাওয়া-দাওয়ার পাট চুকিয়া গেলেই চণ্ডী তাহাদের বিদায় দিয়া বাহিরের দরজা বন্ধ করিয়া দেয়; বেনা পাড়লেই বৈকালিক পাট-কাট আরম্ভ হইবার পূর্বেই চণ্ডী পুনরায় দ্বার মুক্ত করিয়া রাখে। মধ্যের এই সুদীর্ঘ সময়টুকু নিরুপদ্রবেই তাহাদের লেখাপড়ায় অতিবাহিত হয়। আজ মধ্যাহ্নের অব্যবহিত পরেই বহির্দ্বারের আঘাতে মনে মনে অতিমাত্রায় বিবদ্ধ হইয়াই চণ্ডী নিতান্ত অপ্রসন্নভাবেরেই দরজা খুলিয়া দিল।

কিন্তু মুক্ত দ্বারের সম্মুখে এমন অসমবে এক অপ্রত্যাশিতের আকস্মিক উপস্থিতি চণ্ডীর মুখের বিরক্তির রেখাগুলি বিশ্বয়ে পবিণত করিয়া দিল। সে দুই চক্ষু বিস্ফারিত করিয়া দেখিল, পরিচারিকাদের কেহ নহে, মৃগালিনী বা পুরবাসিনী কোনও তরুণী দ্বারে আঘাত দিয়া তাহার মনে বিরক্তির সঞ্চার করে নাই, গৃহস্বামী স্বয়ং তাহার সম্মুখে দণ্ডায়মান!

চণ্ডীর কর্ণ হইতে স্বাভাবিক গতিতেই অন্তঃ স্ববে নির্গত হইল,
—বাবা!

কিন্তু বাবার মুখ হইতে স্বাভাবিক ভাবে ইহার ঠিক প্রতি-উত্তর আসিল না, এবং চক্ষুর অপ্রসন্ন ভঙ্গিটুকুও চণ্ডীর দৃষ্টি এড়াইল না। নিজের বিস্ফারিত দৃষ্টিকে সহসা তীক্ষ্ণ করিয়া সে দেবতুল্য শব্দের সঙ্কচিত মুখের উপর স্থাপন করিল।

বধূর এই সঙ্কোচশূন্য তীক্ষ্ণ দৃষ্টি আজ কর্তার বৃকে সূচের মতই বিঁধিল, কিন্তু এ সঙ্কোচ মনের ভাবটুকু প্রচ্ছন্ন রাখিয়া অন্য দিক দিয়া তিনি মনের অপ্রসন্নতা প্রকাশ করিলেন ; রক্ষস্বরে প্রশ্ন করিলেন,—দিন-দুপুরে এ দরজা বন্ধ ক'রে দিবেছো কেন, বোমা ! দাসীগুলো গেল কোথায় ?

সহজ স্বরে বধূ উত্তর দিল,—আমি তাদের ছুটি দিবেছি, বাবা !

বধূর এই সোজা কথায় কর্তার চক্ষু দুইটি অস্বাভাবিক উজ্জ্বল হইয়া উঠিল ; সঙ্গে সঙ্গে তাঁর প্রশ্ন হইল,—ছুটি দিবেছ ! কেন ?

অতি সাধারণ বিষয়ে অসাধারণ স্বপ্নের এই ভাবে কৈফিয়ৎ চাহিবার ভীতি বধূকে বাধা দিল, সঙ্গে সঙ্গে তাহার সহজাত আত্মসম্মানজ্ঞানটুকুও সচেতন হইয়া উঠিল ; কিন্তু আজ সে ধৈর্য হারাইল না, তৎক্ষণাত্ বেষণ্ড ছাইয়া কণ্ঠস্বরকে যতটা সম্ভব কোমল করিয়া উত্তর দিল,— সব সময় ত ওদের এখানে কাজ থাকে না, শুধুই প'ড়ে প'ড়ে যুমোর ; আর এ দরজাটা খোলা থাকলে সবাই এখানে এসে জোটে, জ্বালাতন করে : সেই জন্যই দুপুরবেলায় ওদের ছুটি দিয়ে দরজা বন্ধ ক'রে রাখি।

তুচ্ছ কথার এই উত্তরই যথেষ্ট এবং এইখানেই প্রশ্নকর্তার তুষ্ট হওয়াই উচিত ছিল, কিন্তু তিনি আজ এই প্রগল্ভা বধূটির উপর চিত্তের অসন্তুষ্টির সমস্ত অস্ত্রগুলিই প্রয়োগ করিয়া প্রত্যেক আঘাতে তাহাকে আহত করিবার সঙ্কল্প লইয়া আসিরাছেন। বিচারের সূচনা হইতেই যে বিচারকেব মনে আসামীকে শাস্তি দিবার আয়োজন ইচ্ছা প্রচ্ছন্ন থাকে, সেখানে আসামীর সকল যুক্তিই ভাসিয়া যায়। সূতরাং প্রশ্নের যথাযথ উত্তর দিবার পরও বধূকে সবিস্ময়ে স্বপ্নের রূঢ় মন্তব্য গুনিতে হইল,—আমি এর কোনও প্রয়োজন দেখি না ; তুমি বোধ হয় ভুলে গিয়েছ বোমা, গেরস্তর সংসারে তুমি ঘর-বসত করতে আসনি, আর পাড়ার দশ জনের মাঝে এমন একখানা ঘর পাওনি—নিজের আঁকু বাঁচাবার জন্য যেখানে দিন দুপুরেও দরজা বন্ধ না ক'রে উপায় নেই ! যেখানে এসেছ, সব বিষয়েই

সেখানকার আদব-কাবদা, রীতি-নীতি, বিধি বাবস্থা মেনে চলতে হবে, বুঝে !

আভিজাত্যের এই খোঁচাটুকুও বধু নীরবে সহ্য করিল ; সে দরিদ্রের কণ্ঠা, ধনাঢ্যের গৃহে বধু হইয়া আসিয়াছে ; কিন্তু এই প্রসঙ্গে দরিদ্রের গৃহশ্রমের প্রতি কটাক্ষ করিবার কি সার্থকতা, তাহা সে বুঝিতে পারিল না । এ সম্বন্ধে প্রশ্ন করিবার প্রলোভনটুকু অতি কষ্টেই সে দমন করিয়া লইল বটে, কিন্তু একটা উত্তেজনার শিহরণ তাহার সর্ব্বাঙ্গের শিবার শিবার রক্তের প্রবাহের সহিত তখন ক্ষিপ্ত বেগেই বহিতেছিল ।

বক্র কটাক্ষে বধুর নত মুখখানির দিকে চাহিয়া কৰ্ত্তা পুনরায় মন্তব্য প্রকাশ করিলেন,—তা ছাড়া, নোতুন বউ তুমি ; মেয়ে-মহলের সবাই আসবেই ত এখানে ; এই স্বত্রে আলাপ-পরিচয় হবে, ঘনিষ্ঠতা জন্মাবে. তুমিও অনেক কিছু জানতে শিখতে পারবে । কিন্তু তোমার সবতাতেই বিপরীত কাণ্ড ! কারুর সঙ্গে মিশতে চাও না, সর্ব্বক্ষণ নিজের মহল্লাব দরজা বন্ধ করে বসে থাক ছুটিতে ! তোমার মুখের সামনে কেউ এগুতে সাহস পায় না, শেষে আমাকেই আসতে হয়েছে এখানে । আন এসেই ত দেখতে পাচ্ছ, যা যা শুনেছি, সে সবই সত্যি ।

শ্বশুরের এই তীব্রোক্তিও বধু মুখখানি নীচু করিয়া নিরুত্তরে গুনিল ।

কর্ত্তার উৎসাহ আরও প্রথর হইয়া উঠিল, বধুর দিকে বদ্ধদৃষ্টিতে চাহিয়া উচ্ছ্বাসের স্বরে এবার কহিলেন,—জানো, কত বড় উচ্চ ধারণাই আমি তোমার সম্বন্ধে মনে পোষণ করেছিলুম, বোমা !

বোমা অবশ্য কথা কয়টি কানে গুনিলেন, কিন্তু চোখ তুলিয়া চাহিলেন না ; শ্বশুরের মনের ধারণাটুকু জানিতে কোনও আগ্রহই তাহার দেখা গেল না ; চক্ষুর দৃষ্টি অপেক্ষাকৃত তীব্র ও কণ্ঠের স্বর তীক্ষ্ণ করিয়া কৰ্ত্তাই তাহা ব্যক্ত করিলেন,—সেখানে তোমাকে দেখে, তোমার কথাবার্ত্তা শুনে, তোমার ব্যবহারে যে পরিচয় তোমার বাহিরের দিক দিয়ে পেয়ে আমি

মুগ্ধ হয়েছিলুম, এখানে তোমার ভেতরটারও সন্ধান আমরা পাব, আর তাই দেখে এ বাড়ীর সবাই আমার মতই মুগ্ধ হয়ে যাবে, এই ছিল আমার ধারণা। কিন্তু এখানে এসেই তোমার প্রকৃতির এ দিকটা যে ভাবে দেখিয়েছ, তাতে বাড়ীশুদ্ধ সকলেই অবাক! আর তাতে আমার মুখ-খানাও একেবারে নীচু হয়ে গিয়েছে।

আয়ত দুইটি চক্ষুর স্থির দৃষ্টি স্বপ্নের মুখের উপর তুলিয়া বধু ধীরভাবে কহিল,—আপনাকে দেখেই আমি বুঝতে পেরেছি, বাবা, এখানকার অনেক কথাই আপনি আমাকে বলবেন, আর বোধ হয়, আমার কাছ থেকে তার উত্তরও শুনতে চাইবেন। কিন্তু এ ভাবে এখানে আপনার দাঁড়িয়ে থাকার ভাল দেখাচ্ছে না, আপনি ঘরে চলুন বাবা, সেখানে বসে,—

অধৈর্য্যভাবে বধুব কথার বাধা দিয়া বৃদ্ধ বলিলেন,—না, তার কোনও দরকার নেই, এইখানে দাঁড়িয়ে দাঁড়িয়েই আমি—

তা হয় না বাবা, আপনাকে বসতেই হবে!—কথার সঙ্গে সঙ্গে বধু অপূর্ব ক্ষিপ্ততার সহিত দালানের অপর প্রান্তে রক্ষিত স্তব্ধ অরাম-কেদারাখানি অবলীলাক্রমে দুই হাতে তুলিয়া আনিয়া স্বপ্নের পদপ্রান্তে রাখিয়া দিল; তাহার পর মিনতির সুরে কহিল,—ঘরে না যেতে চান, এইখানেই আপনি বসুন। যখন আমার বিচার করতেই এসেছেন, তখন দাঁড়িয়ে থেকেও কাজ ত হতে পারে না বাবা, আর তা ভালও দেখায় না।

আসন-গ্রহণের সঙ্গে সঙ্গে মনের বিষয়টুকু গোপন করিয়া মুখে গাভীর্ষা আনিয়া, কণ্ঠা কহিলেন,—তুমি তা হলে নিজেই বুঝতে পেরেছ বউমা, যে, আমি আজ এখানে এসেছি তোমার বিচার করতেই!

মৃদুকণ্ঠে অথচ বেশ সপ্রতিভভাবেই বধু কহিল, আপনার আসবার আগেই আমি বুঝতে পেরেছিলুম, আপনার দরবারে ডাক আমার

পড়বেই। তবে আপনি নিজেই এমন অসময়ে আসবেন, সেটুকু অবশ্য ভাবতে পারিনি, বাবা!

খোদ কর্তার সম্মুখে বিচারের কথা উঠিলেই বিচার প্রার্থী অতি বড় সাহসীর বুকখানিও ভগ্নে কাঁপিয়া উঠে, কিন্তু সেই জ্বরদস্ত বিচারক বক্রনয়নে লক্ষ্য করিলেন, বধুর মুখে কোনওরূপ আশঙ্কা না তৃষ্ণিত্যর একটি রেখাও পড়ে নাই! বিচারকের কণ্ঠের দৃঢ়স্বর উচ্চ: সবেও বিচ্ছিন্ন বিজ্রপের সুরে নির্গত হইল,—তুমি তা হ'লে আগে থেকেই সব জেনে তৈরী হয়েছ! আছ বল! যে জেগে ঘুমোর, তাকে সহজে কেউ জাগাতে পারে না। তেমনি বিচার হবে জেনেও যে দোষ কবে, আর তার জন্য আগে থাকতেই আট-ঘাট বেধে রাখবে, তাকে বড় বড় কোম্পলীরাও জেরায় হানাত্ত পারে না।

কথোপকথনের সময় কথাব পিঠে যে ভাবে অল্পে কথা বলে, সেই ভাবেই বধু বেশ সহজ কণ্ঠে কহিল,—তাদের যে এই পেষা বাবা, কি ক'রে ওদের হারাবে বলুন; ওরা ভাঙ্গবে, তবুও মচকাবে না!—আবার এমন অনেকেরও আজকাল ডাক পড়ে শোনা যায়, কি দোষ তাদের, তাই তারা জানে না; কিন্তু তাতেও বিচার তাদের আটকাই না, শাস্তি হয় নির্ধাত্ত।

কোন সূত্রে নিজের দুর্কলতাটুকুর সুযোগ লইয়া বধু তাঁহার মুখের উপর এমন বেপরোয়া ভাবে প্রত্যুত্তর দিতে সাহস পাইল, মনে মনে ক্ষণকাল সে সম্বন্ধে চিন্তা করিয়াই বিচারক বুঝিলেন, এখানে উপস্থিত হইয়াই কণ্ঠের পর্দা যে ভাবে তিনি চড়াইয়া দিয়াছিলেন, তাহা চরমে উঠিয়া পুনরায় নামিয়া গিয়াছে, বুদ্ধিমতী বধু এই সুযোগটুকু গ্রহণ করিতে অবহেলা করে নাই। মুহূর্ত্তে মুখের ভঙ্গি, মনের ভাব ও কণ্ঠের স্বর উগ্র করিয়া কহিল,—তোমার বিরুদ্ধে একটার পর একটা ক'রে কতগুলো নালিশ এসেছে, তা তুমি জান?

বধু হাসিমুখে উত্তর দিল,—আমি ত বাইরের কোনো খবরই রাখি না, আপনি ত এখানে এসেই তা জেনেছেন, বাবা !

দুই চক্ষু পাকাটয়া কর্তা কহিলেন,—এটাও তোমার বিপক্ষে অন্ততম অভিযোগ !

বধুর মুখের হাসিটুকু মিলাইয়া গেল, স্বপ্তরের মুখ হইতে স্নিগ্ধ দৃষ্টিটুকু সঙ্গে সঙ্গে নামাইয়া লইল, কিন্তু কথার কোনও উত্তর সে দিল না ।

কঠিন স্বরে কর্তা পুনরায় কহিলেন,—আমি তোমাকে বিশ্বাস ক'রে তোমার হাতে সোণার চাবুকটি আমার দিয়েছিলুম—

আনত দুইটি চক্ষুর স্নিগ্ধ দৃষ্টিটুকু সহসা তীক্ষ্ণ করিয়া বধু স্বপ্তরের মুখের উপর নিষ্ফেপ করিল, সে দৃষ্টিতে প্রশ্ন যেন প্রকটিত !

কর্তা কহিলেন,—বাইরের দিক দিবে তোমাকে বতটুকু চিনেছিলুম তাতে খুবই ভরসা ছিল আমার, আমি যে গাধাটার কথা বলেছিলুম তোমাকে, তুমি তাকে চিনতে পারবে, হয় ত তাকে চিট করেও নেবে । কিন্তু তুমি আমার সারার দিক দিয়েও যাওনি !

নিরন্তরে বধুর পুনরায় সেই মর্মাভেদী দৃষ্টি ! অপ্রসন্ন মুখখানি বিকৃত করিয়া কর্তা কহিলেন,—এখানে এসেই তুমি তোমার দেওর নিবারণকেই সেই গাধা সাব্যস্ত ক'রে বসেছ । শুধু তাই নয়, সকলের সামনেই তুমি এ কথা দস্ত ক'রে প্রকাশ করেছ । করনি তুমি ? প্রতিবাদ করবার সাহস তোমার আছে ?

বধুর সুন্দর মুখখানি সেই মুহূর্তে আরক্ত হইয়া উঠিল ; কিন্তু স্বপ্তরের কথায় কিছুমাত্র অপ্রতিভ না হইয়া সজোরে দৃঢ়কণ্ঠে কহিল,—মুখে যে কথা আমি বলেছি, তা গোপন করবার অভ্যাস আমার কোনও কালেই নেই, বাবা !

ব হ'লে তোমার দেওর নিবারণকে তুমি সকলের সামনে গাধা বলেছ এ কথা আমার কাছেও স্বীকার করছ ?

হাঁ, বাবা ! আমি একদিন তাঁকে গাধা বলেছি, আর এক দিন এ কথাও তাঁকে জানিয়েছি যে, তাঁর যে আচরণ, তাতে তাঁকে গাধা বলে গাধাকেই ছোট করা হয়েছে ।

বটে ! কিন্তু শেষের এ কথাটা নিবারণ বলে নি ।

বোধ হয়, বলা আবশ্যক মনে করেন নি, কিম্বা ভুলে গিয়েছেন ; কিন্তু আমি বলেছি ।

কিন্তু আমি তোমাকে স্পর্ধা দেখাবার এতটা অধিকার এখানে দিইনি, বউমা ! এ পর্যন্ত এ বাড়ীর কেউ নিবারণের মুখের দিকে চোক পাকিয়ে চাইতে সাহস করেনি,—আমার সেরেস্তার সবাই, এমন কি, দেওয়ানজী পর্যন্ত নিবারণকে ভয় করে ।

আপনিও বোধ হয় জানেন না বাবা, ছেলেবেলা থেকে আমিও কাউকে ভয় করতে শিখিনি ।

এ কথা জোর গলায় বলতে পারে কারা জান ? যারা জীবনে কারুর ভয়াকা রাখে না—

তুধু তাই নয় বাবা,—যারা জীবনে কোন দিন অন্টারের ধার দিয়ে যায় না আর সত্যময় ভগবানের ওপর বিশ্বাস হারায় না !

তুমি এ কথা আজ বলতে পারছ বোমা, আমার সামনে দাঁড়িয়ে জোর গলায় ? অথচ তুমি নিজে জান, আমি জানি, একটা আধটা নয়, একে উজনের কাছাকাছি অন্টার তুমি করেছ !

আমি অন্টার করেছি ?

নিশ্চয়,—একটু আগে তুমিই স্বীকার করেছ ।

আমি যা করেছি, সেটা স্বীকার করাকেই কি আপনি অন্টার বলে সাব্যস্ত করছেন ?

তুমি আমাকে আজ ঞায়-অন্টার শিক্ষা দিতে চাও,—এ চমৎকাঃ!

তা হ'লে, এ কথার ওপর আমার আর কোনও কথা নেই, বাবা !

কিন্তু আপনি ভুলে যাচ্ছেন, আপনি এসেছেন বিচারক হয়ে গায় অন্ডায় স্থির করতে ।

ঠিক কথাই বলেছ তুমি,—বিচার আমি করব, তোমার প্রত্যেক অপরাধের—প্রত্যেক অন্ডায় আস্পর্কার—

তাই করুন, কিন্তু আমার বিরুদ্ধে যে সব অভিযোগ, সে-গুলোর ভিত্তি কোথায়, তাও আপনার দেখা কর্তব্য ।

ভাল, তোমার কাছেই নূতন ক'রে আজ কর্তব্য না হয় শিক্ষাই করব ।—কিন্তু এই ভাবে কথার জোরে তুমি বে আমাকে ঠকিয়ে জিতে যাবে, তা মনে ক'র না—

কথার জোরে কোন দিন আমি আপনাকে ঠকাইনি, বাবা !

ঠকাও নি ? আলবৎ ঠকিয়েছ তুমি ; শুধু কথায়, মুখের কথায় আর লোক-দেখানো দৈহিক কাযদায় !

বাবা !

অমন ক'রে ঝঙ্কার দিয়ে উঠলে যে ? অস্বীকার করতে চাও আমার কথা ?—কাল হয়েছিল, সেই দুঃস্থ গোকুর শিং ধ'রে তাকে দাবানো, আমি চমকে উঠে তখন সোণার চোখে দেখেছিলুম তোমাকে : তারপর, স্কুল-বাড়ী তৈরী ক'রে দেবার প্রার্থনা,—শুনে আমি মুগ্ধ হয়ে গেলুম,—উজোড় ক'রে দিলুম সব ! তখন ভুলেও ভাবিনি, গায়ের জোর আর মুখের তোড়ই মেয়েদের সর্বস্ব নয়, তাদের ভেতরটাও দেখবার,—সেইটুকু দেখিনি বলেই আজ এই বিভ্রাট বেধেছে, আমাকে এমন ক'রে ঠকতে হয়েছে !

ঠকুও হয়েছে,—আপনাকে ? আমি আপনাকে ঠকিয়েছি, এই আপনার তা হ'লে দৃঢ়বিশ্বাস, বাবা ?

হ্যাঁ, হ্যাঁ ;—এই আমার দৃঢ়বিশ্বাস ।—তোমার প্রকৃতির একটা দিক দেখিয়ে তুমি আমাকে মাতিয়ে দিয়েছিলে, আর এখানে এসে আর একটা

দিক দিয়ে বিষ ছড়িয়ে তুমি আমাকে তাতিয়ে তুলেছ ! নতুন বৌ তুমি, তোমার ব্যবহারে লোক হাসছে, কাউকে তুমি গ্রাহ্য কর না, কোনও দিকে তোমার ক্রক্ষেপ নেই,—নিবারণকে তুমি অপমান করেছ, মৃগালিনীর গায়ে পর্য্যন্ত হাত তুলেছ, আমার স্বপ্তরের নামে পর্য্যন্ত তুমি আঘাত করেছ—এতই তোমার সাহস,—এগুলো অন্মায় নয় ? এখনও তুমি বলতে সাহস করবে, তুমি অপরাধিনী নও ?

কথাগুলি নিঃশেষ করিয়া কর্তা জ্বলন্ত দৃষ্টিতে বধুর দিকে চাহিয়া রহিলেন । স্বপ্তরের প্রতি কথাটি তীরের মত বধুর অঙ্গে বিধিলেও, তাহার জ্বালা অসীম সহিষ্ণুতায় সহ করিয়া ধীর-স্বরে বধু কহিল,—তা হ'লে আমার বিরুদ্ধে নালিশ শুধু অন্মের নয় আপনার মনেও নালিশ উঠেছে, আর সেইটিই আরও গুরুতর । কিন্তু এখন আমি যদি বলি, আমারও একটা নালিশ আছে, আর সেটা অগ্রাহ্য করবার মতও নয়,—এবং এক সঙ্গেই দুটো মামলারই নিষ্পত্তি হওয়া উচিত ।

তোমারও নালিশ আছে নাকি ?—কিসের নালিশ শুনি !

আমিও ঠকেছি যে বাবা, আর সেই স্ত্রেই আমার এই নালিশ ।

তুমি ঠকেছ ? কেন তা হ'লে নালিশ করনি আগেই ?

তখন প্রয়োজন বুঝিনি । ঠকেছি মনে হলেই ক্ষতিটুকু আদায় করতে সবাই নালিশ করতে ছোটে, কিন্তু আমি সকলের চেয়ে বেশী ঠকলেও নিজেই চেষ্টা ক'রে সে ক্ষতিটুকু পূরণ ক'রে নিতে পারব ভেবেই এত দিন নালিশ করিনি ।

তবে এখন নালিশ করতে চাইছ কি অভিপ্রায়ে ?

যিনি আমাকে ঠকিয়েছেন, তিনিই আমার নামে অক্ষয় নালিশ তুলেছেন, সেই জন্তই আমার নিজের নালিশের কথা তোলা ; নতুবা আমি এ পর্য্যন্ত নালিশ কারুর কাছে করিনি ।

কি বলছ তুমি বোমা, হেঁয়ালী তোমার রাখ ; আমি শুনতে

চাই, কে তোমাকে ঠকিয়েছে, কি হত্রে কার বিরুদ্ধে নালিশ তোমার ?

বিক্ষুব্ধ চিত্তের সমস্ত জ্বালা কণ্ঠের উচ্ছ্বসিত স্বরে যেন ঢালিয়া দিয়াই বধু এক নিশ্বাসে উত্তর দিল,—আপনার বিরুদ্ধে আপনার কাছেই এই নালিশ আমার ; আপনি নিজেই আমাকে ঠকিয়েছেন ।

তুই চক্ষু দাঁপ্ত করিয়া চীৎকার তুলিয়া কর্তা কহিলেন,—কি বললে তুমি বোমা, আমি—আমি তোমাকে ঠকিয়েছি ?

ক্রোধের বিপুল আবেগে কণ্ঠ তাঁহার রুদ্ধ হইয়া গেল, কিন্তু তুই চক্ষুর জলন্ত দৃষ্টির ধারা বধুর দিকে যেন বিচ্ছুরিত হইতে লাগিল ।

বধু কিন্তু কিছুমাত্র কুণ্ঠিত না হইয়া দৃপ্ত কণ্ঠে উত্তর দিল,—হাঁ, আমি প্রমাণ করব আমার কথা,—আপনি ঠকিয়েছেন শুধু একা আমাকে নয়, তিন জনকে ;—আপনার স্বর্গীয়া স্ত্রীকে ঠকিয়েছেন, তাঁর ছেলেকে ঠকিয়েছেন, শেষে আমাকেও ঠকিয়েছেন !—সমস্ত প্রমাণ আমি আপনার চোখের ওপর তুলে ধরব,—আপনাকেই বিচার ক'রে রায় দিতে হবে—সত্যই কে ঠকেছে, অন্ডায় কোথায় !

তিন

যে গুরুতর অপরাধের অজুহাতে বিচারক আসামীর প্রতি দণ্ডবিধানে সমুৎসুক, আসামী কথার হত্রে অপূর্ব কৌশলে সেই অপরাধ বিচারকের উপরুণ্ণপাইয়া তাঁহাকেই প্রশ্ন করিয়া বসিল,—আপনিই বলুন, অপরাধ কার,—অন্ডায় কোথায় ?

এক্ষেত্রে উদ্ধত আসামীর স্পর্ধা, সাহস ও ধৃষ্টতায় বিচারকের ধৈর্য্যচ্যুতি ঘটবারই কথা । কিন্তু বধুর তরফ হইতে এমন প্রচণ্ড আঘাত

পাইয়াও কোপনস্বভাব কর্তার ধৈর্য্য-বোমা ফাটিয়া উঠিল না, দুইচক্ষু পাকাইয়া তর্জন তুলিতেও শোনা গেল না ; বরং তাঁহার মুখের পূর্ব ভাবটুকু আশ্চর্য্যরূপে পরিবর্তিত হইতে দেখা গেল । বাহিরে যে জীবটির অপূর্ব সাহস ও শক্তির পরিচয় পাইয়া তিনি তাহাকে নিজ গৃহে আশ্রয় দিয়াছেন, প্রতিপালকস্তানীয় হইয়াছেন, অন্তের সম্বন্ধে সে যতই উদ্ধত হউক, তাহার নিকট মুখ নীচু করিয়াই থাকিবে, পীঠে চাবুক পড়িলেও তাহার ত চোখ পাকাইয়া চাহিবার কথা নহে ! কিন্তু সেই জীবই আজ তাহাকে তাহার সম্বন্ধে কিঞ্চিৎ কঠিন ও ক্রূর হইতে দেখিয়া, সুকোশলী আততায়ীর ক্ষিপ্ততায় তাঁহার চিত্তের ক্ষতস্থানটুকু লক্ষ্য করিয়া এমন ভাবে আক্রমণ করিয়া বসিবে, তাহা তিনি ধারণাও করেন নাই । সূতরাং দারুণ বিরক্তিজনিত ক্রূততার ছায়াটুকু তৎক্ষণাৎ মুখেই মিলাইয়া গেল ও সেই স্থলে ফুটিয়া উঠিল বিশ্বযের গভীর রেখা ।

দুর্মুখ স্বপুত্র ও মুখরা বধু উভয়েই ক্ষণকাল নীরব,—কাহারও মুখে কথা নাই । কর্তা এই নীরবতা ভাঙ্গিয়া দিলেন, গভীরভাবেই কহিলেন,—খাসা ! বাঃ ! হু, নিজের কথার খেইটুকু যদিও আমি হারিয়ে ফেলেছি তোমার মুখের কথার তোড়ে, বোমা, তবুও তোমাকে বাহোবা না দিয়ে পারছি না !

যদিও কর্তার মুখ দিয়া নরম সুরেই কথাগুলি বাহির হইল, কিন্তু বধুর কানে সেগুলি যেন বিদ্রূপের মতই শুনাইল ; দুই চক্ষুর দৃষ্টি তীক্ষ্ণ করিয়া সে স্বপুত্রের মুখের দিকে চাহিল ।

চোখোচোখি হইতেই স্বপুত্র কথার সুর অপেক্ষাকৃত সহজ করিয়া কহিলেন,—একটা গল্প তা হ'লে বলি শোনো, তা হলেই আমার কথাটা তুমি বুঝতে পারবে, বোমা !—এক ভারী যোদ্ধা ছিল, তলোয়ার চালাতে তা'র মত ওস্তাদ সে অঞ্চলে আর দুটি ছিল না । এক দিন হঠাৎ খবর এল, আর এক যোদ্ধা এসে তার ভাইকে কেটে ফেলেছে । কথাটা

শুনেই তার মাথায় খুন নেচে উঠল,—তলোয়ার নিয়ে তৈরী হয়ে তখনই ছুটলো সেই ভ্রাতৃঘাতী দুঃমনের সন্ধানে। খানিক দূর যেতেই ভায়ের দেহ তার চোখে পড়ল ; সে স্তব্ধ হয়ে দেখলে, আততায়ী তার তলোয়ারের একটি চোটেই কাঁধ থেকে কোমর পর্যন্ত একেবারে পৈতে-কাটা ক'রে তাকে কেটেছে! দেখেই তার মাথায় খুন আর মনের রাগ কোথায় যেন মিলিয়ে গেল ; বাহোবা দিয়ে ব'লে উঠলো সেই দুর্জয় যোদ্ধা—‘ক্যোয়া হাতকা সাফাই!’—এখন তোমার সম্বন্ধে আমার মনের অবস্থাও হয়েছে, কতকটা এই রকমেরই, বুঝেছ?

বধু স্বপ্নের এই মন্তব্য শুনিয়া তৎক্ষণাৎ উত্তর দিল,—কিন্তু আমার মনে হয়, বাবা, এটুকু সাময়িক মোহ ছাড়া আর কিছু নয়! একটু পরেই সেই যোদ্ধা নিশ্চয়ই তাঁর ভ্রাতৃঘাতীকে শাস্তি দিয়েছিলেন, আর এখানেও আমার মুখের দুটো কথায় এ মামলা অবশ্য ফেসে যায় নি, এর নিষ্পত্তি একটা হবেই।

কিন্তু মামলার মোড় ত তুমিই ফিরিয়ে দিয়েছ, বোমা ; তোমার বিরুদ্ধে যে নালিশ চলছিল, তুমি ত সে নালিশ আমার ওপরেই চালিয়ে দিলে!

অনেক নালিশের নিষ্পত্তি ত আপনাকে করতে হয়েছে, বাবা, আপনি নিশ্চয়ই জানেন, যে মামলার বাঁধনীতে গলদ থাকে, শেষ পর্যন্ত তা ধোপে ঢেঁকে না,—ফাঁস হয়ে যাবেই ; আর, এমন অনেক মামলার কথাও শোনা গিয়েছে, যেখানে কেঁচো খুঁড়তে গিয়ে জাত-সাপ বেরিয়ে প'ড়ে সমস্তই ওলটপালট ক'রে দিয়েছে!

কি রকম?

এই ধরুন, খুনী আসামীর বিচার চলেছে ; সাক্ষীদের কথায় প্রমাণ হয়ে গেল, সেই খুন করেছে ; হাকিমের মনেও সেই বিশ্বাস ; ফাঁসীর হুকুম হয় আর কি! এমন সময়, যাকে খুন করা হয়েছে ব'লেই মামলা,

সেই মরা মানুষ সশরীরে আদালতে এসে হাজির ! সবাই অবাক, এক মিনিটেই মামলার গতি ঘুরে গেল ।

বধূর কথাগুলি নিবিষ্টভাবেই শুনিয়ে কর্তা একটু শ্লেষের সুরেই প্রশ্ন করিলেন,—কিন্তু যে হাকিম ঐ মামলার বিচার করতে বসেছিল, এত বড় গলদটা পান্টা নালিশের মত বোধ হয় তারই ঘাড়ে আসামী চাপিয়ে দেয় নি ?

কি সূত্রে এই শ্লেষাত্মক প্রশ্ন, তাহা বুঝিতে বধূর বাধিল না, স্বপ্তরের মুখের দিকে একটীবার চাহিয়াই সে সহজকণ্ঠে উত্তর দিল,—হাকিমের ত কোন দোষ ছিল না ; যা নিয়ে মামলা, তার সঙ্গে বিচারকের নিজের সংশ্লিষ্ট যদি না থাকে, তাঁর বিরুদ্ধে কেনই বা নালিশ উঠবে বলুন ! পান্টা নালিশ অবশ্য উঠেছিল সেই লোকটার বিরুদ্ধে, যে খুনের এতেনা দিয়ে মামলার তদ্বির করেছিল । আর, আপনি যা বললেন বাবা, একখানা ‘বলিতি কেতাবে তার কথাও পড়েছি ।

বিশ্বযের সুরে কর্তা প্রশ্ন করিলেন,—কি ?

বধূ পরিপূর্ণ দৃষ্টিতে স্বপ্তরের মুখের দিকে চাহিয়া কহিল,—ও দেশের এক বড়লোকের ছেলে নাম ভাঁড়িয়ে কলেজের একটি মেয়ের সর্বনাশ করে, তারপর একটি বছর তার সঙ্গে ঘরকন্না ক’বে স’রে পড়ে । মেয়েটি তখন মনের দুঃখে পার্পের পথেই এগিয়ে যায় । বিশ বছর পরে সেই মেয়েটিই এক খুনী মামলায় আসামী হয়ে কাঠগড়ায় দাঁড়ায় ; বিচারক তার সূচেশারা ও উচ্চশিক্ষার পরিচয় পেয়ে তাকে জিজ্ঞাসা করলেন,—এ কাণ্ড তুমি কেন করলে ? মেয়েটি তখন তার পূর্বকথা সমস্তই প্রকাশ ক’রে বললেন,—আমার এই অধঃপতনের মূলে সেই প্রতারক ; আপনিও ত বিচারক, আমার অপরাধের বিচার করতে বসেছেন, কিন্তু আমি যার বিরুদ্ধে অভিযোগ তুলেছি, সে যেখানেই লুকিয়ে থাকুক, তাকে ধ’রে এনে তারও বিচার করা কি আপনার কর্তব্য নয় ?

কোতূহলের সুরে কৰ্ত্তা প্রশ্ন করিলেন,—বটে ! সে ত আচ্ছা মেয়ে ;
—তা হাকিম কি করলেন তারপর ?

বধু কহিল,—সেই প্রতারকের নাম জানতে চাইলেন । মেয়েটি নাম
তার বললে,—কিন্তু সে নাম যে বাজে, তাও জানিয়ে দিলে । এইবার
বিচারক সাধারণ চোখেই মেয়েটির দিকে ব্যগ্র দৃষ্টিতে চেয়ে জিজ্ঞাসা
করলেন,—তোমারও কি তখন এই নাম ছিল ? সেই ঘটনার পর
মেয়েটিও তার নাম পাল্টেছিল, বিচারকের প্রশ্নে মাথা নেড়ে তার আসল
নামটি শুনিতে দিলে । তখনই বিচারকের হাত থেকে কলম প'ড়ে গেল ;
সঙ্গে সঙ্গে তিনি চেয়ার ছেড়ে উঠে বললেন,—আমিই সেই প্রতারক, এর
পরও যদি এই মামলার বিচার আমাকেই করতে হয়, তা হ'লে বিচারাসন
কলঙ্কিত হবে ।

বিশ্বয়ের আবেগে কৰ্ত্তা কহিলেন,—এমন ! তারপর কি হ'ল
তাদের ?

বধু কহিল,—মেয়েটার কাসী হ'ল না বটে, কিন্তু জেল হ'ল ; আর
জুজু দায়েব যথাসর্বস্ব ছেড়ে পাপের প্রায়শ্চিত্ত করতে একটা মিশনে ঢুকে
পড়লেন ।

বধুব দিকে চাহিয়া এইবার কৰ্ত্তা মন্তব্য প্রকাশ করিলেন,—তোমার
দেখছি পড়াশুনাও বেশ আছে, বোমা ।

বধু দৃষ্টি নত করিল, কোনও উত্তর দিল না ।

ইংরেজিও তা হ'লে জান ?

সহজ কণ্ঠে বধু উত্তর দিল,—আমার দাদামহাশয় অনেকগুলো ভাষাই
জানতেন; ইংরেজিতেও তিনি পণ্ডিত ছিলেন । আমার যা কিছু শিক্ষা
তীরই কাছে ।

জোরে একটি নিশ্বাস ফেলিয়া কৰ্ত্তা কহিলেন,—ইংরেজিতেও যে তুমি
লায়েক হয়ে আছ, তা আমি ভাবি নি ।

বধূর কানে স্বশুরের এই কয়টি কথা যেন তীক্ষ্ণ হইয়াই বিধিল, কিন্তু এ সম্বন্ধে কোনও কথা না তুলিয়া, এই আলোচনার মোড় ফিরাইবার অভিপ্রায়েই সে কহিল,—তা হ'লে এখন আমার ওপর আর কি হুকুম, বাবা ?

বধূর মুখের ঈষৎ ক্ষোভের রেখাটুকু তীক্ষ্ণ দৃষ্টিতে লক্ষ্য করিয়া সহস্র কঠিন সুরে কণ্ঠা কহিলেন, আসল কাজের ত এখনও কিছু হয় নি, মাঝে থেকে কতকগুলো বাজে কথা ভুলে সময়টা কাটিয়ে দিলে ; ভেবেছিলে, ঐ সব নজীর দেখিয়ে তোমার মামলাটা চাপা দেবে । কিন্তু ভবী' ভোলবার নয়,—তোমার কথায় আমি ভুলি নি, তোমার ঐ সব কথায় আমি কান দিয়েছি ব'লে তুমি যদি ভেবে থাক বিচারের কথা আমি ভুলে গিবেছি, সে তোমার মস্ত ভুল ।

স্বশুরের এই কথায় বধূর মুখে ক্রেশের চিহ্ন কুটিয়া উঠিল, কিন্তু তথাপি তাহাতে বিদ্যাতের মত হাসির একটু তীক্ষ্ণ ঝিলিক তুলিয়া সে কহিল,—এতক্ষণ পরে আমার সম্বন্ধে কি এই ধারণাটুকুই আপনি স্থির ক'রে নিয়েছেন, বাবা ?

হাঁ, যদি তাই করা হয়, সেটা কি অন্যায় হয়েছে তুমি বলতে চাও ?

এ ভাবে আপনার সঙ্গে কথা-কাটাকাটি করা আমার পক্ষে হয় ত অন্যায়, আমি শুধু বলতে চাই, আমার বিরুদ্ধে যে নালিশ আপনি শুনেছেন, আমি তা মেনে নিচ্ছি, আপনি আমাকে শাস্তি দিতে পারেন ।

আর তুমি যে নালিশ তুলেছ আমার বিরুদ্ধে আমারই কাছে, তার কি হবে ?

আমি তা ভুলে নিচ্ছি ।

তা হয় না ; যে কথা আমার বিরুদ্ধে তুমি বলেছ, তোমাকে তা প্রমাণ করিতেই হবে । না পার, বাড়ীপুক্ক সকলের সামনে দাঁড়িয়ে ষাড় হেঁট ক'রে তোমাকে বলতে হবে,—তুমি অন্যায় করেছ, মিথ্যে বলেছ ।

তা হ'লে প্রকারান্তরে আমাকেই মিথ্যা বলতে হয়, কিন্তু ঐ কাজটি আমাকে দিয়ে হবে না, বাবা। আমি যা-যা বলেছি, তার কোনটি যে মিছে নয়, আমি যেমন জানি, আপনিও জানেন।

আমি জানি ?

হাঁ, জানেন আপনি।

বোমা !

আপনি বৃথা উত্তেজিত হচ্ছেন, বাবা, কিন্তু আগেকার কথা সবই ভুলে গিয়েছেন ! ছ'বছরের কোলের ছেলোটিকে আপনার হাতে ভুলে দিয়ে আমাদের মা—ঐ ঘরে দেবীর মত ঘাঁর ছবি এখনও জল-জল করছে—স্বর্গে চলে যান !

হাঁ, স্বীকার করছি তোমার কথা ; আর, বাঙালীস্বত্ব সবাই এ কথা জানে। কিন্তু তাতে কি হয়েছে ?

মা এই অহরোধটুকু যাবার সময় ক'রে যান, যেন তাঁর খোকার কোনও খোয়ার না হয়, তার ওপর বরাবর আপনার নজর থাকে, মা নেই ব'লে ছেলে যেন অনাদর না পায়। আপনি তাতে সায় দিয়েছিলেন।

সম্ভব ; কিন্তু এ কথা আজ তোলবার মানে ? আর, তুমিই বা এ সব কথা জানলে কি ক'রে ?

কুলবধুর অধিকারটুকু দিয়ে এ বাড়ীতে আমাকে এনেছেন বলেই এ সব কথা জানা আমার পক্ষে প্রয়োজন হয়েছিল বাবা, আর জানতে পেরেছিলুম বলেই আপনার সামনে মুখ ভুলে আজ বলতে সাহস পাচ্ছি, আমাদের মার মৃত্যুসংঘ্যায় ব'সে আপনি যে তিনটি প্রতিশ্রুতি তাঁকে দিয়েছিলেন, তার কোনটিই রাখতে পারেন নি।

তীক্ষ্ণদৃষ্টিতে বধুর মুখের দিকে চাহিয়া শ্বেষের সুরে খণ্ডর কহিলেন,—
অথচ ছ'বছরের সেই মাতৃহীন শিশুটি আজ যৌবনের সীমানায় গিয়ে

দাড়িয়েছে ; আর তারই হাতখানি ধ'রে তুমি এ বাড়ীতে কুলবধু হয়ে চোকবার অধিকারটুকু পেয়েছ !

শশুরের এই ক্রূত-বিজ্ঞে কিছুমাত্র সঙ্কুচিত না হইয়া তেজোদৃষ্ট স্বরে বধু কহিল,—ছেলেকে বড় ক'রে তুলেছেন, তারই গৌরব আপনি করছেন, বাবা। পরক্ষণে কি ভাবিয়া কণ্ঠের স্বর সহজ করিয়া বধু কহিল,—বিনা তদারকে বাগানের ভেতর দু'একটা এমন গাছও থাকে, আর দশটা গাছের আওতায় বারা বেড়ে ওঠে ; কিন্তু সে ভাবে তাদের বাড়াটা কি শ্রেয়স্কর, তাতে সার্থকতা কিছু আছে ?

বৃদ্ধ এবার নির্বাক ! কি কথায় কোন্ কথা আসিয়া পড়িল ! স্তম্ভবিশ্ময়ে তিনি বধুর মুখের দিকে তাকাইয়া রহিলেন, এ কথার উত্তর তাহার মুখে তৎক্ষণাৎ যোগাইল না। শশুরকে নিরুত্তর দেখিয়া বধুই পুনরায় কহিল,—বয়সের দিক দিয়ে ছেলেকে শুধু বাড়তেই দিয়েছেন, কেন না, সেটা দাবিয়ে রাখা যায় না। কিন্তু আর সব দিক দিয়েই তাকে ধরে-বঁধে ছোট ক'রে রেখেছেন ! এত বড় আপনার জমিদারী, সমস্তই আপনার নখদর্পণে, কিন্তু বাড়ীর ভেতর থেকেও ঐ ছেলেটির দিকে আপনি দৃষ্টি দেবারও অবসর পান নি !

বিচলিত হইয়া এবার কর্তা সজোরে উচ্চকণ্ঠে কহিলেন,—তুমি এ সব কথা আমাকে বলতে সাহস পাচ্ছ, বোমা ?

মুখের কথায় রীতিমত জোর দিয়াই বধু কহিল,—সত্য কথা বলতে ত সাহসের অভাব হয় না, বাবা ! আমি যে-সব কথা বলছি, হয় ত আপনার ভাল লাগবে না, কিন্তু সব কথাই সত্য। মা-হারা ছেলের কার্না আপনি বরদাস্ত করতে পারেন নি, মাইনে করা দাসীদের কাছে তাকে সঁপে দিয়েছিলেন। তারা সহরের ফেরত, ছেলে শাস্ত করবার ওষুধ জান্তা ছেলের কার্না আর কানে বাজে না, আপনি খুসী হলেন ; কিন্তু প্রহরে-

প্রহরে বিষ গিলিয়ে যে তারা ছেলেকে ঘুম পাড়িয়ে রাখছিল, তার সন্ধান কোনও দিন নিয়েছিলেন, বাবা ?

বিষ গিলিয়ে ঘুম পাড়াত !

হৃদয়ের সঙ্গে মরফিয়া খাওয়াত, ছেলে তাতে সহজে ঘুমিয়ে পড়ত, বারনা আর তুলত না ; এমনি ক'রে বছরের পর বছর দাসীদের আদর-বহ্ন পেয়ে ছেলের মন দিন দিন মুসড়ে পড়ে, বাড়তে পারে নি !

বধূর এই অশ্রুতপূর্ব্ব কথায় অতীতের স্মৃতি ঘেন কর্তার মস্তিষ্কে তাল-গোল পাকাইয়া নৃত্য জুড়িয়া দিল ; মনের বিক্ষোভ সবলে দমন করিয়া প্রশ্ন করিলেন,—এ সব কি অদ্ভুত কথা তুমি বলছ, বোমা, যা আর কেউ জানে না, আমি জানি না, তুমিই শুধু—

চিত্তের বিষম চাঞ্চল্যে কর্তার মুখের কথা আর শেষ হইল না, বধূই সঙ্গে সঙ্গে কথার খেইটুকু ধরিয়া উত্তর দিল,—শুধু আমি নই বাবা, যারা এ কাজ করেছিল, তাদের মধ্যে রাখালী চ'লে গেছে, ক্যামা ম'রে গেছে, বেঁচে আছে শুধু নিস্তারিণী ; পক্ষাঘাতে একটা অঙ্গ তার প'ড়ে গেছে, দিনও তার ফুরিয়ে এসেছে । তাকে ডেকে জিজ্ঞাসা করলেই সব জানতে পারবেন ।

বধূর মুখের দিকে সবিস্ময়ে চাহিয়া কর্তা কহিলেন,—তুমি এখানে এসেই এত খবর নিয়েছ,—অথচ এতগুলো বছরের ভেতর, এ সবকিছু আমি কিছুই কোন দিন শুনি নি !

বধূ এবার একটু হাসিয়া কহিল,—আপনি যে এ সব কিছুই জানতেন না, সে কথা ঠিক ; কিন্তু এর জন্তে যে অপবাদ, আপনি তা থেকে ত রেহাই পেতে পারেন না, বাবা ! আপনার জমিদারীর হাজার হাজার প্রজার ঘরের সমস্ত খবরই আপনি রাখেন, সে দিকে আপনার কড়া নজর, তাহলে সবাই ধস্তাধস্ত করে, কিন্তু নিজের বাড়ীর ভেতরে এত বড় অনাচার আপনি তার কোনও খবরই সংগ্রহ করতে পারেন নি ! এই জন্তেই আমি

বলতে সাহস পেয়েছি বাবা, আপনার আচরণে ঠুঁরা ঠকেছেন! এখন আপনিই বলুন, আমার বলাটা কি অণ্ডায় হয়েছে ?

কর্তা আড়-নয়নে বধুর উজ্জ্বল মুখের দিকে চাহিয়া তাঁহার স্পর্শের কথাগুলি সমস্তই গুনিলেন। পরক্ষণে দৃষ্টি ফিরাইয়া নীরবে মনে মনে কি ভাবিলেন, মুখে গাঙ্গীর্যের রেখা কুটিয়া উঠিল; সঙ্গে সঙ্গে তাঁহার কণ্ঠস্বর বিকৃত হইয়া নির্গত হইল,—অণ্ডায়-অণ্ডায় বিচার হবে পরে, তার আগে তোমার তুণের সব কটা তীরই ছোড়া ত হয়ে যাক!

শ্বশুরের মুখের কথাগুলি, বলিবার ভঙ্গিতে তীরের মতই বধুর মস্তে বিধিল; কিন্তু মুখে ক্রেশের ভাবটুকু প্রকাশ না করিয়া বধু সামান্ত একটু হাসিয়াই উত্তর দিল, আপনি গুরুজন, আদেশ যখন করছেন, বাবা, তুণ আমি খালি করবই, কিন্তু এখনই কি তার প্রয়োজন হবে ?

দৃঢ়কণ্ঠে উত্তর হইল,—নিশ্চয়ই; এর নিস্পত্তি আর্গে ক'রে তারপর অন্য কাজ; রেহাই কারুর নেই, তোমারও নয়, আমারও নয়।

বধু শ্বশুরের কথার শেষাংশে সায় দিয়াই কহিল,—ভগবানের রাজ্যে কাষের জবাবদিহি যে সবাইকেই করতে হয়, রেহাই পাবার ঘো কি! হিসেব ফেলে রাখলে, একদিন সমস্ত জড় হয়ে গোল বাধায়; কাজেই অনেকগুলো বছরের ফেলে-রাখা হিসেবের তলব যখন আজ পড়েছে বাবা, সহজে রেহাই পাবার ত উপায় নেই; তবে ভয় হচ্ছে, পাছে এই সূত্রে মনে বেশী রকমের আঘাত পান।

বধুর কথাগুলি শ্বশুরকে যদিও অসহিষ্ণু করিয়া তুলিতেছিল, তথাপি শেষ পর্য্যন্ত গুনিবার কোতূহলটুকুও তাঁহাকে ব্যগ্র করিতেছিল; কথা শেষ হইতেই তিনি মনের ভাবটুকু প্রচ্ছন্ন বিক্রমের ভঙ্গিতে তীক্ষ্ণ কণ্ঠে ব্যক্ত করিলেন,—আমি পাছে আঘাত পাই, সেই জন্মই তোমার ভাবনাটা বুঝি এখন বড় হয়ে উঠেছে, বোমা! এটা বুঝি পাঞ্জাবী সভ্যতামূলক কার্য ?

গ্রীবা তুলিয়া বধু রক্ষস্বরে প্রশ্ন করিল,—একথা কেন বললেন, বাবা ?

কথাটা বধুকে আঘাত দিয়াছে বুঝিতে পারিয়াই কর্তা গম্ভীর হইয়া কহিলেন,—শুনেছি, ওরা একখানা হাত পায়ে আর একখানা হাত গলায় রেখে লোকের সঙ্গে কথা কয়, ভদ্রতা রক্ষা করে !

বধু তৎক্ষণাৎ দৃঢ়স্বরে উত্তর দিল,—সে হয় ত দেনা-পাওনার ব্যাপারে, যারা মহাজনী করে, তাদের সম্বন্ধে হয় ত এ কথা বলা চলে ; কিন্তু দেনা-পাওনা নিয়ে ত আমাদের কথা হচ্ছে না, বাবা । আর মহাজন হয়েও ত আমি আপনার সামনে দাঁড়িয়ে কথা কই নি !

কর্তা এবার সহসা উত্তেজিত হইয়া উচ্চকণ্ঠে কহিলেন,—নিজের কথাতেই এবার ধরা প'ড়ে গিয়েছ তুমি ! একটু আগেই হিসেবের কথা তোমার মুখেই শুনেছি ; দেনা-পাওনা নিয়েই ত এই ঝগড়াট ! মহাজন হয়েই ত তুমি আমার সামনে আজ দাঁড়িয়েছ, বোমা—তোমার পাওনা আদায় করতে ।

বধু কিছুমাত্র বিচলিত না হইয়া সপ্রতিভ কণ্ঠেই কহিল,—বেশ, আপনার কথাই আমি তা হ'লে মেনে নিচ্ছি, বাবা ; কিন্তু রাগ করবেন না, একটা কথা আমি জানতে চাইছি,—যে দেনা আপনি এ পর্য্যন্ত করেছেন আমাদের কাছে, পরিশোধ করতে পারবেন ?

বধুর এই প্রশ্নে শুরু হইয়া কর্তা কয়েক মুহূর্ত্ত তাহার উৎসাহদীপ্ত মুখখানির দিকে চাহিয়া রহিলেন, তাহার পর আস্তে আস্তে কহিলেন,—কি চাও ?

উদ্দীপ্তকণ্ঠে বধু এবার উচ্ছ্বাসের স্বরে উত্তর দিল, এতে চাইবার কি আছে ; যদি থাকত, আগেই চাইতুম, বধুর অধিকারটুকু বখন পেয়েছি—তার জোরেই ; কিন্তু এখন চাওয়া বৃথা—কেন না, এ দেনা শোধ করবার সামর্থ্য আপনার নেই ।

কণ্ঠস্বর অতিশয় কর্কশ করিয়া কর্তা কহিয়া উঠিলেন,—আমার সামর্থ্য নেই ?

বধু তাহার কোমল কণ্ঠস্বরে বিশেষভাবে জোর দিয়া কহিল,—না, বাবা, নেই।

স্বর অপেক্ষাকৃত কোমল ও মৃদু করিয়া কর্তা কহিলেন,—আমার মুখের ওপর জোর ক’রে তুমি এ কথা বলছ ?

শ্বশুরের এ কথার উত্তরে বধু গাঢ়স্বরে প্রতি কথাটি স্পষ্ট করিয়া কহিল, আপনিই আমাকে বলালেন যে, বাবা। আমার কি দোষ বলুন ! বেশ, দেনার ফেরিস্তি আমি দেখাচ্ছি, শোধ করতে পারবেন ?—আপনার ত অর্থের অভাব নেই, ঐশ্বর্য্যও রাজার মতন, শক্তি-প্রতিপত্তি প্রচুর, তবুও আপনার উপযুক্ত ছেলের এ অবস্থা কেন ? শিক্ষা পায় নি, সহবত শেখান নি, বাহাজগতের সঙ্গে পরিচিত হবার অবকাশটুকুও তাকে দেন নি ; অথচ ছেলের অবস্থা চেপে রেখে শুধু জমিদারী-চাল চলে তাকে আমার সরল বাবার কাছে চালিয়ে দিয়েছেন ! আমার বাবা না জানলেও আমি ত জেনেছি, আমার কাছে আপনি কত বড় দেনা করেছেন, আপনিও মনে মনে জেনেছেন, আমাকে কি ভাবে ঠকিয়েছেন ! এর ক্ষতি আপনি পূরণ করতে পারবেন, আপনার জমিদারী—সঞ্চিত সমস্ত টাকাকড়ি, আর শক্তি-প্রতিপত্তি দিবে ?

অধৈর্য্যভাবে কর্তা উত্তর দিলেন,—তুমি যে দেখাচ্ছ আবল-তাবল যা’ তা’ ব’লে বক্তৃতা শুরু ক’রে দিলে, বোমা ! মেয়েমানুষের জিবের এতটা দোড় ত ভাল নয় !

বধুর উৎসাহ তখন প্রদীপ্ত হইয়া উঠিয়াছে, শ্বশুরের বাধার কর্ণপাত্ৰ না করিয়া পূর্ববৎ উচ্ছ্বাসের সুরেই কহিল—তা হ’লে একবার দয়া করে ঐ ঘরে চলুন, বাবা, আমাদের মায়ের ছবি সেখানে জল-জল করছে, তাঁর মুখের দিকে যদি একটবার চান, ঠিক এই প্রশ্নই আপনার মনের বন্ধ

দরজায় আঘাত দেবে ; আপনাকে মানতেই হবে, ছেলের সম্বন্ধে অবহেলা ক'রে আপনি সেই সাধবীর অন্তিম অনুরোধটুকুও উপেক্ষা করেছেন, এখন আর কোনও প্রতীকার করতে পারেন না।

স্বর্গগতা সাধবী সহধর্মিণীর কথা প্রসঙ্গে সহসা কর্তা যেন চমকিত হইয়া উঠিলেন, অতীতের বহু পুরাতন কথাই তাঁহার স্মৃতিপথে ভাসিয়া উঠিল, দুই চক্ষু অশ্রুভারাক্রান্ত ও কণ্ঠ যেন তাহার আবর্তে রুদ্ধ হইয়া আসিল।

শ্বশুরের মুহূর্ত্তম অবস্থা দেখিয়াও বধু তাহার প্রহরণ সম্বরণ করিল না, কয়েক মুহূর্ত্ত চুপ করিয়া থাকিয়াই পুনরায় সে কহিল,—আর আপনার ছেলেও যদি এ সম্বন্ধে আপনার কাছে অভিমান ক'রে বলে—

ছেলের কথা উঠিতেই স্তব্ধ নারব মেঘের বুক চিরিয়া সরব অশনি যেন ভঙ্কার দিয়া উঠিল। বিকৃতমুখে তিক্তস্বরে কর্তা কহিলেন,—আমার ছেলে ! অর্থাৎ তোমার স্বামী ! কিন্তু তাঁরও অভিমান করবার এক্তিয়ার কিছু আছে না কি ? আমরা ত জানি, ভগবান্ তাঁকে এ বংশের দুলাল ক'রে পাঠিয়েছেন—তাঁর মাথার ভেতর গোবর পুরে দিয়ে ! এরই মধ্যে ঐ অসার পদার্থটুকু বুধি সার হয়ে উঠেছে তোমারই সংস্পর্শে ?

স্বামীর সম্বন্ধে পূজনীয় শ্বশুরের মুখে এই ক্লট মন্তব্য শুনিয়া বধু মনে মনে অত্যন্ত বিরক্ত হইলেও মুখে বা কথায় তাহা প্রকাশ না করিয়া অবিচলিত ধৈর্যের সহিত বেশ সহজ কণ্ঠেই এবার উত্তর দিল,—ভগবান্ সত্যই যার ওপর বিরূপ হয়ে অসার ক'রে সংসারে পাঠান, মানুষ কি কখনও তাকে শোধরাতে পারে, বাবা ? যে অন্ধ হয়ে জন্মায়, কিংবা কালা, বোবা বা বিকলাঙ্গ হয়ে দুনিয়ার আসে, কেউ তাকে সারাতে পারে না। আমিও ত মানুষ, আমার শক্তি কতটুকু ! হাঁ তবে এ কথা আমি অস্বীকার করব না বাবা, তাঁর ভুলটুকু আমি ধরিয়ে দিয়েছি ; তাই তিনি আজ দেখতে পেয়েছেন, ভগবান্ তাঁর মাথার ভেতরে গোবর

পুরে দেন নি, বাড়ীর মাতব্বররাই তাঁর মাথার উপরে গোবরের ঝোড়া চাপিয়ে দিয়েছেন ।

কি রকম ?

ভগবানপণ্ডিত দশচক্রে রাজার কাছে যে ভাবে ভূত সাব্যস্ত হয়েছিলেন, এঁরও অবস্থা অনেকটা সেই রকমই হয়ে দাঁড়িয়েছে, বাবা । গোড়াতেই আপনাকে বলেছি দাসীদের অত্যাচারের কথা, তারপর বয়সের সঙ্গে সঙ্গে শুরু হ'ল স্বার্থ নিয়ে অত্যাচার ।

স্বার্থ নিয়ে অত্যাচার ! কাকে লক্ষ্য ক'রে এ কথা তুমি বললে শুনি ?

আপনি কি মনে মনেও তা অনুমান করতে পারেন নি বাবা, যে, আমাকে আরও স্পষ্ট ক'রে বলতে হবে ?

তা হ'লে তোমার নালিশ শুধু দাসীদের ওপর নয়, আরও ওপরে চুটেছে ? আশ্পর্কী তোমার যে, আমাকে বিশ্বাস করাতে চাও—বড় হয়ে উঠলেও খোকাকে চক্রান্ত ক'রে বেকাম করা হয়েছে !

বিশ্বাস করা না করা আপনার ইচ্ছা, কিন্তু কথার পিঠে কথা যখন উঠেছে, আর যে কথা আমি সত্য ব'লে জেনেছি, আমি কেন গোপন করব, বলুন !

শুঁকে বেকাম সাব্যস্ত ক'রে চক্রান্তকারীদের লাভ ?

এ কথা জিজ্ঞাসা করাই যে বাহুল্য হচ্ছে, বাবা ! আপনার জমিদারীর সাধারণ প্রজারাও জানে, ছেলে যদি বেকাম হয়, বড় হলেও সে জমিদারীর গদীর ওপর বসতে পারে না, তাকে ছোট ভায়েরই হাত-তোলা হয়ে থাকতে হয় !

বধূর এই নির্ভীক উক্তি শুনিয়া বৃদ্ধ আরাম-কেদারার হাতলটির উপর সবলে আঘাত করিয়া চীৎকার তুলিলেন,—উঃ, কি সর্বনাশ ! তুমি আমার এষ্টেট তছনছ করতে এসেছ,—গাঙ্গুলী-সংসার ভাঙতে হাত তুলেছ !

বধুও সঙ্গে সঙ্গে দৃঢ়স্বরে উত্তর দিল,—না বাবা, আমি আপনার ভুল-টুকুই শুধু ভেঙ্গে দিতে এমন মরিয়া হয়ে উঠেছি।

বটে ! কিন্তু ভুল শুধু আমি করিনি ; খোকা যে জড়-প্রকৃতি নিয়েই জন্মেছে, মাথায় তার বুদ্ধিগুদ্ধি কিছু নেই, কস্মিন্‌কালেও সে মানুষ হবে না,—বড় বড় বিজ্ঞাদিগ্‌গজরা তার ভার নিয়ে শেষে ঐ কথা ব'লে এলে দিয়ে গেছে।

যে কোনও কারণেই হোক, তাঁরাও ভুল করেছেন ঠাঁর সম্বন্ধে।

আমি বাবা, আমি ভুল করেছি ; বছরের পর বছর মোটা মোটা মাইনে নিয়ে যারা তাকে নাড়াচাড়া করেছে, তারাও ভুল করেছে, আর ক'টা দিনের চেনা-শুনায় তুমিই শুধু তাকে চিনেছ ?

বধু নিরন্তরে দৃষ্টি নত করিল, কিন্তু তাহার মুখে দৃঢ়তার রেখাগুলি আরও স্পষ্টভাবে ফুটিয়া উঠিল। বক্রদৃষ্টিতে তাহা লক্ষ্য করিয়া কর্তা কহিলেন,—তা হ'লে তুমি জোর করেই আমাকে বোঝাতে চাইছ যে, খোকায় মাথার মধ্যে কোনও গোল নেই ; আমরা তাকে যতটা অপদার্থ মনে ক'রে আসছি, সে তা নয় ;—এই ত ?

বধু সুস্পষ্টস্বরে উত্তর দিল,—আমার কথা ত আগেই বলেছি, বাবা !

অনেক কথাই ত তুমি বলেছ, বোমা। কিন্তু একটা কথার সঙ্গে আর একটা কথার সামঞ্জস্য যদি না হয়, কোন কথার ওপরেই নির্ভর করা যায় না। প্রথমেই তুমি বলেছ, বুটো মাল আমি চালিয়ে তোমাকে ঠকিয়েছি !

মাল বুটো জেনেই ত আপনি চালিয়েছিলেন, বাবা। এখনও আপনার মনে দৃঢ় ধারণা, সে মাল বুটোই !

আমি না হয় এ কথা স্বীকার করছি ; কিন্তু তোমার মুখেই পুনরায় শুনেছি, সে মাল বুটো নয়, আসল। তোমার কোন কথটি তা হ'লে প্রকৃত ?

বধু বুকিল, বিচক্ষণ শ্বশুর তাহার কথার খুঁটুকু ধরিয়াই তাহাকে আঘাত করিতে যে অস্ত্র উদ্ভূত করিয়াছেন, তাহা অব্যর্থ। যে জন্ত শ্বশুরকে সে অনুরোধ করিতে সাহস পাইয়াছিল, তাহারই শেষের কথায় তাহা খণ্ডন হইয়া যায়। কিন্তু অসাধারণ উপস্থিত-বুদ্ধির প্রভাবে বধু তৎক্ষণাত দুইটি কথার সামঞ্জস্য করিতে প্রস্তুত হইল, কিছুমাত্র উত্তেজিত না হইয়া বেষ সহজকণ্ঠেই সে উত্তর দিল,—বিয়ের বাসরে সকলেই জেনেছিল, সোণা ব'লে আপনি পেতল চালিয়ে দিয়েছেন, বাবা। কিন্তু আমি তাদের সে ধারণা ঘুরিয়ে দিয়েছিলুম, নহলে সেখানেই একটা কেলেকারী কাণ্ড কিছু বেধে যেত।

বটে !

আমার দাদা-মহাশয়ের আশীর্ব্বাদেই আমি বাসরেই জানতে পেরেছিলুম বাবা, আপনি আমাকে ঠকাবার চেষ্টা করলেও আমি ঠকি নি.—আসল বস্তু তার মধ্যে আছে, এক দিন সোণা হবেই। তাই কোনও গোল আর বাধে নি, আমারও নাশিশ করবার প্রয়োজন হয় নি। আপনি জানতেন, কি আমাকে দিয়েছেন; আমি জেনেছিলুম, কি ভেবে দিয়েছেন; কিন্তু আমি কি পেয়েছি, সে কথা ত আমাকে জিজ্ঞাসা করেন নি কোনদিন, বাবা !

বদ্ধদৃষ্টিতে কিছুক্ষণ বধুর মুখের দিকে চাহিয়া কর্তা সহসা প্রশ্ন করিলেন,—সেই সোণার চাবুকটা কি উদ্দেশ্যে আমি তোমাকে দিয়েছিলুম, মা ?

প্রশ্নের সঙ্গে সঙ্গে বধু উত্তর দিল,—এখানেও সেই ভুল আপনি করেছিলেন বাবা, সেই জন্তই এ বাড়ীতে এসেই আমাকে স্বর্ণ-গর্দভের সন্ধানে সমস্তায় পড়তে হয়েছিল।

আর, সে সমস্তা তোমার সোজা ক'রে দিয়েছিল. নিবারণ ! কিন্তু মা, তুমিও এখানে মস্ত ভুল করেছ, নিবারণ স্বর্ণ-গর্দভ নয়, স্বর্ণ-সিংহ।

হাসিমুখেই বধু কহিল,—সিংহের চামড়া প'রে একটা গর্দভও কিছুকাল বনে রাজত্ব করেছিল, বাবা। কিন্তু বেশীদিন তার ধাপ্পাবাজী চাপা থাকে নি ;—এ গল্প আপনি অবশ্যই শুনেছেন !

সহসা অসহিষ্ণুভাবে রুম্বস্বরে কৰ্ত্তা কহিয়া উঠিলেন,—কিন্তু তোমার সেই সত্যিকার সিংহটি কোথায় ? এক ঘণ্টার ওপর ত আমাদের তক্কার চলেছে, বাইবের দরজায় আমি যদি পাহারা বসিয়ে না আসতুম, মহলস্বদ্ধ সবাই এখানে ছুটে আসত। কিন্তু তাঁর সাড়াশব্দও কিছু নেই,—নিজের গুহায় প'ড়ে যুমেছেন, কিম্বা ল্যাজ নাড়ছেন হয় ত ! আর, ও যদি নিবারণ হ'ত, তা হ'লে—

শ্বশুরের কথা শেষ করিবার অবসর না দিয়াই বধু অসঙ্কোচে কহিল,—নিবারণের সঙ্গে গুঁর পার্থক্য এইখানেই বাবা !

অতিশয় বিরক্ত ও অসন্তুষ্ট হইয়া জ্বলন্ত-দৃষ্টিতে কৰ্ত্তা বধুর মুখের দিকে চাহিলেন। এই ভয়াবহ দৃষ্টির আঘাত সহ করিয়া তাঁহার মুখের কথায় পুনরায় প্রতিবাদ তুলিবার মত সাহস কাহারও বড় একটা দেখা যায় নাই ; কিন্তু বধু অকুতোভয়ে শ্বশুরের আরক্ত মুখের দিকে চাহিয়া সহস্র ভঙ্গিতে কোমল কণ্ঠে কহিল,—পরের মুখের কথা, আর নিজের মনের অনুমান, এদের ওপর এক তরফা জোর দিলে শেষকালে পস্তাতে হয় না, বাবা ?

ক্রকুটি করিয়া শ্বশুর জিজ্ঞাসা করিলেন,—এ কথার মানে ? কাকে লক্ষ্য ক'রে কথাগুলো বলা হ'ল, বোমা ?

বধু শ্বশুরের মুখের উপর অচঞ্চল দৃষ্টি স্থাপন করিয়া উত্তর দিল,—আমি খুব সোজা আর সত্য কথাই বলেছি, বাবা ! বেঁতুল বরাবর হয়েছে, এখানেও যে ঠিক সেই ভুল হচ্ছে ; আপনি যখন বিচার করতেই এসেছেন, দলীল-দস্তাবেজ সবই যখন কাছে মজুত, তখন নিজের চোখে না দেখে ও-কথাগুলো বলা কি ঠিক হয়েছে ?

খুব জোরে একটা নিশ্বাস ফেলিয়া কর্তা কেদারা ছাড়িয়া উঠিয়া দাঁড়াইলেন, দীর্ঘনিশ্বাসের সহিত রক্তকণ্ঠ হইতে শুধু একটি অশ্লুচ স্বর নির্গত হইল,—হঁ !

বধু অপলক-নয়নে দেখিল, তাহাকে কোনওরূপ আহ্বান না করিয়াই তাহার স্বস্তুর একাই অলিন্দের দরজা দিয়া তাহাদের পাঠাগারের দিকেই চলিয়াছেন !

চার

পড়িবার ঘরখানির ভিতর এতক্ষণ কতকগুলি জটিল আঁকের সমাধান লইয়া একাগ্রচিত্তে গোবিন্দের অপূর্ব সাধনা চলিয়াছিল ! অন্ত কোন দিকেই তাহার ক্রক্ষেপ নাই, বধু যে বাহিরের দ্বারে আঘাতশব্দ শুনিয়া উঠিয়া গিয়াছে ও এতক্ষণ কক্ষে অমুপস্থিত রহিয়াছে, তাহার সম্বন্ধেও সে সম্পূর্ণ অচেতন। টেবলের উপর প্রসারিত খাতাখানির পৃষ্ঠাতেই তাহার প্রাণশক্তি এমনভাবে বুঁকিয়া পড়িয়াছিল, যেন খাতার বাহিরে আর কাহারও দিকে তাকাইবার বা খাতার আঁকগুলি সমাধা হইবার পূর্বে অশ্রুদিকে মনকে চালাইবার তাহার নিজেরই কোনও সামর্থ্য নাই।

সহসা পরিপূর্ণ উল্লাসে করতালি দিয়া গোবিন্দ কহিয়া উঠিল,—বাস্ !
—কুল অফ থী ফিনিস্ ! এবার কি দেবে ?

আনন্দোচ্ছ্বাসিতমুখে জিজ্ঞাসুনয়নে সে বধুর আসনের দিকে চাহিয়া দেখিল, বধু সেখানে নাই এবং মুখখানি রীতিমত গম্ভীর করিয়া যিনি সে স্থলে দাঁড়াইয়া আছেন, এ সময় এ গৃহে এ অবস্থায় সে তাঁহাকে এ ভাবে দেখিবার কোনরূপ প্রত্যাশাই করে নাই। তাহার মুখের হাসি ও

মনের উল্লাস সেই মুহূর্তেই কোথায় তলাইয়া গেল, এই অবস্থাতেও তাহার কর্তব্যবুদ্ধি আজ সহসা সচেতন হইয়া উঠিল। তাড়াতাড়ি আসন ছাড়িয়া সে উঠিয়া দাঁড়াইল, এবং তাহার অজ্ঞাতেই যেন কণ্ঠ হইতে অমুচ্চ স্বর শ্রদ্ধাবিশ্ময়ের সুরে বাহির হইয়া আসিল,—বাবা ! আপনি !!

নিরন্তরে বিশ্বয়বিমূঢ় পুত্রের আপাদ-মস্তক তীক্ষ্ণদৃষ্টিতে নিরীক্ষণ করিয়া বৃদ্ধ একথানা চেয়ার টানিয়া আস্তে আস্তে বসিলেন। সুরূহৎ টেবলখানির উপর অনেকগুলি খাতা ও নানাবিধ কেতাব কেতাদুরস্তভাবেই রাখা ছিল। পর পর কয়েকখানি বাঁধানো বই হাতে লইলেন, খুলিয়া দুই চারিখানির পৃষ্ঠাও উন্টাইলেন, কিন্তু কোনও গ্রন্থের বিষয়বস্তু সম্ভবতঃ উপলব্ধি করিতে না পারিয়াই যথাস্থানে রাখিয়া দিলেন। অতঃপর যে খাতাখানি লইয়া গোবিন্দ ঘণ্টার পর ঘণ্টা গণিতের সাধনায় মগ্ন ছিল, সেইখানি তুলিয়া ইংরেজিতে লেখা অঙ্কগুলির উপর বিশ্মিতদৃষ্টি প্রসারিত করিয়া প্রশ্ন করিলেন,—এ সব তোমার লেখা, খোকা ?

খোকার মুখ হইতে মৃদুস্বরে উত্তর আসিল,—হাঁ।

পুনরায় প্রশ্ন হইল,—কি আঁক এগুলো ?

গোবিন্দ কহিল,—কুল অফ থ্রী ; আজ শেষ হয়ে গেল !

খাতার পাতাগুলি উন্টাইতে উন্টাইতে কোতূহলের স্বরে পিতা জানিতে চাহিলেন,—তেরিজের কত পরে এ আঁকটা ?

পুত্রের মন পিতার প্রশ্নে উল্লাসে নাচিয়া উঠিল ; এমন ভাবে পিতা ত কখনও তাহার সহিত কথা কহেন নাই,—আজ তিনি তাহার খাতার আঁক দেখিয়া তাহার কাছেই জানিতে চাহিতেছেন—তেরিজের কত পরে এ আঁক !

উৎসাহের সুরে গোবিন্দ কহিল,—ওঃ ! তেরিজের অনেক পরে, বাবা ! তেরিজ জু-ফ্যাডিসন,—সে ত গোড়ায়, তার পর সবটুকসন, তার পর মণ্টিপ্লিকেশন, তার পর ডিভিসন, তার পর—

পরবর্তী অঙ্কের নামগুলি বলিবার অবসর পুত্রকে না দিয়াই পিতা পুনরায় প্রশ্ন করিলেন,—আচ্ছা, যে আঁক আজ তুমি শেষ করেছ বললে, ওর বাঙ্গানা নামটা কি ?

পুত্র তৎক্ষণাৎ উত্তর দিল,—ত্রৈরাশিক, বাবা !

মুখের ভাবটুকু পরিবর্তন করিয়া পিতা কহিলেন,—ওঃ, বুঝিছ ; এ আঁক ত পাটীগণিতের প্রায় শেষের দিকেই ! তুমি ত্রৈরাশিক কষছ ! বটে !

অধিকতর উৎসাহভরে পুত্র কহিল,—শীগগীর আমি পাটীগণিত শেষ ক'রে ফেলব ! তখন, কি মজা !

আনন্দবিহ্বল পুত্রের মুখের দিকে দৃষ্টি বদ্ধ করিয়া পিতা কহিলেন—আমি ত শুনেছিলুম খোকা, তেরিজেব কোটা তুমি পেরুতে পার নি, মাষ্টারনা হিমশিম পেয়ে এলে দিয়ে পালায় ! অথচ, সেই তুমিই আজ ত্রৈরাশিক শেষ করেছ !

পিতার মুখের কথায় পুত্রের মুখখানি আপনাই হেঁট হইয়া পড়িল, সে মুখে যুগপৎ ব্যথা ও লজ্জার চিহ্ন প্রকাশ পাইল ।

পুত্রের মুখভঙ্গি লক্ষ্য করিয়াই পিতা প্রশ্ন করিলেন,—কবে থেকে আবার কেঁচে-গাধুম আরম্ভ করা হয়েছে ?

আনত-দৃষ্টি পিতার মুখের উপর স্থাপন করিয়া পুত্র নীরব রহিল । পিতা প্রশ্নটি পুনরায় পরিষ্কার করিয়া ব্যক্ত করিলেন,—আমার কথা কি বলতে পার নি খোকা ? আমি জিজ্ঞাসা করছি, লেখাপড়ার পাট ত চুলোব গিয়েছিল, আবার সুরু করা হ'ল কবে থেকে ?

কুলশয়ার রাত থেকে ।

বটে ! ভাল, ভাল ; আচ্ছা, শেখাচ্ছেন কে ?

গোবিন্দ আবার মুখ হেঁট করিল, সুন্দর মুখখানি তাহার পিতার এই প্রশ্নে সহসা লাল হইয়া উঠিল । সহসা তাহার মনে পড়িয়া গেল বধুর

কথা ; সে দৃঢ়তার সহিত বলিয়াছিল, স্বামী স্ত্রীর মধ্যে যে সব কথা হয়, তাহা কাহাকেও বলিতে নাই ! কে তাহাকে পুনরায় লেখাপড়ায় ব্রতী করিয়াছে, আঁক শিখাইতেছে,—তাহা বলিতে হইলেই বধূর নাম তুলিবার কথা । কিন্তু তাহার যে নিষেধ ! সূত্রাং গোবিন্দ এ প্রশ্ন শুনিয়া নিরুত্তরে মুখ হেঁট করিয়াই রহিল ।

পিতা আড়-নয়নে তাহা লক্ষ্য করিয়া মনে মনে হাসিলেন, পরক্ষণে পুনরায় প্রশ্ন করিলেন,—এতকাল পরে হঠাৎ আঁকের উপর এ আগ্রহ কেন ?

পুত্র দুই চক্ষু তুলিয়া কম্পিতকণ্ঠে গাঢ়স্বরে উত্তর দিল,—মানুষ হতে হ'লে আগেই যে আঁক শিখতে হয়, নইলে মাথা খোলে না ।

পিতার পাকা মাথাটির ভিতর কে যেন সহসা একটি হুঁচ কুটাইয়া দিল ! মনের ভাব গোপন করিয়া এবার একটু শ্লেষের সুরেই তিনি কাহিলেন,—বড় বড় মাষ্টারগুলো যখন তোমাকে পাটীগণিতখানা গুলে খাওয়াতে উঠে প'ড়ে লেগেছিল, তখন তোমার মাথার ভেতর ও-কথাটা খেলে নি কেন ?

পুত্র বালকের গায় কোমলকণ্ঠেই উত্তর দিল,—ওঁরা ত কেউ আমাকে ও-কথাটা তখন বুঝিয়ে বলেন নি । খালি খালি বলতেন, আমি গাধা, আমার মাথার ভেতরটা খালি গোবরে ভরা, আমার কিছুই হবে না ।

তার পর কেউ বুঝি তোমাকে বুঝিয়ে দিলে, তোমার মাথাটা খালি গোবরে ভরা নয়, চেষ্টা করলে তুমিও মানুষ হ'তে পার ?

পুত্র নিরুত্তরে ঘাড়টি নাড়িয়া পিতার মন্তব্যে সার দিল । সঙ্গে সঙ্গে এ সম্বন্ধে বধূর তীক্ষ্ণ কথাগুলি পিতার স্মৃতিপথে ভেরীর মত যেন ঝঙ্কার তুলিল,—ভগবান তার মাথার ভেতরে গোবর পূরে দেন নি, মাতব্বররাই তার মাথার ওপর গোবরের বোঝা চাপিয়ে দিয়েছে !

অতঃপর নীরবেই তিনি কিছুক্ষণ ধরিয়া ঘরখানির সকল অংশই তীক্ষ্ণ-

দৃষ্টিতে দেখিলেন। বুঝিলেন, সত্যকার পড়াশুনাই এই ঘরে চলিয়াছে। টেবলের উপর পাশা-পাশি যে সকল বই ও খাতা ব্যবহার্য হিসাবে পড়িয়া ছিল, তাহাদের ভিতর হইতে একখানি খাতা তুলিয়া পিতা তাহার পাতায় পাতায় পরিষ্কার ছাঁদের লেখা দেখিলেন, পরক্ষণে পুত্রের দিকে চাহিয়া প্রশ্ন করিলেন,—এ লেখাও তোমার ?

মাথা নাড়িয়া পুত্র জানাইল, না।

কার হাতের এ সব লেখা ?

পুত্র নিরুত্তরে আবার মাথাটি হেঁট করিল। পিতা বক্রদৃষ্টিতে পুত্রের দিকে চাহিয়া প্রশ্ন করিলেন,—এ লেখা তা হ'লে বোমার ?

পুত্রের চিবুকটি বার দুই নড়িয়া উঠিল এবং তাহাতেই বুঝিতে পারা গেল, পিতার অনুমান সত্য।

খাতাখানির আত্মোপাস্ত দেখিয়া পিতা একটি সুদীর্ঘ নিশ্বাস ফেলিয়া কহিলেন,—তা হ'লে কেবল আঁকের রাস্তা দিয়েই এখন তোমার ছুটোছুটি চলেছে ?

পুত্র দুই চক্ষু বিস্ফারিত করিয়া কহিল,—আঁক ত খালি নয়, পড়তেও যে হয় অনেক।

বটে ! তা' পড়াটা কি ভাবে চলেছে তোমার ?

এই যে রুটিং দেখুন না।—কথার সঙ্গে সঙ্গে একখানি খাতার একটি পাতা খুলিয়া পিতার হাতে তুলিয়া দিল। একটু বড় ছাঁদের বাঙ্গালা অক্ষরে খাতার পূরা পৃষ্ঠাটি ব্যাপিয়া এই অপূর্ব পড়ুয়ার অহোরাত্রের কৰ্মধারা লেখা রহিয়াছে। শুরু বিষয়ে পিতা পড়িতে আরম্ভ করিলেন :—

ভোর পাঁচটা হইতে সাড়ে ছয়টা	...প্রাতঃকৃত্যাদি ও ব্যায়াম
সাড়ে ছয়টা হইতে সাতটা	...মাতৃপূজা
সাতটা হইতে সাড়ে সাতটা	...গীতাপাঠ
সাড়ে সাতটা হইতে আটটা	...জনযোগ

আটটা হইতে দশটা	...ইংরেজী সাহিত্য
দশটা হইতে বারোটা	...স্নানাহার ও বিশ্রাম
বারোটা হইতে তিনটা	...অঙ্ক
তিনটা হইতে পাঁচটা	.. বাঙ্গালা সাহিত্য
পাঁচটা হইতে সাড়ে সাতটা	...জলযোগ, ব্যায়াম ও সায়াকৃত্যাদি
সাড়ে সাতটা হইতে আটটা	...মাতৃপূজা
আটটা হইতে দশটা	...সাময়িক পত্রিকা পাঠ ও বিবিধ আলোচনা
দশটা হইতে এগারটা	...ভোজন ও বিশ্রাম
এগারটা হইতে রাত্রি বারোটা	...শাস্ত্রপাঠ

পড়া শেষ হইলে খাতাখানি পুত্রের হাতে ফিরাইয়া দিয়া শুধু একটি বিষয়ে পিতা প্রশ্ন করিলেন,—মাতৃপূজাটা কি ?

পুত্র কহিল,—ও ঘরে মাযের বে ছবি আছে, ঐ সময় তাতে ফুলের মালা পরিয়ে ধূপ-ধূনো গঙ্গাজল দিয়ে পূজো করি আর তাঁর কাছে এই ব'লে মানত করি,—মা গো ! আমার মনের জড়তা ভেঙ্গে দাও, অজ্ঞানতার অন্ধকার দূর ক'রে দিয়ে বিবেকের আলো দেখাও, সত্যের পথ ধ'রে আমি যেন সত্যকার মানুষ হ'তে পারি ।

দুই চক্ষু মুদ্রিত করিয়া প্রার্থনার ভঙ্গিতে পুত্র পিতার সমক্ষে মাতৃ-পূজার পদ্ধতি বালকমূলভ সরলতায় ব্যক্ত করিল ।

অতি কষ্টে এবার পিতাকে আত্মসম্বরণ করিতে হইল, উদগ্র অশ্রু-ধারাকে সখলে রুদ্ধ করিতে দুই চক্ষু তাঁহার স্ফীত হইয়া উঠিল ; তাঁহার মনে হইল, বিবাহের দিনেও যুবক-পর্যায়ভুক্ত যে পুত্রের মনোবৃত্তি ছয় বৎসরের শিশুর অনুরূপ ছিল, আজ সে যেন সহসা কি এক অলৌকিক যাত্নদণ্ডের স্পর্শের প্রভাবে ষোড়শবর্ষীয় অধ্যয়নশীল কিশোরের প্রশংসিত

মনস্থিতা অর্জন করিয়া লইয়াছে ;—এখনও যে কয়টি বৎসরের ব্যবধান রহিয়াছে, এই ভাবে উচ্চ সাধনা চলিলে, তাহার তিরোধানও দীর্ঘ সময়-সাপেক্ষ নহে ।

এই সময় পাঠাগারের ঘড়িতে তিনটা বাজিল,—সঙ্গে সঙ্গেই বাহিরের ঘণ্টাঘরের ঘোষণাও তাহার সমর্থন করিল । পিতা সচকিত হইয়া জোর করিয়া কণ্ঠ পরিষ্কার করিয়া কহিলেন,—তোমার ত এখন পড়বার সময় এল, খোকা । বেশ, তুমি পড়া আরম্ভ কর ; আমি একবার ও-ঘরটা দেখে যাই ।

কথা শেষ করিয়াই পিতা মধ্যের বড় ঘরখানির দিকে অগ্রসর হইলেন । সময়ের অপব্যয়ে পুত্র অধৈর্য হইয়া পড়িয়াছিল, এবার সে নিশ্চিত হইয়া এ দিনের পাঠ্য বাঙ্গালা বইগুলি লইয়া বসিল ।

পাঁচ

মধ্যের কক্ষে প্রবেশ করিতেই সহধর্মিণীর সুবৃহৎ আলেখ্যখানির উপর হরিনারায়ণ বাবুর দৃষ্টি পড়িল ।

স্বর্গীয়া পত্নীর এই আলেখ্যখানি বহুবারই তিনি দেখিয়াছেন ; পত্নীর সহস্র স্মৃতিবিজড়িত এই কক্ষের এই স্থানটিতে দাঁড়াইয়া কত দিন অতীতের কত কথাই তিনি স্মরণ করিবার অবকাশ পাইয়াছেন, প্রিয়-বিরহের গভীর অন্তর্ভূতি কত সুদীর্ঘ নিশ্বাসেই ব্যক্ত করিয়াছেন !—কিন্তু আজ সেই পরিচিত কক্ষে, সেই আকাঙ্ক্ষিত আলেখ্য-সমীপে আসিয়া দাঁড়াইতেই তাঁহার মনে হইল, তিনি যেন কোনও সুপবিত্র পূজা-মন্দিরে এক অপূর্ব দেবী-প্রতিমার সংস্পর্শে আসিয়াছেন ! যদিও এই কক্ষের এক পার্শ্বে

মহার্য্য পালকে শুভ্র শয্যার নিদর্শন রহিয়াছে, তথাপি শুদ্ধাচারের শুচিতায় এখানকার প্রত্যেক বস্তুটিই যেন দেবতার নিৰ্ম্মাল্যের মতই অনিন্দ্য ও অনবণ্ড। অতীত জীবনের কত অহোরাত্রিই এই কক্ষে অতিবাহিত হইয়াছে, কিন্তু কোনও দিনই ত তিনি এখানে সুপবিত্র দেবালয়ের শাস্ত্র গাভ্যার্থ্য অনুভব করেন নাই! আর, গৃহের এই পবিত্র সুন্দর পরিস্থিতি গৃহপ্রাচীরে অধিষ্ঠিতা স্বর্গগতা গৃহিণীর প্রতিকৃতির উপরেও কি এক অনন্তপূর্ব ছাতির বিকাশ করিয়া দিয়াছে! হরিনারায়ণ বাবু দৃষ্টি প্রথর করিয়া দেখিলেন, আলেকথোর অধিকারিণীর সীমন্তের যে অংশে সিন্দুর-রেখাটি নিতান্ত ক্ষীণকায় ছিল, তাহা যেন কোনও সিদ্ধহস্তের তুলিকায় স্থূলতর হইয়া জ্বল্-জ্বল্ করিতেছে, শুধু এই পরিবর্তনটুকুতেই তৈলচিত্রের মুখখানির শোভা ও সৌন্দর্য্যের কতখানিই না উৎকর্ষ হইয়াছে! অথচ এই ক্রটিটুকু ত এ পর্য্যন্ত তাঁহার চক্ষু দুটিকে পীড়া দেয় নাই। সীমন্তের এই সিন্দুরশোভা ও সুগন্ধ পুষ্পে নিপুণহস্তে রচিত অমুপম মালা চিত্রময়ীকে যেন প্রাণময়ী করিয়া তুলিয়াছে! অপলক-নয়নে তিনি সেই দিকেই চাহিয়া রহিলেন। কিছুক্ষণ পরে দৃষ্টি নত করিতেই আলেকথোখানির পদ-প্রান্তে শ্বেতপ্রস্তরের এক আধারের উপর নিবেদিত পুষ্পাজলির নিদর্শনও পাওয়া গেল; বুঝিলেন, চিত্রেখরী দেবীর উদ্দেশে অর্ঘ্য ও পুষ্পসস্তার শ্রদ্ধা সহকারে অর্পিত হইয়াছে; পুত্রের পড়াশুনার তালিকায় সকাল-সন্ধ্যায় মাতৃপূজার নির্দেশ তৎক্ষণাৎ তাঁহার বিক্ষারিত চক্ষুর উপর ভাস্বর হইয়া

অতঃপর ধীরে ধীরে তিনি শয্যার দিকে অগ্রসর হইলেন। শয্যাটিও যে নির্দিষ্ট স্থানটি হইতে সরিয়া গিয়া কক্ষের প্রান্তদেশে রুজু রুজু দুইটি ব্যতায়নের মধ্যস্থলে আশ্রয় লইয়াছে, কক্ষে প্রবেশ করিয়াই তিনি তাহা লক্ষ্য করিয়াছিলেন। এখন নিকটে গিয়া দেখিলেন, শুধু স্থান নয়, তাহাতে আরও অনেক কিছুই পরিবর্তন হইয়াছে। শয্যার যে দুইটি

সংবৃত্ত আধার স্থল গদি ও সুকোমল প্রচুর তোষকে আন্তৃত হইয়া কক্ষের শোভা ও চক্ষুর তৃপ্তি বাড়াইয়া তুলিত, তাহা দ্বিধা বিভক্ত হইয়া দুইটি আধারে পরিণত হইয়াছে, এবং গদী, তোষক প্রভৃতি সুকোমল আন্তরণের স্থলে স্থল ও করুণ সতরঞ্চি আধারের মর্যাদা রক্ষা করিতেছে। মথমলের মত কোমল শুভ্র আচ্ছাদন-বস্ত্র অন্তর্হিত হইয়া তাহাদের স্থল অধিকার করিয়াছে এক একখানি মৃগচন্দ্র। মধ্যে মাত্র একটি হাত বাবধানে এই ভাবে দুইটি শয্যা সন্মুখ। বিষ্ময়-কৌতূহলে হরিনারায়ণ বাবু পাশা-পাশি দুইটি শয্যাই হাত দিয়া টিপিয়া টিপিয়া পরীক্ষা করিয়া দেখিলেন, কোনও পার্থক্যই কোনটির মধ্যে নাই ; উভয় শয্যাই সুকঠিন ও শুচিতার প্রতীক। আরও লক্ষ্য করিয়া দেখিলেন, ভেলভেটের আন্তরণ-মণ্ডিত পালঙ্কের উপাধানগুলির কোনও নিদর্শনই কোনও শয্যাতে নাই, শুধু প্রত্যেক শয্যার প্রান্তদেশে মাথার রাখিবার মোটা রকমের একটি করিয়া উপাধান রহিয়াছে, শয্যার ত্রায় সেগুলিও কঠিন এবং তাহাদের আন্তরণ ভেলভেটের নহে ; হাতে কাটা মোটা খদ্দেরের ও সেগুলি গৈরিকবর্ণে রঞ্জিত ; মৃগচন্দ্রের আন্তরণের উপর গেরুয়া উপাধানগুলির সংস্থানে শয্যার সৌন্দর্য্য যেন আরও বিকশিত হইয়া উঠিয়াছে।

আরও কিছুক্ষণ এই অপূর্ব শয্যা দুইটির সম্মুখে স্থিরভাবে দাঁড়াইয়া হরিনারায়ণ বাবু মনে মনে কি ভাবিলেন, তাহার পর আন্তে আন্তে পুনরায় স্বর্গীয়া সহধর্ম্মিণীর আলেখ্যখানির সান্নিধ্যে ফিরিয়া আসিয়া অন্তঃস্বরে ডাকিলেন,—বোমা !

আহ্বানধ্বনির অব্যবহিত পরেই বধূর সহজ কর্ণধ্বনি শুনা গেল,—
ডাকছেন আমাকে, বাবা ?

শুভুরের তীক্ষ্ণদৃষ্টি দ্বারের দিকেই পড়িয়াছিল ; দেখিলেন, তাহার আহ্বানে সাড়া দিয়াই সপ্রতিভভাবে বধু কক্ষমধ্যে প্রবেশ করিতেছে, মুখে তাহার বিরাগ, বিকোভ, অভিমান অথবা সংশয়ের কোন চিহ্নই নাই।

কিয়ৎক্ষণ পূর্বে দীর্ঘসময় ধরিয়া বাহার সহিত তাঁহার বিষম বাদান্তবাদ চলিয়াছিল, নিজে আঘাত পাইলেও, ক্ষমতার উৎকর্ষে তিনি বাহাকে কঠোরভাবে কথার আঘাত দিতে কৃপণতা করেন নাই এবং কথার শেষে ইচ্ছাপূর্বক বাহাকে উপেক্ষা করিয়াই তাহার কক্ষে প্রবেশ করিয়াছিলেন, সেই অদ্ভুত মেয়েটি এমন সহজ ভঙ্গিতে তাঁহার আছবানে সাজা দিয়া সম্মুখে আসিয়া জিজ্ঞাসু দুইটি চক্ষু তুলিয়া দাঁড়াইল, যেন কোনও অপ্রিয় ঘটনাই ইতঃপূর্বে ঘটে নাই, আছবান পাইয়া আজ এই মাত্রই যেন সে না গ্ন হইয়া দেখা দিয়াছে।

মনের বিশ্বয় মুখে প্রকাশ হইতে না দিয়াই বেশ গম্ভীরভাবে কণ্ঠা কহিলেন,—ও-ঘরে তোমার দলীল-দস্তাবেজ সমস্তই দেখে এলুম, বোমা।

বধূ পলকের জন্য শ্বশুরের মুখের দিকে চাহিয়াই তৎক্ষণাৎ দৃষ্টি নত করিল, কোনও উত্তর দিল না।

আড়-নয়নে বধূর এই ভাব লক্ষ্য করিয়া শ্বশুর কথার সুর একটু বক্র করিয়াই কহিলেন,—কিন্তু এ-ঘরের কারদাকানুন হঠাৎ এ ভাবে পাল্টানো হ'ল কেন, তা ত বুঝলুম না!

বধূ এবার চক্ষু তুলিয়া পুনরায় নিজের কণ্ঠকে শক্ত করিয়া আশ্বে আশ্বে উত্তর দিল,—পাল্টাবার যে প্রয়োজন হয়েছিল, বাবা।

প্রয়োজন হয়েছিল! তার মানে?

মানে কি সত্যই বুঝতে পারেন নি বাবা,—ও-ঘরের দলীল-দস্তাবেজ সব দেখেও?

বধূব স্পষ্ট কথায় শ্বশুরের মুখখানি সঙ্গে সঙ্গেই কঠিন হইয়া উঠিল; কিছুক্ষণ চুপ করিয়া থাকিয়া সহসা বধূর মুখের উপর তীক্ষ্ণ দৃষ্টিতে চাহিয়া কক্ষকণ্ঠে তিনি কহিলেন,—এতক্ষণে তোমার মনের আসল উদ্দেশ্যটুকু আমি বুঝতে পেরেছি, বোমা।

জিজ্ঞাসুনয়নে বধূ শ্বশুরের মুখের দিকে চাহিল। শ্বশুর কহিলেন,—

বিয়ের রাতে তোমার বাবাকে আভাসে জানিয়েছিলুম, আমাদের কুলপ্রথা—গাঙ্গুলী-বাড়ীতে মেয়ে বধু হয়ে প্রবেশ করলে, সঙ্ঘৎসরের মধ্যে ফেরবার উপায় থাকে না। তোমার বাবা এ নিয়ম পাল্টাবার জন্য আপত্তি জানাতে, অস্বরোধ করতে ভ্রুটি করেন নি, কিন্তু আমার সে কথা নড়ে নি। এখন আমার মনে হচ্ছে, আমার সেই কথাটা রদ করবার জন্যই তুমি এখানে বেপরোয়া হয়ে এই সব কাণ্ড বাধিবেছ !

বধুর মুখে এতক্ষণে হাসির একটু ঝিলিক দেখা গেল, স্নিগ্ধ দৃষ্টিতে শ্বশুরের মুখের দিকে চাহিয়া কোমলকণ্ঠে সে প্রশ্ন করিল,—এতে আমার লাভ কিছু খতিয়ে পেয়েছেন, বাবা ?

অসহিষ্ণুভাবেই শ্বশুর উত্তর দিলেন,—লাভ তোমার বাপের বাড়ী ফিরে যাওয়া ! তারা তোমাকে দেখেই যেই অবাক হয়ে তাকাবে, তুমিও তেমনি দস্ত ক'রে গুনিয়ে দেবে,—এমন কাণ্ড সেখানে আরম্ভ ক'রে দিলুম যে, বুড়ো মুখের কথা পাল্টাতে পথ পেলো না !

কিন্তু বৃথা বড়াই ত আমি কোনও দিন করি নি, বাবা। আর আমি ও জিনিসটা ভালোও বাসি না ; আপনি তা হ'লে আমার সঙ্ঘৎসর ভুল বুঝেছেন।

ভুল বুঝিছি ! সত্যি বলছ তুমি, বোমা ?

আমি যদি বলি, আপনার ঐ কথাটাই আমার পক্ষে ঠিক 'শাপ বর' হয়ে গিয়েছে, তা হ'লে কি আপনি বিশ্বাস করবেন ?

মুখের কথার সুরটুকু পুনরায় নরম করিয়া শ্বশুর প্রশ্ন করিলেন,—কি রকম ?

বধুর মুখে দৃঢ়তার আভাস পাওয়া গেল, নিজের কণ্ঠ পরিষ্কার করিয়া সুস্পষ্টস্বরে সে কহিল,—বাসরে আপনার ছেলের পরিচয় পেয়েই আমি স্থির ক'রে নিয়েছিলুম, তাঁর মুক্তির জন্য সঙ্ঘৎসর ধ'রে এই তপস্বাই আমি এখানে করব।

সংশয়ের সুরে শ্বশুর পুনরায় জিজ্ঞাসা করিলেন,—স্বয়ংসর তোমার বাপের বাড়ীর পথ বন্ধ জেনেও ?

গাঢ়স্বরে বধু উত্তর দিল,—আমি ইচ্ছা ক’রে নিজেই সে পথ যে বন্ধ ক’রে এসেছি, বাবা !

তুমি বন্ধ ক’রে এসেছ, ইচ্ছা ক’রে ?

অশ্রুসিক্ত দুইটি স্ফীত চক্ষু শ্বশুরের মুখের উপর তুলিয়া বধু কহিল,—সেই জন্মই তখন কনকাজলির বাঘনা তুলতে হয়েছিল,—আপনার দেওয়া মোহরের খালা মার আঁচলে তেলে দিয়ে সমস্ত বন্ধন ছিঁড়ে ফেলে শুধু একটি উদ্দেশ্যেই সমস্ত মন—সমস্ত লক্ষ্য আমার—

অন্তরের দুর্ব্বার উচ্ছ্বাসে বধুর কণ্ঠ সহসা রুদ্ধ হইল, পরের কথা কয়টি আর নির্গত হইল না ।

শ্বশুর সহসা চমকিত হইয়া বিস্ময়ের সুরে কহিয়া উঠিলেন,—ও, বটে ! মনে পড়েছে ! পরক্ষণে মুখের ভাব ও কথার সুর পাণ্টাইয়া কহিলেন,—হ্যাঁ, তোমার লক্ষ্যটুকুও এবার ধরা প’ড়ে গিয়েছে ! ধ’রে নিলুম না হয় তোমার কথাতেই বাপের বাড়ীর পথ বন্ধ হয়েছে ; কিন্তু শ্বশুরবাড়ীতেও ত ক্রমশঃই আগড় বাঁধতে আরম্ভ করেছ ! কাকুর তোয়াকা রাখতে চাও না, বাড়ীর বউ তুমি, অথচ কাকুর সঙ্গে তোমার সম্বন্ধ নেই, ভালমন্দ কোনও দিকেই দৃষ্টি নেই, সমস্ত কর্তব্য ছেঁটে ফেলে শুধু নিজের একটি লক্ষ্য বস্তু নিয়েই প’ড়ে আছ ! এ চমৎকার !

মুহূর্ত্তে বধুর মুখখানির উপর কে যেন কাঠিন্তের আবরণ পরাইয়া দিল, কণ্ঠ ও চক্ষুর দুর্ব্বলতা কোথায় পলকে নিশ্চিহ্ন হইয়া গেল, পরিপূর্ণ দৃষ্টিতে শ্বশুরের মুখের দিকে চাহিয়া তেজোদৃপ্ত স্বরে বধু কহিল,—এ প্রসঙ্গ ছেড়ে দিন বাবা, এর আলোচনা অপ্রিয় হবে ।

বধুর কথায় শ্বশুরের আপাদমস্তক ক্রোধে কণ্টকিত হইয়া উঠিল, বধু আজ অসীম স্পর্ধায় আলোচনার ধারারও নির্দেশ দিতে চায় ! বুঝিলেন,

এই প্রসঙ্গটিই বধূর পক্ষে সাংঘাতিক হইয়া দাঁড়াইয়াছে, সুতরাং ইহাকেই অবলম্বন করিয়া তিনি বধূকে রীতিমত আঘাত দিতে উদ্যত হইলেন।

মুখের কথায় মনের ক্রোধটুকু ব্যক্ত করিয়া বিরক্তির সুরে, তিনি কহিলেন,—অন্যায়ের আলোচনা বরাবর অপ্রিয়ই হয়ে থাকে, বোমা। এটা ঢাকবার চেষ্টা করাই মস্ত অন্যায়। আমি তোমাকে বা জিজ্ঞাসা করছি, তার উত্তর তোমাকে দিতেই হবে। তখনও তুমি জোর ক’রে বলেছ, তুমি কোন অন্যায় এ পর্য্যন্ত কর নি, একটি মিথ্যা কথাও কখনও বলনি!

বধূ মুখ হেঁট করিয়া নিরুত্তর রহিল, কিছুই বলিল না। কিন্তু তাহার এই নীরবতাই যেন প্রকাশ করিতেছিল,—এখনও সে উহাতে সায় দিতেছে।

কর্তা এবার স্বরের উপর বিশেষ জোর দিয়াই কহিলেন, আমি বলছি বোমা, নববধূর কোনও কর্তব্যই তুমি এ পর্য্যন্ত কর নি—বধূদের যেগুলো অবশ্য কর্তব্য!

বধূ সেইভাবেই মুখখানি হেঁট করিয়া রহিল; স্বপ্তরের কথায় কোনও প্রতিবাদ তুলিতে বা এ অভিযোগ অস্বীকার করিতে তাহাকে একটি কথাও বলিতে শুন্য গেল না।

স্বপ্তর এবার উৎসাহিত হইয়া কহিলেন,—বুঝিছ, তুমি ‘না’ বলতে পার না; তিনটে মাস পূরো হ’তে চললো, তুমি এ বাড়ীতে এসেছ; কিন্তু ব্যবহারে বাড়ীশুদ্ধ সকলকেই জানিয়েছ, তুমি তাদের কাউকে চাও না, আর কারুর দিকে তোমার লক্ষ্যও নেই। অস্বীকার করবে তুমি এ কথা?

বধূ তথাপি নীরব, প্রস্তুত-প্রতিমার মত একই ভাবে অপলক-নয়নে নতমুখে দাঁড়াইয়া রহিল।

স্বপ্তর দৃঢ়স্বরে কহিলেন,—এ কথাও তুমি মেনে নিচ্ছ তা হ’লে!

আমাকে আরও কঠিন হয়ে বলতে হচ্ছে বোমা, কথাটা খুবই অপ্রিয়, কিন্তু সত্য,—তোমার শাশুড়ী, দেবর, ননদ,—এদের কারুর কোনও খবরই তুমি রাখ না, রাখা আবশ্যিক মনে কর না, আর, আর, এ কথাও সত্য নে, আমার দিকেও তোমার লক্ষ্য নেই !

বধূর মুখে কোনও পরিবর্তনই দেখা গেল না, এমন কি, পর পর একপ অভিব্যোগেও তার মুখে চিন্তা বা আশঙ্কার কোন ছায়াও পড়িল না ।

শশুর মুখের স্বর এবার কিঞ্চিৎ নরম ও বিকৃত করিয়া কহিলেন,— এখন দুনিয়ার ভেতর তোমার শুধু একটি লক্ষ্য—স্বামী !

প্রস্তর-প্রতিমার এতক্ষণে যেন প্রাণের স্পন্দন আসিল ; শাড়ীর অঞ্চলটি গলায় ঘরাইয়া শশুরের পদতলে হেঁট হইয়া গড় করিয়া ভাবগদগদ-স্বরে বধু কহিল,—আপনার এই অনুমানই আজ আমার পক্ষে পরম আশীর্বাদ, বাবা !

একদৃষ্টে ক্ষণকাল বধূর দিকে তাকাইয়া শশুর রুদ্ধকণ্ঠে কহিলেন,— কিন্তু এইটিই নববধূর পক্ষে একমাত্র গোরবের কথা নয়, বোমা ! সীতা, সাবিত্রী, দময়ন্তী এঁরাও বধু ছিলেন, এঁদেরও স্বামী ছিল, শশুর ছিল, সংসার ছিল—

বধু বিনয়নম্রস্বরে কহিল,—কিন্তু কর্তব্যের সমস্তা যখন এঁদের জীবনে ঝড় তুলেছিল, তখন স্বামীই যে শুধু এঁদেরও লক্ষ্য হয়েছিল, পুরাণেই ত সে পরিচয় পাওয়া যায়, বাবা !

বধূর এই প্রতিবাদে বিরক্ত হইয়া শশুর কহিলেন,—পুরাণের কথা নিয়ে তোমার সঙ্গে তর্ক করবার আমার ইচ্ছা নেই, অবসরও নেই ; আর তোমার এ কথার সমর্থন এ যুগে কেউ করবে না । তোমার দপ্তরখানায় ত দেখে এলুম, শ্রীরামকৃষ্ণদেবের কথামৃত রয়েছে ; ও বই পড়েছ নিশ্চয় ; তিনিই ত বলেছেন গো,—যে মেয়ে রাঁধে, সে কি চুল বাঁধে না ! স্বামি-

ভক্তি যেমন উচিত, লক্ষ্যও তেমনই সংসারের সব দিকে রাখা উচিত ।
যেমন, মাছ ধরতে বসে ছিপের ফাতনার দিকে লক্ষ্য থাকলেও, আর সব
দিকেও তার নজর থাকে ।

শ্বশুরের কথাগুলি নিবিষ্ট-মনে শুনিয়া বধু মুখখানি তুলিয়া মৃদুকণ্ঠে
কহিল, শ্রীরামকৃষ্ণদেব ও কথা সংসারীদের সম্বন্ধে বলেছেন বাবা, সংসারের
নানা কাজে লিপ্ত থেকেও তাঁরা যাতে ভগবানের দিকে লক্ষ্য রাখতে
পারেন ; কিন্তু ক্রব, প্রহ্লাদ বা শুকদেবের সম্বন্ধে এ কথা ত বলা
চলে না !

শ্রাবের সুরে শ্বশুর প্রশ্ন করিলেন,—তবে কি ওদের পথেই বেবিবে
পড়া তোমারও বাসনা, মা !—সেই জগুই কি সকলকে অবহেলা ক'রে
একমুখী রুদ্ধাক্ষ হয়ে উঠেছ ?

বধু এবার কণ্ঠস্বর দৃঢ় করিয়া কহিল,—একমুখী না হ'লে কোনও উচ্চ
সাধনাই যে সিদ্ধ হয় না, বাবা !

শ্বশুরের মুখে বিস্ময়ের সুরে প্রশ্ন হইল,—সাধনা ?

বধু দৃপ্তস্বরে উত্তর দিল,—হা বাবা, সাধনা ; কিন্তু বাঙ্গালাদেশে আর
কোনও বধুকে আমার মত এমন কঠিন সাধনা আরম্ভ করতে হয় নি !
এমন কঠোর পরীক্ষাও আর কোনও দিন কোনও মেয়ের সামনে এদে
বাধা তোলে নি ; তাই বলি, বিয়ের রাতে যে বস্তু আমি পেয়েছি, তাঁকেই
পরম বস্তু ক'রে তুলতে শুধু তাঁরই দিকে লক্ষ্য আমাকে রাখতে হয়েছে ।
মহাভারতে পড়েছি, অস্ত্র-সাধনায় অর্জুন চরম পরীক্ষা দেবার দিনটিতে
শুধু ভাসপাথীর মাথাটির উপর লক্ষ্য রেখেছিলেন বলেই গুরু দ্রোণাচার্য্য
তাঁকেই তীর ছোড়বার অধিকার দেন, অর্জুনও সিদ্ধিলাভ করেন । যাকে
নিয়ে আমার সাধনা, লক্ষ্য যে শুধু তাঁরই দিকে ; তাঁকে সিদ্ধ ক'রে না
তোলা পর্য্যন্ত এ লক্ষ্য যে ফেরাতে পারব, সে ভরসা কিছুতেই যে করতে
পারি না, বাবা !

মুখখানি গম্ভীর করিয়া কর্তা প্রশ্ন করিলেন,—তোমাদের এই সাধন কত কাল চলবে ?

বধু কহিল,—আগেই ত বলেছি বাবা, সম্বৎসরের ব্রত নিয়েছি ।

শুভুর কহিলেন,—বুঝেছি, কিন্তু সময়টা যে আপাততঃ সংক্ষেপ করবার প্রয়োজন হয়েছে ।

বধু দুই চক্ষুর উপর প্রশ্ন তুলিয়া নীরবে শুভুরের মুখের দিকে চাহিল ।

শুভুর কহিলেন,—তোমার বিরুদ্ধে যখন নালিশ উঠেছে, সেটা ত অভ দিন ফেলে রাখতে পারি না ।

তীক্ষ্ণদৃষ্টিতে শুভুরের মুখের দিকে চাহিয়া বধু কহিল,—ঐ দিনগুলোর সঙ্গে আমার মামলার কি সম্বন্ধ, তা ত বুঝতে পারলুম না, বাবা ! তবে কি বিচারের আগেই শাস্তির ব্যবস্থা হচ্ছে ?

ঠিক তাই নয়, বরং তোমাকে বাচাবারই ব্যবস্থা করা হচ্ছে । এখন মামলা উঠলে, যে ব্রত তোমরা আরম্ভ করেছ, তার ক্ষতি হ'তে পারে, লক্ষ্য অন্তদিকে পড়বারই সম্ভাবনা তাতে বেশী, সেই জন্তই তোমাকে ঐ কথাটা বলা হয়েছে । এখন আমার এই ইচ্ছা যে, আজ থেকে চারটি মাসের মধ্যেই যেন তোমার ব্রতটার উদ্‌যাপন হয়ে যায় ।

বধুর মুখের স্বর অর্ধক্ষুণ্ট হইয়া বাহির হইল,—চারটি মাসের মধ্যে !

উৎসাহের সহিত কর্তা মুখের কথার উপর জোর দিয়া কহিলেন,—হাঁ, চারটি মাস মাত্র সময় দেওয়া যাচ্ছে ; আসছে আশ্বিনের দেবীপক্ষের প্রথম দিনটিতেই ব্রত তোমাকে উদ্‌যাপন ক'রে নিতে হবে । তারপরে বিচার তোমার আরম্ভ হবে । এখন শুধু তদন্তই চলবে দু'পক্ষের নালিশের ।

বধু সংযতস্বরে কহিল,—বিচারের জন্ত আমার ভাবনা নয় বাবা, ভাবছি শুধু ব্রতপূর্ণ করবার দিন এত সংক্ষেপ হচ্ছে ব'লে ।

শুভুর দৃঢ়কণ্ঠে কহিলেন,—তিনটে মাস ত ব্রতের কাজেই কাটিয়েছ

বউমা, এখনও বাকি রইল চারটে মাস ; এই কি কম ? মাত্র ক'টা দিনের মধ্যেই যদি একটা ইমারত তৈরী ক'রে সাজিয়ে তোলা সম্ভব হ'তে পারে, এতগুলো মাস এখনও প'ড়ে রয়েছে, এর মধ্যে একটা মানুষ গ'ড়ে তোলা কেনই বা অসম্ভব হবে ?

শশুরের কথার সঙ্গে সঙ্গেই বধুর মথখানি এক অপরিসীম উৎসাহের আভায় যেন প্রদীপ্ত হইয়া উঠিল। দুই চক্ষুর দৃষ্টি উজ্জ্বল করিয়া বধু শশুরের নুখেব দিকে চাহিয়া দৃঢ়স্বরে কহিল,—আপনার যদি আশীর্বাদ থাকে, এই অসম্ভব তা হ'লে সম্ভব হবে, বাবা !

বধুর কথায় এবার শশুরের নুখে হাসি দেখা দিল। তার মধ্যেই একটু পার্শ্বের সুরে তিনি কহিলেন,—এখন তবে বলি, ভবিষ্যৎ ভেবেই তখন সোণার চাবুকটি তোমার হাতে তুলে দিয়েছিলুম মা, সেইটির জোরেই এই অসম্ভবকে একদিন তুমি সম্ভব ক'রে তুলতে পারবে জেনেই !

বধুর মনে হইল, শশুরের কথার সহিত তাহার দেওয়া সেই সোণার চাবুকটির একটি আঘাত সজোরে তাহার পৃষ্ঠদেশ স্পর্শ করিল ! সর্কাজে একটা অসহ জ্বালার অনুভূতি সে প্রাণপণে সম্বরণ করিয়া, মুখের উপর ক্রেশের যে ভাবটুকু ফুটিয়া উঠিতেছিল, তাহা সবলে গোপন করিয়া, মিনতির সুরেই কহিল,—একটু অপেক্ষা করুন বাবা, আমি এখনি আসছি।

শশুর তাঁহার দুই চক্ষুর দৃষ্টি প্রসারিত করিয়া দেখিলেন, বধু ক্ষিপ্রপদে অপর পার্শ্বের সুসজ্জিত কক্ষটির ভিতর প্রবেশ করিল, ভিতর হইতে সামান্য যে শব্দ পাওয়া গেল, তাহাতে তিনি অনুমান করিলেন, বধু তাহার তোরঙ্গ খুলিয়া কোনও কিছু বাহির করিতেছে। তাঁহার যুগল ক্রম সহসা কুঞ্চিত হইয়া উঠিল।

অতি অল্পক্ষণের মধ্যেই বধুকে ফিরিতে দেখা গেল ; কিন্তু বধুর হাতের

বস্তুটির উপর শ্বশুরের উৎসুক চক্ষু পড়িতেই তিনি অস্বাভাবিক স্বরে কহিয়া উঠিলেন,—আবার সেই সোণার চাবুক ?

বধূ অতিশয় সহজ সুরেই উত্তর দিল,—হা বাবা, যেমন আপনি দিয়েছিলেন, বাঞ্ছাই তুলে রেখেছিলুম ; ব্যবহার করার প্রয়োজন হয় নি এ পর্য্যন্ত, তাই আপনার জিনিস আপনাকে ফেরত দিচ্ছি ।

দুই চক্ষু বিস্ফারিত করিয়া বধুর দিকে চাহিয়া শ্বশুর সবিস্ময়ে কহিলেন,—ফেরত দিচ্ছ ?

বধুর ওষ্ঠপ্রান্তে হাসির একটি ক্ষীণ রেখা ফুটিয়া উঠিল, কহিল,—দেওয়াকে যদি একান্তই সার্থক ক'রে তুলতে না পারা যায়, রেখে ত কোনও লাভ নেই, বাবা ! সেটা তখন বোঝা হয়েই দাঁড়াব ।

স্নান দৃষ্টিতে বধুর দিকে চাহিয়া ভগ্নস্বরে শ্বশুর প্রশ্ন করিলেন,—তা হ'লে কি আমিই ভুল বুঝেছিলুম ?

বধূ সুসংযত দৃঢ়স্বরে উত্তর দিল,—আপনি যে এটি দেবার সমর ভাবতে পারেন নি বাবা, আসল যে বস্তুটি আমার জন্য তুলে রেখেছেন—সেটি মরচে পড়া লোহার, সোণার চাবুক দিয়ে ঘসে মেজে পিটে কস্মিন-কালেও তাকে সোণা ক'রে তোলা যায় না, তার জন্য প্রয়োজন—স্পর্শ-মণির । সেইটি পাবার জন্যই যে একমুখী কড়াঙ্ক হয়ে এই সাধনা, বাবা !

নিম্পলকনয়নে শ্বশুর বধুর দৃপ্ত মুখখানির দিকে চাহিয়া রহিলেন ।

বধূ সেই অবসরে সোণার চাবুকটি শ্বশুরের পদতলে রাখিয়া কণ্ঠস্বর গাঢ় করিয়া কহিল,—আমি এর মান রাখতে পারিনি বাবা, সেজন্য মাপ চাইছি ।

হেঁট'হইয়া সেই স্বর্ণময় প্রহরণটি তুলিয়া বিবর্ণমুখে শ্বশুর বধুর দিকে চাহিয়া কহিলেন,—সত্যই তুমি এর ভার বহন করতে অস্বীকার করছ, বোমা ?

বধূ স্বচ্ছন্দে কহিল,—হা বাবা, এ জিনিসটি সত্যই আমার পক্ষে

হুকুম। পরক্ষণেই বধু কণ্ঠস্বর সহসা অস্বাভাবিকরূপে গাঢ় করিয়া কহিল,—আর এটি দেখলেই আমার সর্ব্বাঙ্গে জ্বালা ধরে।

নীরস স্বরে শব্দুর কহিলেন,—বটে! ভাল, তা হলে এটার ভার না হয় নিবারণের হাতেই দেব।

বধুর মুখখানি মুহূর্ত্তের জন্য উত্তেজিত হইয়া উঠিল, জলন্ত দৃষ্টিতে শব্দুরের মুখের দিকে চাহিয়া এক নিশ্বাসে সে কহিয়া উঠিল,—তাই দেবেন; কিন্তু আমাদের মায়ের দিকে ক্ষণকাল চেয়ে যদি জিজ্ঞাসা করতেন কোথায় ওটার স্থান, নিজের মনেই হয় ত তার অনুভূতি পেতেন, বাবা!

কথার সঙ্গে সঙ্গে বধু যেন জোর করিয়াই দেহটাকে টানিয়া লইয়া পার্শ্বের ঘরখানির ভিতরে সবেগে প্রবেশ করিল।

শেষের কথাটায় যে খোঁচা ছিল, শব্দুরের বুক তাহা রাতিমত আঘাত দিল; সঙ্গে সঙ্গে দুই চক্ষুর আর্ত দৃষ্টি সহধর্ম্মিণীর আলোখাখানির উপর স্থাপন করিয়া উচ্ছ্বাসের স্বরে তিনি কহিলেন,—যেখানে তুমি থাক না কেন, সবই ত জানছ, যে অবিচার করেছি তোমার উপরে, তারই প্রতিক্রিয়া এতদিনে সম্ভব হয়েছে; এখন তুমি যদি একটবার নেমে এসে এই সোণার চাবুক নিজের হাতে নিয়ে—গান্ধুলি-বংশের এই অযোগ্য স্বর্ণগর্দভকে শাস্তি দিতে পার, তবেই হয় তার সত্যকার প্রায়শ্চিত্ত!

তৃতীয় পর্ব

বিস্তার

এক

বহির্বাটীতে কর্তার বিশাল খাস-কামরা যেমন সেরেস্টার সম্ভ্রম রক্ষা করত, অন্তঃপুরে রাণীর মহলেও তাঁহার নিজস্ব কক্ষটি অন্তঃপুরিকাদের অহেতুক উল্লাস ও অনর্থক উচ্ছ্বাসকে সংযত করিয়া রাখিত।

প্রায় ত্রিশ ফুট লম্বা একটি সুদীর্ঘ কক্ষ ; তাহার এক ধারে পাশাপাশি অনেকগুলি সোফা, আবাম-কেদারা ; তাহার পরেই একখানি কারু-কার্যখচিত প্রকাণ্ড পালঙ্ক, তাহার উপর পালঙ্কের উপযুক্ত উচ্চাঙ্গের শয্যা আশ্রিত। অন্তরিকটি একেবারে শূন্য, শুধু কক্ষতলটি আগাগোড়া কাপেট-মণ্ডিত। স্থানটি এই ভাবে খালি রাখিবার কারণ কর্তা এখানে প্রায়ই অপূর্ণ ভঙ্গিতে পদচারণা করিয়া থাকেন। কোনও কঠিন বিষয়ের মীমাংসা যখন তাঁহার মস্তিষ্কের মধ্যে আলোড়ন উপস্থিত করে, তখনই কর্তাকে—সুদীর্ঘ গাত দুইখানি পীঠের দিকে আবদ্ধ করিয়া কক্ষের এই অংশটির এক প্রান্ত হইতে অন্য প্রান্ত পর্যন্ত ক্রমাগতই পরিক্রমণ করিতে দেখা যায় এবং এই ভাবে ঘণ্টার পর ঘণ্টা অতিবাহিত হয়, ইহাই তাঁহার চরম অভ্যাস।

কিন্তু এ দিন যেন একান্ত অসহিষ্ণুভাবেই তিনি কক্ষের এই নির্দিষ্ট অংশটির উপর পদচারণা করিতেছিলেন। প্রতি পদক্ষেপের সঙ্গে সঙ্গেই ললাট তাঁহার কুঞ্চিত হইতেছিল, প্রশান্ত মুখখানির সর্বত্রই চিন্তার চিহ্ন স্পষ্ট হইয়া উঠিয়াছিল ; এই কক্ষ এই ভাবে অবিরাম পরিক্রমণ তাঁহার

নূতন নয়, কিন্তু চক্ষু ও মুখের ভঙ্গি অশ্রুনিহিত ভাবের যে আভাস দিতেছিল, তাহা সত্যই অভিনব।

অলিন্দের দিকের দরজার পর্দা ঠেলিয়া মাধুরী দেবী বেশ গস্তীরভাবেই কক্ষমধ্যে প্রবেশ করিলেন। কর্তাও ঠিক এই সময় দ্বারের দিকেই মুখ ফিরাইয়াছিলেন; সহসা চোখোচোখি হইতেই উভয়ের ভাবান্তর উভয়ের চোখেই ধরা পড়িয়া গেল।

কর্তা আশ্চর্যের উদ্দেশ্যে প্রথমেই তৎপর হইয়া কহিলেন,—এত দেরী যে? এক ঘণ্টার উপর হবে আমি তোমাকে ডেকেছি।

সহজকণ্ঠে রাণী কহিলেন,—খবর আমি ঠিক সময়েই পেয়েছি, তবে দেরী ক'রে আসাটা আমার ইচ্ছাকৃতই।

ক্র কুঞ্চিত কবিতা কর্তা রাণীর মুখের দিকে চাহিলেন, সঙ্গে সঙ্গে তাঁহার অজ্ঞাতেই যেন কণ্ঠস্বর তীক্ষ্ণ হইয়া বাহির হইল,—বটে!

রাণী স্পষ্ট স্বরে বিলম্ব করিবার কারণটুকু নির্দেশ করিয়া দিলেন,—বউমার মহলে তিন ঘণ্টার উপর তকরার চলবার পর ঘণ্টাখানেক নিরালাব বিশ্রামের খুবই প্রয়োজন ছিল।

কথাটা কর্তার কানে রসের আভাস না দিয়া বিরক্তির আঘাত দিল; রুক্ষস্বরে প্রশ্ন করিলেন,—কি ক'রে এ খবর এরই মধ্যে তোমার কানে এসে পৌঁছাল?

রাণী কহিলেন,—তুমি যা মনে ক'রে এ কথা জিজ্ঞাসা করছ, তা ভুল; তুমি নিজেই জানো, দরজাব পাহারা বসিয়ে গিয়েছিলে; আর, এ বাড়ীর দাসী-বান্দীদের কারুর ঘাড়ে ছোটো মাথা নেই যে, তোমার হুকুমের এতটুকু নড়চড় করতে পারে।

দৃঢ়স্বরে কর্তা জিজ্ঞাসা করিলেন,—তবে তুমি ওকথা বললে কি স্মৃত্তে শুনি।

ঈষৎ বিজপের স্বরে রাণী উত্তর দিলেন,—আমি যে এ বাড়ীর রাণী,

সমস্তই আমাকে জানতে হয় ; মানুষ না বললেও, বাতাস আমার কানে কানে সব শুনিতে দিয়ে যায় ।

তুই চক্ষু উজ্জ্বল করিয়া তীক্ষ্ণ দৃষ্টিতে কর্তা রাণীর মুখের দিকে চাহিয়া কহিলেন,—ভালো ভালো, কথাটা যেন ভুলে যেয়ো না—এখনি যা বললে । এর পীঠে অনেক কথাই আমাকে তুলতে হবে, এখানেও ক'ঘণ্টা সময় কাটবে তা কে জানে !

কথার সঙ্গে সঙ্গে একখানা সোফার দিকে অগ্রসর হইয়া কর্তা কহিলেন,—কতক্ষণ দাঁড়িয়ে থাকবে তুমি, ব'স ।

রাণী কহিলেন,—আমার বসবার দরকার হবে না, বসেই ছিলাম, তোমার বসাতাই প্রয়োজন হয়েছে, এক ঘণ্টা ধরেই দৌড়াদৌড়ি ক'রে যে কাছিল হয়ে পড়েছ, তা বুঝতে পারছি ।

সোফার কোমল অঙ্কে দেহভার গুস্ত করিয়া কর্তা কহিলেন,—এই একটি ঘণ্টা যে এখানে বিশ্রাম করি নি, এ কথা তা হ'লে স্বীকার করছ বল ?

রাণী গম্ভীর মুখে উত্তর দিলেন,—চাবুকের ঘা পীঠে পড়লে স্থির হয়ে কেউ যে বিশ্রাম করতে পারে না, গায়ের জ্বালায় ছুটোছুটি করে, এ কথা এখন স্বীকার না ক'রে পাচ্ছি না ।

একটা নিশ্বাস ফেলিয়া কর্তা প্রশ্ন করিলেন,—ও ভাবে এ কথা বলবার মানে ?

রাণী মুখের কথায় একটু জোর দিয়াই কহিলেন,—যে ভাবে নিশ্বাস ফেলে কথাটা তুমি বললে, তাতেই বোঝা যাচ্ছে, মানে তুমি বুঝতে পেরেচ । বেশী ক'রে বোঝাতে গেলেই গায়ের জ্বালাটুকু বাড়াবে বই ত নয় !

সন্দিগ্ধভাবে রাণীর মুখের দিকে চাহিয়া কর্তা কহিলেন,—বউমার মহলে আমি গিয়েছিলুম জানা কথা, অনেকক্ষণ সেখানে থাকতে হয়েছিল

আমাকে সবাই জানে ; কিন্তু কি কথাবার্তা আমাদের মধ্যে হয়েছে, যুগাক্ষরে কেউ তার একটি বর্ণও শুনেছে, আমার ত মনে হয় না ; তবে কি সূত্রে তুমি আমাকে খোঁটা দিলে যে—বউমার কথার ঘা বরদাস্ত করতে না পেরেই গায়ের জালায় আমাকে অনেক ছুটোছুটি করতে হয়েছে ?

স্বামীর কথার শেষ দিকে তীব্রতার আভাস পাইয়া রাণী ক্ষণকাল তাঁহার দিকে তীক্ষ্ণদৃষ্টিতে চাহিয়া সহসা কহিলেন,—বউমার সঙ্গে বোঝাপড়া করতে আট-ধাট বেধেই গিয়েছিলে, কিন্তু ফেরবার সময় মুখ, চোখ, গলার স্বর এগুলোকে ত বাঁধতে পার নি, ওরাই যে স্পষ্ট জানিয়ে দিচ্ছে, ঘা খেয়েই ফিরে এসেছ তুমি, গায়ে জালা ধরেছে ।

কথাটা কৰ্ত্তাকে রীতিমত আঘাত দিল, তিনিও প্রতি-আঘাত দিতে অবহেলা করিলেন না ; তীক্ষ্ণ বিদ্রূপের সুরে কহিলেন,—যার পাণ্ডু রোগ হয়, ছনিয়াগুদ্ব সে পাণ্ডুবর্ণ দেখে । কে জন্মে তা জানতে আমার বাকি নেই ; কিন্তু এটা হচ্ছে সমুদ্র, কিছুতেই তাতে না ।

ব্যঙ্গের ভঙ্গিতে একটু তীক্ষ্ণ হাসির ঝিলিক তুলিয়া রাণী কহিলেন,—কল্প নিষ্ফল গর্জন করতেও ছাড়ে না ।

কৰ্ত্তার মুখখানি হঠাৎ গভীর হইয়া উঠিল ; মনে মনে বুঝিলেন, এখানে প্রতিপক্ষ সমকক্ষের দাবী লইয়া প্রতি-উত্তর দিতে কিছুমাত্র বিধা করিবে না ; সুতরাং সন্ধির প্রত্যাশায় তিনি নিজেই কথার সুর নরম করিয়া কহিলেন,—অনুমানের উপর জোর করে কিছু সাব্যস্ত করা ঠিক নয়, তাতে ঠকতে হয় ।

রাণী এ কথায় সায় না দিয়া প্রতিবাদের ভঙ্গিতে কহিলেন,—কিন্তু এ পর্য্যন্ত যা কিছু সাব্যস্ত করা হয়েছে, সবই ত অনুমানের উপর নির্ভর করেই !

বিশ্বয়ের সুরে কৰ্ত্তা কহিলেন,—তাই কি ? এর নজীরও তা হ'লে নিশ্চয়ই আছে ?

রাণী কহিলেন,—অনেক । প্রথম নজীরই ত আমি ।

তুমি !

হা ; শুধু বংশরক্ষার অভিপ্রায়েই যে রাজকন্যাকে ধরে আনা হয় নি, সে তুমিও জান, আমিও জানি ; এর পেছনে ছিল একটা উচুদরের অনুমান ।

বটে !

এক ডিলে দুটো পাখী শিকার করবার অনুমান কেনই তুমি নেচে উঠেছিলে !

বল কি !

আরও স্পষ্ট করেই বলছি ; তোমার অনুমান ছিল, মেবারের রাণা গাজসিংহের মত একটা কীর্তি অঙ্কন করা, আর আমার বাবা সরকার-ঘেসা ব'লে তাঁকে জনিয়ে দেওয়া—ওর কোনও দাম নেই ।

কোতুল্লাবিষ্টে হইয়া কর্তা রাণীর দিকে কিছুক্ষণ চাছিল, বহিলেন, তাহার পর একটু হাসিয়া কহিলেন,—এত কাল পরে এত বড় একটা তবু তুমি আবিষ্কার ক'রে ফেলেছ ! কিন্তু এর আগে ত কোন দিন এ সম্বন্ধে কোন কথাই আমাকে বল নি ।

রাণী গাঢ়স্বরে কহিলেন,—বলবার ত প্রয়োজন এ পর্য্যন্ত হয় নি । কথার পীঠে কথা উঠতেই আমাকে বলতে হ'ল যে, অনুমানের উপর নির্ভর করেই যত কিছু গুরুতর ব্যাপারেই তুমি মাথা দিয়েছ । একটা নজীর ত দেখালুম, আরও অনেক আছে ।

কর্তা কহিলেন,—থাক, আর গুনিয়ে কাজ নেই । বাজে কথায় আমরা কাজের কথা থেকে তফাতে এসে পড়েছি । যে জন্ম তোমাকে ডেকেছি, সে সম্বন্ধে কোন কথাই এখনও হয় নি । কিন্তু তুমি বসবে না ?

রাণী কহিলেন,—না, বসলে তোমার সঙ্গে কথায় আমি পেরে উঠব

না ; আমি বেশ বুঝতে পারছি, ও মহলে যা খেয়ে আমার উপরে তার শোধটা তুলবে বলেই তুমি তৈরী হয়ে এসেছ ।

আবার ঘুরিয়ে ফিরিয়ে ঐ কথাই তুমি টেনে আনছ !

ঐ কথা ছাড়া নতুন কোন কথা সত্যই কি তোমার বলবার আছে ? আমার ত মনে হয় না ।

তোমার মনের কি ধারণা, তাই শুনি !

এ বাড়ীতে এসে অবধি কাজের কোন কৈফিয়ৎই আমাকে দিতে হয় নি, তার তলবও আসে নি, প্রয়োজনও দেখা দেয় নি । সেই কৈফিয়ৎ আজ আমাকে দিতে হবে । আমার এই ধারণা কি অমূলক ?

উচ্ছ্বাসের সুরে কষ্ঠা কহিলেন,—চমৎকার ! কিন্তু আমি ভেবে পাচ্ছি না, তারিফ করব কার ? বোমাও অসময়ে তাঁর মহল্লার আমাকে দেখেই বলেছিলেন, আমি তাঁর বিচার করতে এসেছি । তুমিও আমার তলব পেয়েই সাব্যস্ত ক'রে নিষেছ—তোমার কাজের কৈফিয়ৎ নিতেই ডেকেছি ।

স্বামীর এই উচ্ছ্বাসে ক্রম্বেপ না করিয়াই সহজকণ্ঠে রাণী কহিলেন,— আমি প্রস্তুত হয়েই এসেছি । তোমার যা কিছু জিজ্ঞাসা করবার আছে, তার কাজ আরম্ভ করতে পার, আমার পক্ষ থেকে কিছুমাত্র অবহেলা হবে না ।

কষ্ঠা কণ্ঠের স্বরটুকু কৃত্রিম সহানুভূতিতে গাঢ় করিয়া কহিলেন,— তোমার বখন এত জেদ, তখন তোমার মুখ-রক্ষায় আমার পক্ষ থেকেও অবহেলা করা কিছুমাত্র উচিত নয় । হাঁ, ভাল কথা, গোড়াতেই যে কথাটা তুমি জোর ক'রে বলেছিলে, হঠাৎ মনে পড়ে গেল,—এ বাড়ীর তুমি রাণী, সবই তোমাকে জানতে হয়, বাতাস তোমার কানে কানে সব কথাই শুনিতে দিয়ে যায় ;—এই কথাগুলিই ঠিক বলেছিলে না ?

রাণী দুই চক্ষু মেলিয়া মুহূর্তের জন্য স্বামীর মুখের দিকে চাহিলেন,

পরক্ষণেই দৃষ্টি ফিরাইয়া কহিলেন,—এ সব কথা তোলবার কোনও প্রয়োজনই ছিল না, মুখের কথা অস্বীকার করবার শিক্ষা কখনও পাই নি।

কর্তা কহিলেন,—তা আমি জানি, আর এ জন্ম কতবার প্রশংসা করেছি, তুমিও তা জান। তবে ঐ কথাটা এক্ষেত্রে তোলা কতকটা সংস্কারের মতই; আদালতে হাকিমের সামনে অতি বড় সত্যবাদীকেও যেমন হালপ করতে হয়! হ্যাঁ, এবার কাজের কথাই হোক। সত্যিই, চারদিকের অবস্থা এমনই তালগোল পাকিয়ে উঠেছে যে, কতকগুলো খবর না নিয়ে আমার আর নিষ্কৃতি নেই।

কথাগুলি শেষ করিয়াই কর্তা তীক্ষ্ণ দৃষ্টিতে রাণীর মুখের দিকে চাহিলেন; কিন্তু রাণীর নিকট হইতে কোনও উত্তর পাওয়া গেল না।

কর্তা পুনরায় কহিলেন,—একটু আগেই তুমি আমার সম্বন্ধে বলেছ, রাজস্থানের রাজসিংহের মত বাহবা নেবার জন্মই আমি তোমাকে বিবাহ করেছি, আরও একটা অপবাদ চাপিয়েছ, সে কথা এখন থাক, প্রথমটার কথা ভুলেই বলছি, সব দিক দিয়ে বিবেচনা করলে সবাই এ কথা বলবে যে, কাজটা ঠিক অন্তায় করি নি, আর ঐ কাজটুকু শেষ করতে ত্যাগ-স্বীকারও বড় অল্প করতে হয় নি। এখন এ সম্বন্ধে এইমাত্র বিচার্য্য যে, আমি তোমাকে অবহেলা করেছি কি না!

রাণী মন্বস্পর্শী স্বরে কহিলেন,—এ অভিযোগ ত আমি কোনও দিন করি নি, বরং আমি মুক্তকণ্ঠেই বলব, বিবাহের পর তুমি আমাকে যে মর্যাদা দিয়েছ, তা সামান্য নয়; তোমার সংসারে আমাকে সর্বময়ী করেছ তুমি। যে অধিকার আমি পেয়েছি, আর সেই সূত্রে সংসারের সকলের ওপর এ পর্য্যন্ত যে ক্ষমতা চালিয়ে এসেছি, একটি দিনের জন্মও তুমি তাতে প্রতিবাদ তোল নি, কোন বাধাই দাও নি।

রাণীর কথাতেই নিজের বক্তব্য বিষয়ের সূত্রটুকু পাইয়াই কর্তার

মুখখানি মুহূর্তের জন্য হর্ষোৎকল্ল হইয়া উঠিল, উৎসাহের সুরে তৎক্ষণাৎ কহিলেন,—বেশ ! খুসী মনেই যে ভাবে তুমি ক্ষমতা পাওয়াটার কথা বললে, সেই পাওয়া ক্ষমতাটুকুও তুমি ওজন ক’রে সবার ওপর চালিয়ে এসেছ—এ কথা জোর ক’রে বলতে পারবে ?

স্বামীর এই অপ্রত্যাশিত কঠোর প্রশ্নটি মুহূর্তের জন্য যেন রাণীকে স্তব্ধ করিয়া দিল ; কিন্তু পরমুহূর্তেই তিনি এই আঘাতটি একেবারে অগ্রাহ করিয়াই দৃষ্টকণ্ঠে কহিলেন,—এ কথার উত্তর দেবার আগে আমি জানতে চাই, ক্ষমতা দেবার সময় সেটা প্রয়োগ করবার কোনও নির্দেশ আমাকে দিয়েছিলে ?

সেটা কেউ দেয় না।

দেয়। অন্যের কি কথা, শুনেছি, বড়লাটকে এ দেশে পাঠাবার আগে বিলেতের কর্তারা ক্ষমতা চালানো সম্বন্ধে রীতিমত তালিম দিতে ভোলেন না। তোমার জমিদারীর কোনও মহালে যখন নতুন নায়েব বহাল করা হয়, তাকেও কি কোনও নির্দেশ দাও না—কি ভাবে সে প্রজাপালন করবে, তার ক্ষমতার এজ্জিয়ার কতখানি ?

স্বীকার করলুম, তোমাকে কোনও নির্দেশ দেওয়া হয় নি ; তুমি যেখানে সহধর্মিণী, সংসারের গৃহিণী, সেখানে তোমার ক্ষমতা নিয়ন্ত্রিত করা আমি নিশ্চয়োজন মনে করেছিলুম। কিন্তু তোমারও ত কর্তব্য তাতে যথেষ্ট ছিল !

নিশ্চয়ই। কর্তব্য যদি অবহেলা হ’ত আমার পক্ষ থেকে, তা হ’লে গোড়াতেই ঝড় উঠত ; এতগুলো বছর নিরুদ্বেগে কাটবার পর আজ হঠাৎ কৈফিয়তের তলব আসত না।

তা হ’লে কেন তুমি বলতে কুণ্ঠিত হচ্ছ যে, সংসারের সবার ওপরেই তুমি ওজন ক’রে তোমার ক্ষমতা চালাতে দ্বিধা কর নি।

অনর্থক মিথ্যা ব’লে ত কোনও লাভ নেই। নিজের ওজনে সব

কর্তব্য পালন করা চলে না, বিধাতার সৃষ্টিতেও তারতম্যের অন্ত নেই, মানুষ সবাই সমান হয় না, চেহারায় স্বভাবে কত তফাতই দেখা যায়, একটা হাতের পাঁচটা আঙ্গুলই সমান নয় ; কাজেই কি ক'রে আমি বলতে পারি যে, সবার ওপরে ওজন করেই আমার ক্ষমতা চালিয়েছি ।

এ কথার উত্তরে আমি যদি বলি, তা হ'লে তুমি ক্ষমতার অপব্যবহার করেছ ; যারা চালাক, তারা তোমার তোষামোদ ক'রে তোমাকে ঠকিয়ে তাদের সুবিধে গুছিয়ে নিয়েছে, আর যারা বোকা, তোমার মন যোগাতে পারেনি, তারা বরাবরই অসুবিধে ভোগ করেছে, নিজেরা ঠকেছে ?

গুরুত্তর অভিযোগ । কর্তা ভাবিয়াছিলেন, বোমা এবার সশব্দে বিদীর্ণ হইবে ও সঙ্গ সঙ্গ একটা কদর্য্য আবহাওয়ার আবর্ত বহিবে । কিন্তু রাণীর ধৈর্য্য কিছুমাত্র ক্ষুণ্ণ হইল না, বা তাঁহার কণ্ঠস্বরে তীব্রতার কোনও আভাস পাওয়া গেল না । সহজ কণ্ঠেই তিনি স্বামীর এই কঠোর মন্তব্যের উত্তরে কহিলেন,—সংসারের সকল ক্ষেত্রেই আবহমানকাল থেকে এই যোগাযোগ চ'লে আসছে । যারা চালাক তারা জেতে ; যারা বোকা তারা ঠকে । ইতিহাসেও এর নজীর আছে ।

কর্তা বিস্ময়ের সুরে কহিলেন,—তুমি যে দেখছি মস্ত মস্ত কথা ভুলে আমাদের কথাটাকে গুলিয়ে দিতে চলেছ !

রাণী মৃদু হাসিয়া কহিলেন,—মস্ত বস্ত জলের ওপর জোর ক'রে পড়লেই জল গুলিয়ে ওঠে ; সত্যকে খাটো ক'রে আমি ত তোমার মন যোগাতে বসি নি, মনের মস্ত কথাটাই সাহস ক'রে খুলে বলেছি ।

কর্তা ক্রুদ্ধিত করিয়া কহিলেন,—তা হ'লে এ বাড়ীতে যারাই তোমার সো হ'তে পারে নি, তুমি তাদের সকলকেই কোণঠাসা করে রেখেছ বল ?

রাণী সুস্পষ্ট স্বরে উত্তর দিলেন,—আমার মত অবস্থায় যে কোনও মেয়ে পড়ত, এ কাজটুকু না করলে তার নিকৃতিই ছিল না । এ বাড়ীতে

এসেই আমি দেখলুম, বাড়ীপুত্র সকলেই আগেকার রাণীর নামেই পাগল, তাঁর তুলনায় আমি যে কত ছোট, তার প্রমাণ করতে তাদের চেষ্টার অন্ত নেই। কাজেই আমারও প্রথম কাজ হল, আমার সেই স্বর্গীয়া সতীনের স্মৃতিটুকু পর্য্যন্ত মুছে ফেলা আর আমি যে তার চেয়ে সব দিক দিয়ে বড়, সেটা সব দিক দিয়ে প্রমাণ করা। আমার হাতে যখন এত ক্ষমতা, আমার কর্মক্ষেত্রে আমি যখন কর্ত্রী, নিজেকে প্রতিষ্ঠা করবার সুযোগ কেন নষ্ট করব !

নিজের অজ্ঞাতেই কর্ত্রী যেন মনে মনে চমকিত হইয়া উঠিলেন। এতকাল বিবাহ হইয়াছে, কিন্তু সচধর্ম্মিণীর সহিত এভাবে কোনও দিন তাঁহার কথোপকথন হয় নাই, এমন সুস্পষ্টভাবে রাণী কোনও দিন তাঁহার মনের কথাগুলি ব্যক্ত করেন নাই। কিছুক্ষণ বদ্ধ দৃষ্টিতে তিনি রাণীর মুখের দিকে তাকাইয়া রহিলেন, তাহার পর জোরে এক নিশ্বাস তাগ করিয়া কহিলেন,—হঁ ! আচ্ছা, এবার একটা শব্দ কথাই আমাকে তুলতে হচ্ছে ; খোকার সম্বন্ধেও কি তুমি ও ক্ষমতা বরাবর চালিয়ে এসেছ ? সতীনের স্মৃতি পর্য্যন্ত মুছে ফেলতে যখন তুমি চেষ্টার ক্রটি কর নি, সেই সতীনের ছেলেটিও কি তা হ'লে—

স্বর এখানে ভাবের উচ্ছ্বাসিত আবর্তে রুদ্ধ হইয়া গেল, স্মৃতি দুইটি চক্ষু রাণীর মুখের দিকে তুলিয়া নিবিষ্টভাবে তিনি চাহিয়া রহিলেন, শীকরসিক্ত তারকা দুইটিই যেন অসমাপ্ত কথাগুলি ব্যক্ত করিয়া দিল।

রাণী অবিচলিত কণ্ঠে কহিলেন,—খোকার কথা বলছ ? কি সম্বন্ধে তোমার এই প্রশ্ন ? তাকে আত্তি-বত্ত করবার, মানুষ ক'রে তোলবার, না আর কিছু ?

কর্ত্রী অভিভূতের মত কহিলেন, আমি কথাটার খেই হারিয়ে ফেলছি ক্রমাগতই, কোন্ কথাটা আমি জানতে চাই, সেটা আমি না বলেই

তোমাকে জানাচ্ছি, তুমি তার সম্বন্ধে সবই বখন জান, তোমার ঘেটুকু বলবার আছে, তার সম্বন্ধে তাই বল ।

রাণী কহিলেন,—সংসারের ভার আমার ওপর যতটা বিশ্বাস ক'রে তুমি দিয়েছিলে খোকার ভার ত সে ভাবে আমাকে দাও নি, বরং ওদিক দিয়ে আমাকে অব্যাহতি দিয়ে তোমার আগেকার রাণীর দাসীদের হাতেই তাকে সমর্পণ করেছিলে ।

হা,—এ কথা আমি অস্বীকার করছি না । সপত্নীপুত্রের ঝগড়াট সহ করতে যদি তুমি বেজার হও, সেই জগুই আমি তোমাকে অসুবিধায় ফেলি নি ।

শুধু তাই কি ? কিন্তু আমার মনে হয়, বিমাতার হাতে পড়ে পাছে খোকার অনিষ্ট হয়, এই আশঙ্কাতেই আমাকে অবহেলা করা হয়েছিল । আমিও ভেবেছিলুম, সেটা বিধাতারই আশীর্বাদ । কেন না, খোকার ভার যদি আমাকেই দিতে, আর আমি প্রসন্ন হয়েই তাকে কোলে তুলতুম, তা হ'লে আজ সে জড়ভরতের মত অকর্ষণ্য হয়ে প'ড়ে থাকত না ।

কিন্তু তবুও কি তার দিকে রূপার দৃষ্টিতে চাওয়াটা তোমার উচিত ছিল না ?

না । প্রথম দিকে আমি অভিমান করেই তার দিকে চাই নি, তার পর নিবারণ আসতে তার দিকেই আমাকে পূরোপুরিই চাইতে হয়েছিল । বড় হতে সবাই বখন বললে, খোকা, একেবারে নীরেট, বুদ্ধিশুদ্ধি কিছু নেই, লেখাপড়া হবে না, আর নিবারণের সুখ্যেত তাদের মুখে ধরে না, তখন বোধ হয়, আমার মত খুসী আর কেউ হয় নি ।

আর্তস্বরে কর্তা কহিলেন,—তুমি শুনে খুব খুসী হয়েছিলে ?

মৃদু সুরে রাণী কহিলেন,—অত্যন্ত ব্যথা পেয়েছিলুম—এই কথাটা মিছে বানিয়ে বললে তুমি হয় ত খুসী হবে ; কিন্তু আমি অকপটেই সত্যই

বলছি। আর, কেনই বা খুসী হব না? আমি ত মানুষ, খুব বেশী বে লেখাপড়া শিখে তত্ত্বজ্ঞান পেয়েছি, তাও নয়, রক্ত-মাংসের শরীর আমার, ষোল আনা স্বার্থ নিয়ে সম্বন্ধ। সন্তানের ছেলে যাচ্ছেতাই হ'লেই আমার ছেলের অদৃষ্ট যখন খুলে যাবে, বাস্তবীর গদীতে সে-ই বসবার যোগ্যতা পাবে, মায়ের পক্ষে এর চেয়ে খুসীর কথা আর কি থাকতে পারে? তবে এ কথা স্বীকার করবই, গল্প-উপন্যাসের সংমাদের মত ঐ কাঁটাটাকে ভাঙ্গবার বা তোলবার কোনও চেষ্টাই যেমন করি নি, তেমনই তাকে শাণাবারও কোনও বড়ই এ পর্য্যন্ত নিই নি, ভোঁতা হয়েই যাতে বরাবর প'ড়ে থাকে, সেইটুকুই ছিল আমার আগ্রহ। এতে আমাকে তোমরা স্বার্থপরই বল, বা এই নিয়ে যে কোনও অপবাদই আমার ওপর চাপাও, আমি বরাবর জোর ক'রে ব'লে যাব—সন্তানের স্বার্থের দিকে চেয়ে আমি আমার কর্তব্যই করেছি।

অসহিষ্ণুভাবে কঠা কহিলেন,—আর যাকে বঞ্চিত করতে তুমি এই অনাচার করেছ, সেও কি তোমার সন্তান নয়?

রাণী কণ্ঠস্বরে রীতিমত জোর দিয়া কহিলেন,—না। কাগজে, কেতাবে যেমন পড়া যায়—আমি মা, দেশময় আমার অসংখ্য সন্তান, এও ঠিক তাই! বাইরে থেকে শুনতেই ভাল, স্বার্থের সংশ্রবে এলেই গোল বাধে। সন্তানের মমতা নিয়ে আজ তুলছ তুমি সমস্তা, কিন্তু গোড়ায় বিশ্বাস করতে পার নি, তখন ছিলুম আমি বিমাতা! ব্যবধানের প্রাচীর তুলেছিল কে? অথচ, নিজেও ছিলে দিব্যি নিশ্চেষ্ট, একেবারে নির্বিকার! তারপর, নিজেই বরাবর নিবারণকে প্রাধান্য দিয়েছ, নিজেই স্বীকার করেছ কতবার—সেই গদীতে বসবে। অথচ—

বিকৃতকণ্ঠে কঠা কহিলেন,—খামলে কেন, বল; তোমার কথাটা ত এখনও শেষ হয় নি।

রাণী উচ্ছ্বাসের সুরে কহিলেন,—সে মত এখন বদলে গিয়েছে। যে

দিন কবরেজের মেয়েকে প্রথম দেখেছিলে, তার হাতের জোর দেখে নেচে উঠেছিলে এ বংশের বউ করতে, সে গরীবের মেয়ে ব'লে আমি রাজী হই নি—অমনি রোখ তোমার চেপে গেল, আর এত কাল পরে হঠাৎ খোকার জন্তে বুক অমনি টন্টন্ ক'রে উঠল ! এখন নিবারণ হয়েছে যাচ্ছেতাই ; দিনরাত স্বপ্ন দেখছ, বউ তোমার ইঞ্জিন হয়ে ঐ গাধাবোটখানাকে টেনে নিয়ে জমিদারী দরিয়ার কিনারায় ভিড়িয়ে দেবে ! এই স্বপ্নে বিভোর হয়েই তুমি থাক, আর যে কৈফিয়ৎ আমি দিলুম, যদি আমার দোষ তাতে থাকে, শাস্তির ব্যবস্থা স্বচ্ছন্দেই করতে পার, আমি তার জন্তে প্রস্তুত হয়েই এসেছি ।

রাণীকে এবার উত্তেজিত দেখিয়া কর্তা বিক্রপের ভঙ্গীতে কাহিলেন,—
এঃ ! সেই মামুলী রাস্তাতেই শেষটায় গড়িয়ে পড়লে তুমি ! শাস্তির কথাও ওঠে নি, আর বোমার কথা আমি মোটেই তুলি নি, তুমি খামকা সেই ভদ্রলোকের মেবেকে টেনে মামলাটা ভারী করতে চাইছ ! তা হ'লে বেশ বোঝা যাচ্ছে, এখন বোমাই হ'বে দাঁড়াচ্ছেন তোমার প্রতিদ্বন্দ্বিনী !

রাণী শ্লেষের সুরে উত্তর দিলেন,—এটা আমার দুর্ভাগ্য ছাড়া আর কি বলি !

কিন্তু এই ব্যাপারটাকে ঘুরিয়ে সোভাগ্যের বিষয় ক'রে নেওয়া যায় না ?

কি সূত্রে শুনি ?

এই মুখরা মেয়েটিকে মায়ের স্নেহে তোমার কোলে টেনে নিয়ে ?

উদ্দীপ্তকণ্ঠে রাণী কাহিলেন,—তা হয় না, কিছুতেই না । এমন অহুরোধ তুমি যেন দ্বিতীয়বার আমাকে আর ক'র না । তার চেয়ে তোমার জড়ভরত খোকাটিকে যদি ওর কাঁধেই ভর দিয়ে বাগুলীর গদীতে বসাতে চাও, তাতেও আমার আপত্তি নেই, বাধা দিতে একটি কথাও আমি বলব না ।

গম্ভীরমুখে কর্তা প্রশ্ন করিলেন,—কিন্তু নিবারণকে ঠেকাতে পারবে ?

দৃপ্তকণ্ঠে রাণী উত্তর দিলেন,—আমি তাকে জোর ক’রে টেনে আনব, বেঁধে রাখব—

তারপর ? বরাবর এই মেয়েটির প্রভুত্ব সহিতে পারবে ?

সে ভাবনা পরে ! তোমার আর কিছু জিজ্ঞাসা করবার আছে ?

কণ্ঠ পরিষ্কার করিয়া সুস্পষ্টস্বরে কর্তা কহিলেন,—তুমি যে কথাগুলো এইমাত্র বললে, তার প্রতিবাদ করবার আছে। তুমি নিশ্চয়ই জান, বাসুদেবীর গদীতে এ পর্যন্ত গাঙ্গুলী-বংশের কোনও ছেলে অত্র বংশের কোনও মেয়ের কাঁধে ভর দিয়ে বসে নি ; জ্যেষ্ঠের অধিকারে ওখানে একান্তই বসতে যদি হয়, খোকাকেই বসতে হবে ; কিন্তু তার আগে মানুষ হবার যোগ্যতাটুকু অর্জন করতে না পারলে ওটা তার পক্ষে দুর্ভাগ্য ছাড়া কিছু নয়।

রাণী স্তব্ধভাবেই কথাটা শুনিলেন। কিছুক্ষণ কাহারও মুখে কথা নাই ! কর্তা একবার অপাঙ্গে রাণীর মুখের দিকে চাহিলেন, পরক্ষণে সমবেদনা উদ্ভেকের ভঙ্গিতে কোমলকণ্ঠে কহিলেন,—তুমি এ ভারটুকু নিতে পার না ? যে কোনও কারণেই হোক, যে অবহেলা তার সম্বন্ধে তার শৈশবের অসহায় অবস্থায় আমাদের পক্ষ থেকে হয়ে গেছে, এখন কি সেটা শুধরে নেওয়া যায় না ?

ক্ষণকাল মনে মনে কি ভাবিয়া রাণী স্নিগ্ধস্বরে উত্তর দিলেন,—যদি সম্ভব হ’ত, তোমার এ অনুরোধ আমি মাথা পেতে নিতুম, কিন্তু এখন তা হবার নয়। পাথরকে চেষ্টা ক’রে চালানো যায়, কিন্তু জানানো যায় না।

মুখে উৎফুল্লের ভাব প্রকাশ করিয়া জোরকণ্ঠে কর্তা কহিলেন,—ঠিক ! এটা সম্ভব কি না, জানবার জন্মই তোমাকে ডেকেছিলুম, আর

এই স্বত্রে এত বাজে কথার বৃথা চর্চা করা গেল। কিন্তু আমি এই আসল তত্ত্বটুকু না বুঝেই নিজের খেয়ালে ঐ মেয়েটিকেই অগতির গতি ভেবে ওর হাতে আমার বড় সাধের সোণার চাবুকটি তুলে দিয়েছিলুম।

মুহূর্ত্তে রাণী কহিলেন,—সে কথা শুনেছি।

স্বর এবার দৃঢ় করিয়া উচ্ছ্বাসের সহিত কৰ্ত্তা কহিলেন,—কিন্তু আজ সে চাবুকটি ফিরিয়ে দিয়েছে আমাকে, বলেছে, পাথরকে জাগাতে মানুষের মনের পরশই যথেষ্ট, সোণার সংস্রবের দরকার হয় না। আমি এ কথার উত্তরে কি সাব্যস্ত করেছি, শুনতে চাও ?

জিজ্ঞাস্নয়নে রাণী কৰ্ত্তার মুখের দিকে তাকাইতেই তিনি উত্তেজিত-কণ্ঠে গাঢ়স্বরে কহিলেন,—তার বিরুদ্ধে যে সমস্ত নালিশ আজ পর্য্যন্ত এসেছে, আমি সব মূলতুবী রেখেছি শুধু তার দিকে চেয়ে, যদি ঐ পাথরটাকে সে জাগাতে পারে, তার সাত খুন মাপ, সকলের ওপরে হবে তখন তার স্থান ; কিন্তু যদি হারে, তা হ'লে ঐটিকে অবলম্বন করেই তাকে শ্যামাপুরে ফিরে যেতে হবে। বাক্যে বলে—পুনর্মুখিকো ভব !

কথাটা শেষ হইতেই কৰ্ত্তার ওষ্ঠপ্রান্তে হাসির একটা তীক্ষ্ণ ঝলিক দেখা দিল, সে হাসিটুকু প্রথর বিদ্যাতের মতই তীব্র। রাণী অপলকনেত্রে স্বামীর সেই বিচিত্র মুখখানির দিকে চাহিয়া রহিলেন।

চতুর্থ পর্ব

বিকর্ষণ

এক

বাঙালী গ্রামখানি সৌন্দর্য্যময়ী সমৃদ্ধ নগরীর ন্যায় অশ্রান্ত বিষয়ে সৌষ্ঠবসম্পন্ন হইলেও, কোনও নদীর শ্রোতোধারায় অভিমুক্ত হইবার সুযোগ তাহার ছিল না। তবে এইটুকুই গ্রামবাসীগণের সাঙ্কনার বিষয় ছিল যে, পার্শ্ববর্তী দশ বারোখানি গ্রামের পরেই যে নদীটির অস্তিত্বের পরিচয় পাওয়া যায়, তাহা শ্রোতস্থিনী সরস্বতী এবং এ-অঞ্চলের ভূস্বামীর মতই তাহার প্রভাব ও প্রকৃতি অতিশয় প্রখর। উপরন্তু নদীর সংস্রবগত অভাবটুকু কথঞ্চিৎ মোচন করিতে বাঙালীর বাবুরা বিপুল অর্থবাবে এই বেগবর্তী নদীটির একটি শাখা খালের আকারে বাঙালীর প্রান্ত দিয়া বিস্তীর্ণ জমিদারীর সীমান্তবর্তী আর একটি নদীর সহিত সংযোগ করিয়া দিয়াছিলেন এবং নদীর মোহনায় এক গগনস্পর্শী বিশাল ভবন তুলিয়া তাহার নামকরণ করিয়াছিলেন—বাঙালী-কানন।

বাঙালী হইতে প্রায় পনেরো মাইল তফাতে সরস্বতীর কূল ঘেঁসিয়া এই উদ্যানভবন। বর্ষার প্রবল বন্যা ও জোয়ারের জলোচ্ছ্বাসে তীরভূমির ভাঙ্গন রক্ষা করিতে অনেকটা স্থান ব্যাপিয়া কেল্লার গম্বুজের আকারে সুদৃঢ় ও সুদৃশ্য প্রাকার এই বিশাল উদ্যানভবনটির বৈশিষ্ট্যের পরিচয় দিয়া থাকে। এই অল্পপাতে উদ্যানের রচনা-বৈচিত্র্য, দুর্মূল্য ও দুপ্রাপ্য নানাজাতীয় পুষ্প ও তরুরাজির সমন্বয়, উদ্যান-সংলগ্ন প্রাসাদোপম অট্টালিকার শোভা, এবং প্রাসাদ-কক্ষগুলির আড়ম্বরপূর্ণ সজ্জা ও সৌন্দর্য্য সহজেই অনুমের।

কিন্তু বৎসরের অধিকাংশ কালই এই অতুলনীয় প্রাসাদের বিবিধ আসবাবপত্রে সুসজ্জিত কক্ষগুলি শূন্যই পড়িয়া থাকে। কোনও কোনও বৎসর গ্রীষ্মের সময় খোদ জমিদার সপরিবার এখানে কয়েক সপ্তাহ অবস্থিতি করেন; সে সময় এই অঞ্চলটি জমকাইয়া উঠে ও অধিবাসিগণ সাগ্রহে তাহাদের ভূস্বামীর দীর্ঘ স্থিতি কামনা করে। কিন্তু সকল বৎসরেই হুজুরের শুভাগমন সম্ভবপর হয় না। এ বৎসরও হয় নাই।

তবে কয়েক বৎসর হইতে প্রায় প্রতি ঋতুতেই ছোট হুজুর—খোকা রাজাকে অস্থায়িতাবে বাগুলী-কাননে সপারিষদ ছই এক অহোরাত্র অতিবাহিত করিতে দেখা যাইতেছে বটে। কিন্তু ইহাতে এই অঞ্চলের বাসিন্দারা বিশেষ উৎকল হইতে পারে নাই। কেন না, যত বড় রাণভারি হউন না কেন, এবং বাগুলীর সদরে বড় হুজুরের দর্শনলাভ দুর্লভ হইলেও, এখানে তাহার সম্পূর্ণ ব্যতিক্রম দেখা যাইত। এখানকার সদরে বড় হুজুরের সম্মুখে কেহ একবার সাহসের সঞ্চিত আসিয়া দাঁড়াইলে, সেই নৃপতুল্য মানুষটির স্নেহলাভে বঞ্চিত হইত না। কিন্তু ছোট হুজুরের প্রকৃতি ছিল ইহার সম্পূর্ণ বিপরীত; কেহ দর্শনার্থী হইলেই সাব্যস্ত করিয়া ফেলিতেন যে, সেরেস্ভার সুযোগটুকু এখানেই লইবার উদ্দেশে তাহার এই স্পর্ধা; সুতরাং এই সূত্রে সাক্ষাৎকারীর লাঞ্চার অন্ত থাকিত না। শুধু প্রজারাই নহে, প্রাসাদের পরিচারক ও দ্বারবানুগণ ছোট হুজুরের আবির্ভাব হইলেই আতঙ্কিত হইয়া পড়িত; তাহারা জানিত, দোষ ত' দূরের কথা, সামান্য একটু ভুলচুক হইলেও তাহাদের নিষ্কৃতি নাই, কঠিন দণ্ড অনিবার্য। সুতরাং সকলেই ভগবানের নিকট নিয়ত ছোট হুজুরের আশু অপসারণের প্রার্থনাটুকু না জানাইয়া পারিত না।

কিন্তু ইহাদের কাতর প্রার্থনা এবার শ্রীভগবানের কানে গিয়া পৌঁছায় নাই। যেহেতু, প্রায় তিনটি মাসের উপর আট দশটি সহচরের সহিত ছোট হুজুর নিবারণবাবু বাহাল তবিরতে বাগুলী-কাননে কায়েমী ভাবেই

বসবাস করিতেছেন। সদরের সেরেস্টার কাজকর্ম ছাড়িয়া এখানে এভাবে তাঁহার দীর্ঘ অবস্থিতির মূলে অবশ্য বড় হুজুরের মঞ্জুরী ছিল এবং বিচক্ষণ গৃহ-চিকিৎসকের সহায়তায় বিশেষভাবে তদ্বির করিয়া ছোট হুজুরকে সেই মঞ্জুরীটুকু আদায় করিতে হইয়াছিল। কিন্তু ইহার মূলে অতি বিচক্ষণ মস্তিষ্ক-প্রসূত যে গূঢ়তর উদ্দেশ্যটুকু নিহিত ছিল, বাণুলীর বহুদর্শী বড় হুজুরের সদাসন্দিগ্ধ চিত্তেও তাহার রেখাটি পর্য্যন্ত পড়ে নাই।

এই সূত্রে ছোট হুজুরের নূতন সহায়ক এই বিচক্ষণ গৃহ-চিকিৎসক এম, বি উপাধিধারী বিশ্বমিত্র মজুমদার নামক নূতন জীবটির পরিচয় একান্ত প্রাসঙ্গিক।

বাণুলীর খাল ও সরস্বতা-কাননের মত বিপুল ব্যয়ে এক সুবৃহৎ হাসপাতাল প্রতিষ্ঠা ও সুপ্তভাবে তাহা পরিচালনার ব্যবস্থা করিয়া গাঙ্গুলীবাবুরা স্থায়ী কীৰ্ত্তি সঞ্চয় করিয়াছিলেন। সরকারী কার্য হইতে অবসরপ্রাপ্ত কোনও প্রবীণ সিভিল সার্জন উচ্চ বেতনে নিযুক্ত হইয়া হাসপাতালটি পরিচালনা করিতেন এবং গাঙ্গুলী-পরিবারের স্বাস্থ্যরক্ষা সম্বন্ধেও তিনিই অবাহিত থাকিতেন। দুই বৎসর পূর্বেও বিখ্যাত সিভিল-সার্জন অমরনাথ ব্যানার্জী বাণুলী হাসপাতালের সর্বময় কর্তা ছিলেন। তাঁহার প্রায় দশবর্ষব্যাপী সাধনায় ও আধুনিক পরিকল্পনায় শুধু এই হাসপাতাল কেন, এই অঞ্চলের স্বাস্থ্যসংক্রান্ত বিবিধ উন্নতি-বিধানের পরিচয় পাওয়া যায়। চিকিৎসায় তাঁহার যেমন হাত-যশ ছিল, সকল শ্রেণীর রোগীর প্রতি ব্যবহারটিও ছিল তেমনই সুন্দর। জনসাধারণ শ্রদ্ধাসহকারে তাঁহার নামকরণ করিয়াছিল—ধনুস্তরি দেবতা। এই দেবতাটিই একদা দয়া-পরবশ হইয়া ডাক্তার বিশ্বমিত্র মজুমদারকে তাঁহার সহকারীরূপে অস্থায়ীভাবে হাসপাতালের কার্যে নিৰ্ব্বাচিত করেন। সে সময় সহসা কলেরা করাল মূৰ্ত্তি ধরিয়া এই অঞ্চলে সংহার-লীলা আরম্ভ করিয়া দেয় ; ক্যাষেলের পাশ যে ডাক্তারটি তাঁহাকে সাহায্য করিতেন,

ডাক্তার অমরনাথ তৎকালে তাঁহার উপর সম্পূর্ণ নির্ভর করিতে পারেন নাই ; অস্থায়িতাবে এক জন বিচক্ষণ চিকিৎসক নিয়োগের জন্য সংবাদপত্রে বিজ্ঞাপন দেন এবং তাহাতে কয়েক দিনের মধ্যেই শতাধিক উপাধিধারী ডাক্তারের আবেদনপত্র তাঁহাকে বিব্রত করিয়া তুলে। ঠিক সেই সন্ধিক্ষণে কলিকাতা মেডিকেল কলেজের মেডেল, ডিপ্লোমা, এবং পাঞ্জাব প্রদেশের কতিপয় নামজাদা চিকিৎসা-প্রতিষ্ঠানের সার্টিফিকেট ও কয়েক জন নামী নেতার সুপারিশপত্রসহ বাণুলীর হাসপাতালে ডাক্তার মজুমদারের ভূভাগমম হয়।

প্রথম দর্শনে মজুমদারের আকৃতি প্রিয়দর্শন বর্ষীয়ান ডাক্তার অমরনাথের প্রীতিপ্রদ না হইলেও তাহার সঙ্গে এতগুলি দুর্ব্বার হাতিয়ার ও তাহার বাকশক্তির প্রভাব তিনি উপেক্ষা করিতে পারেন নাই। কিন্তু এই নবাগত ডাক্তার যখন দুই প্রান্তে ক্ষৌরিত মধ্যের হৃদয় গৌণটুকু কুঞ্চিত করিয়া স্বাভাবিক-বক্র-দৃষ্টিটুকু প্রধান চিকিৎসকের দিকে প্রথরভাবে নিক্ষেপ করে, তাঁহার সহকর্মীরা তখন পরস্পর নিম্নস্বরে মন্তব্য প্রকাশ করিয়াছিল,—বাপ রে! এ যে শনির দৃষ্টি!

সে দিনের এই মন্তব্যটি কয়েক মাসের মধ্যেই নির্ঘাত সত্য হইয়া প্রধান চিকিৎসকের উপর দিয়াই ফলিয়া গিয়াছিল। একটি মাসের মধ্যেই কলেরা বাণুলীর এলাকা ছাড়িয়া পলাইয়াছিল, তিনটি মাস পরেই নবাগত মজুমদারের অস্থায়ী পদ ত্যাগ করিয়া যাইবার কথা ; কিন্তু আরও কয়েকখানি উচ্চস্তরের সুপারিসের দাপটে অস্থায়ী চিকিৎসক স্থায়িতাবেই প্রধান চিকিৎসকের সহকারী পদে পাকা হইয়া বসেন। ইহার কয়েক মাস পরেই বাণুলীবাসী সকলেই স্তব্ধ বিষ্ময়ে দেখিয়াছিল, দশ বৎসরের কর্মক্ষেত্র ও প্রাণতুল্য চিকিৎসা-প্রতিষ্ঠানটির সংশ্রব পরিত্যাগ করিয়া ‘ধনুস্তরি-দেবতা’ অমরনাথের সপরিবার বাণুলী ত্যাগ এবং তাঁহার পদে তাহাদের চক্ষুঃশূল বিণ্ড ডাক্তারের অধিষ্ঠান! ইহার

মূলে যে নানা রকমের যোগাড্বন্দ্ব ও রীতিমত চক্রান্তের সংযোগ ছিল, তাহা বুঝিবার মত বুদ্ধি হাসপাতালের কর্মচারীদের থাকিলেও, শনি দেবতার রোষদীপ্ত বক্রদৃষ্টির সম্মুখে দাঁড়াইবার মত সাহসটুকু তাহাদের কাহারও ছিল না।

ইহার পর যে দিন হাসপাতালের কর্মচারী ও এন্ট্রিটের আমলাবর্গ পর্যন্ত সকলেই জানিতে পারিয়াছিল, সেয়নায় সেয়নায় কোলাকুলি হইয়াছে, অর্থাৎ দুর্ন্যূথ ছোট ভজুরের সঞ্চিত হাসপাতালের এই অবরুদ্ধ ভজুরটির শুভ সংযোগ ঘটয়াছে, সে দিন সকলকেই চমৎকৃত হইয়া একবাক্যে বলিতে হইয়াছিল,—তোফা !

এই শুভ সংযোগের পূর্বাভাসটুকু এইরূপ :—

বধূর বিরুদ্ধে অভিযোগ উপস্থিত করিতে গিয়া নিবারণ সর্বপ্রথম কর্তার নিকট যে আঘাত পাইয়াছিল, তাহা সে সহ্য করিতে পারে নাহ ; নিদারুণ মানসিক যন্ত্রণা দুর্বিষয় হইয়া তাহাকে শব্দ্যাশায়ী করিয়া দেয়। তাহার রক্তচক্ষু, কম্পিত দেহ, বিবর্ণ মুখ, উদাস দৃষ্টি, জিহ্বার জড়ত পরিজনদের চিত্তে বিষম বিক্ষোভের সৃষ্টি করে ; তৎক্ষণাৎ বিস্তৃত ডাক্তারের আহ্বান এবং অনতিবিলম্বে রোগীর কক্ষে অপূর্ণ ভঙ্গিতে তাহার প্রথম প্রবেশ !

প্রাথমিক চিকিৎসার রোগী অনেকটা সুস্থ ও প্রকৃতিস্থ হইলে ডাক্তার পরিজনদের দিকে চাহিয়া গম্ভীরমুখে জানাইলেন,—একটি ঘণ্টার অন্তর আপনাদের বাইরে যেতে হবে ; এ ঘরে ত নয়ই, আমার ইচ্ছা—ঘরের আশে পাশেও কেউ না থাকেন।

পরিজনরা তৎক্ষণাৎ কক্ষ ত্যাগ করিলে ডাক্তার স্বহস্তে কক্ষদ্বার রুদ্ধ করিয়া দিয়া রোগীর অঙ্গ ঘেসিয়া তাহার শব্দ্যায় বসিলেন। রোগীর দৃষ্টি ডাক্তারের মুখের দিকে। চোখোচোখি হইতেই ডাক্তার কহিলেন,—দেখুন, আমি ডাক্তার ; আপনার জীবন-মৃত্যুর ভার যখন আমার হাতে

দিয়েছেন, তখন আপনার মনের দুয়ারটিও অসকোচে খুলে দিতে হবে ; এর মধ্যে কোনও আবরণ থাকবে না ।

মৃদুকণ্ঠে নিবারণ প্রশ্ন করিল,—আপনাকে বিশ্বাস করতে পারি, ডাক্তার ?

দৃঢ়স্বরে ডাক্তার আশ্বাস দিলেন,—স্বচ্ছন্দে । এ বাড়ীতে আপনার চিকিৎসায় আমি এই প্রথম ব্রতী হলেও, আমি আপনাকে দেখেই বুঝতে পেরেছি, ব্যাধি আপনার মনে ; আর তার উৎপত্তি কি সূত্রে, তারও কতক কতক যে জানি না, তা নয় ।

আপনি জানেন ? আশ্চর্য্য ত !

না জানাটাই বরং আশ্চর্য্যের বিষয় ; আমি ডাক্তার, যাঁদের জীবনের সঙ্গে আমার কর্তব্যের যোগসূত্র থাকে, তাঁদের ব্যাধি সম্বন্ধে যেমন সর্বদা সচেতন থাকতে হয়, মনের অনেক তত্ত্বও সেই সূত্রে সংগ্রহ ক'রে বাধতে হয় ।

বলেন কি ?

ফ্যামিলি-ফিজিসিয়ানের ওটাও একটা ডিউটি, মনের খবর জানা না থাকলে রোগের চিকিৎসা চালানো এ-যুগে অসম্ভব ।

আমার মনের খবর তা হ'লে জেনেই চিকিৎসায় এসেছেন বলুন ?

আগেই ত এ কথা বলেছি, কতক কতক জানা আছে বৈ কি ! এখন বাধ্য হয়েই আপনাকে এ কথাও জানাতে হচ্ছে আপনার মনের ব্যাধিটি রীতিমত বেঁকে দাঁড়িয়েছে, যদিও ঠিক 'হোপলেস্' অবস্থা নয়, কিন্তু সে অবস্থায় গড়িয়ে পড়া কিম্বা তা থেকে খুব ক্লেভার্নী টার্ন নিয়ে এড়িয়ে যাওয়া এখন আপনার হাত ।

আমার হাত ?

হাঁ । আপনার মন ছুটেছিল সেকলে রাজাদের অশ্বমেধের ষোড়ার মত দুর্বার বেগে, তার কপালে আঁটা পরোয়ানা প'ড়ে কেউ তাকে ছুঁতে

ভরসা পায় নি, কিন্তু সে এত দিনে হঠাৎ হুমড়ি খেয়ে পড়েছে; সবাই তফাতে দাঁড়িয়ে দেখছে, কিন্তু এগুচ্ছে না কেউ তাকে বুদ্ধি খেলিয়ে তুলে দিতে; এই ভাবে দিনকতক প'ড়ে থাকলেই তার অবস্থা হবে ঠিক আপনার জড়ভরত ভাইটির মত।

নিবারণ শিহরিয়া উঠিল; বুঝিল, ডাক্তার মিথ্যা বলে নাই। কিছুক্ষণ পূর্বেও নিজের ইন্দ্রিয়গুলিকে আয়ত্তে রাখিবার শক্তি সে হারাইয়া ফেলিয়াছিল; শুধু তাহাই নহে, মনের ব্যাধির যে নির্দেশ এই মনস্তত্ত্ববিদ ডাক্তার আজ দিয়াছে, তাহা অস্বীকার করিবার শক্তিও ত তাহার নাই। এ পর্য্যন্ত সে যাহাকে কৃপা-প্রত্যাশী ভাবিয়া উপেক্ষা করিয়া আসিয়াছে, আজ এই প্রথম তাহার সম্বন্ধে অন্তস্তলে অন্তরের শ্রদ্ধার সঞ্চার! কণ্ঠের স্বর কোতূহলে কোমল করিয়া সে কহিল,—সত্যই আপনি অনেক খবরই রাখেন দেখছি! আচ্ছা বলতে পারেন, ঘোড়াটা ওভাবে হঠাৎ কেন প'ড়ে গেল?

চলতি পথে একখানা শাড়ীর আঁচল-ঝাপটায় ঘাবড়ে গিয়ে বে-টপকায় মোড় নিয়েছিল, এ ক্ষেত্রে পড়াটা স্বাভাবিক।

পুনরায় ওঠাটা?

উচিত ত বটেই, অবশ্য যদি ডাক্তারের চিকিৎসা এবং পরামর্শ চলে!

কিন্তু বে শাড়ীর কথা তুললেন, তার অধিকারিণীর খবরও আপনি রাখেন না কি?

অনেক। আপনারা তার সিকিও জানেন কি না সন্দেহ!

কথাটা শুনিয়াই দুই চক্ষু কপালে তুলিয়া নিবারণ উঠিবার প্রয়াস পাইল, কিন্তু ডাক্তার সঙ্গে সঙ্গে বাধা দিয়া সহজ কণ্ঠেই কহিল,—উঠবেন না এখন, শুয়ে-শুয়েই আমার কথা শুনুন, বা জিজ্ঞাসা করবার হয় করুন। যদিও স্পষ্ট অনুভব করছি, আমার কথাতেই আপনার রোগ এখন

পালাবার পথ পাচ্ছে না, তথাপি আপনাকে কিছু দিন রোগী হয়েই থাকতে হবে।

নিবারণ এ কথায় কাণ না দিয়া আগেকার কথার স্মৃতি ধরিয়াই প্রশ্ন করিল,—আমাদের চেয়েও আপনি বেশী খবর রাখেন ?

এতে বিশ্বয়ের কি আছে, তা ত বুঝছি না ; উনি যখন পাঞ্জাবে গুর দাদামশায়ের হেফাজতে ছিলেন, আমি যে তখন সেখানে প্র্যাকটিস করতুম।

ওঃ,—তাই বলুন ! তা হ'লে—

সে সময় অনেক খবর সংগ্রহ করবার আমার অবকাশ হয়েছিল। কিন্তু এখন সে সব কথা থাক, পরে সবই শুনবেন ; এখন আমার কথা এই, যে ঘোড়া হুমড়ি খেয়ে পড়েছে, তাকে চাক্ষু ক'রে আবার ছোটাতে হবে, এবার রাস্তার ভুল আর হবে না।

নিবারণের মাথার মধ্যে তখনও পূর্বের কথাটাই তালগোল পাকাইতেছিল, উৎসুকভাবেই পুনরায় প্রশ্ন তুলিল,—আপনার সঙ্গে যখন জানাশোনা ছিল, কথাবার্তাও হয়েছিল নিশ্চয় ?

ডাক্তার জোরে একটা নিশ্বাস ত্যাগ করিয়া কহিলেন,—সে ত হবারই কথা, গুর শেষের কথাটা এখনও আমার কাণে যেন আঘাত দিচ্ছে !

কি সম্বন্ধে কথা ডাক্তার ? বলতে আপত্তি আছে ?

কিছুমাত্র না ; আমার মানসিক চিকিৎসা সম্বন্ধে উনি একদিন ঠাট্টা ক'রে বলেছিলেন, আপনি ফিজিকস্ (Physics) ছেড়ে ফিজিয়নমির (Physiognomy) চর্চা করুন তাতে লোকের মুখের ভাব দেখে মনের ভাব ব'লে দিতে পারবেন।

আপনি কি জবাব দিয়েছিলেন ?

জবাব দেবার অবসর পাই নি ; দেখা যাক, আপনার ঘোড়াটা যদি

‘উইন’ করে, তখন হয় ত জবাবটা তারই মারফতে দাখিল করবার সুযোগ হবে।

কথাটা শুনিয়াই অর্থপূর্ণ দৃষ্টিতে নিবারণ ডাক্তারের মুখের দিকে তাকাইল, ডাক্তারের বক্রদৃষ্টিও তাহার দিকেই বদ্ধ হইয়াছিল; উভয়েই উভয়কে শুভক্ষণে চিনিয়া লইয়া স্ব স্ব হৃদয়ের দ্বার অকপটেই খুলিয়া দিল। বয়ঃক্রমগত প্রায় দশটি বৎসরের ব্যবধান, আভিজাত্যের দস্ত ও অধীনতার সঙ্কোচ মানবদেহধারী এই দুইটি অপূর্ব জীবের মধ্যে এত দিন যে বাধার প্রাচীর তুলিয়াছিল, আশ্চর্য্য রকমেই তাহা নিশ্চিহ্ন হইয়া গেল।

নিবারণের ব্যাধি, তাহার নিদান ও তাহা হইতে নিষ্কৃতির বিধান এমন ভাবে এই বিশু ডাক্তার হরিনারায়ণ বাবুকে বুঝাইয়া দিলেন যে, তিনি সে অবস্থায় সতয়ে সায় দিতে বাধ্য হইলেন। অতিরিক্ত কশ্মের চাপ এবং তাহার উপর কোনও নিদাক্রণ মনস্তাপ যে ব্যাধির ভিত্তি, তাহাকে অবহেলা করিলে অদূর ভবিষ্যতে মস্তিষ্কবিকৃতি অনিবার্য্য,— ডাক্তারের এই নির্দেশই তাঁহার পক্ষে সাংঘাতিক হইয়াছিল, সুতরাং এই বিচক্ষণ ডাক্তারের তত্ত্বাবধানে সরস্বতী-নীকর-সিক্ত বায়ুপ্রবাহে স্বাস্থ্য সঞ্চয়ের জন্য পুত্রকে সরস্বতী-কাননে নির্লিপ্তভাবে অবস্থিতির অনুমতি দিয়াছিলেন।

সরস্বতী-কাননে কয়টি মাসের অবস্থিতিসূত্রে সেখানকার পারিপার্শ্বিক সুসমা-মাধুর্য্যে ও অস্তুরঙ্গ বিশু ডাক্তারের সাহচর্য্যে নিবারণ শুধু যে স্বাস্থ্য সঞ্চয় করিতেছিল তাহা বলা যায় না; সেই সঙ্গে তাহার তরুণ জীবনে অনাস্বাদিত আরও দুই একটি অভিনব বস্তুর সহিত পরিচয়-সূত্রে অভিজ্ঞতা সঞ্চয়ও করিয়াছিল।

নিবারণ যে সময় চা খাইত, ডাক্তার তাহার টেবিলে বসিয়াই সে সময় সুরার পেগ্ চালাইতেন; হাসিয়া বলিতেন, স্বাভাবিক উষ্ণ এই তরল

পদার্থ টি মনোব্যাদির অব্যর্থ মহোষধ। সপ্তাথানেক পরেই, নিবারণের চায়ের পিয়ালয় এই মহোষধটি কিঞ্চিত পরিমাণে মিলিত হইয়া চায়ের শক্তি বাড়াইয়া দিল। পরের সপ্তাহে পিয়ানাটি উভয় জাতীয় তরল পদার্থের সমানাধিকার মানিয়া লইতে বাধ্য হইল। পরের সপ্তাহ স্বাভাবিক উষ্ণ তরল পদার্থ-টি পিয়ালাকে উপেক্ষা করিয়া উচ্চতম আধার অধিকার করিয়া লইল। পানভোজনের টেবিলে দুই বন্ধুর মধ্যে সাম্যের যে খুঁটুকু ছিল, তাহা যুচিয়া গেল।

মনস্তত্ত্ববিদ ডাক্তার ব্যাধিগ্রস্ত বন্ধুর মনোরথ পূর্ণ করিতে এই কয়টি মাস শুধু বে মনোব্যাদির মহোষধ নইয়াই ব্যস্ত ছিলেন, এ কথা বলিলে তাঁহার প্রতি অবিচার করা হয়। মনের মত বেগবান গতিতে জেলার বিভিন্ন স্থানে ছুটাছুটি করিয়া তিনি বাঙালীর বিশাল এষ্টেট দরিয়ার টানা দিবার জন্য এক মহাজাল রচনা করিয়াছিলেন।

শ্রীরামচন্দ্রের নাগরবন্ধনে ক্ষুদ্র কাঠবেড়ালীও যোগ দিয়াছিল ; ডাক্তারসহায় শ্রীমান্ নিবারণের এই উত্তমে ছোটবড় অনেকেই জালের গ্রহি বাধিয়াছিল। বাঙালী এষ্টেটের বধূটির মনোবৃত্তি সম্বন্ধে যে সকল তথ্য সংগৃহীত হইয়াছিল, তাহার সহিত দেশের বিপ্লবপন্থীদের অনুসৃত নীতির ত্রৈক্য প্রকাশ পায় ; শ্যামাপুরে এই বধূটির আকার অনুসারে জ্বরদস্ত ভূস্বামীর অবৈতনিক বিদ্যালয় প্রতিষ্ঠা এবং সেই বিদ্যালয়ে বালিকাদের অধ্যয়নে বাধ্য করিতে তাঁহার অপ্রতিহত ক্ষমতাপ্রয়োগ প্রভৃতিও অতিরঞ্জিতভাবে গ্রথিত হইয়াছিল। মিশনারী বিদ্যালয়ের লাক্ষিতা, শিক্ষয়িত্রীও এই জালে গ্রহি দিতে দ্বিধা করেন নাই। জমিদার কঙ্ক বিদ্যালয় স্থাপিত ও চালু হইবার পরেই ছাত্রীর অভাবে মিশনারী বিদ্যালয়টির দরজা বন্ধ হইয়া যায়, ডিক্টেট মিশন সোসাইটির কর্তারা ইহাতে রীতিমত ক্ষুব্ধ হইয়াছিলেন ; এ তরফ হইতেও সহযোগিতার অপ্রতুল ঘটে নাই। জেলার কালেক্টর ও ম্যাজিস্ট্রেট ওয়াসেন্ সাহেব বরাবরই বাঙালীর

এই খেয়ালী জমিদারটির প্রতি বিরূপ ছিলেন, অথচ তাঁহাকে কায়দা করিতে এ পর্য্যন্ত বিশেষ কোন রকমই পান নাই। সহসা এই সময় তাঁহার নিকটে নানা সূত্রে বাণুলী এট্টেট এবং তাঁহার ভূস্বামীর বিরুদ্ধে নানারূপ অভিযোগ প্রত্যক্ষ ও পরোক্ষভাবে উপস্থিত হইয়া তাঁহাকে চমৎকৃত করিয়া তুলিল। সাহেব বুঝিলেন, এত দিনে একটা রকম মিলিয়াছে, কিন্তু তথাপি তাহার মধ্যে সহসা প্রবেশ করিতে মনে স্বভাবতঃই দ্বিধা উঠিতেছিল। উঠিবারই কথা ; নামী জমিদার, সরকারী খেতাবের পরোয়া করে না, প্রচুর প্রভাব ; যদি অভিযোগ মিথ্যা হয় ?

কিন্তু দ্বিধাটুকুও তাঁহার দূর করিয়া দিল, একদা অপ্রত্যাশিতভাবে জমিদারপুত্র তাঁহার খাস কামরায় দর্শন দিয়া। বলা বাহুল্য নিবারণ একা আসে নাই, বিত্ত ডাক্তার উকীলের মতই তাহার সার্থী হইয়া আসিয়াছিল এবং সাহেবের সহিত কথা কহিতে নিবারণ যেখানে খেই হারাইতেছিল, বিত্ত ডাক্তার তৎক্ষণাৎ দক্ষতার সহিত সেটুকু সংশোধন করিয়া দিতেছিল।

এই সাক্ষাৎসূত্রে প্রকাশ পাইল, যে দুর্দান্ত মেয়েটি জমিদার বধু হইয়াছে, সে-ই এক্ষণে প্রকৃতপক্ষে বাণুলীর বন্ধ জমিদারকে চালনা করিতেছে। তাহার স্বামী মূর্থ, জড়প্রকৃতি ও পাগল ; সূতরাং জ্যেষ্ঠ হইলেও সে বাণুলীর গদীতে বসিবার যোগ্যতা হারাইয়াছে। কিন্তু বধু কর্তৃক প্রভাবান্বিত হইয়া জমিদার এই পাগলকেই বাণুলীর গদীতে বসাইতে উদ্যোগী হইয়াছেন। ইহাতে প্রকারান্তরে বধুই বাণুলীর পরিচালিকা হইবে, কিন্তু তাহা হইলে এই বিখ্যাত টেট কিছুতেই সরকারের সহিত সন্তাব ও সহযোগিতা রাখিতে পারিবে না—যে হেতু এই মেয়েটির প্রকৃতি ও মনোবৃত্তি অত্যন্ত আপত্তিজনক এবং বাঙ্গালার যে সকল তরুণী বিপ্লবের পথে অগ্রবর্তিনী হইয়াছে, তাহাদের সহিত ইহার রীতিমত যোগসূত্র আছে।

এই সূত্রে নানা কথাবার্তার পর সাহেব নিবারণকে আশ্বাস দিয়া

করমর্দনে আপ্যায়িত করিয়া বিদায় দিলেন, ডাক্তারও অল্পরূপ সৌভাগ্য-লাভে বঞ্চিত হইলেন না।

এই ঘটনার পনের দিন পরে একদা গভীর রাত্ৰিতে সরস্বতী-কাননের প্রমোদভবনে প্রমোদের প্রবাহ ছুটিয়াছে। গীত, নৃত্য ও বাজের সহিত পানেরও উচ্ছ্বাস বহিয়াছে। কলিকাতা হইতে ডাক্তারের কতিপয় বন্ধু ও তথাকথিত কতকগুলি তরুণী বান্ধবীর আগমনে তাহাদের অভ্যর্থনা সূত্রে এই নৈশ উৎসবের আয়োজন। উপযু্যপবি পেগের প্রাবল্যে মজলিস যখন টলটলায়মান, তখন সরস্বতী-কাননের রুদ্ধ ফটকের সম্মুখে এক সওয়ার উপস্থিত হইয়া শাস্ত্রীর তন্দ্রা ভাঙ্গিয়া দিল; ব্যস্তভাবে উঠিয়া সে দেখিল, বাহিরে অশ্বারোহী প্রতীক্ষা করিতেছে, তাহার উর্দী হইতেই প্রকাশ পাইতেছে—সে হজুরের বার্তাবহ।

দ্বার খুলিতেই অশ্বারোহী জানাইল, বড় হজুরের রোকা লইয়া সে আসিয়াছে, এখনই ছোট হজুরের হাতে দাখিল করিতে হইবে; ভারি জরুরী খবর আছে।

চিঠি পড়িবার মত অবস্থা তখন ছোট হজুরের ছিল না, অগত্যা বিগু ডাক্তারকেই চিঠি খুলিতে হইল; ক্রমাগত পেগ চালাইয়াও তিনি এ পর্য্যন্ত হুঁসিয়ার ছিলেন। মনে মনে চিঠিখানা আগে পাঠ করিয়াই ডাক্তার উল্লাস তুলিলেন—হুঁসে!

জোর করিয়াই সকলে চক্ষুগুলি ঞ্ণিকের জন্ত উঁচু করিয়া চাহিলেন, মজলিসের আর সকলেই সম-অবস্থাপন্ন। ডাক্তার কণ্ঠে জোর দিয়া পড়িলেন,—

শুভানুধ্যায়ী শ্রীহরিনারায়ণ গঙ্গোপাধ্যায়, পরম শুভাশীর্বাদ পূর্বক বিজ্ঞাপনক্ৰম বিশেষ,—এইমাত্র বিশ্বস্তসূত্রে অবগত হইলাম যে, প্রেসিডেন্সি বিভাগের কমিশনার ও জেলার কালেক্টর সাহেব শিকারে বাহির হইয়াছেন, আগামী কল্য প্রত্যুষে তাঁহারা বাণলী প্রাসাদে আসিয়া আতিথ্য গ্রহণ

করিবেন জানাইয়াছেন। অতএব যে অবস্থায় তুমি আছ, ডাক্তারকে লইয়া পত্রপাঠ ওখান হইতে রওয়ানা হইবে। ইতি—

আশীর্বাদক—শ্রীহরিনারায়ণ দেবশর্মাণঃ

বড় হুজুরের এই জরুরী পত্র যে এরূপ আনন্দ-সংবাদ বহন করিয়া আনিবে, নিবারণ বা ডাক্তার কেহই তাহা কল্পনা করে নাই। কিন্তু তথাপি দুঃখের বিষয় এইটুকু যে, এ আনন্দে পরিপূর্ণরূপে হৃদয়োচ্ছ্বাস মিনাইবার শক্তি বা উৎসাহ তখন তাহাদের ছিল না। তথাপি ডাক্তারের নির্দেশে এই নৈশ-প্রমোদ-যজ্ঞে শেষ আহুতি অর্পণ করিতে প্রত্যেকেই পূর্ণ পাত্র হস্তে কম্পিতপদে দাঁড়াইল এবং ভয়কণ্ঠে সমস্বরে উচ্ছ্বাস তুলিল—মহামাত্র কমিশনার এবং কালেক্টর সাহেবের উদ্দেশে—

উদ্দেশটুকু পূর্ণ হইতেই পুনরায় নৈশ বামিনীর নিস্তরতা ভঙ্গ করিয়া বিজাতীয় ধ্বনি উঠিল—*তিপ্, তিপ্, হুর্রে!*

দুই

মা! মা! মা!

স্বামীর আর্ন্তকণ্ঠের ব্যাকুল আহ্বানধ্বনি বধুর স্রুষ্টি ভঙ্গ করিয়া দিল। ধড়মড় করিয়া সে উঠিয়াই অদূরবর্তী মৃদু আলোটির দিকে ছুটিল। আলো উজ্জ্বল হইয়া উঠিলে সে দেখিল, স্বামীও শয্যার উপর উঠিয়া বসিয়াছে; দুই চক্ষু তাহার বিস্ফারিত, মুখে এক অভিনব ভাবের বিকাশ!

কি হয়েছে? এমন ক'রে চোঁচিয়ে উঠলে যে!

বধুর কথায় স্বামী যেন সস্থির পাইল; দুই চক্ষুর দৃষ্টি স্বাভাবিক করিয়া বধুর দিকে চাহিয়া সে ভাবগদগদস্বরে কহিল,—*মৃষ্টি ধরে মা আমার*

বিছানায় এসে বসেছিলেন, আমার গায়ে হাত দুখানি তাঁর বুলিয়ে দিলেন, মনে হ'ল শ্বেতপদ্মের পাপ্‌ড়ীগুলি কে যেন পীঠময় ছড়িয়ে দিচ্ছে ; এখনও সে পরশ যেন অনুভব করছি ; ছবিতে মার যে চেহারা দেখি, ঠিক তাই, কেবল গায়ের রং পদ্মের মত ধবধবে সাদা !

বধু কিছুমাত্র বিশ্বয় প্রকাশ করিল না, কোনও প্রশ্নও তুলিল না ; নিঃশব্দে শুধু কহিল,—সাধনায় চিত্তশুদ্ধি হলেই দিব্যভাব আসে, শেষে দিব্যদর্শনও হয়ে থাকে ; এতে আশ্চর্য্য হবার কিছুই নেই ।

গোবিন্দ কহিল,—আশ্চর্য্য ত হই নি, কিন্তু দুঃখিত হয়েছি খুবই ; জেগে উঠে মাঝে দেখতে পেলুম না ত !

বধু মধুর কণ্ঠে ব্যথিত স্বামীকে আশ্বাস দিল,—চোখের দেখাটাই কি বড় দেখা ? তাঁর প্রতি অচলাভক্তি রাখলে মনের মধ্যে সর্বক্ষণই ত তাঁকে দেখতে পাবে । আনন্দমঠের কথা মনে নেই ?—বাহুতে তুমি মা শক্তি, হৃদয়ে তুমি মা ভক্তি, অং হি প্রাণাঃ শরীরে !

বাহিরের দ্বারে এই সময় ঘন ঘন আঘাতের শব্দ দম্পতিকে চমকিত করিয়া তুলিল । অসময়ে কোন্‌ প্রয়োজনে কে এ ভাবে উপদ্রব আরম্ভ করিল ! উভয়েই ঘড়ির দিকে চাহিয়া দেখিল, চারিটা বাজিতে তখনও কিঞ্চিৎ বিলম্ব আছে ।

আজ গোবিন্দই দ্বার খুলিতে অগ্রবর্তী হইল । বধু মুগ্ধদৃষ্টিতে স্বামীর ক্ষিপ্ৰগতির দিকে তাকাইয়াছিল, সে তন্ময় হইয়া দেখিতেছিল, অঙ্গ-চালনার প্রতি ছন্দে পৌরুষের দীপ্তি যেন ঝলমল করিতেছে ! বধুর কণ্ঠে তখন উদগ্র হইয়া উঠিতেছিল পদাবলীর সেই মধুর পদটি—ঢল ঢল ঢল অঙ্গের লাবণী, অবনী বহিয়া যায় !

গোবিন্দ ফিরিয়া আসিয়া সংবাদ দিল,— বাবা হঠাৎ অসুস্থ হয়েছেন, তোমাকে ডাকছেন ; দাসীরা বাইরে দাঁড়িয়ে আছে ।

বধুর মুখে চিন্তার ছায়া পড়িল, ক্র কুঞ্চিত করিয়া কহিল,—আমাকে

যখন ডেকেছেন, নিশ্চয়ই অসুখ বেশী রকমেরই হয়েছে। তুমি বাবে না ?

জ্ঞানমুখে গোবিন্দ কহিল,—আমাকে ত ডাকেন নি !

বধূ কহিল,—অসুখ-বিসুখে তোমাকে ডাকবারও যে প্রয়োজন আছে, সে ধারণা এখনও ত তাঁর মনে শক্ত হয়ে স্থান পায় নি !

কথাটা শুনিয়া গোবিন্দের মনে অভিমান জাগিল, কহিল,—বাবা কি ভেবেছেন, এখনও আমি তেমনিটি আছি ! তিনি ত দেখে গেছেন, আমি ত্রৈশিক শেষ করেছি, তাঁর কথার জবাবও দিয়েছি, তারপর, এ ক'মাসে কি আরও কিছু উন্নতি আমার হয় নি ?

স্বামীর কথাগুলি বধূর অন্তর স্পর্শ করিল, কিন্তু সে এইমুহুর্তে তাহাকে উত্তেজিত না করিয়া প্রবোধ দিবার ছলে কহিল,—এমনও হতে পারে, সেই থেকে বাবার মনে একটা অনুতাপ হয়েছে, তুমি এখন শিক্ষায় ও বুদ্ধিবৃত্তিতে আরও এগিয়েছ অনুমান করে হয় ত তোমাকে ডাকতে কুণ্ঠিত হয়েছেন। তবে তুমি ইচ্ছা করলে, নিজেই তাঁর কাছে এ অবস্থায় যেতে পার, তাতে কোনও দোষ নেই, তিনি তোমাকে দেখে খুসীই হবেন।

গোবিন্দ ক্ষণকাল মনে মনে কি ভাবিয়া জিজ্ঞাসু দৃষ্টিতে বধূর দিকে চাহিয়া কহিল,—কিন্তু তাতে যদি মন্দ হয়। সেদিন একখানা বইয়ে পড়েছিলুম না—অসুখের অবস্থায় খুব খারাপ খবর শোনানো যেমন ঠিক নয়, ভাল খবরও হঠাৎ শোনাতে নেই, তাতে মন্দ হয়। আমি বেশ ভাল হয়েছি দেখে বাবার অবস্থা যদি হঠাৎ আরও খারাপ হয়ে যায় ?

বধূ প্রশংসার দৃষ্টিতে স্বামীর মুখের দিকে চাহিয়া কহিল,—কিন্তু আমার ~~কথা~~ এ কথাটা ঢোকে নি ! সত্যিই তুমি, মায়ের কৃপা পেয়েছ ! বানরঘরের সেই মানুষটি তুমি, সে রাত্রেও তোমার কথা শুনেছি, আর আজ রাত্রেও শুনেছি !

বধুর কথার উত্তরে গোবিন্দ দুই চক্ষুর দৃষ্টি উজ্জ্বল করিয়া কহিল,—
আর তুমি সেখানে যে কথা আমাকে শুনিয়াছিলে, কাজেও তাই করেছ ;
তোমার জন্মই না আমি আজ মানুষ হয়েছি !

বধুর মুখখানি আরক্ত হইয়া উঠিলেও নিম্মল হাসির স্নিগ্ধতায় সে মুখ
উজ্জ্বল করিয়া কহিল,—তুমি যে মানুষ হয়েছ, সে তোমার মনের জোরে ।

গোবিন্দ কণ্ঠস্বর গাঢ় করিয়া কহিল,—কিন্তু আমার মনে জোর
দিয়েছিল কে ? মানুষ হবার পর থেকে আমি কি ভাবি জান ?—লেখা-
পড়া যারা শেখে নি, তারা কি হতভাগা ! তোমায় না পেলে আমি ত
সারাজীবন এমনই হতভাগা হয়েই থাকতুম ; সবাই দূর ছাই করত, এই
দেখ, এখনও আমার মাথার ছিট্‌ যায নি ! তোমাকে এখনো আটকে
রেখেছি ; তুমি আগে বাবার কাছে যাও, আমি উদ্‌গ্রীব হয়ে রইলুম ।

বধু অপলকনয়নে মুগ্ধদৃষ্টিতে স্বামীর মুখের দিকেই চাহিয়াছিল,
গোবিন্দ তাহার দিকে পরিপূর্ণ দৃষ্টিতে চাহিতেই উভয়ের দৃষ্টির সংযোগ
ঘটিল ; সঙ্গে সঙ্গে দুইখানি মুখই এক অপূর্ব দীপ্তিতে উদ্ভাসিত হইয়া
উঠিল ।

তিন

সুদীর্ঘ কক্ষে পালঙ্কের উপর কর্তা আচ্ছন্নের মত পড়িয়া আছেন ।
তাঁহাকে পরিবেষ্টন করিয়া মাধুরী দেবী, যুগালিনী ও আরও কতিপয়
মহিলা মানারূপ পরিচর্যা করিতেছেন । হাসপাতালের বর্ষীয়ান সহকারী
চিকিৎসক সহকর্মীদের সহিত অনতিদূরে বসিয়া ঔষধপত্রের ব্যবস্থাবিধানে
তৎপর ।

বাবা !

এই পরিচিত আস্থানটুকুর আশ্চর্য্য প্রভাবে রোগীর আচ্ছন্নতা সেই মুহূর্তেই কাটিয়া গেল, চক্ষু তুলিয়া আন্তে আন্তে স্নেহকোমল কণ্ঠে কহিলেন,—বোমা !

বধু অসঙ্কচিতভাবে একেবারে শয্যার প্রান্তদেশে আসিয়া স্বপ্তের পা দুইখানি কোলে লইয়া বসিল ।

কর্তার মুখ হইতে তৃপ্তিজন্মিত মৃদু স্বর বাহির হইল,—আঃ !

রোগীর দিকে উৎসুক দৃষ্টিতে চাহিয়া বধু প্রশ্ন করিল,—কি হয়েছে, মা ?

রোগী একটি দীর্ঘনিশ্বাস ফেলিয়া কহিলেন,—হঠাৎ মাথা ঘুরে প'ড়ে যান, তবে ভগবানের দয়ায় নিজেই সামলে নিয়েছিলেন, চোট লাগে নি ; কিন্তু মাথাটার ভেতর এখনও গোল রয়েছে ।

বধুর মুখখানি বিবর্ণ হইয়া গিয়াছিল, কণ্ঠ অত্যন্ত মৃদু করিয়া কহিল,—ডাক্তার কি বলছেন মা ?

এরা ত কিছু মুখে বলছে না, মাথায় বরফ দেবার ব্যবস্থা করেছে, একটা ইন্জেকশনও দিয়েছে ! কিন্তু ডাক্তার না এলে কিছু বোঝা যাচ্ছে না ।

বধু ব্যগ্রকণ্ঠে প্রশ্ন করিল,—তিনি এখনও আসেন নি কেন ?

রোগী অপ্রসন্ন-মুখে কহিলেন,—তিনি বাইরে গেছেন । তবে শুনছিলুম, অসুখ হবার আগেই নাকি কি দরকারে তাঁকে ডেকে পাঠিয়েছেন ; সকালেই এসে পড়বে ।

সকলকে চমকিত করিয়া রোগী এই সময় প্রশ্ন করিলেন,—বোমা, যুঝছিলে বোধ হয় ?

বধু কহিল,—না বাবা, আমি জেগেই ছিলাম । কিন্তু আপনি চুপ করুন বাবা, কথা কইবেন না ।

কণ্ঠস্বরে অপেক্ষাকৃত জোর দিয়া কর্তা কহিলেন,—তা হ'লে তোমাকে

ডাকলুম কেন, মা ? আজ ত ডাকবার কথা নয়,—পিতৃপক্ষ চলেছে, দেবীপক্ষ আসতে এখনো ক'টা দিন বাকি ; কিন্তু বাধ্য হয়েই আমাকে অকাল-বোধন করতে হ'ল যে, মা !

রোগীকে এভাবে কথা কহিতে দেখিয়া প্রবীণ ডাক্তার হাতের কাজ ফেলিয়া ছুটিয়া আসিলেন, চিকিৎসকের দায়িত্ব স্বরণ করিয়া অল্পবোধের সুরে কহিলেন,—করছেন কি ভ্জুর ! একটা কথা বলাও এখন আপনার পক্ষে সাংঘাতিক যে !

আরক্ত দুটি চক্ষু প্রথর করিয়া রোগী ডাক্তারের দিকে চাহিলেন, পরক্ষণে তীক্ষ্ণস্বরে কহিলেন,—জীবনে কোনও দিন কারুর শাসন মানি নি, ডাক্তার ! আজ তুমি রোগের দোহাই দিয়ে আমাকে ঠেকাতে এসেছ ?

ডাক্তার হাত দু'খানি বোড় করিয়া কহিল,—আমার অপরাধ হয়েছে, আপনি থামুন ।

তরুণ তুলিয়া রোগী কহিলেন,—থামব আমি ! এখনই ?—সঙ্গে সঙ্গে বিকৃত কণ্ঠে অদ্ভুত রকমের উচ্চ হাশ্বের সহিত কহিলেন,—রেসের ঘোড়া বেপরোয়া ছুটে চলেছে, তোমার সাধা কি তাকে থামাবে ! থামবে সে আপনি, একেবারে সীমানায় গিয়ে ।

ডাক্তার রোগীর প্রকৃতি বোধ হয় জানিতেন, স্তত্রাং আর না ঘাটাইয়া তাহার স্থানে ফিরিয়া গেলেন ।

বধূকে উদ্দেশ করিয়া রোগী কহিলেন,—ডাক্তার বুঝি পালানো বোমা, তা ত পালাবেই ! ও কি কবরেজের মেয়ে যে চোখ পাকিয়ে একটি কথায় দ্রাবিয়ে দেবে ! হাঃ হাঃ হাঃ,—কিন্তু, কথাটা শুনে তুমি ত রাগ কর নি, মা ?

বধূ ডাকিল,—বাবা !

এ ডাকে শুধুই সম্বোধনের আভাস ছিল না, আরও অনেক কিছুই

ছিল। রোগীর কানে এই দৃষ্ট আহ্বান যেন উন্মাদনাময় সুরের
ঝঙ্কার দিল। উদ্বেলিতকণ্ঠে কহিলেন,—বাঃ! এই ডাকই শুনতে
চাইছিলুম মা!

বধু নিঃশব্দে কিস্কিৎ তীক্ষ্ণ করিয়া কহিল,—কারুর শাসন কোনও
দিনই আপনি মানেন নি, তা আমরা জানি; কিন্তু এখন আপনাকে
শাসন মানতেই হবে, বাবা! আপনি একটি কথাও কহিতে পাবেন না;
এ কথা যদি না মানেন, আমরা সকলেই উঠে যাব এখন।

আস্তে আস্তে একখানি হাত তুলিয়া কর্তা কহিলেন,—তা আমি জানি,
তুমি মা, সব পার। ডাক্তারকে ভয় করি না, কিন্তু তোমাকে করি।

দৃঢ়স্বরে বধু কহিল,—তা হ'লে আপনার একান্তই ইচ্ছা, আমরা উঠে
যাই?

রোগী এবার বিকৃতকণ্ঠে কহিলেন,—উঠে যাবে! তুমি কি ভেবেছ
মা, সেবা করতেই তোমাকে ডেকে এনেছি! যে কথা বলবার জন্ত
জিভখানা আমার স্ফুড়-স্ফুড় করছে, তোমাকে তা শুনতেই হবে, না শুনে
যে নিষ্কৃতি নেই, তোমারও নয়, আমারও নয়—

বধু কোমলকণ্ঠে কহিল,—কিন্তু এখন কি কথা শোনার সময় বাবা?

কর্তা পূর্ববৎ বিকৃতকণ্ঠে হাসিয়া কহিলেন,—সময়ও যে ঠিক আমারই
মতন, মা! কারুর বাঁধাধরা মানে না; যখন সাংঘাতিক হয়ে দাঁড়ায়,
কেউ ঠেকাতে পারে না। হাঁ, যে জন্ত তোমাকে ডেকেছি, তাই বলছি,
—দিনটা নিজেই এগিয়ে এসে পড়েছে মা, ফেরাবার যো নেই; কমিশনার
সাহেব কালেক্টরকে নিয়ে শিকারে বেরিয়েছেন, কাল সকালেই হাজীর
হচ্ছেন এখানে—

কথার সঙ্গে সঙ্গে কর্তার মুখে বেদনার চিহ্ন ফুটিয়া উঠিল। বক্তব্যটুকু
সমাপ্ত হইবার অবকাশ পাইল না।

বধু তৎক্ষণাৎ বুঝিয়া কর্তার বুকখানির উপর আস্তে আস্তে হাত

বুলাইতে লাগিল, তাহার বন্ধদৃষ্টি খণ্ডরের ব্যথাক্লিষ্ট মুখখানির দিকেই আবদ্ধ রহিল। কিছুক্ষণ কাহারও মুখে কথা নাই। কিন্তু সে ভাবটুকু কাটিতেই কর্তা পুনরায় পরিপূর্ণদৃষ্টিতে বধুর দিকে চাহিলেন।

বধু খণ্ডরকে কোনও কথা বলিবার অবসর না দিয়া নিজেই কহিল,—
আপনার স্বভাবের ঘটটুকু পরিচয় আমি পেয়েছি বাবা, তাতে আমি কখনই এ কথা বিশ্বাস করব না যে, কমিশনার সাহেবের খাতিরের কোনো ত্রুটি হবে ভেবেই আপনি এতখানি কাতর হয়ে পড়েছেন!

বধুর কথায় সহসা কর্তার মুখে হাসির ঝিলিক দেখা দিল, উৎসাহের সুরে কর্তা কহিলেন,—তুমি মা বাহাদুর মেয়ে, রোগ ঠিক ধরেছ! কমিশনার আর কালেক্টর এখানে শিকার করতে আসছে না মা, বিচার করতে আসছে!

কথাটা রোগীর কক্ষে সমবেত সকলকেই চমকিত করিয়া দিল। বধু খণ্ডরের মুখের দিকে চাহিয়া প্রশ্ন করিল,—সে এক্তিয়ার কি এখনই ওঁদের আছে বাবা?

আর্তস্বরে কর্তা উত্তর দিলেন,—হয় ত নেই; কিন্তু না থাকলেও এমন নালিশ ওঁদের কাছে উঠেছে, আর কেউ হলে বিনা-এত্তেলায় পুলিশ পাঠিয়ে ধরে নিয়ে যেত! কিন্তু জানে কিনা, এ বড় শক্ত ঘানী, তাই পুলিশ দিবে ষাঁটাতে সাহস পায় নি,—কর্তারাই সেজেগুজে আসছেন শিকারের ছলে তদারক করতে; না বলবার যো নেই, নতুন অর্ডিনাম্সে বাধে—

বধু বিশ্বয়ের সুরে কহিল,—এ যে ভারী আশ্চর্যের কথা বাবা! সরকার আপনাকেও অর্ডিনাম্সের জালে বাঁধতে—

কথাটা এই পর্য্যন্ত বলিয়াই, খণ্ডরের মুখের আকস্মিক ভাব-পরিবর্তন লক্ষ্য করিয়া বধু যেন জোর করিয়াই কণ্ঠরোধ করিল।

কর্তা উষ্ণ হইয়া কহিলেন,—আমাকে? এই ত মা, এবার তুল করে বসলে—

বধূ অবিচলিতকণ্ঠে কহিল,—আপনার মুখ দেখেই বুঝতে পেরেছি বাবা, আমার অনুমান ঠিক হয় নি ; কিন্তু এখন আমি বুঝতে পেরেছি বাবা, ওরা শিকারের ছলে কাকে শিকার করতে আসছেন !

ব্যগ্রভাবে কৰ্ত্তা কহিলেন,—বুঝতে পেরেছ মা, বুঝতে পেরেছ ? তা হ'লে এখন নিশ্চয়ই জানতেও পারছ, ওদের আসবার নামে আমি এতটা কাতর হয়েছি কেন ?

বধূ ক্ষণকাল চুপ করিয়া কি ভাবিল, তাহার পর স্নিগ্ধকণ্ঠে ধীরে ধীরে কহিল,—কিন্তু বাবা, আপনার পা দুখানি ছুঁয়েই আমি বলছি, দু একটা কঠিন কাজে হাত দিলেও, এমন কোনও অন্তায় কাজ এ পর্য্যন্ত আমি করি নি, যাতে অর্ডিনালের আমলে যেতে পারি। ওরা নিশ্চয়ই একটা কল্পিত বস্তুর ওপর আঘাত করতে আসছেন, কিন্তু সে বস্তুটির অস্তিত্বই নেই।

কৰ্ত্তা বধুর কথাগুলি ধীরভাবে গুনিয়াও অধীর হইয়া কহিলেন,—যদি আমি আজ চাক্কা থাকতুম মা, কোনও কথাই ছিল না ; কিন্তু এখন দাঁড়াচ্ছে কি জান মা,—বাঁধে ছুঁলে আঠারো ঘা—

বধূ স্বপ্নের উচ্ছ্বাসে বাধা দিয়াই কহিল,—আপনি জেনেছেন বাবা আমার বিরুদ্ধে নালিশটা কি ?

কৰ্ত্তা অস্থিরভাবেই উত্তর দিলেন,—অনেক, অনেক মা, অনেক ; এ সব ত আগে থাকতে জানবার কথা নয় ; তবে কি জান মা, সব দফতর থেকেই খবর ফাঁস হয়ে বেরোয়, সরকারের দফতরখানাও বাদ যায় না, তাই জেনেছি, নালিশ উঠেছে তোমার বিরুদ্ধে—তুমি নাকি নানা রকমে সন্দেহের মধ্যে পড়েছ, তোমার হাতের অনেক চিঠিপত্র নাকি ধরা পড়েছে, যে সব শক্ত শক্ত কাজ তুমি করেছ, সেগুলো নজীর হয়ে এখন দাঁড়িয়েছে ; তা ছাড়া—তুমি নাকি আমাকেও মুঠোর ভেতর পুরেছ, আর আমার মুখ পাগলা ছেলেকে উপলক্ষ করে প্রকারান্তরে তুমিই

বাণীীর মালিক হবার চেষ্টায় আছ, আসল উদ্দেশ্য তোমার—সরকারের বিরুদ্ধবাদীদের সাহায্য করা ।

বধু নিবিষ্ট মনেই স্বপ্নের মুখের কথাগুলি শুনিল, কিন্তু তাহার মুখে আতঙ্ক বা দুশ্চিন্তার কোনওরূপ ছায়া পড়িতে দেখা গেল না, সহজ কণ্ঠেই কহিল,—শ্রায়কে জোর করে অশ্রায় সাব্যস্ত করবার অনেক চেষ্টাই অনেকে করে,—কিন্তু শ্রায় চিরদিন শ্রায়ই থাকে ; সত্য কখনও মিথ্যা হয় না । কি বলব, আমি আপনার কুলবধু, নইলে গুঁরা এখানে এলে আমি নিজেই গুঁদের সামনে গিয়ে জবাবদিহি করতুম—

প্রগাঢ় উৎসাহের স্বরে কৰ্ত্তা কহিলেন,—এই জন্মই আমি তোমাকে ডেকেছিলুম মা,—এই জন্মই, এই জবাবদিহি করবার জন্মই ।

বধু বদ্ধদৃষ্টিতে স্বপ্নের মুখের দিকে চাহিয়া কহিল,—বাবা, আমি তা হ'লে—

কৰ্ত্তা কণ্ঠের স্বরে জোর দিয়া কহিলেন,—হাঁ মা, তুমি তৈরী হও, আমি যখন বলছি, কোনও সঙ্কোচ তোমার নেই ; আজ সবই নির্ভর করছে তোমার ওপর । তুমি যাও মা—

বধু কহিল,—তারা যখন আসবেন, প্রয়োজন বুঝে আমি যাব বাবা, এখন আমার সমস্ত কর্তব্য আপনার কাছে, আপনার সেবায়—

অধৈর্য্যভাবে কৰ্ত্তা কহিলেন,—না মা, তোমার সব চেয়ে বড় কর্তব্য এখন তোমার আত্মরক্ষার তোড়বোড় করায়, নিজের ঘরে গিয়ে ভেবে নাও মা, কি ভাবে মুখরক্ষা করবে : আমার সব ভাবনা যে এখন তোমাকে নিয়েই—

বধু অবিচলিত কণ্ঠে উত্তর দিল,—আপনার পা দু'খানি দু'হাতে ধরেই আপনাকে জানাচ্ছি বাবা, আপনি এ সম্বন্ধে নিশ্চিত থাকুন, যার মনে পাপ নেই, তার মর্যাদা মা জগদম্বাই রক্ষা করেন, তাঁর কৃপায় এ বংশের অমর্যাদা হবে না বাবা !

মনে মনে যেন একটা তৃপ্তি অনুভব করিয়া কর্তা আবেগের সহিত কহিলেন,—রক্ষা শুধু তোমারই নয় মা, আমারও ; তার পর মা, যদি এ যাত্রা নিজে রক্ষা পাই,—তখন শাসনের একটা—থাক্ মা, ও বাজে কথা ; কি বলতে কি বলছিলুম ; হাঁ,—তুমি তা হ'লে ওঠ মা,—ভোর হ'তে বোধ হয় বেশী বিলম্ব নেই ।

বধু স্বপ্নের পা দুইখানি আঁতে আঁতে উপাধানের উপর রাখিয় মিনতির কণ্ঠে কহিল,—আমি ত উঠছি বাবা, কিন্তু আমার মিনতি, আপনি আর বকতে পারবেন না ।

কর্তার মুখে হাসি দেখা দিল, কহিলেন,—তাই হবে মা, এবার চুপ করব । তুমি এসো, মা ।

বধু ধীরে ধীরে রোগীর কক্ষ হইতে বাহির হইয়া গেল । কর্তা ক্ষণকাল পরে সজোরে একটি নিশ্বাস ত্যাগ করিয়া আর্ন্তস্বরে কহিলেন,—ইসারায় কথাটা বুঝে নিলে, তাই বলি-বলি করেও আসল কথাটা আর বলা হ'ল না ।

রাণী এ পর্য্যন্ত বধু ও স্বপ্নের কথাপ্রসঙ্গে চুপ করিয়াই ছিলেন, এবার প্রচ্ছন্ন বিক্রমের সুরে কহিলেন,—তা হ'লে যে উচ্ছ্বাস এতক্ষণ চালালে সেটা নকল ?

কথাটা শুনিবামাত্রই কর্তা জ্বলিয়া উঠিলেন ;—তীক্ষ্ণকণ্ঠে উত্তর দিলেন,—নকলের কথা তোমার তোলবার কারণ ? আমি আসলের কথাই না বলেছি !

রাণীও কিছুমাত্র অপ্রতিভ না হইয়া কহিলেন,—আসলের কথা উঠলেই নকলের কথা আপনিই আসে । আমি অন্তর কিছু বলি নি । কথা চেপে রাখবার অভ্যাস আমার নেই !

কর্তা দুই চক্ষুর দৃষ্টি খরতর করিয়া রাণীর দিকে চাহিলেন, পরে একটু গম্ভীর হইয়া কহিলেন,—আর এই অভ্যাসটুকু প্রথম আরম্ভ করতে গিয়েই আমার এই অবস্থা ।

সন্দিগ্ধ দৃষ্টিতে স্বামীর মুখের দিকে চাহিয়া রাণী প্রশ্ন করিলেন,—এ কথা বলবার অর্থ? কাকে লক্ষ্য করে এই আসল কথাটা এতক্ষণে প্রকাশ করা হ'ল?

এবার কঠিন হইয়াই কর্তা কহিলেন,—শুনবে? কিন্তু এটা ঠিক আসল কথা নয়, মুখবন্ধ বলতে পারো। আসল কথাটা কি জান? তোমার গুণধর ছেলে বিগু ডাক্তারকে উকিল ধরে কালেক্টর সাহেবের কাছে এত্তেলা দিয়েছিল আমাদের বিরুদ্ধে—

কে—নিবারণ?

হাঁ, হাঁ, তবে গুণধর ছেলে বললুম কেন!

কি এত্তেলা দিয়েছে?

সে অনেক,—যত রকমের অস্তর আছে, আড়াল থেকে সবগুলোই ছুঁড়েছে—

কে বলেছে এ কথা?

সে খবরে কি দরকার? মনে কর, বাতাস আমার কানে কানে গুনিয়েছে সব, কিন্তু মিছে নয়—সত্যি। এই জগুই কালেক্টর সাহেব কমিশনারকে নিয়ে শিকারের অছিলায় বাগুলিতে গুভাগমন করছেন! এই আসল খবরটা বাপুলি ছাড়া আর কেউ শোনে নি,—আমিও মনের ভেতর চেপে রেখে মুখ বন্ধ করেছিলুম, কিন্তু বরদাস্ত হ'ল না;—মাথা ঠিক রাখতে পারলুম না, তবে আফশোষ এই—এই—ওঃ—

উত্তেজনার প্রাবল্যে কর্তার কণ্ঠস্বর এইখানেই রুদ্ধ হইয়া গেল, মুখের ভঙ্গি ও চক্ষুর অস্বাভাবিকতা কক্ষের সকলকেই চমকিত করিয়া তুলিল; প্রবীণ চিকিৎসক শশব্যস্ত হইয়া রোগীর সান্নিধ্যে ছুটিয়া আসিলেন।

বাণুলীর অধিবাসীদের চমকিত করিয়া প্রত্যাষেই বিভাগের কমিশনার ও কালেক্টর সাহেব বেশ ঘটা করিয়াই বাণুলীর ভূস্বামী-ভবনে পদার্পণ করিলেন। সঙ্গে ছিলেন পুলিশ-সাহেব, মহাকুমার কয়েকজন দারোগা এবং অনেকগুলি সশস্ত্র বরকন্দাজ।

দেওয়ান রাধানাথ বাপুলী পূর্বাঙ্কেই এষ্টেটের বিশিষ্ট আমলাবর্গের সহিত সাহেবদের অভ্যর্থনায় প্রস্তুত হইয়াছিলেন। সুসজ্জিত ড্রইংরুমে অভ্যাগতদের সম্বর্দ্ধনার পর দেওয়ানজী সবিনয়ে জমিদারের আকস্মিক অসুস্থতার সংবাদ জানাইয়া কহিলেন,—আমি তাঁর প্রতিনিধিরূপে আপনাদের সেবা আদিষ্ট হয়েছি, শিকার সম্বন্ধে আপনাদের ষে রূপে অভিরুচি তার যথাযথ ব্যবস্থায় কোনও অবহেলা হবে না।

কালেক্টর সাহেব সন্দিগ্ধ দৃষ্টিতে কমিশনারের দিকে চাহিলেন; ক্ষণকাল উভয়ের মধ্যে চুপি চুপি কি একটা পরামর্শ হইয়া গেল। পরক্ষণে কালেক্টর সাহেব আসন হইতে উঠিয়া দেওয়ানজীকে একান্তে ডাকিয়া তাঁহাকে অত্বর-অশ্রুতস্বরে জানাইয়া দিলেন যে, শিকারের অছিলায় তাঁহারা আসিয়াছেন বটে, কিন্তু শিকারটাই তাঁহাদের ঠিক উদ্দেশ্য নয়; জমিদারের পুত্রবধুর বিরুদ্ধে তাঁহারা যে গুরুতর অভিযোগ পাইয়াছেন, সেই সূত্রে রীতিমত তদন্ত করিতেই তাঁহাদের এভাবে আসা। তবে কমিশনার সাহেবের একান্ত ইচ্ছা এতবড় এষ্টেটের যিনি মালিক, তাঁর পারিবারিক সম্ভ্রম রক্ষার অনুরোধে প্রাথমিক তদন্ত গোপন ভাবেই শেষ করা হয়।

দেওয়ানজী জানাইলেন,—আপনার এই অপ্রত্যাশিত সংবাদ আমাকে চমৎকৃত করেছে; যার সম্বন্ধে আপনারা তদন্ত করতে এসেছেন, তাঁর প্রকৃতি এত সুন্দর ও নির্দোষ যে, শেষে আপনারাই অমৃতপ্ত হবেন।

কালেক্টর সাহেব কহিলেন,—ঈশ্বরের অনুগ্রহে তিনি নিরপরাধ প্রতিপন্ন হলেই আমরাও অত্যন্ত আনন্দ অনুভব করব ; কিন্তু তদন্ত কার্যটি অপরিহার্য।

দেওয়ানজী কহিলেন,—তা হ'লে, হজুরদের যদি অভিপ্রায় হয়, স্টেট-রুমেই তদন্তের ব্যবস্থা করা যেতে পারে।

আবার ক্ষণকাল সাহেবদের মধ্যে পরামর্শ হইল এবং কালেক্টর দেওয়ানজীকে জানাইলেন, সে-ভাল ; কিন্তু সে-ঘরে বাইরের কেউ থাকবে না ; সরকার পক্ষের কমিশনার, কালেক্টর, পুলিশ-সাহেব ও কমিশনারের পার্শনাল এসিষ্ট্যান্ট—এই কয়জন মাত্র থাকিবেন এবং দেওয়ানজী ও কোনও একজন উকীল অভিযুক্তকে সাহায্য করিবেন।

দেওয়ানজী কহিলেন,—উকীলের উপস্থিতির কোনও প্রয়োজন হবে না, যার বিরুদ্ধে অভিযোগ, যদি মিথ্যা হয়, তিনি নিজেই খণ্ডন করতে পারবেন ; আর যদি সত্য হয়, স্বয়ং জ্যাকসন সাহেব এসে দাঁড়ালেও কিছুই হবে না।

দেওয়ানজীর কথায় প্রীত হইয়া কমিশনার সাহেব কহিলেন,—ঠিক কথা ; আপনি সেই ব্যবস্থাই করুন।

ব্যবস্থা করিতে বিলম্ব হইল না। জমিদারী-সেরেস্টার বিভিন্ন বিভাগেব মধ্যবর্তী সুবিশাল সুসজ্জিত গদী-গৃহে চারিজন পদস্থ রাজ-কর্মচারী সমবেত হইলেন। বৃহৎ গৃহের আড়ম্বরপূর্ণ রাজকীয় ব্যবস্থা সকলকেই চমৎকৃত করিয়া দিল।

কমিশনার সাহেব প্রথমেই প্রশ্ন করিলেন,—জমিদারের ছেলেরা কোথায় ? ইচ্ছা করলে তাঁরা এখানে উপস্থিত থাকতে পারেন।

দেওয়ানজী কহিলেন,—ছোটকুমার বাইরে গেছেন, কাল রাত্রেই তাঁকে খবর দেওয়া হয়েছে ; বড়কুমার বাড়ীতেই আছেন, তাঁরও শরীর ভাল নয়, তবে যদি তদন্ত সূত্রে প্রয়োজন হয়, তিনি নিশ্চয়ই আসবেন।

বড়কুমারের শরীর সম্বন্ধে সংবাদটুকু কালেক্টর সাহেবকে কতকটা আশ্বস্ত করিল। ইতিমধ্যেই ভিতরে সংবাদ গিয়াছিল এবং বাহার বিরুদ্ধে অভিযোগ, তদন্তকারীরা সাগ্রহেই সেই ভীষণ প্রকৃতির মেয়েটির প্রতীক্ষা করিতেছিলেন।

কিন্তু অধিকক্ষণ তাঁহাদিগকে প্রতীক্ষা করিতে হইল না, ভিতরের দিকের দীর্ঘ দ্বারের সুশোভন পরদাখানি ঠেলিয়া তাঁহাদের একান্ত আকাঙ্ক্ষিত, যে মেয়েটি তাঁহাদের সম্মুখে আসিয়া দাঁড়াইল, তাহার অনবদ্য আকৃতি, অনিন্দ্যসুন্দর মুখের অপূর্ব দীপ্তি ও কুণ্ঠাহীন নির্ভিক ভঙ্গি দেখিয়া তদন্তকারীরা ভুলিয়া গেলেন যে, এই অসাধারণ মেয়েটির বিরুদ্ধে আরোপিত গুরুতর অভিযোগগুলির তদন্ত করিতেই তাঁহারা উপস্থিত,—কমিশনার সাহেবের দেখাদেখি সকলেই তৎক্ষণাৎ আসন ছাড়িয়া উঠিয়া দাঁড়াইলেন, মাথার টুপী খুলিয়া কিঞ্চিৎ নতও হইলেন।

কিন্তু বাহার উদ্দেশে, পদস্থ রাজপুরুষদের এই সম্মান, সেই মেয়েটিও তৎক্ষণাৎ প্রত্যভিবাদনের ভঙ্গিতে মাথাটা অবনত করিয়া পরিষ্কার ইংরেজীতে কহিল,—সামান্য একটা নারীকে গ্রেপ্তার করতে এসেও আপনারা যে শিষ্টাচারের পরিচয় দিলেন, সেটা আপনাদের জাতিগত সভ্যতারই নিদর্শন, এজন্য আমিও বিনীতভাবে ধন্যবাদ জানাচ্ছি।

সকলেই চমৎকৃত। বাঙ্গলার এমন অতি অল্প ভূস্বামীর সহিত কমিশনার ও কালেক্টর সাহেব পরিচিত ছিলেন, বাহার বিস্ময় ইংরেজীতে তাঁহাদের সহিত কথোপকথনে সমর্থ। পল্লী-বঙ্গের এই বিখ্যাত জমিদারটিও যে এ বিষয়ে অনভিজ্ঞ, তাহাও কালেক্টর সাহেবের অবিদিত ছিল না। কিন্তু তাঁহারই তরুণী বধূটির মুখে এমন শিষ্টাচার সম্বন্ধে ইংরেজি বাণী ও বিস্ময় উচ্চারণ শুনিয়া তাঁহারা ক্ষণকাল স্তব্ধ হইয়া রহিলেন।

বধূই নিস্তব্ধতা ভঙ্গ করিয়া কহিল,—আমাদের দুর্ভাগ্য, যে আমি

মাননীয় স্বশ্রুত অসুস্থতাবশতঃ আপনাদের ণায় পদস্থ রাজপুরুষদের সম্বন্ধনায় বঞ্চিত, যদিও আমি তাঁর পুত্রবধু, কিন্তু আপনাদের যোগ্য সম্বন্ধনার অধিকার আমারও নেই ; যেহেতু আমি জানতে পেরেছি, আমার বিরুদ্ধে কোনও অভিযোগস্বত্রেই আপনারা তদন্ত করতে এসেছেন। আপনাদের এ কার্যে যথাশক্তি সাহায্য করতেই আমি এসেছি। আপনারা অনুগ্রহ ক'রে আসন গ্রহণ করুন, আমি আপনাদের সকল প্রশ্নের উত্তর দিতেই প্রস্তুত।

কমিশনার সাহেব কহিলেন,—আপনি আপনার আসনে আগে বসুন ; যদিও আমরা কর্তব্যের অনুরোধে এই অপ্রীতিকর কার্যে অগ্রসর হয়েছি, কিন্তু যে পর্যন্ত আপনার অপরাধ প্রতিপন্ন না হবে, আপনার স্বাধীনতা ও মর্যাদা অক্ষুণ্ণ থাকবে। আপনি অনুগ্রহ করে বসুন।

অগত্যা সন্নিহিত একখানি শোফায় বধুকে বসিতে হইল। বধু বসিলে, কমিশনার সাহেব ও তাঁহার সঙ্গীরা আসন গ্রহণ করিলেন।

অতঃপর তদন্ত কার্য আরম্ভ হইল। কমিশনার সাহেবের সহকারী বাঙ্গালী-সাহেবটি দলিল দস্তাবেজের ফাইলটি কমিশনার সাহেবের হাতে দিলেন।

কাগজগুলি ক্রমিক সংখ্যায় চিহ্নিত হইয়া ফাইলে আবদ্ধ ছিল। প্রথম কাগজখানির উপর চক্ষু বুলাইয়া কমিশনার সাহেব বধুকে প্রথম প্রশ্ন করিলেন,—আপনার নাম শ্রীমতী চণ্ডী দেবী ?

বধু তৎক্ষণাৎ উত্তর দিল,—হাঁ।

পরবর্তী প্রশ্ন,—কতদিন হল আপনার বিবাহ হয়েছে ?

বধু উত্তর দিল,—আজকের দিনটি ধরে ছয় মাস একুশ দিন মাত্র।

পুনরায় কমিশনার সাহেবের প্রশ্ন,—শ্যামাপুরে আপনার পিত্রালয় ? বিবাহের পূর্বে সেইখানে থাকতেন ?

বধু কহিল,—হাঁ।

কমিশনার—সেখানে আপনি কোন মিসন গার্ল স্কুলের লেডী টিচার মিস্ খ্রীষ্টকুমারীকে প্রহার ও রীতিমত লাঞ্চিত করেছিলেন ?

বধূ—প্রহার অবশ্য করি নি, কিন্তু প্রয়োজন-মত লাঞ্চিত যে করেছিলুম এ কথা সত্য ।

কমিশনার—এটা কি অপরাধ বলে গণ্য হতে পারে না ?

বধূ—এ ঘটনা দেড় বছর পূর্বের, এতকাল পরে কি সেই অপ্রীতিকর প্রসঙ্গ নিয়ে আমার বিরুদ্ধে নালিশ উঠেছে স্মার ?

কমিশনার—নালিশ ঠিক ওঠে নি, কিন্তু মূল নালিশের সংশ্রবে এটা নজীর হয়ে দাঁড়িয়েছে । আপনি উত্তর দিন ।

বধূ—আমার উত্তর কি আপনি সত্য বলে বিশ্বাস করবেন ?

কমিশনার—নিশ্চয়ই ; আমার দৃঢ় বিশ্বাস, আপনার মত সুশিক্ষিতা মহিলা মিথ্যা বলবেন না ।

বধূ—তা হ'লে সে ইতিহাসটা আমাকে সংক্ষেপে বলতে হয় ।

কমিশনার—বলুন ।

বধূ—আমার যতদূর মনে আছে, ঐ ইস্কুলের কোনো উৎসব-সভার গ্রামের অন্যান্য মহিলাদের মত আমিও নিমন্ত্রিতা হয়ে গিয়েছিলুম । কিন্তু ইস্কুলের লেডী টিচার আমাদের অকারণ অপমান করেছিলেন ।

কমিশনার—কি সূত্রে ?

বধূ—তিনি বক্তৃতাসূত্রে আমাদের সমাজ, ধর্ম ও সংস্কারের ওপর অযথা আক্রমণ করেন, আমিই সেখানে একমাত্র মেয়ে প্রতিবাদ তুলেছিলুম ।

কমিশনার—বটে ! তার পর ?

বধূ—সেই প্রতিবাদের উত্তরে তিনি তর্কসূত্রে কোনও প্রতিবাদ না তুলে, আমাকে তাঁর সামনে ডেকে আমার এই গালে হাত তুলেছিলেন ।

কমিশনার—আপনি তখন কি করলেন ?

বধু—প্রভু বীণাশ্রীঠের উপদেশটি মেনে নিয়ে এ গানটিও অবশ্য তাঁর দিকে ফিরিয়ে দিই নি,—বরং তাঁকে কিঞ্চিৎ শিষ্টাচার শিক্ষা দিতে হাতখানা দিয়ে তাঁর টেবিলখানা উল্টে দিয়েছিলুম, তিনি সেই সঙ্গে অবশ্য পড়ে গিয়েছিলেন, দোয়াতের কালিতে তাঁর কালো মুখখানা আরও কালো হয়ে গিয়েছিল।

কমিশনার সাহেব ও তাঁহার সহচরগণ এ সময় অতিকষ্টে মূখের উদগ্র হাসি সম্বরণ করিলেন।

বধু অকুণ্ঠিতভাবেই পুনরাব কহিল,—এ কার্যকে যদি আপনারা অপরাধ বলে ধরেন, তা হ'লে অবশ্যই আমি অপরাধী।

এ প্রসঙ্গ তাগ করিয়া সম্মিতমুখে কমিশনার সাহেব অন্য প্রশ্ন তুলিলেন,—এ কথা কি সত্য নয়—আপনিই জোর-জবরদস্তি করে ঐ ইন্স্কলটা তুলে দেন ?

বধু দৃঢ়স্বরে উত্তর দিল,—কখনই না : হতে পারে গোণভাবে এ ব্যাপারে আমাকেই উপলক্ষ হতে হয়েছিল, কিন্তু আমি নিজে ওর বিরুদ্ধে একটি অঙ্গুলি তোলবারও অবসর পাই নি।

কমিশনার—কেন বিবাহের সময় আপনার স্বপ্তরের কাছে এই মর্মেই কি বোতুক চান নি যে, ঐ ইন্স্কলের পাঠ উঠে বায়, আর আপনার নামে একটা নতুন ইন্স্কল বসে ?

বধু—আমি আমার স্বপ্তরের কাছে সত্যই এই বোতুক চেয়ে নিয়েছিলুম যে, এমন একটা ভাল ইন্স্কলের প্রতিষ্ঠা হয়, যেখানে মেয়েরা বিনা-খরচে লেখাপড়া শিখতে পারে এবং সেই শিক্ষাতে বাধ্যবাধকতা থাকে ; কোনও ইন্স্কল তুলে দিতে তাঁকে বলি নি, তিনিও দেন নি ; তবে যদি আমার এই প্রার্থনা উপলক্ষ হয়ে আপনা-আপনিই কোন স্কুলের দরজা বন্ধ হয়ে গিয়ে থাকে, সে আলাদা কথা।

কমিশনার—কিন্তু এই চাওয়াটা কি সমর্থনযোগ্য ?

বধু—আপনাদের ইয়োরোপের কোনও সভ্য রাজ্যের একটা নজীর দেখিয়ে আমি প্রতিপন্ন করতে পারি যে আমার ঐ চাওয়াটা কিছুমাত্র অস্বাভাবিক নয় ;—এর গোড়ায় ছিল শুধু জাতীয় সমাজ ও শিক্ষার প্রতি দরদ, অন্যের প্রতি বিদ্বেষ নয় ।

কমিশনার—ইয়োরোপের কি নজীর আপনি দেখাতে চান ?

বধু—ফ্রান্সে-প্রুসিয়ান যুদ্ধের ফলে ফ্রান্সের আলসেস-লোরেন নামে দুটো প্রদেশ জার্মানরা দখল করে নেয়, আর সেখানকার সমস্ত ইন্সকুলে জার্মান-সরকার জার্মান ভাষাতেই ফরাসী ছেলে-মেয়েদের শিক্ষার ব্যবস্থা দেন ; ফরাসীদের আপত্তি-প্রতিবাদ সমস্তই ভেসে যায় । কিছুকাল পরে জার্মানীর রাণী আলসেস-লোরেন পরিদর্শন করতে আসেন, সেই সময় সমস্ত ইন্সকুলের মেয়েরা মিলিত হয়ে তাঁর সম্বর্দ্ধনা করে । রাণী মেয়েদের ব্যবহারে অত্যন্ত খুসী হয়ে বলেন—তোমাদের জন্য আমি কি করতে পারি, —তোমরা কি চাও ? দশ বছরের একটি মেয়ে তৎক্ষণাৎ রাণীকে জানায়, —আলসেস-লোরেনের সমস্ত ইন্সকুলে বাতে ফরাসী ভাষায় শিক্ষা দেওয়া হয়, আপনি তার ব্যবস্থা করে যান, তা হ'লেই আমাদের সমস্তই পাওয়া হবে । রাণী তাঁর প্রতিশ্রুতি রেখেছিলেন ।

কমিশনার সাহেব কহিলেন,—হ্যাঁ, এ ইতিহাস আমি পড়েছি ।

বধু—তা হ'লে আপনিই বলুন, যেখানে আমাদের ধর্ম ও সংস্কারের সম্বন্ধে সঙ্গতি রেখে সুশিক্ষা দেবার মত বিদ্যালয়ের একান্ত অভাব ছিল, সেই অভাবটুকু মোচনের প্রার্থনাই আমি যদি করে থাকি, সেটা কি দোষের হয়েছে ?

কমিশনার সাহেব স্তব্ধভাবে হাতের কাগজপত্রগুলির উপর দৃষ্টিবদ্ধ করিয়া কিছুক্ষণ চুপ করিয়া রহিলেন, তাহার পর কহিলেন, কোনও রূপ বিদ্বেষ যদি আপনার এই প্রার্থনার মূলে প্রচ্ছন্ন না থাকে, তা হ'লে নিশ্চয়ই ইহা দোষের নয়, বরং প্রশংসার বিষয় । কিন্তু নানান্বয়ে

আমরা জানবার সুযোগ পেয়েছি যে, শিক্ষা-প্রচার সম্বন্ধে আপনার উদ্দেশ্য বিপ্রবলুলক !

বধু কণ্ঠস্বর কিঞ্চিৎ তীক্ষ্ণ করিয়া কহিল,—কিরূপ প্রমাণের উপর নির্ভর করে আমার উদ্দেশ্য সম্বন্ধে আপনাদের এই ভয়ঙ্কর ধারণা, সেটা আমি জানতে পারি ?

হাতের ফাইলটি তুলিয়া ধরিয়া কমিশনার সাহেব কহিলেন,—নিশ্চয়ই ; এই ফাইলটা আপনি দেখুন, এতে যে সব চিঠি এবং ছাপা ইস্তাহার আছে, সেগুলো ভাল করে পড়ুন ; তারপর এগুলো সম্বন্ধে আপনার কৈফিয়ৎ দিন ।

ফাইলটির ভিতর কতকগুলি চিঠি ও কয়েকখানি মুদ্রিত ইস্তাহার ছিল । বধু সেগুলি দেখিয়া ও কিছু কিছু পড়িয়া ফাইলটি সম্বন্ধিত একখানি আইভরি টিপয়ের উপর রাখিয়া কহিল,—এর মধ্যে যে অস্ত্রগুলি আপনারা সংগ্রহ করে রেখেছেন, এগুলি অবলম্বন করেই যদি আমার বিরুদ্ধে বুদ্ধ ঘোষণা করে থাকেন, আপনাদের সকল পরিশ্রমই ব্যর্থ হয়েছে ।

বধুর স্পর্ধায় বিরক্ত হইয়া ক্ষুব্ধস্বরে কমিশনার প্রশ্ন করিলেন,—কেন ?

শ্রেষের সুরে বধু উত্তর দিল,—কারণ, ওর সবগুলিই অচল ।

কমিশনারের মুখে বিরক্তির চিহ্ন সুস্পষ্ট হইয়া উঠিল ; তীক্ষ্ণদৃষ্টিতে বধু তাহা লক্ষ্য করিয়া কহিল,—ওগুলোর সম্বন্ধে আমার কৈফিয়ৎটুকুও অগ্রহ করে শুনুন ।

বধু পরক্ষণে ফাইল হইতে একখানি ছাপা ইস্তাহার বাহির করিয়া কহিল,—নীচে আমার নাম দিয়া এই সব ইস্তাহারে ঘোষণা করা হয়েছে—
“শ্রামাপুরের মিশন ইন্স্কুল তুলে দিতে তার চেয়েও কঠোর, এমন কি স্থল-বিশেষে চরম পন্থা অবলম্বন করা চাই । দু-একটা মিশন ইন্স্কুলে উপদ্রব হ'লে মিশনারী টিচারদের উপর আক্রমণ চ'ললে, এদেশে এদের যতগুলো

ইস্কুল আছে, সবগুলোর দরজা বন্ধ হয়ে যাবে।”—আপনারা নিশ্চয়ই লক্ষ্য করেছেন, এই ইস্তাহারে প্রেসের নাম নাই, শুধু আমার নামটাই ছাপা আছে। আপনাদের স্বীকার করতে হবে যে, আমার নামের কোনও খ্যাতি নেই এবং অন্ধপুরের বাইরে পা-বাড়াবার আমার অধিকার নেই, আমার যদি এই উদ্দেশ্যই থাকবে, আমি তার সিদ্ধির জন্য এভাবে ইস্তাহার ছাপাতে বাব কেন? আমার স্বপ্নের যে প্রতাপ ও প্রভাব, তাতে তাঁর সমস্ত জমিদারীর মধ্যে বতগুলো মিশনারী ইস্কুল আছে—আইন সঙ্গত উপায়েই সেগুলোর দরজা বন্ধ করা যেতে পারত, কিন্তু এক শ্যামাপুরের দৃষ্টান্ত ত অল্প কোথাও অবলম্বন করা হয় নি।

কমিশনার সাহেব মনোযোগের সজ্জিত বধুর কথাগুলি শুনিলেন, তাহার পর প্রশ্ন করিলেন,—তা হ'লে এই ছাপানো ইস্তাহারগুলোর সঙ্গে আপনার সংশ্লিষ্ট স্বীকার করতে চান?

বধু কঠিন হইয়া উত্তর দিল,—নিশ্চয়ই।

কমিশনার—আর ঐ সব চিঠি? ওগুলোর সঙ্গেও কি আপনি সংশ্লিষ্ট স্বীকার করবেন?

বধু—আমি তা আগেই বলেছি স্মার, ও সমস্তই অচল! চিঠিগুলো পরীক্ষা করলেই আপনারা বুঝতে পারবেন, ভেতরের লেখা কোনও মেয়ের, কিন্তু তার শিক্ষা সামান্য, পত্রের ছত্রে ছত্রে বর্ণাশুদ্ধি; আর লেফাফার ঠিকানা কোনও শিক্ষিত পুরুষের, পাকা হাতের ইংরেজী হস্তাক্ষর। আমান হাতের ইংরেজী ও বাঙ্গলা দুটোই আপনাদের সামনেই লিখে দিচ্ছি, আপনারাও পরীক্ষা করুন এবং পরে হস্তলিপি বিশারদদের পরীক্ষার জন্য দিলেও জানতে পারবেন, আমার কথা মিথ্যা নয়।

নিকটের আধারে লিখিবার ব্যবতীয় উপকরণ ছিল, বধু একখানি সাদা কাগজে কয়েক ছত্র বাঙ্গলা ও ইংরেজী লিখিয়া কমিশনার সাহেবের টেবলে রাখিয়া দিল।

তৎক্রমাৎ বধূ হস্তলিপি ও ফাইলটি লইয়া কমিশনার সাহেবের তত্ত্বাবধানে সমবেত কয়জন রাজকর্মচারী গবেষণায় প্রবৃত্ত হইলেন।

পরীক্ষা অন্তে কোনও রূপ মন্তব্য প্রকাশ না করিয়া কমিশনার সাহেব কহিলেন,—কিন্তু চিঠিগুলির লেফাফায় এখানকার ডাকঘরের মোহর পড়েছে, সেটা আপনি নিশ্চয়ই লক্ষ্য করেছেন ?

বধূ পরিষ্কার কর্ত্তেই উত্তর দিল,—করেছি। প্রেসে ইস্তাহারগুলো ছাপা হয়েছে যেমন সত্য, চিঠিগুলোও ডাকঘরে ফেলা হয়েছে তেমনই সত্য ; কিন্তু লেখিকা ও প্রেরিকা বলে যে নামটি ব্যবহার করা হয়েছে, সেইটিই শুধু সত্য নয়।

কমিশনার—এমন হওয়াও ত আশ্চর্য নয় যে, আপনি আত্মরক্ষার অভিপ্রায়ে চিঠিগুলো অপর কাউকে দিয়ে লিখিয়েছেন ?

বধূ—তাতে আমার লাভ ? আন্দোলনে যোগ দিয়ে বাঙ্গলার যে সব মেয়েরা বিখ্যাত হয়েছেন, তাঁদের মত নামের প্রতিষ্ঠা আমার বখন নেই, আমার নাম ইস্তাহারে জড়াবার কি সার্থকতা বলুন ত ? হাতের লেখা প্রকাশ করবার সাহস বার নেই, ইস্তাহারে নাম প্রকাশের সাহস তার পক্ষে কতটুকু সম্ভব ?

কমিশনার—আপনি শপথ করে বলতে পারেন, ফাইলের এই সব কাগজপত্রের সম্বন্ধে আপনি বরাবরই অজ্ঞ—কোনও সংশ্রবই আপনার নেই ?

বধূ—এই ফাইলটি দেখেই ত আমার বক্তব্য আমি আগেই বলেছি, আর ঈশ্বরের নামে শপথ করে আমি দৃঢ়তার সঙ্গে এইটুকু বলতে পারি যে, এ পর্য্যন্ত আমি একটি মিথ্যা কথনও বলি নাই এবং সত্য গোপনের শিক্ষা পাই নাই।

কমিশনার—তা হ'লে, আপনার কোনও শত্রুপক্ষ আপনার অনিষ্টের

উদ্দেশ্যে আপনার নামেই এই কাজগুলি সুকৌশলে সম্পন্ন করেছে, আপনি কি এরূপ অনুমান করেন ?

বধু—এ সম্বন্ধে আমার অনুমান অপেক্ষা আপনাদের অনুসন্ধান কি অধিক বলবান নয় ? আমি এ সম্বন্ধে একটা কথা কি জিজ্ঞাসা করতে পারি ?

কমিশনার—নিশ্চয় ; আত্মপক্ষ সমর্থনে এখানে যে কোনও প্রশ্নই আপনি তুলতে পারেন ।

বধু—ইস্তাহারের নীচে শুধু আমার নামটি ছাপানো আছে, কোনও সমিতির নাম ঠিকানার উল্লেখ মাত্র নেই ; চিঠিগুলি যে সব লেফাফার মধ্যে পাঠানো হয়েছে, তাতে লেখা আছে,—‘সেক্রেটারী, নারী-প্রগতি সমিতি, টালিগঞ্জ, সাউথ কলিকাতা ।’—নিশ্চয়ই আপনারা এই ঠিকানা থেকেই এসব অস্ত্রগুলি আবিষ্কার করেছেন ; কিন্তু সেখানে কি সত্যই কোনও সমিতির অস্তিত্ব আছে ? যদি থাকে, সেক্রেটারীর সন্ধান পেয়েছেন ? কোনও সভ্যকে সেখানে দেখেছেন ? আমার সম্বন্ধে তাঁদের অভিমত গ্রহণ করেছেন ? তাঁরা কি একরার করেছেন, আমাকে জানেন বা আমি তাঁদের সঙ্গে প্রত্যক্ষে বা পরোক্ষে সংস্বব রাখি ?

এ প্রশ্নের উত্তরে অত্যন্ত অনহিষ্ণুভাবেই কমিশনার সাহেব কহিলেন,—আপনার এই প্রশ্নগুলির সম্বন্ধে কোনও উত্তরই উপস্থিত আপনাকে দিতে পারব না, ক্ষমা করবেন ।

তীক্ষ্ণদৃষ্টিতে একবার কমিশনার সাহেবের দিকে চাহিয়াই বধু বেশ সহজ কণ্ঠেই কহিল,—আমাকে আর কিছু প্রশ্ন করবার আছে ? আপনাদের সন্দেহ কি আমি মোচন করতে পেরেছি ?

কমিশনার সাহেব কথায় একটু জোর দিয়াই এবার কহিলেন,—আপনি ব্যস্ত হবেন না, আগাদের তদন্ত এখনও শেষ হয় নি, আরও প্রশ্ন আছে ।

বধূর মুখখানি আপনা-আপনিই একটু নত হইল। কমিশনার সাহেব বক্রদৃষ্টিতে বধূর দিকে একবার চাহিলেন, তাহার পরই পুনরায় প্রশ্ন তুলিলেন,—আপনার স্বামীর নাম গোবিন্দনারায়ণ ?

বধূ—হাঁ।

কমিশনার—তিনি জন্মাবধিই জড়ভাবাপন্ন, মূখ্য এবং উন্মাদ ?

বধূ—অনেকেরই এরূপ ধারণা বটে।

কমিশনার—আপনার কি ধারণা তাঁর সম্বন্ধে ?

বধূ—এ প্রশ্নেরও কি উত্তর দিবার কোনও সার্থকতা আছে আমার পক্ষে ? জিজ্ঞাসা করতে পারি কি আর, কি উদ্দেশ্যে এ প্রশ্ন আমাকে করা হচ্ছে ?

কমিশনার—এই উদ্দেশ্যে যে, আপনার মত একজন মার্জিত-রুচি শিক্ষিতা মহিলা এমন অপদার্থকে বিবাহ করেছিলেন কোনও দলের প্ররোচনায়—ভবিষ্যতে এইমূত্রে এই এষ্টেটের অর্থে উক্ত দল প্রভাবান্বিত হবে এই অভিপ্রায়ে।

বধূ—আমি যদি এই প্রশ্নের উত্তরে বলি, সকলেই যে-মানুষটিকে অপদার্থ সাব্যস্ত করেছিল, আমি তার মধ্যে পদার্থ আছে বুঝে, নিজের চেষ্টায় তাঁকে আদর্শ মানুষ করে তুলব বলেই বিবাহ করেছিলুম এবং আমার সে চেষ্টা সার্থক হয়েছে,—তা হ'লে কি আপনি স্বীকার করবেন যে, আপনার এ সন্দেহও অমূলক ?

বধূর এই উত্তর শুধু কমিশনার সাহেব নহে, তাঁহার অন্য তিন জন সহচরকেও সেই মুহূর্ত্তে সচকিত করিয়া তুলিল। চারিজন রাজকর্মচারীর অর্থপূর্ণ দৃষ্টি-বিনিময়ের অভিনয় বধূর দৃষ্টি এড়াইল না। বধূ বুকিল, প্রসঙ্গ এবার উপসংহারের পথে আসিয়াছে। সাহেবরা ভাবিলেন, নিজের কথাতেই এই অদ্ভুত মেয়েটি এবার ধরা পড়িয়া গিয়াছে ! এরূপ ভাবিবার হেতু যথেষ্ট ছিল। অন্য প্রসঙ্গগুলির অবস্থা বধূর যুক্তিতে কাহিল হইয়া

পড়িলেও, আলোচ্য প্রসঙ্গটি যে একেবারেই অব্যর্থ সে সম্বন্ধে তাঁহাদের মনে কোনও সন্দেহই ছিল না। তদন্তকারীরা তদন্তে আসিবার পূর্বে কোনও ইংরেজী সাময়িক পত্রে এই এষ্টেট সম্বন্ধে প্রকাশিত বিবরণেও জ্ঞাত হইয়াছেন যে, জমিদারের জ্যেষ্ঠ পুত্র জড়ভাবাপন্ন ও বিকৃত-মস্তিষ্ক; বাণুলীতে প্রবেশ করিয়া সর্বসাধারণের অভিমত হইতে এই সিদ্ধান্ত প্রকৃত বলিয়াই তাহারা অবগত হইয়াছেন। অথচ, বধুই এখন তাঁহাদের সম্বন্ধে বলিতে চাহে—তাহার স্বামী অপদার্থ নহে।

বধুর কথাটা দৃঢ়ভাবে উপলব্ধি করিবার উদ্দেশ্যে কমিশনার সাহেব কাহিলেন,—আপনি কি আপনার এই কথাগুলি এখনই প্রত্যাহার করবেন ?

বধু মুখ তুলিয়া প্রশ্ন করিল,—কেন ?

কমিশনার—আপনার কথায় স্পষ্টই, প্রকাশ পাচ্ছে যে, আপনার স্বামী মোটেই অপদার্থ অর্থাৎ বিকৃত মস্তিষ্ক বা মুর্থ নন, তিনি স্বাভাবিক অবস্থায় আছেন !

বধু—অন্ততঃ আমার এইরূপ ধারণা তাঁর সম্বন্ধে।

কমিশনার কিন্তু অত্নের ধারণা তাঁর সম্বন্ধে কিরূপ, আপনি কি তা বিশেষভাবে জ্ঞাত ? নন

বধু—আমাকে এ প্রশ্ন করাহ বৃথা ; অত্নের ধারণা অন্তসারে আমার বিবেক দ্বারা পরিচালিত হতে পারে না।

সাহেবের লাল মুখখানার উপর মুহূর্তের জন্ত যেন একখানা ধূসর আবরণ পড়িল। পরক্ষণেই আত্মসম্বরণ করিয়া কমিশনার সাহেব দৃঢ়স্বরে কহিলেন, তা হ'লে অনর্থক আমরা সন্দেহের পথে চলেছি, আপনার উপযুক্ত স্বামীর সহিত পরিচিত হবার সুযোগ এক্ষেত্রে আমরা পরিত্যাগ করতে পারি না ; আমরা তাঁর উপস্থিতি প্রত্যাশা করছি।

বধু অর্থপূর্ণ দৃষ্টিতে দেওয়ানজীর দিকে চাহিতেই, তিনি উঠিয়া ঘরের

দিকে অগ্রসর হইলেন। ভিতরে কতিপয় পরিচারিকা আজ্ঞা প্রতীক্ষায় দাঁড়াইয়া ছিল, তিনি তাহাদিগকে যথোচিত নির্দেশ দিলেন।

কিছুক্ষণ সকলেই নীরব। সহসা কমিশনার সাহেব সে নীরবতা ভঙ্গ করিয়া কৃৎস্নক প্রশ্ন করিলেন,—আপনার স্বামীর সম্বন্ধে আপনার উচ্চ ধারণা অনুসারে তাঁকে সুশিক্ষিত বলে গ্রহণ করবার আশা বোধ হয় আমরা করতে পারি ?

বধূ উত্তর দিল,—ইংরেজীই যদি শিক্ষার মাপকাঠি হয়, আর সেইটি উপলক্ষ্য কবেই আপনারা তাঁর শিক্ষার বিচার করতে চান, তা হ'লে হয় ত হতাশ হবেন, সে রকম সুশিক্ষিত অবস্থায় উপনীত হওয়াটা তাঁর পক্ষে এখনও সময়সাপেক্ষ। তবে কিছুকাল পরে সে ত্রুটিটুকুও তাঁর থাকবে না, বাঙ্গালার যে কোনও সুশিক্ষিত জমিদারের সঙ্গে সমান-তালে পাকলে তিনি কল্পক্ষেত্রে অগ্রসর হতে পারবেন,—এ ভরসা আমি রাখি।

কমিশনার সাহেব কহিলেন,—আপনার স্বামীর সম্বন্ধে অশ্রুপক্ষ থেকে আমরা এপর্যন্ত যে সংবাদ পেয়েছি, সেই সূত্রেই আমরা তাঁর সঙ্গে আলাপ করব। আমরা যদি দেখি, তিনি স্বাভাবিক অবস্থায় আছেন, তা হ'লেই আমরা আপনার সমস্ত উক্তি স্বীকার করে এইখানেই তদন্ত শেষ করব।

বধূর মুখে কোনও পরিবর্তনের চিহ্ন দেখা গেল না, শুধু সে কহিল,—
আমি কি কিছুক্ষণের জন্য ভিতরে যেতে পারি ?

বধূর প্রশ্নের সঙ্গে সঙ্গে কমিশনার সাহেব আসন হইতে উঠিয়া কহিলেন,—নিশ্চয়ই ; যদি প্রয়োজন হয় আমরা আপনাকে আহ্বান করব।

বধূ এই কক্ষে আসিবার সময় যেভাবে সাহেবদের সম্বন্ধনা পাইয়াছিল, এই কক্ষ ত্যাগ করিবার সময়ও তাহাতে বঞ্চিত হইল না।

অল্পক্ষণ পরেই দ্বারের পরদা ঠেলিয়া গোবিন্দনারায়ণ কক্ষমধ্যে প্রবেশ

করিল। তুষারশুল্ক ক্ষোম পরিচ্ছদধারী কঠোর সংযম ও ব্রহ্মচর্যাপরায়ণ আগন্তুক যুবক দীর্ঘায়ত দিব্যমূর্তির দিকে নির্ঝাক দৃষ্টিতে সাহেবরা চাহিয়া রহিলেন।

দেওয়ান কহিলেন,—ইনিই এই এষ্টেটের জমিদার বাবু হরিনারায়ণ গাঙ্গুলীর জ্যেষ্ঠ পুত্র গোবিন্দনারায়ণ গাঙ্গুলী।

গোবিন্দনারায়ণ রীতিমত গাঙ্গুলীর সহিত অগ্রসর হইয়া সাহেবদের উদ্দেশে ইংরেজীতে সুপ্রভাত জানাইয়া অভিবাদন করিল।

তাঁহার সঙ্গে সঙ্গেই কমিশনার সাহেব আসন হইতে উঠিয়া প্রত্যভিবাদনস্থলে গোবিন্দের করমর্দন করিলেন, কালেক্টর প্রভৃতিকেও তাঁহার আদর্শের অনুসরণ করিতে হইল।

শিষ্টাচার বিনিময়ের পর সকলেই আসন গ্রহণ করিলে কমিশনার সাহেব গোবিন্দনারায়ণের দিকে ক্ষণকাল তীক্ষ্ণদৃষ্টিতে চাহিয়া সতস্রা বিপুল বাঙ্গালান প্রশ্ন করিলেন,—এই এষ্টেটের সঙ্গে আপনার সম্বন্ধ কি কি বিষয়ে আছে--জানতে পারি?

গোবিন্দনারায়ণ ধীরে ধীরে প্রতি কথাটি সুস্পষ্টভাবে উচ্চারণ করিয়া কহিলেন,—কি রকম সম্বন্ধের কথা আপনি জানতে চাইছেন?

কমিশনার সাহেব গাঢ়স্বরে কহিলেন,—আমি জানতে চাই, এই ষ্টেটের রাড মিনিস্ট্রেশান সম্বন্ধে আপনি কিভাবে আপনার পিতাকে সহায়তা করে থাকেন?

গোবিন্দনারায়ণ হাসিমুখে কহিল,—আমাকে নিয়েই এই ষ্টেট এবং আমার পিতা বরাবরই বিব্রত, সুতরাং আমার পক্ষে তাঁর সহায়তা করা কি সম্ভব?

কমিশনার—এ কথা আপনি বলছেন কেন? আপনাকে নিয়ে ওদের বিব্রত হবার কারণ?

গোবিন্দ— কারণ, আমার দুর্ভাগ্যক্রমে আমি সকল বিষয়েই অযোগ্য ছিলাম।

কমিশনার—এখনও আপনি নিজেকে সকল বিষয়েই অযোগ্য মনে করেন ?

গোবিন্দ—না। শিক্ষার অভাবে তখন ভাবতুম, সত্যই আমি অযোগ্য, কিন্তু এখন কিঞ্চিৎ শিক্ষা পেয়ে ভাবি, চেষ্টা করলে যোগ্যতা লাভ করা বিশেষ কঠিন নয়। হয় ত উপযুক্ত শিক্ষা পেলে, আমার বাবাকে এবং তাঁর ছেটেকে র্যাড্‌মিনিস্ট্রেশান সম্বন্ধে সাহায্য করাও ভবিষ্যতে আমার পক্ষে সম্ভব হবে।

কমিশনার—আপনার সম্বন্ধে আমরা যে সব রিপোর্ট পেয়েছি, অর্থাৎ আপনি ভদ্রসমাজে মিশতে পারতেন না, লেখাপড়া মোটেই জানতেন না, আপনার মাথাও পরিষ্কার ছিল না—এসব কি ঠিক শুনিছি ?

গোবিন্দ—ঠিক শুনেছেন ? আমার পূর্বের জীবন এখন আমার নিজের কাছেই দুঃস্বপ্নের মত মনে হয়। সবাই আমাকে ভাবত, ম্যাড, ফুল, যিডিয়াট—

কমিশনার—আর, আপনি কি ভাবতেন ?

গোবিন্দ—আমিও নিজেকে বেকাস, পাগলা বা গাধা ভেবে নিয়ে-
ছিলাম ! ম্যাড, ফুল আর যিডিয়াট কথার মানে ত তখন বুঝতুম না।

কমিশনার—এখন সমস্ত ইংরেজী কথার মানে বুঝতে পারেন ?

গোবিন্দ—সমস্ত কথারই যে মানে বুঝতে পারি তা নয়, তবে কতক কতক কথার পারি। এখনও আমার শিক্ষা শেষ হয় নি।

কমিশনার—শিক্ষা কতদিন আরম্ভ করেছেন ?

গোবিন্দ—বিবাহের পর, এখনো সাত মাস পূরো হয় নি।

কমিশনার—তার পূর্বে কি করতেন ?

গোবিন্দ—কিছু না,—না-মানুষ না-পশু এমনি অবস্থায় ঘরের কোণে

পড়ে থাকতুম! যারা আমাকে মানুষ করতে আসতেন, দিন দুই নাড়াচাড়া করেই সরে পড়তেন, বলতেন, আমার বুদ্ধিগুদ্ধি কিছু নেই, যিডিয়াট, জড়ভরত, কিছু হবে না।

কমিশনার—তা হ'লে কি আপনি বলতে চান, আপনার বিবাহের পর—এই কয়মাসের চেষ্টাতেই আপনি এতটা উন্নতি করতে সক্ষম হয়েছেন?

গোবিন্দ—হঁ।

কমিশনার—কি করে এটা সম্ভব হল, আমাকে বলবেন কি?

গোবিন্দ—আমার স্ত্রীর চেষ্টায়। আমাকে অপদার্থ দেখে তিনিই আমার শিক্ষার ভার নিয়েছিলেন।

কমিশনার—আপনি তা হ'লে স্বীকার করছেন, তাঁরই শিক্ষায় আপনার এই পরিবর্তন এবং উন্নতি?

গোবিন্দ—নিশ্চয়ই, আমি এ কথা গর্বের সঙ্গে স্বীকার করছি।

কমিশনার—আচ্ছা, আর একটি কথা আপনাকে জিজ্ঞাসা করব; আপনার স্ত্রী যেমন আপনার পড়াশুনায় সাহায্য করতেন, আপনি তাঁর অন্যান্য কার্যেও সেইভাবে নিশ্চয়ই সাহায্য করতেন ত?

গোবিন্দ—তাঁর ত আর কোনও কার্যই ছিল না, আমার শিক্ষার ব্যবস্থা ছাড়া! তিনি যে এই কাজেই তাঁর জীবন উৎসর্গ করেছেন, স্মার!

কমিশনার সাহেব সহর্ষে এইবার গোবিন্দনারায়ণের করমর্দন করিয়া কহিলেন,—আপনার সঙ্গে আলাপ করে আমি অত্যন্ত প্রীত হয়েছি, বাবু;—ধন্যবাদ!

ঠিক সেই সময় গৃহমধ্যে প্রবেশ করিল নিবারণ, তাহার পশ্চাতে ডাক্তার বিশ্বমিত্র; তাহাদের মুখ দুইখানি তখন ছায়ের মত বিবর্ণ হইয়া গিয়াছে।

দেওয়ান কহিলেন,—ইনিই বাগুলীর জমিদারের কনিষ্ঠ পুত্র বাবু নিবারণ গাঙ্গুলী।

কালেক্টর সাহেব তর্জনের সুরে কহিলেন,—হ্যালো ! এই তোমার ভাই গোবিন্দ, তোমার কথিত—ফুল, যিডিয়াট এবং ম্যাড ?

নিবারণের নেশা কাটিলেও জিহ্বার জড়তা তখনও কাটে নাই ; স্থলিতকণ্ঠে সে কহিল,—ইয়েস্, দিন ও রাত যেমন সত্য, তেমনই সত্য আমার ভাই ফুল, যিডিয়াট এবং ম্যাড—

কমিশনার সাহেব বিক্রপের ভঙ্গীতে কহিলেন,—But now we see the tables have been turned !

• কমিশনার সাহেবের বাঙ্গ হাশ্বের সহিত তীক্ষ্ণ রোষের সুর মিশাইয়া কালেক্টর সাহেব কহিলেন,—Now, save your situation Nibaran Babu !

ডাক্তার বিশ্বমিত্র এই সময় নিবারণকে চুপি চুপি আত্ম-সমর্থনকল্পে কমিশনার সাহেবের স্তুতির কতিপয় মন্ত্র বাতলাইয়া দিলেন ।

সেই অন্তর্দানে নিবারণ সাহেবের অভিমুখে অগ্রসর হইল, কিন্তু হৃৎপাকক্রমে দেহের টাল সামলাইতে পারিল না, পাড়িয়া ত গেলত, এবং সেই সঙ্গে এমন কদর্য নিদর্শনও প্রকাশ হইয়া পড়িল যে, পানাসক্তিসূত্রে তাহার মত্ততাব কথাও সাহেবদের অবিদিত রছিল না ।

ভৃত্যগণ কক্ষমধ্যে ছুটিয়া আসিয়া ছোট-ভাজুরকে তুলিয়া ধরিল ।

কমিশনার সাহেব তর্জনের সুরে সেই অবস্থায় তাহাকে কক্ষান্তরে লইয়া বাইতে আদেশ করিলেন ।

অতঃপর কণ্ঠস্বর কোমল করিয়া সাহেব দেওয়ানের দিকে চাহিয়া কহিলেন,—এক্ষণে আমার এইমাত্র অনুরোধ আপনার জমিদারের নিকট, কয়েক মিনিটের জন্ত তিনি আমাকে তাঁর সঙ্গে কিছু কথা বলবার অনুমতি প্রদান করেন ।

সাহেবের প্রস্তাব শুনিয়া দেওয়ান তৎক্ষণাৎ অন্তঃপুরে কর্তার নিকট সংবাদ পাঠাইলেন ।

অন্ধ রাজা ~~স্বভাব~~ কুরুক্ষেত্র যুদ্ধের বিবরণ গ্রহণে গ্রহণে শ্রবণ করিতে যেরূপ আগ্রহাশ্রিত ছিলেন, ততোধিক আগ্রহে শব্দাশায়ী হরিনারায়ণবাবু বাণুলীর সভা-গৃহের বার্তা পুঙ্খানুপুঙ্খরূপে সংগ্রহ করিতেছিলেন। বার্তার অভিনবত্ব ক্ষণে ক্ষণে তাঁহার রোগ-মলিন মুখের উপর একটা অননুভূত আনন্দের রশ্মি বিকীর্ণ করিতেছিল!

দরবারী পরিচ্ছদ চোগা-চাপকানের পরিবর্তে পুত্রের পিধানে বিগুঢ় গরদের ব্যবস্থা দেখিয়া বিস্ময়মুগ্ধ পিতাও বুঝিয়াছিলেন, কাহার উন্নত পরিকল্পনা পোষাক সম্বন্ধে চিরাচরিত রীতির পরিবর্তন করিয়া দিয়াছে। বিমুগ্ধ পিতার পদধলির সহিত আশীর্বাদ লইয়া গোবিন্দ উদ্বেলিত অঙ্গুরে কমিশনার-সন্দর্শনে গমন করিয়াছিল, পুনরায় যখন ফিরিল, মুখখান তাঁহার প্রফুল্ল এবং সঙ্গ কামিশনার সাত্বে স্বয়ং।

গোবিন্দই প্রথমে কহিল,—বাবা, সাত্বে এসেছেন; ইনিই আমাদের বিভাগের কমিশনার—

যে ভিতরে আসিয়াছে বস্ত্র পরিবর্তন করিয়া স্বপুত্রের শিষ্যের গিয়াছে আসিয়াছিল। সাহেবকে দেখিয়াই মাথায় অবগুণ্ঠন টানিয়া সমস্তমুখে উঠিয়া দাঁড়াইল।

কর্তা উজ্জল দৃষ্টিতে সাহেবের দিকে চাহিলেন মাত্র। সঙ্গ সঙ্গ সাহেব হাত তুলিয়া ভারতীয় প্রথায় নমস্কারের ভঙ্গীতে পরিষ্কার বাঙ্গলায় কহিলেন,—নমস্কার গাঙ্গুলী বাবু! আপনার এইপ্রকার অসুস্থ অবস্থা জেনেও কর্তব্যের অনুরোধে কয়েক মিনিটের জন্য আপনাকে বিবস্ত্র করতে এসেছি। আপনি নিশ্চয়ই শুনেছেন, আপনার পুত্রবধুর বিরুদ্ধে গুরুতর অভিযোগ সত্রেই আমরা তদন্তে এসেছিলাম। কিন্তু আপনাকে

আনন্দের সহিত জানাচ্ছি, আপনার পুত্রবধু তাঁর অসাধারণ শিক্ষা, সত্য-নিষ্ঠা ও মনের দৃঢ়তায় সমস্ত অভিযোগ খণ্ডন করেছেন। আমি মুক্তকণ্ঠে তাঁকে ধন্যবাদ জানাচ্ছি এবং এই অপ্রীতিকর ব্যাপারে তাঁর জায় আদর্শ উচ্চশিক্ষিতা মহিলাকে বিরক্ত করার জন্য দুঃখপ্রকাশ করছি।

কর্তা হাতখানি কণ্ঠে তুলিয়া কহিলেন,—ধন্যবাদ সাহেব! আপনার সৌজন্যে আমি যেমন মুগ্ধ হয়েছি, তেমনই আনন্দ পাচ্ছি ও আশ্চর্য্য হচ্ছি আপনার মুখে এমন পরিষ্কার বাঙ্গলা শুনে।

সাহেব হাসিয়া কহিলেন,—এতে আশ্চর্য্য হবার কিছু নেই বাবু! আমি জাষ্টিস উড্‌ফের শিষ্য, সংস্কৃত ও বাঙ্গলা শৈশব থেকেই আমার মাতৃভাষার মত চর্চা করে আসছি।

সাহেবকে বসিবার জন্য অনুরোধ করা হইল, কিন্তু তিনি বসিলেন না,—সকলকে ধন্যবাদ জানাইয়া এবং অবগুণ্ঠনবতী বধুর উদ্দেশে শ্রদ্ধাসহকারে নমস্কার করিয়া বিদায় লইলেন।

বধুর মাথায় শিথিল হাতখানি রাখিয়া কর্তা কহিলেন,—সব দিক দিয়েই তুমি জিতেছ মা, তুমি যে স্বয়ংসিদ্ধা, তাই এমন ক'বে সর্ব্বরক্ষা করতে পেরেছ, মা! বোবাকে বাণী দিয়েছ, পাথরকে জাগিয়ে তুলে বাঙালীর মুখ রক্ষা করেছ মা, তুমি!

বধু আত্মপ্রশংসার উচ্ছ্বাসে অভিভূতা না হইয়া কোমল কণ্ঠে কহিলেন—~~কোমল কণ্ঠে কহিলেন~~—আবেগে কহিল,—সবই তাঁর ইচ্ছায় হয়েছে, বাবু, আমার কোনো কৃতিত্বই ত নেই; আপনি ত জানেন বাবা—

• মুকং করোতি বাচালং পশুং লজ্যতে গিরিम् ।

যৎকৃপা তমহং বন্দে পরমানন্দমাধবम् ॥

